

# Alain Bouchart

III<sup>e</sup> FASCICULE

roy alloit en Allemaigne, il y faudroit mener grande puissance dont la force du royaulme seroit grandement diminuee. Or ne scauoient comment entrer en traicte dacord avecques le duc de Bretagne, car ia y auoient este leuesque de Langres messire Jehan de Vienne & messire Jehan de Bueil qui riens ny auoient fait.

**C** Le conte dEstampe fut de rechief enuoye en ambassade par deuers le duc de Bretagne pour le fait de Clisson.

**S**i aduisa le duc de Berry quil enuoieroit son cousin le conte dEstampes en Bretagne par deuers le duc, car on tenoit lors le conte dEstampes vaillant homme & faige pour traicter vne bonne paix. Si luy pria & luy dist: Beau cousin, il vous fault aller en Bretagne deuers nostre cousin le duc parler a luy. Si vous le trouuez dur ne haultain en ses parolles, ne vous en challe, ne vous eschauffez contre luy; traictez le doucement en parlant a luy faigement, & sil vous est possible, le ramenez a voye de rayson. Et luy dictes que le roy & mon beau frere de Bourgoigne & moy ne luy voulons que tout bien & tout amour, & que la ou il voudra demourer delez nous, il nous trouuera tousiours appareillez a son commandement. Et aussi de ces chasteaulx quil tient du conestable, remonstrez luy bien doucement que a bien petite achoison il les a faisiz & que il luy plaise a les rendre & que le roy luy en rendra & ordonnera daussi beaulx & daussi bons que ilz font en quelque lieu quil les vouldra choisir en son royaulme. Et faictes tant, beau cousin, que de ce vous nous rapportez bonnes nouvelles, & pour quelque seiour que vous facez, traictez le duc doucement, que le roy puisse recouurer a luy amour & paix. Et mettez bien en memoire ses responses & ses contenances. Le conte dEstampes respondit: Monseigneur, ie le feray voluntiers.

Tantost apres partit le conte dEstampes pour aller en Bretagne & passa par Angers, & la trouua la royne de Naples qui femme auoit este au duc dAniou, & ses deux filz Loys &

Charles. La dame receut son cousin le duc dEstampes lycement & doucement, & y estoit aussi Jehan de Bretagne, frere de ladicte dame qui trop a grace nauoit pas le duc de Bretagne. Si y fut le conte dEstampes festoye pour vng iour bien grandement, & le lendemain partit pour aller son voyage & tira es parties de Vennes en Bretagne, ou le duc se tenoit, & la il trouua le duc qui le receut licement, car le conte dEstampes estoit son cousin prochain. Et apres plusieurs priues & famillieres parolles quilz eurent entre eulx le conte dEstampes luy raconta bien & notablement la charge pour laquelle il estoit venu par deuers luy, dont le duc ne se effroioit pas fort. Et pour toute resolution dist au conte dEstampes: Nous scauons bien que tout ce que nous auez dit & recite est vray, si y penserons, & demourez icy encores & ie vous monstreray plusieurs passetemps, car vostre venue nous est bien chere & lauons a grant plaisir.

Quant le conte dEstampes eut la este quinze iours & quil eut priueement parle au duc de tout son affaire, il neut de luy aucun semblant de restituer largent ne les places du conestable; si print conge du duc & sen retourna par deuers le duc de Berry, qui se tenoit a Meun sur Yeure ou y a vng bel chasteau que icelluy de Berry auoit nouvellement fait edifier. Et luy recorda de point en point ce quil auoit trouue, dont le duc de Berry se passa assez legerement, & de la sen alla le conte dEstampe par deuers le roy de France & le duc de Bourgoigne, auxquelz il racompta tout leffaiict de son voyage. Si demoura la chose en lestat iusques a vne aultrefois.

**E**NUIRON celuy temps & le vii<sup>e</sup> iour dAuril mil trois cens quatre vingt & huit fut conclud, arreste & ordonne au conseil du roy dAngleterre & de ses oncles le duc dYorch & le duc de Cloestre, que le conte dArondel Richart seroit souuerain chef dune armee par mer ou il y auoit mil hommes darmes & troys mil archers. Si fut ceste armee preste au moys de May ensuyuant; a Wantonne chargerent ces gens sur mer & ne menoient nulz cheuaulx,

car ilz esperoient si les choses venoient a leurs ententes descendre en Bretagne, & la troueroient des cheuaulx assez. Quant ilz furent sur la mer ilz eurent vent a plaisir. Si tirerent vers la coste de Normandie vogant sans chercher terre nulle part, fors a frontoyer les costes de Normandie & de Bretagne, tant que aultres nouvelles leur venissent, & furent ainsi vne espace de temps.

**C** Dune aultre ambassade que le roy de France enuoya de rechief en Bretagne.

**L**ES ducs de Berry & de Bourgoigne qui veoyent que le roy estoit delibere daller en Allemaigne a la requeste de son cousin le duc de Iuliers contre le duc de Guerles qui auoit deffie le roy de France, considerant bien que ce voyage ne se pouoit bonnement faire iusques a ce que lon eust mis la fin au fait de Bretagne, car ilz estoient aduertis de ces Angloys qui se tenoient sur la mer, lesquelz ne faisoient finon attendre le partement du roy & de son armee pour aller en Allemaigne, affin de descendre en Bretagne & de la entrer en France. Si fut aduise que le sire de Coucy, messire Iehan de Vienne & le seigneur de la Riuiere yroient par deuers le duc de Bretagne, car le duc ay moit moult le sire de Coucy. Si furent despeschez, & leur charge leur fut bailliee par articles signez, tout ainsi que par lestroit conseil du roy auoit este delibere & conclud.

**C** Comment le duc de Bretagne assemble son conseil pour auoir aduis sur ce que les ambassadeurs du roy auoient propose.

**L**E duc de Bretagne sceut auant que les seigneurs se meissent a voye quilz deuoient venir par deuers luy, mais il ne scauoit pour quoy; toutefois il voit bien que la chose lui touchoit grandement puis que le sire de Coucy y venoit.

Or estoit le duc de Bretagne bien aduertiy que lon traictoit le mariaige du duc de Berry, & la fille du duc de Lancastre, qui pour lors

se tenoit a Bayonne, dont le duc de Lancastre ne luy auoit escript aucune chose, car de toutes leurs affaires il auoit acoustume de luy rescripre comme a son frere. Et ne sceust le duc que penser. Si assemble son conseil auquel estoient ceulx en tout le monde en qui plus il se fyoit, & leur remonstra toutes ces incidences & bien cherement leur pria que en leurs consciences ilz eussent a le conseiller en leur declairant que sur toutes choses il desiroit viure en paix avecques le roy de France & auoit tousiours eu la volunte telle sil eust peu y trouuer leur assiz; mais oncques il ny trouua que tout mal & toute deffiance, car le roy de France auoit tousiours tendu & encores tendoit a luy faire perdre son heritaige, & iceluy bailler a Iehan de Bretagne & encores en estoient les propos mis auant par le mariage dudit de Bretagne & de la fille de Clifton, & pour ce requeroit que on le conseillast de ce quil auoit a faire.

**C** La prudente responce du conseil de Bretagne.

**L**E conseil de Bretagne luy dist par la bouche de son chancelier: Mon souuerain seigneur, tout vostre affaire bien debatue, vostre conseil est daduis quil vous fauldra briser vostre propos comment que ce soit, ou perdre trop grossement, & mettre vostre terre en guerre, a quoy deuez bien resister; car puis que lon vous prie de paix vous y deuez curieusement entendre, & si est la duchesse nostre souueraine dame grosse qui ne seroit pas legiere a voyager sil vous estoit besoing de prendre la fuytte, comme autrefois auez fait. Vostre beau frere le roy de Nauarre ne vous peut que vng petit ayder, vous voiez vne grande apparence de traicte de paix entre France & Angleterre, par le mariaige qui se fait du duc de Berry & de la fille au duc de Lancastre. Nous auons entendu que le sire de Coucy, l'admiral de France & le seigneur de la Riuiere doibuent venir de par le roy par deuers vous, le roy se embesougne volontiers pour son conestable

& croyons que ces ambassadeurs viennent pour scauoir de vous la finale conclusion de vostre deliberation. Si vous tenez tousiours vostre premiere oppinion, nous ymaginons, car par les apparences aprent on les choses que ceste armee qui se appareille si grande pour aller en Guerles se retournera sur vous. Or pensez de qui vous ferez conforte si vous auez la guerre, ainsi que vous auez & ny faillirez se le duc de Lancastre marie sa fille en France; car il ne scauoit mieulx meestre pour recouurer son heritaige, & y a bien plus, car si vous tendez au party de la guerre, la plus grande partie des prelatz, barons, citez & bonnes villes de vostre pays seront contre vous. Nous vous disons, puis que conseil demandez, quil est heure plus quil ne fut iamais que vous vous aduisez & mettez paine a garder vostre heritaige qui tant vous a couste de sang, & brisez sil vous plaist la poincte & laigreur de vostre hayne. Nous scauons que a bien bon droit vous auez en grant hayne messire Oliuier de Clifson, & quil vous a fait moult de maulx & de dommages & na pas tenu a luy si pis ne vous a fait. Monseigneur, faictes tant sil vous plaist que vous soiez maistre & seigneur de vostre couraige, & considerez puis que le roy de France la si fort a cueur il fera secouru contre vous, & si le roy dernier mort fut en vie, ce que vous auez fait fut adueni, nous scauons de verite quil eust auant couste au roy la moytie de son royaume que liniure ne fust amende, mais le roy de present est ieune, si ne prise pas les choses comme il fera encores sil vit dix ans. Il vient & vous en allez. Monseigneur, pour Dieu mercy, que auez vous affaire de tenir a present les places de messire Oliuier de Clifson ne son heritaige & les auoir prins sur la forme que vous les tenez, soit que vous demourez en paix ou en guerre, ilz vous cousteront plus a faire garder en trois ans quilz ne vous vaudront en douze. Nous sommes daduis que vous les rendez & que des maintenant vous en retyrez voz gens, & quant la renommee courra que sans contraincte & de vostre liberalite vous en ferez departy, vous adoulcirez & tempererez la felonie de plusieurs

& ferez grandement au plaisir de monseigneur de Bourgoigne, car il fera tout ioieux de trouuer en vous telle douceur; quil ayt matiere de vous porter & soustenir & ce luy vient de par vostre bonne cousine & amye madame de Bourgoigne sa femme, de laquelle il a eu de beaulx enfans, & ce sont ceulx auourd'hui qui le plus pres vous appartiennent. En Angleterre naurez iamais a faire car ilz ne vous monstrent iamais signe damour sinon en tant quilz auront a faire de vous, vous le scauez par experience.

**C** Comment le duc de Bretaigne consentit aller iusques a Bloys, & de la tyranniser iusques a Paris par deuers le roy.

**Q**UANT le duc ouyt parler son chancelier, quil luy eust remonstre ce que par son conseil auoit este ordonne, il fut tout esbahy & se teust pour vng temps & puis se retourna & dist: Je croy & voy du tout clerement que a vostre pouoir me conseillez haultement & autre chose ne mest besoing que bon conseil; mais comment est il possible que ie puisse aymer Oliuier de Clifson qui tant ma fait de dommage & plus encores ma cuyde & chascun iour cuyde & sefforce de faire, moult ay este depuis courouce que ie ne le feiz mourir quant ie le tins au chastel de lErmyne. En nom de Dieu soit, dirent ceulx de son conseil, sil fust mort vous ne leussiez pas renconne, & si le cas fut adueni la playe en eust seigne iusques sur vous, mieulx vault que les choses soient comme elles sont. Et pour conclusion, il nous semble que mieulx ne scauriez faire que remestre ses places arriere en ses mains de franche liberalite; vous auez veu de vostre temps vostre cher cousin le conte de Flandres comment sur la fin de ses iours il eust affaire par telles indigences dont le roy & tout le royaume fut embesongne pour empescher que par ses subgectz il nayt este mis hors de son heritaige.

Or, dit le duc, puis que ie demande conseil il fault pour le mieulx que ie le croye & ayme. A ceste parolle se arresta le duc & fist

## Le quatriesme

en diligence retyrer ses gens hors des places du conneſtable & luy en laiffa la poſſeſſion, dont bien toſt vindrent les nouuelles au ſeigneur de Coucy & aulx autres qui ia eſtoient en voye pour aller deuers le duc, dont ilz furent ioieulx, car de tant moins auront ils a faire. Si tyrerent & cheuaucherent tant quilz vindrent par deuers le duc qui eſtoit a Vennes, lequel leur fiſt grant chere & tres bien les recueillit, & menerent leſdictz ambassadeurs le duc par ſi belles parolles quil conſentit venir par deuers les ducs de Berry & de Bourgoigne, iuſques en la ville de Bloys, puis ſen retournerent en court dire ces nouuelles.

Les deux ducs de Berry & de Bourgoigne ſe rendirent a Bloys, auſſi fiſt ledit duc de Bretagne, leſquelz ſentrefirent bonne chere. Et apres quilz eurent longuement parle & communicque enſemble des matieres propoſees, & que les ducs de Berry & de Bourgoigne virent que le duc de Bretagne auoit bon & grant deſir de ſe tenir de leur part par les bonnes parolles quilz luy porterent, fut entre eulx accorde que le duc de Bretagne ſen yroit a Paris par deuers le roy de France, faire ſon hommaige que encores il nauoit fait & feſtoit touſiours excuſe, diſant que le roy nauoit pas aage ſouffifant pour recepuoir les hommaiges; touteſſoys deuant que il conſentit y venir, leſdictz ducs de Berry & de Bourgoigne luy promiſſerent que en tout le voyage il ne verroit meſſire Oliuier de Clifſon ne ſon beau filz Iehan de Bretagne, laquelle promeſſe luy fut tenue, car il ne les vit oncques.

Le duc de Bretagne diſpoſa tellement ſes affaires que la vigille de la Natiuite monteigneur ſainct Iehan Baptiſte, il entra a Paris par la porte d'Enfer que on dit a preſent la porte Sainct Michel, ou eſt la rue de la Harpe, & deſcendit en ſon hoſtel de Bretagne qui eſt en ladicte rue de la Harpe, & eſtoit auſſi bien acompaigne des ſeigneurs de ſon pays que xx ans auoit lon auoit veu entrer prince dedens Paris autre que le roy, & auoit auſſi pluſieurs princes, barons, cheualiers & eſcuiers de leſtel du roy, qui eſtoient allez hors Paris au deuant de luy par le commandement du roy.

**A**PRES que le duc de Bretagne ſe fut rafraichy vne heure ou ii a ſon logis, il remonta a cheual tres bien accompaigne, & ſen alla au Loure ou le roy eſtoit, lequel le recueillit tres gracieuſement, & eſtoit le roy preſt de diſner, les tables dreſſees, le duc luy diſt : Monſeigneur, ie vous ſuis venu veoir qui eſtoit la choſe au monde que plus ie deſiroie ; Dieu par ſa grace vous tienge en ſante. Beau couſin, diſt le roy, ie vous mercye, vous ſoiez le mieux que tres bien venu. Adonc les maîtres doſtel firent ſigne d'apporter leau a lauer. Si l'aua le roy & miſt le duc la main a la touaille & au baſſin, & quant le roy fut affiz il print congie du roy & ſen reconuoyerent pluſieurs princes & ſeigneurs iuſques a ſon logis.

**C** Comment le duc fiſt au roy hommaige acouſtume a faire par ſes predeceſſeurs & puis ſen retourna en Bretagne.

**D**EPUIS le duc de Bretagne parla tout a laiſir au roy de France & luy fiſt ſon hommaige de ce que faire luy deuoit, & tant bien accorderent leurs differens, que touz furent contens les vngs des autres, & puis le duc print congie & ſen retourna en Bretagne, & deuant ſon partement luy donna pluſieurs beaulx ioiaulx.

Le conte d'Arondel & toute ſon armee de mer ou y auoit ſix vingts nauires, fut aduertie comme le duc de Bretagne auoit eſte a Paris, dont il fut tres fort courouce. Si tyra la route droit a la Rochelle, & prindrent les Angloys terre au haure de Marant, & y eut la forte guerre.

Dautre part, le roy de France aſſembla lors ſon armee & partit de Montereau ou Fault Yonne a tout cent mil combatans, & ſen alla es Allemaignes droit a Iulliers & a Guerles ; mais depuis ſe trouua traicte d'accord entre eulx, ſi ſe retourna le roy de France en ſon royaume ſans bataille.

Bien toſt apres, le duc Iehan de Bretagne qui veuf eſtoit, ſe voulut remarier, enuoya le ſeigneur de Chateaugiron en Nauarre querir madame Iehanne de Nauarre fille de Charles

roy de Nauarre & de la fille du roy Iehan de France, laquelle dame luy fut de bon cuëur octroyee & luy fut amenee a Nantes, & le duc lespoufa la vigille de Noel lan mil troys cens quatre vingts huyt & lan ensuyuant la vigille de Nouel quatre vingts & neuf, elle enfanta vng filz qui fut nomme Iehan, dont le duc fut moult ioieux, car de ces deux premieres femmes il nauoit eu aucuns enfans, & depuis eut celle dame plusieurs autres filz & filles, dont en lhystoire cy apres feray mencion.

**E**NUIRON celuy temps, qui fut lan mil troys cens quatre vingts dix, estoit trop grandement ayme du roy de France & de son frere le duc de Touraine, vng cheualier du pays dAniou nomme messire Pierre de Craon, qui estoit de moult noble extraction, puissant & riche : ce quil ordonnoit chez le roy estoit fait & plus encores chez le duc de Touraine son frere, & laymoit le roy pour la grande familiarite quil auoit au duc de Touraine, car le duc de Touraine auoit pour lors telle grace au dit messire Pierre de Craon quil le tenoit pour son compaignon, & si le vestoit & abilloit de pareilz draps que luy, & si aimoit messire Pierre de Craon le duc de Bretaigne dune bonne & cordiale amour & le duc luy, car de leurs enfances auoient congnoissance ensemble & estoient parens. Or en la court du roy de France ou celuy de Craon auoit comme iay dit grande auctorite, estoit aussi messire Olinier de Clifson conestable de France, qui auoit grande prochainete au roy & au duc de Touraine, mais messire Pierre de Craon & luy ne sentreaymoient gueres pour ce que le duc de Bretaigne hayoit Clifson, aussi faisoit le duc de Bourgoigne en faueur du duc de Bretaigne, & la hayne venoit de par la duchesse de Bourgoigne, laquelle estoit dame de hault couraige & ne pouoit aymer le conestable de France, car le duc de Bretaigne & elle estoient cousins germains, & tout ce que son pere le conte de Flandres auoit ayme elle aymoient, & ce quil auoit hay elle hayoit.

Si aduint que messire Pierre de Craon fut soubdainement esloigee de la grace du roy

de France & du duc de Touraine, & fut pour ce quil rapporta a la duchesse de Touraine qui fut fille & heritiere de Philippe Marie duc de Millan, que le duc son mary aymoient tres ardamment vne ieune dame de Paris belle & frisque, a laquelle il auoit promis mil liures si elle eust voulu se condescendre a sa volunte. ce quelle refusa, dont bien luy print, & festoit le duc de Touraine descouuert de ce secret a messire Pierre de Craon & non a aultre, & comment le duc alloit veoir la dame il ny mennoit personne que ledit de Craon. La duchesse manda tantost la ieune dame & luy dist tout le demaine, en laduertissant que sur sa vie elle neust plus de parlement au duc son mary, & que luy donnast congie. La ieune dame qui se veoit accusee de verite & en danger dist : Madame, ie men deliureray le plus tost que ie pourray & feray tant que iamais nen orrez parollez qui vous desplaissent.

Quant le duc de Touraine retourna deuers la ieune dame, il la trouua toute remplie de reffuz, & luy recita ce que la duchesse sa femme luy auoit dit & luy pria que ny retournast plus. Le duc fist tant que la duchesse sa femme luy dist quelle en auoit este aduertie par messire Pierre de Craon; le duc nen fist lors semblant & sen alla par deuers le roy son frere, & luy conta toute ceste besongne en soy complaignant de messire Pierre de Craon. Le roy luy promist que iamais ne sen seruiroit, & a celle cause la court du roy luy fut deffendue & luy fut dit que sil se y trouoit ne aussi en la court du duc de Touraine on luy feroit desplaisir.

Quant messire de Craon vit que on l'auoit ainsi accoustre & ne scauoit dont ce venoit ne la cause pourquoy on le hannissoit de court, il se retyra en sa ville de Sable en Aniou, ou il se tint vne espace de temps, puis apres se retyra par deners le duc de Bretaigne quil trouua a Vennes, lequel luy fist bonne chere. Si luy conta mot a mot comment on l'auoit banai en court.

Et quant le duc de Bretaigne leust ouy bien denifer, il luy respondit & dist : Beau cousin, confortez vous, car tout ce vous a brasse le seigneur de Clifson.

## Le quatriesme

Ceste racine & fondation de hayne multiplia depuis grandement comme vous orrez cy apres. Si demoura messire Pierre de Craon par si long temps pres le duc de Bretagne que on loublya en France & si ne scauait on nul gre au duc de Bretagne de ce quil le retenoit en sa court.

**C** Comment le duc de Bretagne retourna par deuers le roy a Tours.

**D**EU de temps apres fut aduise par les hayneulx du duc de Bretagne & de messire Pierre de Craon estans au conseil du roy que le duc, qui ia auoit fait homaige au roy, auoit depuis este rebelle au roy & a ses entreprinſes. Si fut conclud que le roy yroit a Tours, & la feroit mande le duc venir par deuers luy. Si y allerent ambassadeurs de par le roy, le conte d'Estampes & maistre Ynes de Noyent, breton, qui estoit de lestroit conseil du roy, lesquels trouuerent le duc a Vennes. Et luy remonſtrerent tant de belles parolles quil se accorda & dist quil viendroit a Tours, puisque le plaisir du roy estoit tel.

Or, vindrent a Tours le roy de France, le duc de Touraine son frere, le duc de Berry, le duc de Bourgoigne & Jehan de Bourgoigne son filz; le duc de Bourbon, oncle du roy, frere de sa mere; le sire de Coucy, le conte de la Marche, le conte de Sainct Pol, & les conseilz du roy. Aussi y vindrent le conneſtable & son beau filz Jehan de Bretagne. Bien tost apres y arriua le duc de Bretagne moult honorablement accompaigne.

Ce pendant que ces princes furent la assemblez, arrinerent par deuers le roy deux des chambellans ambassadeurs du roy d'Angleterre pour scauoir si le roy de France estoit en uolunte de comparoir a Amyens avecques les princes & seigneurs de son conseil pour traicter de la paix dentre les deux roiz. A quoy le roy respondit quil se y trouuerroit & partyroit incontinent quil auroit fait vne fin touchant les affaires de Bretagne; si sen retournerent les ambassadeurs d'Angleterre bien contens de ceste

responce. Et puis apres leur partement furent mis en termes les differens dentre le roy de France & le duc de Bretagne.

**C** Comment le conseil du roy blasma le duc en la presence du roy, daucunes entreprinſes par luy faictes contre le roy.



ON remonſtra de par le roy & en la presence au duc de Bretagne comment en plusieurs choses il estoit rebelle & desobeysſant au roy neantmoins quil luy eust fait serment de fidelite; il respondoit au contraire, disant quil a este tousiours delibere & encores estoit de seruir le roy de France de son homaige si auant quil y estoit tenu. Et on luy proposoit: Pourquoi doncques puisque vous confessez que vous estes homme du roy, nobeyſſez vous a toute raison? Et il demandoit en quoy il estoit rebelle, & on luy remonstroit plusieurs poincts.

Premierement, en la creance du pape Clement qui se tenoit en Auignon, que le roy tient a vray pape, car a ses commandemens vous ne voulez obeyr, mais vous pouruoiez aux benefices de Bretagne daucuns clerics apportans bulles dudiect pape; & autres qui ont semblables bulles de luy vous les ignorez & ne voulez souffrir leur prouision; cest grandement contre la maieste royalle, & peschez en conscience & en esprit.

Dautre part, des mandemens & exploiz qui viennent de la court de parlement de Paris pour estre mis a execution en vostre duche, vous empeschez quilz ny soient exploictez & ne voulez souffrir que les conseilz & huissiers dicelle court les y exploicent, & empeschez aussi la iurisdiction des euesques de vostre pays, dont plusieurs plainctes sont venues en parlement a Paris; mais quelques prouisions quilz ayent diceluy parlement, vous empeschez que on ne les mette a execution en vostre duche, par quoy il appert clerement que en plusieurs passaiges, vous desobeysſez au roy & a sa court de parlement qui est aller directement contre le serment de fidelite que vous auez fait au roy.

## La Vertueuse responce du duc.

**A** quoy respondit le duc par sa bouche & en la presence du roy, adressant sa parolle a celluy qui auoit propose pour la part du roy : Vous me mettez sur le differend de ces papes & dictes que ie fais contre conscience, ie vous respons que de ma conscience ne doit nul parler ne iuger fors Dieu qui est le souuerain iuge; aussi ie nay veu que l'Eglise ait fait aucune declaracion du differend des papes, & au iour que les nouvelles vindrent de la creacion de Urban, iestoie en la ville de Gand delez mon cousin le conte de Flandres; & luy enuoia lettres patentes Robert du Quesne, cardinal de l'Eglise rommaine, par lesquelles estoit certifie & signifie au conte mon cousin que par la grace de Dieu & inspiration diuine, ilz auoient esleu vng pape quilz nommerent Vrban. Comment se peut le pape deffaire? ie croy quil est bien difficile, & quant a moy, ie le tiens impossible, se il ne meure ou quil deuienne hereticque.

En tant que touche les benefices de mon pays, ie ne suis pas si hault ne si fier aux impetrans que vous dictes, car ie seuffre bien les clers de ma duche a estre pourueuz de la bulle du pape, soit Vrban ou Clement, ce mest tout vng; mais ceulx qui ne sont point de la nacion, ie les refuse, & la cause pourquoy ie le vous diray: les estrangiers veulent impetrer la substance & la greffe hors de mon pays sans deseruir les benefices qui seroit pour apourir mon pays que iay conquis a la pointe de lespee, & ne scauroit le roy nyer que ie ny eusse le vray droit, saulue sa reuerence, puis quil en a de moy receu la submission, & par ce ne se doit on esmerneiller si ien deffens les droictures & droiz de souuerainete qui ny sont pas dhuy ne de hier, mais sont parauant que iamais y eut roy en France, car en ce faisant, ie fais ce que doy & suis tenu de faire par serment & par raison; & si mes subiectz m'appellent leur souuerain seigneur faire le doiuent, car iay sur eulx & en mon pays plusieurs dont ie ne recongnois roy ne prince fors Dieu le tout puissant.

Aux commissaires & huiffiers de parlement de Paris qui viennent en Bretagne pour exploicter, vous mettez icy en termes deuant le roy que ie leur suis rebelle & hault, mais saulue sa reuerence non suis ne ne vouldroye estre; vous deuez scauoir, & la verite est telle, que la duche de Bretagne est de si noble condition que, comme souuerain seigneur nul peut faire exploicter autre que le seigneur naturel & souuerain: cest a entendre le duc de Bretagne tient sa court de parlement & a sa iustice ouuerte selon ses seneschaucies & bailliages, & a de tout temps ses officiers pour exploicter & faire toutes execucions & exploiz raisonnables en droit en la terre de Bretagne tout ce qui y doit estre par iustice exploicte & execute de quelque point quil viengne; & si iauoye en ma terre sergeans ou officiers qui fussent rebelles aux subiectz de France ne autres estrangiers en maniere quilz eussent cause de se plaindre deulx, ie les feroye punir tellement que ce seroit a tous exemples, mais ne vouldroye souffrir aultre y exploicter ne faire exploicter que moy.

Au regard des euesques dont vous me parlez, il me semble soubz correction que le roy ne sa court de parlement ny ont que voir; iay a cela la souuerainete, & que que soit touchant leur temporel, & nay voulu ne veulx empescher leur iurisdiction ordinaire spirituelle ne temporelle. Et si quelquun de mes officiers ordinaires leur faict tort, iay ma court de parlement ouuerte, vne fois lan ou ilz peuuent auoir leurs recours par appel & y attendre droict & arrest sans aucun ressort; & comme par arrest & court souueraine quant a ce passaige. Et vous, messeigneurs du conseil du roy, le scauez bien, aussi bien & mieulx que moy, & par ce il appert clerement que a bien grant tort vous me venez icy charger deuant le roy, disant que ie luy suis desobeyssant. Ie ne veulx pas parler contre sa maieste, car ie suis son cousin & son homme, & le seruiray & tout son royaume bien & loyalement quant ien seray requis autant que ie y suis tenu, mais ie veulx bien parler contre ceulx qui ne le conseillent pas a point.

**A**DONC luy fut demande : Dictes nous lesquels se font qui mal le conseillent & y pouruoirons. Le duc de Bretagne leur respondit : Vous les congnoissez mieulx que moy, car vous les frequentez plus souuent & estes, messieurs du conseil du roy, fort a reprendre qui voulez & desirez que guerre se nourrisse entre le roy & moy. La cause pour quoy elle est toute clere : vous souffrez a mon cousin Iehan de Bretagne des choses contre moy defraisonnables, cest de ce quil porte les armes de Bretagne toutes plaines, qui n'appartiennent a autre que a moy. Et ay sceu que vous luy donnez a entendre quil peut venir a lheritaige de Bretagne dont il est hors de lesperance, car iay filz & filles qui y succederont apres mon trespas. Et scauez bien, messeigneurs, que pour moy contrarier, messire Oliuier de Clifson, qui est mon subiect, le tient a celle opinion, et tant que les choses soient en cest estat & que le roy le y vueille soustenir, comme il a fait cy deuant, ie nentendray a quelque traicte de paix, guerre ie ne feray ne pourchasseray au roy ne au royaume; mais si a la faueur de Clifson on me fait la guerre, ie me deffendray, & si me trouuera lon en ma terre.

**A**INSI se demenoient les traictez entre le roy & le duc de Bretagne, lequel vertueusement deffendoit ses droiz & parloit moult hardiement aux gens de lestroit conseil du roy, car le roy estoit moult ieune, auquel conseil estoient : le Begue de Vilaines, messire Iehan de la Riuiere; messire Iehan Le Mercier & messire Guillaume de Montagu, ceulx la faisoient des affaires de France a leur plaisir. Le duc de Bourgoigne auoit embouche le duc de Bretagne de parler ainsi vertueusement & de ne laisser riens a dire qui fut a propos pour son affaire soustenir & volentiers escoutoit, & vouloit que les raisons & deffenses du duc de Bretagne fussent iectees en place, & aussi les soustenoit le duc de Berry, car il hayoit fort les dessusdictz de lestroit conseil du roy, pour ce que peu de iours deuant ilz auoient fait estrangler & brusler par iustice son tresorier Bersach en la ville de Besiers, mais souffrir le

luy conuenoit. Et ces deux princes croissoient le couraige au duc de Bretagne a parler ainsi audacieusement. Et furent en cest estat a Tours plus de troys moys sans y pouoir trouuer accord : tellement que le roy fut en volente de retourner a Paris & laisser ainsi passer liuer, & vers le printemps assembler grant ost de gens darmes pour aller en Bretagne faire la guerre au duc & a ceulx de son acord le tout par laduis de son dit conseil estroit.

**L**ES ducs de Berry, de Bourgoigne & Bourbon, oncles du roy, le sire de Coucy, le chancelier de France, le conte de Sainct Pol & messire Guy de la Trimouille renoient vng autre conseil pour le bien du royaume. Et veioient que si la compagnie se departoit en la rigueur ou les autres auoient mis les matieres qui tant aigrement auoient picque le duc de Bretagne que autant luy estoit la guerre que la paix, & que laccord ne sy trouuast les Angloys en leurs traictes quilz esperoient poursuivre a Amiens ou le roy se deuoit trouuer en feroient plus fors, car ilz se attendoient a estre confortez & aydez du duc & de son pays. Si remonstrerent ces choses au roy a part & luy dist le duc de Berry : Monsieur, il fault adoucier ces differens quoy quil vous couste, car si nous auons la guerre aux Angloys & aux Bretons comme autressois auons eue, ce nous seroit trop grant paine.

**C** Du mariage du filz du duc & de la fille du roy de France.

**T**ANT regarderent ces seigneurs & si subtillement en leurs conseilz que lon trouua vng moien sans lequel lon ne fut iamais venu a conclusion daccord, ce fut que le roy auoit une fille ainsnee nommee Ysabel, & le duc auoit vng filz nomme Iehan. Si fut acorde lors le mariage de ce ieune prince a celle ieune dame, & par ce moien fut conioincte entre le roy & le duc vng amour si parfaite que toutes diuisions cesserent pour celle fois; mais le duc ne voulut voir messire Oliuier de Clifson, tant lauoit en grande hayne,

& au regard de Iehan de Bretagne il fut reconfilie & mis en lamour du duc: & luy fist le duc bonne chere le tout en faueur de ce mariage.

Ce mariage fut promis & accorde par les seigneurs dune part & dautre qui le iurerent & se obligerent pour icelluy parfaire & sollenniser alors que les enfans auroient encores vng peu plus deage. Et de ce furent lettres fermees & tabellionnees. Fut aussi lors faict le mariage de la fille du duc de Bretagne & de Charles de Bloys, filz ainse du conte de Pentheure, filz de luy & de Marguerite sa femme. Puis apres se departit le roy de Tours & se retira vers Paris, car le terme sapprochoit quil deuoit aller a Amyens, le roy de France en personne, son frere, ses oncles & autres princes & gens de leur conseil pour traicter la paix avecques les Angloys. Si print le duc de Bretagne conge du roy, de son frere & de ses oncles, & se retira en son pays de Bretagne. Et aduindrent les choses dessusdictes lan de grace mil iiii cens iiii vings & xi.

Enuiron celluy temps, viuoit le conte Guy de Bloys & dame Marie de Namur sa femme, qui tenoient plusieurs grans heritaiges comme la conte de Bloys, les terres de Henault, Chimay, la conte de Soissons & plusieurs autres seigneuries en Holande & Zelande. Lesdictz conte & contesse de Bloys eurent vng filz nomme Loys que on appelloit le conte de Dunoy, moult frisque & coinct, qui en leage de xiiii ans espousa Marie de Berry, fille au duc Iehan de Berry, & auoit este douee de vi mil liures parisiz de rente de douaire fur la conte de Bloys. Le premier an du mariage dudit Loys, il partit enuiron la sainct Iehan des Montiz soubz Bloys & sen alla a Beaumont en Henault veoir sa mere & sa femme qui y estoit, et tellement seschauffa quil luy print vne maladie dont il mourut. Or nauoit le conte de Bloys enfant que luy & nestoient plus luy & sa femme disposez den faire, car par force de repoz & de bien boire & menger delicates viandes en habondance, ilz estoient si tres gras & lung & lautre que cheual du monde ne les pouoit porter. Vous deuez scauoir quilz furent moult troublez de la mort de leur filz, car le pere

imaignoit que le duc de Berry, qui estoit oultre mesure conuoiteulx & si tres auaricieulx quil ne adoroit autre dieu que sa pecune, le bouteroit hors de la conte de Bloys pour fournir le douaire de sa fille veufue du conte de Dunoy son filz. Aussi pour son excessiue auarice, Dieu punist le duc de Berry, car en vne mesme annee, ses deux filles furent veufues: Bonne, qui auoit eu espouse le ieune conte de Sauoye, & Marie le ieune conte de Bloys, & nauoit autres enfans que lesdictes deux filles.

### Comment le conte Guy de Bloys vendit sa conte de Bloys au duc dOrleans.

**Q**R aduint que ce pendant que le roy & les seigneurs furent a Tours, le duc de Touraine qui se sentoit pourueu dung milion de fleurins, ou autre grant nombre quil auoit eu en mariage avecques Valentine de Millan fille du duc Philippe Marie de Millan, fut conseille demployer partie de ses deniers en lacquisition de la conte de Bloys, & pria le roy son frere de luy estre aidant a celle entreprinse. Si fut la chose si bien conduicte que par le moyen dung varlet de chambre que ledit conte auoit, qui estoit son secretaire & chef de son conseil, que on appelloit Sohier, natif de Malines, filz dung tisserant, le conte Guy de Bloys & dame Marie de Namur sa femme consentirent a vendre au duc de Touraine frere du roy la dicte conte de Bloys pour la somme de deux cens mil francs. Et par ce moien fut Iehan de Bretagne priue de la conte de Bloys, laquelle luy fut aduenue par droit de succession, car le conte Guy de Bloys & Iehan de Bretagne estoient cousins germains, enfans de deux freres. Et par le traicte de ceste vendicion fut le conte Guy de Bloys lye si auant comme faire lon peut; car il nauoit nully de son estroit conseil que Sohier qui oncques ne fut a lescolle pour apprendre loys, & auoit este gaigne moiennant certaine somme de finance. Et ainsi veez la comment la conte de Bloys est aduenue a la maison dOrleans, car depuis le duc de Touraine fut duc dOrleans comme verrez cy apres.

**L**AN mil iiii cens iiii vings xi enuiron la my  
 carefme, fut l'assemblee a Amiens, a la-  
 quelle se trouuerent le roy de France, ses  
 oncles les ducs de Berry & de Bourgoigne, &  
 plusieurs autres du sang du roy & de son con-  
 seil. Et pour la partie des Anglois se trouue-  
 rent les trois oncles du roy Richard, le duc de  
 Lancastre, le duc d'Iorch & le duc de Clo-  
 cestre, & plusieurs autres seigneurs & gens de  
 conseil, lesquelz furent la par le temps de  
 xv iours, mais finalement ne peurent venir a  
 conclusion de paix, car les Francois deman-  
 doient que Calais fut renuerse par terre telle-  
 ment que on ny habitast iamais, & les An-  
 glois demandoient que le traicte de paix fait a  
 Bretigny pres Chartres fut acomply, & quil  
 sortist son effect, & quant est de Calais iamais  
 ne leussent rendu, car cest la ville au monde  
 que la communaute d'Angleterre ayme mieulx,  
 car tant quilz seront seigneurs de Calais, ilz  
 dient quilz portent les clez du royaume de  
 France a leur saincture. Toutefois furent ou-  
 uertes aucunes matieres pour le bien de paix  
 que les princes d'Angleterre nauoient pas puis-  
 sance d'accorder, dont furent faiz articles, & a  
 tout ces articles sen retournerent les seigneurs  
 d'Angleterre de la ville d'Amiens ou ilz furent  
 honorablement festoiez & furent deffroiez de-  
 puis leur partement de Calais iusques a ce que  
 ilz y furent retournez.

Après que l'assemblee eut este a Amyens, le  
 roy de France cheut malade d'une fieure  
 chaulde moult frenaticque, si mua laer & fut  
 porte en vne leictiere a Beauuais, & la se tint  
 tant quil fut guery, puis vint a Paris ou il  
 resida depuis quelque temps.

**C** Comment messire Pierre de Craon  
 outragea de nuit a Paris le conestable  
 de Clifson.

**V**ous auez bien ouy cy deuant racon-  
 ter comment messire Pierre de  
 Craon fut eslongne de la grace du  
 roy de France & du duc de Tou-  
 raine son frere, & comment il estoit venu en  
 Bretagne delez le duc, & supposoit que le

conestable de Clifson luy auoit ce brunaige  
 brasse; si aduisa comment que ce fut quil met-  
 troit a mort le conestable, & ceste delibera-  
 tion il ne reuela a personne. Or est il que  
 messire Pierre de Craon auoit en la ville de  
 Paris au cymetiere de Sainct Iehan vng tres  
 bel hostel auquel il auoit vng concierge qui le  
 gardoit; messire Pierre de Craon qui se tenoit  
 en sa ville de Sable en Aniou, auoit des le ca-  
 refme prenant mande a son concierge quil luy  
 pourueust sa maison darmures comme haubre-  
 geons, coiffes dacier, ganteletz & telles choses  
 pour armer quarante compaignons, ce que le  
 concierge fist. Et des la sepmaine de la Pen-  
 thecoute il enuoya a Paris bien quarante de  
 ses gens, & leur commanda y entrer lung  
 apres lautre, & par diuers iours & secretement  
 eulx tenir en sa maison sans en faire bruit. Si  
 ne leur auoit pas dit ne reuele son entre-  
 prinse, car si ilz eussent sceue ilz ny eussent ia  
 entre.

Or aduint que le iour du sainct Sacrement,  
 le roy de France en son hostel de Sainct Pol a  
 Paris auoit tenu court ouuerte a tous les  
 princes & seigneurs de France qui estoient de-  
 dens Paris, & y furent la festes iusques apres  
 la minuyt que chacun tendoit a se retirer a  
 son logis. Messire Oliuier de Clifson se departit  
 tout le dernier, & passa par la chambre du duc  
 de Touraine et luy dist: Monsieur, demourrez  
 vous icy ou si vous retournerez chez Poulain.  
 Ce Poulain estoit tresorier du duc de Touraine,  
 & demouroit pres la croix du Tiroier pres le  
 Lyon d'argent. Le duc luy respondit & dit:  
 Conestable, ie ne scay encores lequel ie feray,  
 allez vous en, il est mesuy heure de se retirer.  
 Donc print le conestable congie, & sortit de  
 l'hostel de Sainct Pol en la rue, & la trouua  
 ses gens a tout vng cheual pour luy & deux  
 torches, si se misdrent a chemin pour venir  
 par la rue de Saincte Katherine.

Messire Pierre de Craon, qui des le matin  
 estoit entre secretement dedens Paris, a tout  
 vng page, festoit tenu tout le iour en sa mai-  
 son, & auoit fait espier le conestable des ce  
 quil fut au logis du roy. Si estoit ledit de  
 Craon parti & yssu hors de son hostel des le

foir & ses gens tous armez a la couuerte & tous montez a cheual, & ny en auoit pas vng deulx qui sceust quelle chose ledit messire Pierre de Craon auoit entrepris de faire; il estoit sur le paue en la rue Saincte Katherine, & la se tenoient luy & ses gens tous coys attendant le conestable. Si tost que le conestable fut yssu hors de la rue de Sainct Pol & quil fut en la rue Saincte Katherine & estoit a cheual & ses torches deuant luy, voicy venir messire Pierre de Craon & sa rote qui se auancerent entre les gens du conestable qui le suyuoient, si frapperent sur les torches & les estaignirent. Si cuidoit le conestable que se fut le duc de Touraine qui se esbatoit a luy & dist : Monsieur, par ma foy cest mal fait, mais ie vous pardonne car vous estes ieune. A ces motz dist messire Pierre de Craon en tirant son espee : A mort, a mort Cliffon. Qui es tu, dist le conestable? Ie suis Pierre de Craon ton ennemy mortel, tu mas tant de fois courrouce que tu en seras icy poye. Et en disant ces parolles il fiert & frappe, & ses gens dautre coste frappent sur les gens du conestable qui se misdrent en deffence, ilz frapperent aussi sur le conestable qui estoit vestu seulement de ses abillemens sans armures ne baston, fors vne dague de deux piedz de long quil tira. Aucuns des hommes de messire Pierre de Craon demanderent : Tuerons nous tout? Oui, dist il, ceulx qui se mettront en deffense. Et vous dy que quant les gens dudiect de Craon eurent congnoissance que cestoit le conestable quilz assailloient, ilz furent si effraiez & si esbahis que leurs coups nauoient pas de puissance, & aussi le faisoient ilz paouusement; car en trahison faisant lon na hardiesse quelconque. Si se deffendoit le conestable au mieulx quil pouoit. Mais sa deffense ne luy eust de riens seruy si Dieu ny eut ouure, car messire Pierre de Craon luy bailla de son espee tel coup sur la teste & de si grant roideur quil le versa de dessus son cheual droit a lencontre de lhuys dung fournier qui ia estoit sur bout pour faire son pain, & estoit son huys entreouuert, & moult bas & petit, dont bien en print au conestable, car au cheoir quil fist du cheual

contre lhuys du fournier, lhuys souurit & le conestable cheut dedens la maison.

Ceulx qui la estoient a cheual ne peurent entrer dedens, car lhuys estoit trop bas & si estoient paoureux.

De ce coup cuida messire Pierre de Craon que le conestable fut mort, si dist : Allons nous en, nous en auons assez fait, car fil nest mort il mourra de ce coup. A ces parolles partirent tous ensemble a celle heure, & fortirent par la porte de Sainct Anthoine & prindrent les champs, car la porte ne fermoit point ne nauoit este fermee depuis le retour du roy de Rosebec en Flandres que Cliffon luy mesmes auoit conseille au roy faire desgonter les portes de Paris, & du tout abatre a terre comme vous auez oy cy deuant.

Ainsi fut le conestable de France laisse comme homme mort chez le boulenger qui moult fut esbahy quant il sceut que cestoit le conestable. Ses gens entrerent dedens lhostel & trouuerent leur maistre blece & le visaige tout senglant. Si furent tous esbahis & esplorez, & en diligence enuoierent querir les chirurgiens pour le visiter.

Le roy fut aduertey de ceste auenture ainsi quil se voulut mettre au lit. Si partit de sa chambre a tout ces eschapins en sa robe de nuyt, & avecques les gens de sa garde qui faisoient guet celle nuyt, sortit hors de son logis & vint en lhostel du fournier ou estoit le conestable naure; il parla a luy & aux chirurgiens qui luy dirent au roy que le conestable nestoit point en danger & que dedens quinze iours ilz le rendroient cheuauchant par le pays, dont le roy loua Dieu. Puis dist au conestable : Pensez de vous & ne vous souffriez de riens, car oncques delict ne fut si cher compare ne amende comme cestuy cy fera. Si se retira le roy a son logis & ia estoit iour tout cler, & enuoya gens apres messire Pierre de Craon a plus de cinquante cheualx; mais on ne le peut attaindre, car ia festoit retire en ses places en Aniou.

**C** Le testament du conestable de Cliffon.



MESSIRE Oliuier de Clifson doubtant la mort disposa de ses affaires & fist ses ordonnances & testamens qui se montoient en purs meubles sans son heritage iusques a xvii cens mil frans, dont plusieurs grans princes & aultres parloient estrangement; toutteffoys il fut guery de celle bleceure par la bonne cure que on luy fist.

Nouvelles vindrent au roy de France, ne scay se elles furent vraies ou non, que le duc de Bretagne auoit recueilli messire Pierre de Craon. Si garda le roy ceste matiere en son cueur moult secretement, & estoit moult enflamble par les mauuais rapors de ceulx de son estroit conseil, & par leur induction il enuoya en Bretagne par deuers le duc, auquel il escripuit lettres contenantes que si le traistre Pierre de Craon estoit en Bretagne, il prioit au duc sur le deuoir de sa foy & de son hommaige quil le luy enuoiaist; ces lettres furent portees au duc de Bretagne par vng escuier de lostel du roy, auquel le duc feist tres bonne chere. Et quant il eut veu le contenu esdictes lettres, il despescha le messagier, & moult honorablement escriuit au roy comment du fait de messire Pierre de Craon il ne scauoit riens, & ne le vouloit aucunement retirer ne soutenir au desplaisir du roy, & que la hayne quil auoit a messire Oliuier de Clifson en riens ne luy touchoit, par quoy supplioit humblement au roy quil ne len voulsist auoir aucune suspeccon touchant ceste matiere, car plus de dix moys auoit quil nauoit veu messire Pierre de Craon, & fil estoit en la duche & le duc en fust aduertey, il y pourueiroit ainsi que le roy de France luy auoit escript. Lescuier print conge du duc & sen retourna par deuers le roy de France, & presenta les lettres du duc de Bretagne au roy qui les leut, & puis les monstra a son frere le duc de Touraine, & leur sembla la responce du duc bien gracieuse & humble, mais les gens du conseil estroit du roy donnerent ausdictes lettres sens & interpretation, de telle sorte que le roy & son frere changerent propos, car ilz donnerent entendre au roy que veritablement messire Pierre de Craon

neust ose entreprendre vng tel fait sans le port & conseil du duc de Bretagne, & que luy mesmes auoit fait & brasse tout cest ouirage, & disoient que loultrage estoit trop grant & touchoit trop auant la maieste royalle, & requeroit grande & scandaleuse reparacion, & a ce quilz pouoient, ilz enflamboient & embrasoient le roy a faire vne cruelle guerre contre le duc de Bretagne.

**C** De lentreprinse que feist le roy de France contre le duc de Bretagne pour Venger loultrage que son auoit fait a son connestable.



LE roy qui pour lors se tenoit a Paris, aussi faisoit son oncle le duc de Berry, parloit souuent de ce delict au duc de Berry, a quoy le duc de Berry respondit : Monseigneur, il est tout certain que messire Pierre de Craon a fait vng grant oultrage & est bien a pugnir & qui le scauroit ou trouuer, ie conseilleroye que lon entendist a le prandre. Bel oncle, disoit le roy, il est en Bretagne delez le duc & non allieurs. Nous voulons aller celle part & vous avec nous. Le duc de Berry luy accorderoit tout, mais il eust volontiers empesche lentreprinse & disoit au roy : Monseigneur, il vous fault auoir le beau frere de Bourgoigne en vostre compagnie. Nous laurons, dist le roy, sans luy ne ferons nous point le voyage. Nous yrons en Bretagne en bien grant arroy, car nous voyons clerement que ce duc de Bretagne nous picque en ce quil peult & prent son deduit & son plaisir a toutes les choses qui nous deplaisent, & sommes deliberes de nentendre iamais a aultre chose que ne layons mis a la rayson.

Trop auoit le roy de France grande affection de contreuancher ce despit de ce que on auoit fait a son connestable & se ordonnoit en tous poins a aller leste ensuiuant en Bretagne & luy sembloit bien que le traite du mariage qui auoit este acorde de sa fille avecques le filz du duc de Bretagne aggrauoit ce fait grandement, en tant que depuis le duc auoit recueilli & retire messire Pierre de Craon, & par luy auoit

fait faire cest oultrage au conneftable de France. Cependant se ordonnoient petit a petit les entreprinſes de la guerre que le roy vouloit faire en Bretagne, & faisoit le roy faire ſur les chemins de Poitou & d'Aniou, du Maine & de Normandie tirant en Bretagne, ſes prouiſions grandes pour ſouſtenir les paſſages du roy & de ſes gens darmes. Et fiſt le roy abatre vng tres bel hoſtel qui eſtoit a meſſire Pierre de Craon feant au cymetiere Sainct Iehan a Paris, & fut la place ou ledit hoſtel eſtoit donnee a faire vng cymetiere a enfouyr les mors, & ainſi paſſerent lyuer & tout le careſme iuſques apres Paſques.

Vers l'entree de leſte apres Paſques lan mil trois cens quatre vingt & douze que meſſire Oliuier de Clifton fut ſain & guery entiere-ment, manda le roy a tous princes & ſeigneurs du royaume quilz ſe preparaffent & miſſent en armes pour le venir acompaigner en Bretagne, & venge loutrage que le duc de Bretagne auoit fait faire a ſon conneftable.

Le duc de Bourgoigne, a qui ceſte entreprinſe deſplaiſoit grandement, diſoit au roy que il vouloit encommencer une guerre ſans raiſon, & que ia la concluſion nen feroit bonne, & remonſtroit que veritablement le royaume de France, le pays de Bretagne ne les cheualiers, eſcuiers & peuple du plat pays aux quelz riens ne touchoit ne appartenoit la hayne de meſſire Oliuier de Clifton & de meſſire Pierre de Craon nauoient que faire de ſouffrir pour eulx les cruelles & piteuſes deſolations de la guerre, & que on laiſſaſt eulx, leurs parens & gens de leur lignage guerroyer lun lautre ſans fouler ne greuer le peuple qui nen peult mais, auſſi n'apert aucunement que le duc de Bretagne lait fait ne fait faire.

Le duc de Berry eſtoit aſſez de celle opinion, mais ilz ne pouoient eſtre ouyz ne creuz, car le roy auoit delez luy du conſeil qui le conſeilloit tout au contraire quil ay moit mieulx que le leur.

**C** Leſchange de la duché d'Orleans pour la duché de Touraine.

**C** En celuy temps que les choſes ſe approchoient grandement & que le roy eſtoit ſur ſon partement de Paris pour tirer en Bretagne, fut faicte vne eſchange de terres & de pays au prouiſſit du duc de Touraine, car il reſigna & remiſt en la main du roy ſon frere, la duché de Touraine & toutes les appendances. Et pour recompence le roy luy bailla & transporta la duché d'Orleans qui mieulx valloit que quatre Tours en la forme & maniere que lauoit autrefois tenue le duc Philippe d'Orleans qui fut frere du roy Iehan, lequel Philippe eſtoit mort ſans enfans maſles.

**C** Comment le roy partit de Paris pour aller de France en Bretagne dont tresmal luy en print.

**A** PRES ceſte eſchange faicte le roy ſe delibera de partir de Paris pour faire ſon voyage. Si print conge de la royne Yſabel ſa femme & de la duchefſe d'Orleans qui eſtoient a loſtel de Sainct Pol & ſon frere le duc d'Orleans auſſi, & vindrent au gitte en Sainct Germain en Laye & la ſe tint quelque temps. Alors neſtoit pas le roy bien ferme de ſante ſi comme diſoient ſes medecins, mais il eſtoit fort & grant homme & puissant de corps, que de ſes deus mains il ououroit & dreſſoit vng fer de cheual, & auoit ſi grant courage de voyager en ceſte guerre, quil diſoit quil ſe ſentoit en meilleur point quil neſtoit. Tout ce faiſoit pour eſmouoir & mettre a chemin ſes gens darmes. Auecques le roy eſtoit lors ſon frere monſeigneur d'Orleans & ſon oncle naturel monſeigneur de Bourbon. Mais ſes deux aultres oncles les ducs de Berry & de Bourgoigne eſtoient encores derriere, & voluntiers fuſſent demourez, mais pour leur honneur il leur conuenoit obeir & acompaigner le roy.

Quant le roy eut ſejourne a Sainct Germain en Laye par le temps de quinze iours & quil luy fut vng peu amende, il partit de la & tira le chemin de Chartres, & ſen vint tout eſbattant a Anuel pres la Beaulſe, ou il y a bonne &

Charles VI  
fort homme  
& puissant.

## Le quatriesme

grosse tour & vng fort chasteau, lequel pour lors appartenoit par heritaige au seigneur de la Riuiere de par sa femme; & furent le roy, les ducs d'Orleans & de Bourbon & les aultres seigneurs moult bien festoyez par le seigneur de la Riuiere, car moult bien le scauoit faire, & y furent trois iours pour eulx refreschir. Au quatriesme iour le roy & les seigneurs se departirent & vindrent a Chartres. Et le lendemain que le roy y fut la venu, vindrent le duc de Berry & le conte de la Marche, & le quatriesme iour apres y arriua le duc de Bourgoigne, dont le roy fut ioyeux.

Quant le roy de France eut seiourne en la ville de Chartres enuiron sept iours, il sen departit & print le chemin du Mans, & gens darmes le suiuoient de toutes pars & luy venoient d'Artoys, de Vermandoy, de Beauuoy, de Gascongne, de Poitou, de Normandie & aultres contrees de ce royaume en telle habondance que les chemins en estoient plains & couuers, & tousiours approchoit le roy du Mans tant quil y paruint & tous les seigneurs en sa compaignie.

Les ducs de Berry & de Bourgoigne estoient moult desplaisant de ceste entreprinse, aussi estoient les medecins du roy, car quant le roy fut arriue au Mans, il se trouua fort mal & disoient les medecins aux quatre ducs d'Orleans, de Berry, de Bourgoigne & de Bourbon : Messeigneurs, on fait trauailler le roy, mais certainement il nen eust que faire, car il nest pas en estat de cheuaucher, le repos luy vaudroit mieulx assez. Car depuis quil se departit de la cite d'Amiens ou lassemblee des Angloys fut, il ne fut en lestat que il estoit deuant. Les princes le remonstrent au roy en luy rapportant le danger ou il se metoit & l'opinion des medecins, mais il nen voulut riens faire, & disoit que pour la grant affection que il auoit d'aller en Bretagne quil se trouuoit assez en meilleur point en trauaillant & cheuauchant par pays quil ne seroit en seiournant, & disoit : Qui me conseille autrement ne me ayme pas. Aultre responce nen auoit on. Et estoient les princes & gens de son conseil tous les iours assemblez en conseil pour aduifer &

ordonner de ces affaires, mais le roy vouloit tousiours y estre affin que nul n'entreprint de rompre le voyage de Bretagne.

**O**r fut lors aduise le roy la etant & seiournant au Mans, & se y assentit assez pour acomplir le desir de ses oncles que lon enuoieroit quatre cheualiers notables deuers le duc de Bretagne, lesquelz luy remonstrent vivement & sagement lintention du roy & de son conseil; & que trop grandement il festoit forfait de ce quil soustenoit delez luy lennemy du roy & du royaume messire Pierre de Craon, & encores sil vouloit enuoyer deuers le roy au Mans, lon trouueroit vng moyen que luy ne son pays nauoient point ceste guerre. Si partirent ces ambassadeurs du Mans & trouuerent le duc a Nantes, qui bien cherement les recueillit. Si luy dirent & remonstrent ce pourquoy ilz estoient venus. A quoy respondit le duc moult saignement, & leur dist que impossible chose luy seroit rendre & liurer au roy messire Pierre de Craon en faisant le duc grant serment que il ne scauoit ou il estoit ne ou il se tenoit, & vng an auoit ou pres quil ne lauait veu. Toutefois pour soy mieulx excuser il enueoieroit vne ambassade par deuers le roy bien briefuement. Ce fut la responce que les nobles cheualiers de France la enuoyez de par le roy & son conseil eurent. Apres ce le duc les festoia honorablement, & depuis sen retournerent deuers le roy a qui ilz declarerent la responce du duc de Bretagne, & dirent que bien brief deuoit enuoyer par deuers le roy vne ambassade pour plus amplement soy excuser. Et a ceste cause fut aduise que le roy ne partiroit point du Mans iusques a ce que lambassade du duc de Bretagne feust venue & que la il lattendrait.

**C**omment leuesque le Barbu & aultres furent par le duc de Bretagne enuoyez deuers le roy de France qui estoit au Mans.



**L**e duc de Bretagne fut aduertie que le roy de France faisoit deualer par la riuiere de Loire & aussi par terre force de grosse artillerie pour ruer

ius les fortes places de son pays & quil estoit delibere de tout le pays destruyre. Si aduifa le duc quil ne feroit pas feurement en sa ville de Nantes, & se delibera de tirer a Sainct Mallo avecques sa femme la duchesse & leurs beaulx enfans dont ilz auoient cinq ou six, & faire apprester vng bon nombre de nauires de guerre bien equippez, & si le roy entroit en sa duche, le duc & sa famille passeroient la mer & yroient en Angleterre. Toutefois deuant que partir de Nantes il despecha pour aller deuers le roy vne moult honorable ambassade dont vng euesque de Bretagne nomme le Barbu, bien noble homme, filz du seigneur de Quillyo en Bretagne, estoit chef, & estoit ledit euesque de saincte & deuote vie.

### La Vertueuse proposition des ambassadeurs de Bretagne.

**L**E roy & son conseil desiroient fort la venue de ces ambassadeurs de Bretagne pour veoir & fauoir ce que le duc de Bretagne auoit intention de faire. Les ambassadeurs de Bretagne arriuerent au Mans, & apres quilz furent arriuez & rafraichis, ilz se tirerent par deuers le roy, auquel ilz firent la reuerence & les humbles recommandacions du duc de Bretagne. Si luy declarerent leur charge & dirent : Sire, le duc mon souuerain seigneur se donne grant merueille de ce que vous auez entrepris de luy mener si dure guerre. Vous luy auez fait scauoir que la cause de ceste entreprinse si est pour ce que il a en sa compagnie messire Pierre de Craon qui vous a griefuement offense. Sire, le duc vous fait scauoir par nous quil ne vit messire Pierre de Craon sinon deux moys depuis que vous & monseigneur vostre frere luy feistes deffendre vostre court, & entend le duc que a ceste cause ledict de Craon se retira en la ville de Sable ou il se tint vng moys ou deux, & de Sable sen alla veoir le duc pour ce quil est son parent & luy declara comment il auoit este banny de court sans lauoir deseruy & auoit sceu que messire Oliuier de Clifson conestable de France en auoit este

cause pour la grande hayne qui long temps a estoit entre eulx, & dist messire Pierre de Craon au duc quil hoit de tout son cuer monseigneur de Clifson, & luy feroit guerre mortelle de toute sa puyssance a quelque fin que il en deust venir. Et quant il eut dit ces parolles, le duc luy demanda se il le luy auoit signifie, & il respondit que ouy, & quil auoit deffie formellement iusques a le mettre a mort ou de nuyt ou de iour la ou il le pourroit rencontrer a son auantaige, & ceste deffiance luy auoit dit de bouche deuant quil partist de vostre court. Et bien tost apres partit dauecques le duc messire Pierre de Craon, & sen retourna en Aniou ou allieurs, & oncques puis le duc ne le vit.

Sire, ceste remonstrance est vroye, & pour tesmoignage, le duc en appelle Dieu le tout puissant qui est celuy qui garde & qui conduit les guerres & les batailles tout ainsi quil luy plaist, & se esbahit le duc de ce que vous luy voulez faire la guerre pour ceste cause, car il ne cuide ne ne voudroit enuers vous riens forfait ne des alliances ne conuenances du mariage de ma dame vostre fille & de monseigneur le conte de Nantes son filz, ne daultres choses par vous & luy irees & accordees ensemble il na enfrain, & fil plaist a Dieu ne enfraindra. Sire, vous auez receu son hommage & serment de fidelite, & estes par ce moyen selon raison escripte tenu de le defendre contre tous autres, & vous mesme sans cause quelconque luy venez faire la guerre. Sire, combien que vous soyez tellement par sur la loy que vous ny estes subiect aucunement fil ne vous plaist, si estes vous subiect a la raison & vous & tous les princes du monde, en maniere que si vous desprifez raison & que vous prenez volente pour faire raisonnable & loy absolue, vostre affaire ira tout au rebours & au contraire de vostre intention, ainsi que nous lifons es escriptures saintes & aultres histoires quil est adueni aux princes desfriguez que Dieu a griefuement chastiez & pugniz, & celuy Dieu qui lors regnoit cest celuy qui regne a present, & est autant a craindre quil fut oncques & aussi puissant de faire miracle quil estoit lors.

## Le quatriesme

Sire, Dieu a tousiours voulu conseruer le pays de Bretaigne de puis que les princes crestiens premierement y regnerent qui fut au temps de l'empire de Theodosius lan de grace 5  
troys cens quatre vingt & vng. Et si depuis il a este vsurpe soubz aultruy main, il ny a gueres este quil ne soit retourne, & tousiours retournera a sa droite seigneurie qui nest pas ourage humain mais de Dieu tout puissant. Et pour ce, sire, vous plaïse aduifer quel est le fonde- 10  
ment de vostre guerre, & aussi les pouretez que la guerre produit, car a tout cela fault restitution si le fondement nest raisonnable. Et sur le tout vueillez moderer vostre malveillance & re- 15  
mettre en vostre grace le bon duc, ses subgetz & son pays, autrement nous serons tous contrains de nous allier, de crier a haulte voix au roy des roys qui est Dieu eternal, & luy supplier secour & ayde contre vostre guerre & ini-  
mitie.

**Q**UANT ce noble euesque eut remonstre vertueusement la charge de son ambassade au roy, a son frere, a ses oncles & a ceulx de son conseil, le roy tout obstine leur fist respondre 25  
quil auroit aduis & conseil sur ce que auoit este propose, & bien tost y feroit faicte la responce.

Le roy assemble son conseil auquel il estoit & y estoient semblablement les ducs d'Orleans, de Berry, de Bourgoigne & de Bourbon, & les 30  
autres gens de conseil. Et furent debatues bien au long les matieres. Les ducs de Berry, de Bourgoigne, leurs aliez audit conseil se feussent assez contantez de ce que ce notable ambassadeur auoit remonstre. Mais ilz n'osoient dire ce qui leur en sembloit pour ce que lon auoit ia embouche le roy quilz portoient le fait du duc de Bretaigne, & aussi disoit le roy quil auoit este deuant aduertir par secreete informa- 40  
cion quil auoit faict faire, que messire Pierre de Craon estoit avecques le duc de Bretaigne, & puis quil estoit venu cy auant iamais ne retourneroit en France ne a Paris quil neust mis le duc a la raison & de corps & de biens.

Toutteffoys le duc de Berry se aduencza 45  
pour la grande affection quil auoit de pacifier ceste folle entreprinse, & dist au roy en la pre-

sence de ses medecins : Monseigneur, ie croy que vous n'avez pas assez bien pense en ce que ses ambassadeurs de Bretaigne vous ont remonstre, nous ne voyons pas que le debat; & la hayne dentre le sire de Clifson & le sire de Craon soit suffisante cause pour esmouuoir vostre royaume a faire vne si cruelle guerre. Il en peut sortir plus de maulx que lon ne vous sauroit dire. Dautre part, voicy vos medecins qui a toute heure se plaignent a nous de ceulx qui vous ont fait entreprendre ce voyage pour le temps de present, car ilz vous treuuent & congnoissent estre bien mal dispose, & dient que de iour en aultre vostre sang sechaufe & se esmeut, & que grandement il vous est em- 15  
pire de puis que vous partistes de Chartres, & ny a medicine au monde qui vous preserue de tomber en vng tres dangereux inconueniant ou ilz vous voient prochainement dispose a tomber 20  
comme feroit le repos du corps & de lentendement, vous vous escaufer a voyager, vous troublez vostre cerueau de tant estre en conseil, & pour ce, monseigneur, que ie suys lun des plus prochains de vostre sang, ie vous ay bien voulu aduertir que vous moderez vng peu ceste entreprinse & que vous souffrez que lon pense de vostre personne pour vostre sante & le bien de tout vostre royaume.

**L**E roy respondit au duc de Berry : Vous sauez, bel oncle, que ie vous ay dit par cy deuant que sil y a personne qui me veille empescher de parfaire ce voyage, il me courroucera amerement, car quelque chose que vous 35  
me ayez dicte, ie tiens fermement que le traître Pierre de Craon nest en aultre lieu que tout coy delez le duc de Bretaigne, & par la foy que ie doy a Dieu & a saint Denis, il nous en rendra vne foiz bon compte. Et au regard de mes medecins ie scay mieulx lestat ou ie suys qui ne font, & ce que vous me dictes ne sont que menees qui sont en ma maison par entendemens que lon a avecques le duc de 40  
Bretaigne. Et pour ce renuoyez luy ses ambassadeurs, car ie ne les veulx plus ouyr, & vous despens que plus ne men parlez.

Quant le duc de Berry eut ouy ceste res-

Obstination  
du roy.

ponce, il la recita au duc de Bourgoigne son frere, lesquelz furent moult esbahiz; si enuoierent querir les ambassadeurs du duc de Bretagne & les manderent venir parler a eulx, & leur dist le duc de Berry : Messigneurs les ambassa-  
deurs, il na pas tenu a moy ne a mon beau frere de Bourgoigne qui cy est si le roy na change propos, nous y auons faict tout ce que nous a este possible de faire, mais le roy ne veult ouyr parler de rompre ce voyage. Si sauons  
bien par quelles gens il est conseille de ce faire & ny saurions mettre aucun empeschement, & par ce nous sommes daduis que vous en retournez par deuers nostre cousin le duc de  
Bretagne, car le roy ne vous veult plus veoir.

Toutessoy pour ce que le roy est bien mal sain de son corps & de son entendement, il me semblera bon que vous laisserez icy quel-  
quun de voz gens qui soit homme de diligence, affin que sil souruient empeschement en nostre  
voyage, nous le ferons fauoir en toute diligence au duc vostre maistre. Et ce pendant ferons tout ce que nous pourrons enuers le  
roy pour adoucir ce different. Mais ne vous attendez plus de parler au roy, car il a com-  
mande que lon vous en enuoiaist sans responce.

Si furent les ambassadeurs de Bretagne bien tristes & dolans de ce que le duc de Berry leur dist. Mais puis quil ny auoit autre remede,  
force leur fut auoir patience & remectre le surplus a la prouision de Dieu puyz que les  
hommes ny pouoient pourueoir. Et tout ainsi que leur dist le duc de Berry, ilz laisserent  
auecques le duc de Bourgoigne vng des gentilz hommes de leur compaignie nomme Charles  
de la Villeon. Si sen partirent les ambassadeurs tirans a Sainct Mallo ou le duc estoit lors.

**L**E lendemain que les ambassadeurs de Bretagne partirent du Mans, le roy qui ia y auoit este xxiiii iours entiers, se delibera de partir de la ville du Mans. Si en partit entre neuf & dix heures deuant midy au moys de iuing que le soleil en sa droicture estoit en sa plus grant force. Et deuez fauoir que le roy au temps quil partit nestoit pas bien sain, car chascun iour il auoit eu la fieure, auecques ce

pour la desconuenue de son conestable, il estoit fort melencolieux & auoit lesprit trouble & trauaille. Et ainsi quil cheuachoit & estoit hors les forsbourgs du Mans enuiron vne lieue tirant a Angers, vne grande aduenture luy aduint, car au destour dun chemin entre deux arbres luy vint soubdainement vng homme moult grant tout deschaulx de iambes & piez, sans bonnet ne chaperon sur son chef, vestu dune pouure cocte de burel blanc. Si se lanca a trauers le chemin & print les resnes du cheual que le roy cheualchoit, si larresta tout coy & luy dist : Demeure, roy, ne cheuauche plus auant, retourne toy dont tu viens, car tu es trahy. Ceste parolle effroya le roy qui ia auoit le cerueau feble & se mella tout son sang. Si marcherent ceulx de sa garde qui frapperent sur cest homme & luy firent lascher la resne du courcier que le roy cheuachoit, & sensuyt lhomme tellement que oncques puis on nen ouyt nouvelles. Mais ceulx qui estoient delez le roy le virent & luy ouyrent dire ce que iay cy deuant recite. Le roy & sa route passerent oultre & pouoit estre lors enuiron douze heures a vng iour de vendredy xxvi de iuing apres la natiuite de sainct Iehan Baptiste lan de grace mil iii cens iiii xx & xii.

Le soleil estoit adonc bel & aussi resplendissans de grans raiz & si plain de force & chaleur que plus ne pouoit estre, & estoient les chemins larges, sablonneurs & descouuers de tous costez, par quoy les cheualx estoient moult eschauffez, & cheuachoient les seigneurs par routes vngz ca & les autres la pour cuider fuyr le pouldrier. Les ducs de Berry & de Bourgoigne cheuachoient sur le fenestre coste du roy, parlans ensemble loings de luy comme deux arpens de terre. Le duc dOrleans, le duc de Bourbon, le sire de Coucy, messire Charles dAniou & le baron dYuri cheuachoient de lautre part du roy assez loignet, & le conte de la Marche, messire Jacques de Bourbon, messire Charles dAlbret, messire Phelippes dArtoys, messire Pierre de Navarre & les autres seigneurs cheuachoient par rotes. Et deuisoient ces seigneurs ensemble & ne se donnoient garde de ce que soubdainement ad-

## Le quatriesme

uint sur le plus grant chef de la compaignie, ce fut le propre corps du roy. Et pour ce sont les œuures de Dieu a craindre & ses secretz & diuers iugemens sont moult a doubter. En la saincte escriptures & ailleurs, maintes histoires sont escripts plusieurs cas soubdainement aduenuz inopinez & non preueuz aux humains, de la ruyne & pereclination de plusieurs roys & princes. Nauons nous pas au vingt quatriesme chappitre du quart liure des roys, comment ce tant redoubte prince Nabugodonosor qui fut roy de Babilone & des Assiriens qui estoit si puissant quil transporta & enmena par force darmes & puissance de guerre deux mil princes, sept cheualiers, fors combatans & mil orfeures ouuriers du nombre desquelz princes Mardocheus grant pere de Ester estoit lun, & aussi en estoit le prophete Ezechiel, tous furent prins en Ihierusalem & transportez de Ihierusalem en Babilone par ledict Nabugodonosor : il estoit si puissant que avec le royaume de Babilone il conquist le royaume des Assiriens, il regna vng temps si doubte quil nestoit lors en la terre nouvelles de nul autre plus puissant que luy. Et soubdainement comme il est escript au quatriesme chappistre de Daniel, luy estant dans sa greigneur force, Dieu le disposa en telle ruyne & misere que il perdit son royaume, son sens & son estat, & fut sept ans en telle captiuite quil viuoit de glans & de pommes fauluaiges, & auoit lappetit & le goust dun pourceau. Et quant il eut fait celle penitence, Dieu luy rendit son memoire & son sens. Et adonc, dit il a Daniel, que dessus le Dieu dIsrael il nestoit nul aultre dieu.

Or nous enseigne nostre foy crestienne que le Dieu tout puissant qui lors regnoit est encores a present regnant aussi puissant pour monstrer ses oeuvres comme il fut oncques. Et pour adresser ceste matiere a nostre propos, deuez scauoir que vne merueilleuse influence descendit ce iour sur le roy de France, car ainsi quil cheuauchoit a la chaleur du soleil sur ces chaulx sablons & auoit vestu vng noir iacques de veloux qui moult leschauffoit, & sur sa teste auoit vng sengle chapperon moult proprement chiquete de vermeille escarlate, &

dessus auoit vng chapelet de perles; & vng sien page qui cheuauchoit derriere luy portoit sur son chef un chapeau de Montauban de fin acier cler & nect. Et derriere ce page cheuauchoit encores vng aultre page du roy qui portoit vne lance toute couuerte de soye vermeille ainsi que pour le roy, & auoit la lance vng fer dacier cler & fin.

**C** Comment le roy de France fut diuinement touche ainsi quil marchoit en guerre cuidant destruire Bretagne.

**A** DUIND tout en cheuauchant comme ie vous conte ainsi que enfans & pages desuoient ou que les courciers font les faulx, le page qui portoit la lance du roy laissa la lance tomber & cheut le fer sur le chapeau de Montauban que lautre page auoit sur la teste, si sonnerent & clicquerent hault ces aciers lun contre lautre. Le roy qui estoit pres & deuant lequel tressaillit soubdainement & fremit de tout le sang, car il auoit encores en ymaginacion & en sa fantaisie les parolles que le fol ou le faige, ne scay lequel, luy auoit dictes, & vint au roy en aduision que grant foefon de ses ennemis luy couroient suz pour loccire.

En celle aduision & abusion dentendement, il se desfroya par feiblesse de cerueau & faillit auant en poignant son cheual, tira son espee & se retourna sur ces pages & en perdit sur leure la congnoissance & de tous aultres hommes, & cuida estre en vne bataille enclos de ses ennemis, & de son espee frapoit & donnoit sur tous ceulx qui pouoit atcaindre en criant : a mor, a mort sur ces traictres.

Les pages qui le virent ainsi enflame, poignirent leurs courciers a grant cources, lun ca lautre la. Le duc dOrleans nestoit pas lors loing du roy, le roy lieue lespee & court sur le duc dOrleans & luy voulut fendre la teste, ce quil eust fait sil leust assigne, car ia en auoit le roy par sa faiblesse perdu la congnoissance, ne ne congnoissoit son frere ne ses oncles. Quant le duc dOrleans le vit ainsi esfraye venir sur luy lespee toute nue, il ne le

voulut pas attendre & a bonne cause si poignit son cheual & sen fuit a la grant course. Et le roy va apres le grant galop.

Le duc de Bourgoigne qui ouyt leffroy des cheualx & les pages crier qui ia estoient narez & tous sanglans, aduisa le roy qui lespee toute nue chassoit son frere, commença a sefcrier : Beau Dieu, quest ce cy, le roy est il forcene, pour Dieu que on le praingne & sauluez monseigneur dOrleans quil ne le blesse. Lon se print de toutes pars a cuider enclore le roy, mais personne ne loisoit attendre.

Les loingtains qui cheuauchioient a dextre & a fenestre cuidoiient que lon chassast aux loups iucques a tant quilz sceurent ces piteuses nouvelles, toutesfoiz le duc dOrleans se saulua par layde que on luy fist par force de gens darmes se mirent a lentour du roy & le laisserent se fouller & lasser, car autrement ne le pouoit on auoir, il en blecza plus de cinquante. Mais ie nay point leu quil fust mort quelquun de la blessure. Finablement quant il fut bien lasse & trauaille, & son cheual bien soulle & tout baigne de sueur & dardeur, vng cheualier de Normandie chambellan du roy, que on nommoit messire Guillaume Martel, faulta de terre sur la croppe du courcier que le roy cheuauchoit, & par derriere embrassa le roy qui tenoit lespee nue en la main, si luy ferra les bras moult estroitement.

Quant il fut tenu & ferre, tous les aultres seigneurs se approcherent & fut le courcier sus lequel le roy estoit, arreste par les resnes, & fut au roy ostee lespee, & fut mis ius du cheual & moult doucement, & fut defuetu de son iacques pour le refroidir & refreschir.

### Comment le duc fut soudainement aduertit de la piteuse fortune aduenue au roy de France.



A vindrent son frere & ses troys oncles, mais il auoit ia perdu la congnoissance deulx ne nul semblant dauoir de congnoissance ne dacointance ne leur faisoit. Et luy tournoient les yeulx en la teste & a nully ne parloit. Les

seigneurs de son sang furent tous esbahis & dirent : Il le faut rapporter au Mans, le voyage est fait pour ceste faeson. Le duc de Bourgoigne aduisa illec pres Charles de la Villeon que les ambassadeurs de Bretagne luy auoient laisse. Si luy dist tout en pleurant : Mon gentil escuier, vous voiez quelz sont les ourages de Dieu, partez en diligence & vous en allez par deuers beau cousin de Bretagne & luy recordez ces piteuses nouvelles & luy dictez que ce voyage est rompu & quil na plus doubte de ceste guerre. Si partit ledit escuier enuiron vne heure apres nonne du lieu ou le roy gisoit a terre, & fut arriue a Sainct Malo par deuers le duc le lendemain a dix heures du matin. Si trouua le duc, la duchesse & leurs enfans qui ia auoient trouffe & charge en nauires leurs bagues & ioyaulx, & ne restoit sinon a y mettre leur personne pour passer la mer & aller en Angleterre. Si leur dist de la Villeon ceste piteuse aduenture, & quant ilz ouyerent ces nouvelles & que ilz furent certains que le voyage estoit rompu, ilz firent descharger leurs nauires & sen retournerent a Vennes.

Or pour retourner a lestat ou estoit le roy de France que lon tenoit a terre on lapareilla & mist on a point le plus doucement lon peut, & fist on finance dune lectiere en laquelle il fut couche & tout souefuement rapporte au Mans. Lon enuoya a diligence de par les marcheschaulx au deuant des gens darmes & de lartillerie qui estoient passez plus auant, & leur fut dit que tous se meissent au retour, & que le voyage estoit rompu.

Si furent mediciens moult embefongnez, & pour ce que aucuns gens disoient que on auoit empoisonne le roy, les autres que on lauoit enforcele, & les aultres que cestoiient les verges & corrections que Dieu luy enuoioit pour empescher les destructions. & desolations quil estoit delibere de faire en Bretagne sans cause & sans raison. Mais les matieres bien debatues, les mediciens monstroient par viues raisons que ce luy estoit venu & procedoit de la foiblesse de son cerueau, & estoit du demourant de la fieure frenaticque qui luy print a Amyens & que le trauail du cheual quil faisoit par si ex-

Le roy est porte au Mans.

## Le quatriefme

treme challeur avecques la assiduele communication & colocation quil auoit en son conseil dont pour la diuersite des matieres quil vouloit toutes comprendre, il auoit le cerueau & lentendement si tannez & ennuyez, auoient este cause de cest accident, & que aultre empoisonnement ne enforcellement ny auoit. Mais si Dieu luy auoit enuoye ceste flagellation pour destourner le voyage de Bretagne, ilz nen sauroient que parler, ilz nauoient pas este appelez a ce conseil, car Dieu celebre son conseil a porte close.

Ainsi fut traicte & gouerne pour vng temps en la ville du Mans le roy de France qui nauoit congnoissance de personne, il ne parloit & si nentendoit chose que on luy dist. Et puy fut doucement apporte a Paris & de la a Creil qui est pres Sainct Leu de Seram ou il y a le plus bel air de France, & fut a Creil bien long temps tres fort malade. Et estoient commis pour le garder de par les princes de son sang, quatre notables cheualiers : messire Regnault de Roye, messire Guillaume Martel, & fut dit au sire de Clifson, au sire de la Riuiere, a messire Iehan le Mercier, a Montagu, au Begue de Vilames, a messire Guillaume des Bordes & a messire Helye de Lignac, quilz se deportassent de tous pointz de frequenter enuiron la personne du roy ne enuiron le chasteau de Creil ou il estoit; sen deporterent combien que le malheur fut, car ilz auoient este tout lestroit conseil du roy, & furent cause de ce quil auoit entrepris ce voyage & quil lauoit ainsi a cueur, & deuez fauoir que lors que Dieu visita le roy de France de celle cruelle playe, il nestoit pas encores de laage de vingtz & quatre ans acompliz, mais peu sen failloit.

**Q**UANT le roy eut este porte a Creil & que on eut pense de lestat & gouuernement de sa personne, furent assemblez a Paris les Estatz de France pour fauoir qui auroit le gouuernement des affaires du royaume & ladministration diceluy : le duc dOrleans qui estoit frere ou les ducs de Berry & de Bourgoigne qui estoient oncles du roy. Si furent debatues les matieres bien longuement, finalement aduise fut & con-

feille pour cause que le duc dOrleans estoit ieune pour entreprendre vng si grant fex; que les deux oncles du roy les ducz de Berry & de Bourgoigne en auroient le gouuernement & principalement le duc de Bourgoigne. Si fut aduise que en la ville de Laon y auoit vng notable medicin que on nommoit maistre Guillaume de Harfelay, lequel fut mande venir a Paris par deuers les ducs de Berry & de Bourgoigne, & apres quilz eurent parle a luy, ilz lordonnerent pour aller a Creil veoir & visiter le roy. Maistre Guillaume y alla, & quant il leut visite & quil eut sceu par les aultres medecins la cause dont estoit procede sa maladie, il vit & congneut bien, elle estoit curable & entreprint a le guerir non pas du tout, mais a luy faire retourner la congnoissance & lentendement, & a le remettre en assez bonne disposition & sante corporelle tellement que il yroit & viendroit par pays. Si demoura ledit Harfelay a Creil pour penser du roy attendant sa guerison.

Les ducs de Berry & de Bourgoigne se tenoient a Paris & nauoient encores riens fait de nouuel, mais ilz auoient en propos quilz ouureroient de brief & tout par raison sur aucuns, lesquelz ilz nauoient pas bien a grace, car ilz les auoient trouuez durs, haultz & rebelles en plusieurs manieres, & disoit le duc de Berry : Clifson, la Riuiere, le Mercier, Montagu, le Begue de Vilames, des Bordes & de Lignac, quant ilz furent avec le roy en Languedoc, me osterent & firent cruellement mourir mon tresorier Bethisac par leur enuie & mauuaisetie, ne pour chose que ie pense dire ne faire, ne le peu auoir de leurs mains. Prennons bien garde a leur fait, car ilz feront paieez de la monnoye forgee en pareille forge. Aussi le duc de Bourgoigne & ses aliez auoient este moult recullez du roy & souuent estoient reboutez en court de leurs affaires par les dessus nommes qui lors auoient gouerne tout entierement le roy.

Pour ces iours la duchesse de Bourgoigne qui estoit vne dame dun haultain couraige & se tenoit lez la royne, & d'elle auoit la souveraine administration, hayoit de tout son cueur

messire Oliuier de Clifson pour la cause du duc de Bretagne son cousin germain, car ilz estoient enfans du frere & de la seur, & parloit bien souuent la dame au duc son mary du duc de Bretagne son cousin, & luy remonstroit vi-  
uement & clerement que cestoit grande faulte  
que on auoit tant porte messire Oliuier de  
Clifson a lencontre dun si grant prince que  
son cousin le duc de Bretagne.

Le duc de Bourgoigne saige, froit & ymaginatif, qui veoit de loing les affaires du royaulme esquelles il ne vouloit pas mestre trouble & respondit a sa femme saigement & doucement, & disoit : Dame, en tous temps faict il bel & bon dissimuler. Verite est que nostre  
cousin le duc de Bretagne est vng grant seigneur & puissant prince, & est le seigneur de Clifson son subiect, si pour les guerres que Clifson luy a faictes ie vouloie courir suz a Clifson lon fesmuerueroit trop grandement  
en France & a bonne cause, car le seigneur de Clifson dit, monstre & met en auant que toutes les haynes quil a monstrees a nostre cousin le duc de Bretagne sont engendrees pour soustenir le royaulme de France ou nous auons  
grant part. A celle cause ma fallu dissimuler si ie vouloye demourer en la grace du roy & du royaulme ou ie suys tenu de foy & de serment que ie ne suys au duc de Bretagne qui tousiours fest ayde des Angloys qui sont ennemis  
de France.

Et madame de Bourgoigne replicquoit au duc son mary & disoit : Ha! Monseigneur, pour Dieu merci, lon ne doit point fauoir de mal gre a mon cousin de Bretagne, sil est ayde des  
Angloys, car ce que iay ouy parler, si le roy Philippe le bel neust iamais soustenu le mariage de Charles de Bloys & de la fille de Guy de Bretagne, qui fut frere du duc Iehan de Bretagne ayeul de mon cousin le duc de present,  
mais eust voulu porter le faict de mondit cousin & de son pere qui estoit filz du duc de Bretagne, iamais mon cousin neust quis laliance ne le port des Angloys, & eust a iamais este  
vng grant pilier a la couronne de France, & iamais neust cherche aultre party. Ledit roy Phelippe le bel & depuis luy les roys Loys

Hutin, Phelippes le long, Charles le bel, Phelippes de Valoys, le roy Iehan vostre pere, Charles cinquiesme vostre frere, & monseigneur le roy de present vostre neueu ont tous chascun en son temps couru suz a mon beau  
cousin de Bretagne pour luy cuyder oster & faire perdre son droit heritage, lequel il a defendu a lespee comme vaillant preux & hardy cheualier. Et fil fest ayde des Angloys en ses  
affaires, il ne sen fault esmerueiller, car quant en vne telle necessite il eust appelle a son ayde les Sarrazins & infidelles, il ny a celuy qui luy en sceust donner blasme ne reproche. Et  
par les hommes & subiectz qui lont habandonne pour tenir le party dudit de Bloys en sont grandement a reprandre comme est ledit Oliuier de Clifson. Ainsi se debatoit la dame  
auecques son mary pour soubstenir la querelle de son cher cousin le duc de Bretagne. Et le duc son mary luy disoit : Ah! dame, vous aymez bien vostre cousin & vous en scay tres bon gre, car cest vng des vertueulx cheualiers  
qui iamais portast espee & bien a sceu nagueres remonstrer les droiz de sa duche quant il fut dernièrement deuers le roy, car iamais prince plus vertueusement ne parla. Et si vous laymez  
aussi faiz ie moy. Mais vous pouez fauoir quil me fault a present dissimuler pour linconueniant qui est adueni a la personne de monseigneur le roy dont est cause le seigneur de Clifson & ses aliez qui ont conseille le roy contré le beau  
frere de Berry & moy daller au voyage ou il vouloit outrement aller. La verge est toute cueillie dont ilz feront hastiuement corrigez, ainsi que de brief vous orrez dire, mais il vous  
fault vng petit attendre & souffrir. Ainsi par telz langaiges se deuisoient le duc de Bourgoigne & madame sa femme.

**C** La deliberation que les princes de France firent de prandre Clifson & aultres gouverneurs.



R aduint vng iour & gueres ne demoura depuis celles parolles que le duc de Bourgoigne & le duc de Berry eurent ensemble vne priuce &

## Le quatriesme

secrete communication. Et disoit le duc de Berry en ceste maniere : Il se fault aduencer de faire prendre ceulx qui ont este cause de faire au roy entreprendre ce maudit voyage; ilz lauoient tellement gaigne & si subtilement que nous nauyons en son conseil ne lieu ne voix, & vous voiez quelle en est lissue. Bon seroit que lon commencast a faire le proces de ce conestable de Clifson, car cest le plus grant & qui plus a de finances. Nauuez vous pas sceu de son testament qu'il fist lautre iour par lequel il ordonnoit la distribucion de xvii cens mil francs. Ou en a il tant assemble? Et si luy a couste le mariage de sa fille a Jehan de Bretagne pres de ii cens mil francs. Et le duc de Bretagne le renczonna quand il le print a Vennes de cent mil francs, ce sont deux millions de francs. Il le fault assaillir par iustice & cautelement, car nostre neueu le duc d'Orleans le porte grandement. Cest verite, dist le duc de Bourgoigne, la premiere foiz quil viendra parler a moy, & si fault il quil y viene dedans demain, ie luy porteray telle contenance quil congnoistra que ie ne lay pas a grace, aussi feray ie moy, dist le duc de Bourgoigne, sil vient deuers moy. Et sur ces parolles se departirent les deux seigneurs densemble.

Le conestable de France, qui cuidoit estre bien de ces seigneurs, vint pour son office de conestable deuers le duc de Bourgoigne pour ce quil estoit poursuyui daucuns chefs de guerre qui en ce voyage auoient este, lesquels vouloient auoir argent, & les luy enuoyerent le chancelier & les tresoriers de France. Et y vint si comme ie vous dis a vne releuee le conestable a lostel d'Artoys a Paris pour remonstrer lestat de ces besongnes au duc de Bourgoigne, a qui la charge & gouvernement de royaume auoit este baillee. Quant il fut venu a lostel d'Artoys & il eut parle au duc de Bourgoigne touchant ce que cy dessus vous ay recite, le duc de Bourgoigne respondit assez fierement en luy disant : Clifson, Clifson, vous nauuez que faire de vous embesongner touchant lestat du royaume, vous ny serez plus appelle, vous vous en estes tant mesle & vous y estes si bien & si loyaument gouerne en vostre temps que

voz plumes se montent selon vostre testament a xvii cens mil francs. Ou est-il possible que de tant soiez emplume sans rober Dieu & le monde? Le roy, beau frere de Berry & moy, pour toute nostre puissance, nen pourrions tant mecre ensemble. Allez entendre a voz propres affaires & ne vous entremettez plus des affaires du royaume, & vous partez dicy. A ces mots, le duc de Bourgoigne se departit & laissa le seigneur de Clifson, lequel yffit hors de la chambre, baissant le chef & tout pensif, & partit de lostel d'Artoys sans autre conduite que de ses gens, & se retira en son hostel pres Bracque.

Quant le seigneur de Clifson fut retourne en son hostel, il eut maintes ymaginacions & congnt que son affaire nestoit pas bien & ne fauoit a qui se complaindre, car le duc d'Orleans estoit lors a Creil. Si ordonna tantost toutes ces besongnes & dist a daucuns de ses seruiteurs le secret de ce quil pensoit. Si vuida son hostel celle nuyt par derriere & deuant que les portes de la ville fermassent, yffit de Paris & tout nuyt sen vint en son chastel de Montlhery, & la se tint tant quil ouyt autres nouuelles.

Clifson sen fuyt a tout son tresor.

CE propre iour que le duc de Bourgoigne eut ainsi raualle le conestable, le duc de Berry & luy se trouuerent ensemble pour traicter de ce ou il falloit besongner pour les affaires du royaume & comta le duc de Bourgoigne au duc de Berry ce quil auoit dit au conestable, dont le duc de Berry luy sceut bon gre, & fut conclut par entre eulx que le lendemain au plus matin, Clifson, Montagu, La Riuiere & Le Begue de Vilame seroient prins & mis prisonniers au Loure. Toutefois, celle nuyt, Montagu sen fuyt & tira en Auignon, & faulua la plus grant part de son bien.

Le matin, furent prins messire Jehan Le Mercier & Le Begue de Vilames, & mis prisonniers au Loure. Aussi l'on enuoya a Anuel pres la Beauffe, ou messire Jehan de la Riuiere festoit retire, lequel fut prins & mis aussi au Loure.

Le lendemain, l'on enuoya le barrois de Barres a tout troys cens lances a Montlhery, mais ia en estoit party le conestable avecques

ses bagues & festoit retire en Bretagne, en son chastel de Joffelin, auquel il se faulua. Ainsi ne peurent prandre de tous leurs gens que ces troys, La Riuiere, Le Mercier & Le Begue. Le Begue ny fut gueres, car par force  
5 damys il fut deliure & eust grace; mais les deux aultres y furent plus de dix huyt moys.

Au regard du conestable de Clifson, il fut adiourne a comparoir en personne en la court de parlement a Paris, ou il ne comparut point comme  
10 bien conseille. Si furent contenuz contre luy plusieurs deffaulx dont le procureur du roy requist le profit, lequel luy fut adiuge. Et estoit tel par arrest de la court prononce en la presence de plusieurs princes & seigneurs, messire Oliuier  
15 de Clifson, pour ses desmerites, fut desgrade par figure de l'estat de cheualier & de l'office de conestable de France & condemne enuers le roy en cent mil mars d'argent pour les extor-  
20 cions & pilleries quil auoit faictes, & fut for- bany du royaume de France.

Et bien tost apres, l'office de conestable de France fut promise a messire Phelippe d'Artoys conte d'Eu, au mariage faisant de luy & de la  
25 fille du duc de Berry, que on appelloit la contesse de Dunoy, & estoit veufue de feu Loys, filz du conte de Bloys, dont cy deuant auez ouy parler, car le duc d'Orleans ne vouloit souffrir que lon baillast l'office de conestable  
30 a quelque aultre iusques a ce que on eust ouy parler le sire de Clifson qui estoit en Bretagne. Mais ce pendant l'office fut promise audiect d'Artoys au cas que Clifson ne le tiendroit plus.

Vous auez cy deuant ouy comme messire Guillaume de Harselay, medicin, estoit de-  
35 mourre avecques le roy a Creil pour en penser. Si en pensa tellement quil y acquist honneur & profit, car petit a petit il le remist en bon estat. Premierement, il luy osta la fieure, l'alteracion & chaleur, & luy fist auoir  
40 goust & apetit de boyre & de menger, de dormir & de reposer, & luy fist auoir congnoissance de toutes choses. Mais il estoit trop foible, & petit a petit pour le renoueller de air, il le fist cheuaucher & aller voler de lesperuier aux  
45 allouectes & pies, & puy voulut veoir la Royne qui auoit ieu d'une fille. Tout luy fut

mene a Creil, ou il y eut moult grande ioye, & quant le Roy fut mieulx venu a reconua-  
lescence, il vint a Paris, ou il se tint tout liuer ensuyuant. Mais pour tout ce, les ducs de  
5 Berry & de Bourgoigne demourerent tousiours regens & gouuerneurs du royaume, car oncques puy le roy de France neust le cerneau certain ne lentendement arreste. Si furent de  
10 puy a sa requeste deliurez de prison le sire de la Riuiere & messire Jehan Le Mercier, & furent enuoiez en leurs maisons.

Tantost apres allerent en Bretagne de par le roy de France & au pourchaz du duc d'Or-  
leans messire Guillaume Martel chambellan du roy & messire Phelippe de Sauoifiz de la maison  
15 du duc de Berry, pour cuider parler a messire Oliuier de Clifson & veoir si on le pourroit reconcilier affin que son office de conestable neust point este baille a dautres. Et furent les-  
20 dictz cheualiers a Joffelin ou Clifson estoit, mais ilz ne peurent parler a luy car ses gens le recelloient; finalement ilz sen retournerent sans riens faire, dont le roy & le duc d'Orleans furent couroucez. Assez tost apres se parfist le  
25 mariage dudiect conte d'Eu & de la dite Marie de Berry, contesse de Dunoy. Et fut le dessusdict institue conestable de France.

Messire Oliuier de Clifson se tenoit a Joffelin en Bretagne, ou il y a ville close & fort chastel,  
30 & auoit grant nombre de gens affin que si le duc de Bretagne luy voulist courir suz que il se fust mis en deffense. Et si auoit le viconte de Rohan, le conte de Lual, le sire de Pentheure, Lymoges son beau filz & leur route  
35 qui souuent le visitoient, lesquels ne leussent point laisse oultrager au Duc & desiroient & seforsoient en ce quilz pouoient de les mettre dacord. Mais le sire de Clifson craignoit ren-  
40 choisir es dangers du duc, car il nauoit pas oublie sa detencion au chasteau de l'Ermine & le peril ou il fut lors.

**L**E duc de Bretagne, qui estoit vng prince de moult grant esprit & que dame experience  
45 auoit instruit & faict saige, consideroit l'aliance dont en sa duchie le sire de Clifson estoit alie tant de son sang & lignage comme par le ma-

riage de ses deux filles Beatrix, femme du sire de Leon fille de Rohan, & Marguerite femme du conte de Pentheure, viconte de Lymoges, il veoit aussi quil venoit sur son vieil eage & combien que les ieunes hommes ne soient pas assurez de viure longuement si sont les vieulx certains quilz ne viuront plus gueres. A celle cause & aussi que les enfans estoient fort ieunes il desiroit viure desormais en paix avecques ses subiectz, ce quil auoit des oncques desire. Mais iamais il nauoit peu gagner le sire de Clifson pource quil estoit merueilleusement auaricieux & grande habondance des estatz & richesses quil assembloit en France luy faisoient habandonner & delaisser le party de son naturel seigneur. Si disoit & remonstroit le duc bien souuent ces choses aux seigneurs de Lual & de Rohan qui souuent le alloient veoir & connoissent assez lesdictz seigneurs la volonte du duc & luy disoient que le sire de Clifson leur auoit dit que le plus grant desir quil auoit en ce monde festoit destre bien humblement reconcilie avecques le duc & en sa grace en maniere quil peust paracheuer de viure le demourant de ses iours en Bretagne en paix & en repos & de conscience, mais il doubtoit la fureur du duc & son yre tellement quil ny osoit prendre fondement de seurte sans vng bien grant hostage.

**C** Comment le seigneur de Clifson fut avec le Duc reconcilie.

**L**E duc respondit au dessusdict de Rohan & de Lual : Mes cousins & treschers amys, ie vous iure Dieu & le benoist saint Yues que ie ne veux faire ne pourchasser au sire de Clifson aucun mal ne desplaisir en sa personne ne en ses biens, puis que ie suis assure que dorefnauant il veult estre bon & loyal Breton, & si par cy deuant il eust en celle intencion & deliberation ie leeusse autant ayme que cheualier du monde. Or, laissans noz peruerfes & mauuaises voluntes passees en arriere & viuons desormais en charite. Affin que le sire de Clifson congnoisse lamour que ie veil auoir a luy & a le bien

traicter ie vous prie que vous allez par deuers luy en son chastel de Joffelin ou il se tient & faictes tant quil viene par deuers moy, car ie desire parler a luy : & amenez avecques vous mon ainsne filz & luy dictes quil le face garde en sa place de Joffelin ce pendant quil fera ce voyage, meilleur gaige ne plus seur ostage ne luy sauroye enuoier. Quant les barons eurent ouy le bon vouloier du duc ilz luy respondirent que ilz acompliroient son commandement. Si fut le ieune conte de Montfort filz ainsne en sa compaignie, lesquelz enuoierent deuant a Joffelin le sire de Beaumanoir pour aduertir le connestable de leur venue, & estoit lors ce ieune conte de Montfort aage de sept ans ou enuiron.

Quant le sire de Beaumanoir fut arriue a Joffelin par deuers le sire de Clifson & il luy eust recite comment le duc enuoiroit son filz en ostage a Joffelin pour y garde ce pendant que le sire de Clifson seroit par deuers le duc, le sire de Clifson se descendit de son chasteau & fist soubdainement aprester dixhuyt ou vingt cheualx & partit pour venir au deuant du conte de Montfort & de sire de Rohan & de Lual, lesquelz il trouua a trois lieus pres de la ville de Vennes ou ilz venoient a luy. Si leur fist le sire de Clifson moult humble reuerence pour lonneur du filz ainsne du duc qui y estoit & leur dist : Messeigneurs, retournons ensemble par deuers le duc & luy ramenons Monseigneur son filz, car ie suis a present assure quil na aucun mauuais vouloir a moy, sil desire parler a moy aussi faiz ie a luy. Si retournerent ces seigneurs ensemble droit a Vennes & firent les barons sauoir au duc leur venue.

Le duc incontinant quil sceut la venue du connestable & comment on luy ramenoit son filz il laissa des gens a lentre de la ville pour leur dire que ilz allassent descendre a leglise des freres mineurs de Vennes qui est situee pres du chastel de lErmine.

Les barons & le sire de Clifson arriuerent a Vennes & furent aduertiz que le duc auoit ordonne que ilz allassent descendre de cheual aux Cordeliers. Sy a allerent & le duc incontinant apres partit de son logis de la Motte & sen alla aux

Cordeliers de Vennes ou il trouua messire Oliuier de Clifson quil recueillit moult doucement. Et puis se retirerent le duc & Clifson eulx deulz tous feulz au iardin des Cordeliers pour parler & deuifer ensemble, & commanda le duc que lon mist gardes aux portes du iardin afin que personne ne vint pour interrompre leurs propos : ilz furent ensemble enclos dedans ce iardin par le temps de quatre heures sans ce que personne ne sceust dont ilz deuiferent ensemble, mais a liffue du iardin on vit quilz estoient dacord & bons amys ensemble. Et fut mande venir a Vennes le conte de Pentheure & luy fist le duc deliurer toutes les terres & seigneuries quil auoit assignees a sa mere par le traite de Guerrande, & tantost apres trespassa Charles de Bloys filz diceluy de Pantheure, que lon auoit marie avecques la fille du duc, & fut entere aux Cordeliers de Guingamp.

De ceste paix furent grant nouuelles en France & furent les ducs de Berry & de Bourgoigne moult ioyeux. En celuy an bien tost apres le roy de France vint en voyage au mont saint Michel en la basse Normandie.

Bien tost apres trespassa la royne d'Angleterre Anne, fille au roy de Boesme, d'une grieve maladie, & demoura le roy Richart veuf.

**E**N celuy temps le roy de Hongrie escripsit au roy de France par ung euesque de Hongrie, que vng grant & puissant Turc que on appelloit Basan, autrement Lamorabaquin, luy auoit mande quil le viendroit assaillir & combattre en son royaume de Hongrie & requeroit au roy de France secours & ayde. Ces lectres furent publiees par France & furent plusieurs princes & nobles escuiers deliberez de faire le voyage. Fut aduise que Iehan de Bourgoigne, duc de Neuers, filz ainsne du duc de Bourgoigne seroit chef de ceste guerre. Si furent assemblez LX mil hommes de France qui passerent en Hongrie & trouuerent le roy de Hongrie en armes qui les attendoit. Ilz se misdrent ensemble aux champs iucques a cent mil combatans tous a cheual & tirerent oultre & passerent a barges & vessaulx la riuere

d'Uure qui fait la separation dentre Hongrie & Turquie & mirent huyt iours a passer.

Quant les crestiens furent tous oultre la Duure ilz vindrent assieger vne petite ville de Turquie quon appelle Comette & est assise sur la riuere de Mette, & la se tint le roy de Hongrie & tout son ost & donnerent plusieurs assaulx : finablement la ville fut prinse par les crestiens & tous les Turcs qui y estoient furent mis a mort sans nulle mercy.

Quant Comette fut prinse, les crestiens se deslogerent & entrerent plus auant en Turquie & vindrent deuant une cite grande & forte quon appelle Nycopoly & y mirent le siege, & y furent si longuement que le roy Basan, autrement dit Lamorabaquin, acompaigne de Sarrains & Perfois & vint pour leuer le siege. Les crestiens en furent aduertis, si se midrent en bataille pour lattendre; les Francoys qui estoient en lauant garde se auancerent de vouloir combattre les Turcs & ne voulurent attendre les Hongres, si furent les Francoys enclos entre deux elles de Turcs ou il y auoit en chascune elle LX mil Turcs, & la furent tous les Francoys mors ou prins. Quant le roy de Hongrie vit ceste desconfiture par loutrecuidance des Francoys il senfuit avecques le Maistre de Rodes & passerent en diligence la riuere de la Duure en vne petite barge qui estoit au grand maistre de Rodes, & nestoient que sept en celle barge & deux notonniers. Les contes de Neuers, d'Eu & de la Marche, le sire de Coucy, messire Henry de Bar, messire Guy de la Trimoille & aultres furent prisonniers lesquelz furent certains temps apres rachetez a pris dargent.

**E**N celuy temps enuiron la feste de Touffains lan de grace mil iii cens xcviij furent faictes moult triumphaument les nopces du roy Richart d'Angleterre qui fut filz au prince de Galles & de dame Yfabel de France agee lors de viii a ix ans, fille ainsnee de Charles vi lors regnant roy de France, laquelle auoit este au parauant fiancee au conte de Montfort, mais pour le bien du pais & a la priere & instante requeste du roy & des princes de France le duc de Bretagne qui present estoit se y consentit

## Le quatriesme

moyennant que lon fianca au conte son filz la ii<sup>e</sup> fille du roy de France nommee Iehanne. Si se assemblerent entre Ardic & Calaiz aux champs ou force pauillons auoient este tendus pour cest affaire, le roy de France, les ducs d'Orleans, de Berry, de Bourgoigne & de Bourbon. Et ainsi que iay leu en quelque hystoire, y estoit aussi le duc de Bretaigne que le roy de France auoit semons a y venir. Dautre part & estoient le roy d'Angleterre Richart & ses oncles le duc de Cloestre & le duc de Lancastre, & plusieurs aultres seigneurs. Et deuez scauoir que le duc de Cloestre ne se vouloit iamais assentir a ce mariage & disoit que c'estoit la destruction d'Angleterre que a eulx auoir lialiance de France, car ilz ont bonne & iuste querelle de faire la guerre aux Francoys pour recouurer les terres & seigneuries qui leur furent deliurez des le viuant du roy Iehan par le traite de Bretigny pres Chartres que les Francoys leurs auoient ostees, & disoit que par ce mariage lon faisoit vne paix entre France & Angleterre & quelque soit vne treue de trente ans, par quoy ces querelles demourroient en arriere. Si nen faisoit le duc de Cloestre semblant quelconque, mais lon pouoit bien veoir a sa contenance que le mariage ne luy plaisoit gueres.

### Des nopces du roy d'Angleterre Richart & de dame Ysabel fille du roy de France.

**A**USSI y furent la royne de France qui y auoit amene ladicte dame Ysabel sa fille, & y estoient les duchesses d'Orleans, de Berry & de Bourgoigne, & aultres. Si parlerent les deux roys ensemble moult gracieusement & furent faictz en leurs tentes festes & banquetz. Et puis apres les aultres solennites requises le roy de France print ma dame sa fille par la main & la deliura au roy d'Angleterre Richart. Si tost que le roy d'Angleterre en fut saisi fut print de toutes pars conge & mist on la royne d'Angleterre en vne litiere moult riche, & luy fut baillee la dame de Couci pour la gouverner. La estoient les

dames d'Angleterre, les duchesses de Lancastre, de Cloestre, d'York & d'Irlande, la dame de Nanuir & aultres, & toute la compaignie d'Angleterre se partit & vint a Calays. Et le mardi qui fut le iour de Toussains lan mil trois cens quatre vingt & feze espoufa le roy d'Angleterre, en leglise de Saint Nicolas, ladicte dame Ysabel de France. Le roy & la royne de France, le duc de Bretaigne & tous les aultres princes & seigneurs sen retournerent en France chascun en son quartier & sen retourna le duc en Bretaigne. Et deuez scauoir que au traite de ce mariage ne peult estre acordee la paix finale, mais vne treue de trente ans fut iuree entre les deux roys.

**E**N ce temps courut vng tres grant bruit en France que dame Valentine de Milan, fille du duc de Milan & femme du duc d'Orleans, auoit este cause de la maladie du roy de France par magiciens arolles & deuins qui tesmoignerent que a la requeste & au pourchast de ladicte dame cest encombrer auoit este faict & donne au roy de France cuidant le faire mourir affin que par ce moyen son mary peust paruenir a la couronne de France; il y eut partie de ses dames princes & arses a Paris & en Auignon, & oncques puis la duchesse de Milan ne resida en la court du roy de France ne de la royne.

**L**E roy d'Angleterre, apres quil eut espouse a Calaiz dame Ysabel de France, luy & sa femme se chargerent en nauires ensemble tous les princes & princesses, seigneurs & dames d'Angleterre & la dame de Couci, & passerent en Angleterre & tirerent a Londres ou furent faiz plusieurs tournois & haultes cheres, & y eut bien drinque, mais le duc de Cloestre se tiroit tousiours arriere en maniere que chascun veoit & congnoissoit que ce mariage luy desplaisoit.

Le duc de Cloestre auoit vng cheualier en qui moult il se fioit & luy declaroit le secret de son courage & entre aultres choses luy disoit que si le roy Richart estoit mort ce seroit grandement le profit du royaulme & que sil vit longuement il destruira tout, & fist courir vng bruit que le roy Richart auoit promis au

roy de France en faisant son mariage que il luy deliureroit & rendroit Calays, & faisoit courre ce bruit par Londres pour mutiner ceulx de Londres contre luy. Et fut aduertie le roy Richart de ce bruit & aultre que le duc de Clocestre son oncle & le conte d'Arondel auoient delibere que a force & puissance de gens ilz le viendroient prandre & mettre en prison, & pour ces mutinemens, le roy Richart estoit moult irrite contre le duc de Clocestre son oncle & contre le conte d'Arondel, mais il ne descouurit point son courage & monstroit tout semblant damour au duc de Clocestre; toutefois le roy pour la garde de sa personne auoit au tour de luy deux mil archers iour & nuyt qui le gardoient & acompaignoient partout ou il alloit, tellement que personne n'osoit contre luy quelque chose entreprendre dont bien tost il neust raison.

Le roy d'Angleterre se aduisa vng iour & dist a ses deux oncles le duc de Lancastrre & le duc d'Yorch : Mes beaulx oncles, pour Dieu conseillez moy que iay affaire. Je suis informe & la verite est telle que vostre frere le duc de Clocestre mon oncle, le conte d'Arondel & leurs complices me veulent prandre & de fait ilz ont assez lacord des habitans de Londres, & me veulent mettre & enclorre en vng chastel & me partir viures par porcion & a ma femme aussi & fera mon royaume gouverne par quatre mibours dont vous deux beaulx oncles ferez partie & deuez estre gouverneurs de toute la marche du nort, le bel oncle de Clocestre aura le gouvernement de Londres & de tout perles iusques a la riuere de Hombre, & le conte d'Arondel sera gouverneur de tout le pais qui est entre la riuere de la Tamise & de Bristo. Et vez la comment ilz departent la venaison, si vous prie que par amour & charite & le serment que vous auez a moy & que vous me deuez que vous me conseillez loyaument comme tenuz y estes.

Les deux ducs de Lancastrre & d'Yorch dirent au roy : Monseigneur, ces nouvelles nous sont estranges & assez facilement croyons que on le vous a raporte & quil en a este seme quelque parolle, car nous congnoissons bien que nostre frere de Clocestre a la pire teste & la plus dan-

gereuse d'Angleterre, toutefois il ne peut riens sans vous & sans nous; plusieurs choses se dirent dabondance du cueur qui ne viennent a aucun effect. Vous plaise laisser couler a valle temps & vous appaiser, les choses se tourneront en bons termes si a Dieu plest; & ainsi apaiserent le roy pour celle foys.

Pourtant que ces deux seigneurs nommez voyoient bien que les besongnes d'Angleterre se commenchoient a mal partir & que grandes haynes se nourisoient entre le roy & leur frere de Clocestre, lequel ilz craingnoient moult, ilz se departirent de lostel du roy & toutes leurs familles & chascun sen alla en sa duche & demoura le roy Richart d'Angleterre delez Londres & sa garde tous les iours pres de luy.

**L**E roy Richart d'Angleterre auoit tous les iours nouvelles des piques & haynes qui croissoient en son royaume entre luy & ses subiectz, & ses seruiteurs estoient cause de moult enuenimer & enflamber ceste hayne, car ilz disoient quil faisoit dangereux le seruir & conseiller pource que le duc de Clocestre auoit fait trancher la teste publiquement a Londres a messire Symon Burlay & plusieurs aultres qui auoient este seruiteurs du roy leur maistre, en hayne de ce que ilz estoient autour de sa personne, & ny auoit le roy peu mettre empeschement, & disoient quilz n'attendoient chascun iour autre chose sinon den auoir autant.

### Comment le roy Richart print le duc de Clocestre & le fist tuer dont tresmal luy print.

**L**E roy Richart qui bien auoit note toutes ces parolles, se transporta luy mesme avecques xxv ou xxx de ses gens a vne maison de plaisance ou le duc de Clocestre se tenoit a dix lieues ou enuiron de Londres, & y arriua enuiron vespres; faignant vouloir chacer aux dains & cheureulx fist venir son oncle le duc de Clocestre aux champs. Si le fist prendre & toute nuyt mener pres Londres a Stadefort par le conte mareschal & ses gens, & le fist mettre en vng na-

## Le quatriesme

uire sur la riuere de la Tamise, & de la mener a Calays ou il fut mis prisonnier dedans le chasteau, & le roy demoura au chasteau de Londres, & deux ou trois iours apres que le duc de Clocestre eust este mene a Calays, quatre cheualiers entrerent dans sa chambre ou il estoit tout seullet, & luy getterent au coul vne touaille & lestraignirent tellement les deux dun coste & les deux daultre quilstranglerent, & tout mort leporterent sur vng list, le despoilerent & le midrent entre deux linceulx, & puis sen allerent, & tantost les gens qui estoient ordonnez pour le garder entrerent en la chambre & le trouuerent mort, si dirent quil estoit mort dune appoplexie. Tout enuiron ce-  
luy temps furent prins seulement le conte dArondel & le conte de Varuich & mis en la grosse tour de Londres, & trois iours apres fut par iustice le conte dArondel condemne auoir la teste coupee, & fut publiquement la sentence executee a Londres en la rue de Sep. Mais le conte de Varuich fut receu a grace & a pardon a la requeste du conte de Salsbery & daultres, & fut forbanny du royaume dAngleterre. La mort du duc de Clocestre fut tantost sceue en Angleterre, a celle cause fut le roy Richard moult craint & redoubte, & ses deux oncles les deucs de Lancastre & de Yorch nen osoient mot sonner. Toutefois aucuns cheualiers & nobles hommes dAngleterre en parlerent en vng sens & les autres en aultre sens, ceulx qui hayoient le duc de Clocestre disoient quil auoit bien merite la mort, car il vouloit esmouoir le commun peuple du pays a aller contre le traicte de paix fait entre France & Engleterre, les autres qui laymoient disoient tout au contraire, & que si le roy acheuoit comment il auoit commence la noblesse dAngleterre seroit bien tost oultre.

Entre le conte Derby filz ainse au duc de Lancastre & le conte mareschal se meurent sur ces propos quelques parolles priuees & secretes, car le conte Derby estoit deplaisant dont lon auoit ainsi fait mourir son oncle le duc de Clocestre, & dist le conte Derby au conte mareschal : Sainte Marie, beau cousin, que pense faire le roy? veult il vider le pays dAngleterre

de princes & nobles hommes? il me semble quil ne desire pas le triumphe & lhonneur de son royaume. Le conte mareschal ne respondit riens a ce propos & dissimula cuidant en faire son prouffit, mais il en fut abuse. Si se retira par deuers le roy dAngleterre & pour luy cuider complaire, il luy va dire : Sire, Dieu ma fait cest honneur destre de vostre sang & lignage, & si mauez tousiours monstre grant signe damour, aussi iay le serment a vous par quoy ne vous doy celer chose que fache estre a vostre preiudice & detrimment. Le roy le regarde & luy demande : Pour quoy dictes vous ces parolles, conte mareschal. Si luy respondit : Sire, ie vous le dis pour ce que le conte Derby ma au iour duy dit aucunes choses qui grandement touchent vostre maieste royalle, & affin que ie vous en face le raport en sa presence, vous plaise, sire, le faire venir en place. Si fut mande le conte Derby venir promptement deuant le roy, lequel y vint; si estoit present le duc de Lancastre son pere, & quant il y fut le roy demanda au conte mareschal : De quoy voulez vous accuser mon cousin Derby. Sire, ie vous le diray puis quil y est. Conte Derby, ie tiens & maintiens que vous auez de tresmauuaises pensees & volentez contre le roy, & que vous luy desirez & voulez mal, en tant que au iour duy vous mauez dit que il nest pas digne de tenir terre ne royaume, quant sans iustice ne raison il chasse & met hors de son royaume les nobles hommes qui le doiuent ayder a iceluy garder & soustenir; & si vous voulez soustenir que vous ne me ayez pas dist ces parolles, ie vous presente mon gaigne & vous declare que ie vueil prouuer de mon corps contre le vostre en champ de bataille que comme traire vous mauez dict lesdictes parolles.

Le conte Derby fut tout esbahy. Si nosa demander au duc son pere quelle responce il deuoit faire, & pensa vng peu deuant que parler, & puis dist haultement : Conte mareschal, ie veulx soustenir que comme vng traire flateur & zizanieur vous mauez mis sur a tort & sans cause lesdictes parolles, & pour vous en desmentir en champ de bataille ie vous presente

mon gaige. Si le leuez, si vous sentez vostre cas net. Adonc se tirerent les contes & feigneurs qui la estoient entre ces deux contes, & furent leurs parolles couuertes & muees en aultre sens; touteffoys le roy en fut tresmalcontant. Si se tira a part & manda venir a luy le conte de Rostellant conneftable d'Angleterre, lequel y vint, & quant il y fut il luy dist : Conneftable, allez parler au conte Derby & au conte mareschal, & leur deffendez quil ne partent hors de mon royaume, & pour feurete de ce faictes que aultres que eulx y soient obligez iusques a ce que en champ de bataille ilz ayent prouue leurs querelles lun contre lautre.

Grans nouuelles furent en plusieurs contrees de ces deffiances darmes entre ces deux contes pour y proceder iusques a oultrance. Si firent leurs prouisions pour leurs tournoys qui furent signifiez en plusieurs royaumes, mais oncques puis le duc de Lancaftre ne fut deuers le roy ne aussi deuers son filz pource quil en estoit tresmal contant, aussi estoient plusieurs aultres princes & feigneurs d'Angleterre qui disoient que le roy ne deuoit point prendre ces folles parolles tant a cueur, mais les deuoit blasmer seulement. Or combien que le roy d'Angleterre fust plus craint & doute que iamais nauoit este roy, si se faisoit il garder de iour & de nuyt a ii mil archers qui estoient paieez de leurs gaiges chascune sepmaine, & ne se confioit le roy en prince ne en feigneur de son royaume ne de son lignage, fors en son frere le conte Hostidonne, au conte de Rostellant cousin germain du roy, filz au duc d'Yorch & au conte de Salbery, ceulx la ilz auoient amour & non aultres fors a aucuns cheualiers de sa chambre.

QUANT la iournee du tournoy approcha, ces trois feigneurs cy deuant nommez se tirerent par deuers le roy & luy dirent moult secretement : Sire, nous auons pense en ce tournoy dont le iour saproche & seront tantost ses deux ieunes contes prest a combatre lun lautre a oultrance. Sire, nous scauons plus de nouuelles que vous, car vous ne partez du logis & ne conuersez personne, & chascun iour auons a noz oreilles nouuelles estranges; il

court vng bruyt en vostre royaume & en especial en la ville de Londres que vous estes cause de ce mal, & que vous auez fait tirer auant le conte mareschal pour mettre fur au conte Derby les parolles affin de le combatre, & dient plusieurs prelatz & gens des trois estaz de vostre royaume que vous ne tendez finon a deffaire vostre lignage & le royaume d'Angleterre, lesquelles choses ne vous feront point souffertes, & si ceulx de Londres & les nobles s'ellieuent contre vous, qui se mettra au deuant. Vous nauez puissance que de voz hommes, & pour ce, sire, aduisez a vostre affaire bien prudemment, car iamais neustes plus mestier de conseil que presentement vous auez.

Quant le roy Richard entendit ces parolles, si mua couleur & contenance, car ceulx qui parloient a luy estoient ceulx en qui il auoit toute sa fiance. Si leur dist ainsi : Le vous ay bien entenduz & voy bien que vostre intention est tres bonne & que bien vous confiderez les dangers ou ie suis, & pour ce vous prie que vous me declarez que ie doyy faire, puis que les choses sont ia si auant es termes ou vous les voyez. Sire, respondirent ilz, vous deuez ce nous semble diuertir ce tournoy & le conuertir en aultre reparacion; le conte mareschal a eu grant tort dauoir ainsi oultrageusement profere ces parolles & fault quil le compare grandement & pour contenter vostre peuple & aussi ceulx du lignage de toutes les deux parties; nous auons regarde pour le meilleur sans que point ilz se arment ne voient lung lautre que vous enuoyez deuers eulx & les faictes obliger que de ce fait & entreprinse ilz vous croiront & feront ce que vous ordonnerez. Et quant ainsi les auez obligez, vous appointerez quilz ne combatront point & effacerez ceste entreprinse quant a ce point. Et au surplus, bien tost apres, vous declarerez par vostre iugement que le conte Mareschal, pour sa folle entreprinse, vuidera hors de vostre royaume dedans xv iours comme banny sur peine de perdre sa vie sans espoir de plus y retourner, & Henry de Lancaftre, conte Derby, vuidera hors semblablement du royaume d'Angleterre dedans xv iours comme banny pour fix ans seulement, sauf

## Le quatriesme

vostre misericorde & grace par laquelle les pourriez rappeler quant vostre plaisir fera, & faictes tant quilz ne combattent point lun lautre, car ilz ont des parents de chascune part qui se pourroient mettre en armes dont il pourroit sortir tel inconuenient que vous ne le pourriez estaindre. Le roy pensa vng peu & dist : Le voy que vostre conseil procede dune grande prudence & feray ce que me conseillez sans faulte.

Or, fut assemble le grant conseil d'Angleterre, auquel estoient les ducs de Lancastre & d'Yorch, les prelatz & aultres seigneurs d'Angleterre qui tous furent mandez au chasteau de Altem, auquel lieu le roy se tenoit lors. Si prononça sa sentence tout ainsi que icy deuant auez ouy que conseille luy auoit este, ceste sentence contenta assez les seigneurs d'Angleterre qui la estoient, mais le conte mareschal se repentit moult dauoir raporte au roy les parolles dessusdictes, car il cuidoit entrer par celuy moyen en la grace du roy plus que deuant, mais tout luy vint au contraire, & ce fut bien raison.

### Comment Henry conte Derby qui banny estoit d'Angleterre vint a Paris.

**L**ES deux contes prindrent humblement congie du roy d'Angleterre pour eulx retourner en leurs maisons, & eulx preparer & disposer de sortir du royaume d'Angleterre. Le conte Derby, Henry de Lancastre, fut conseille par le duc son pere de se tirer en France passer le temps pour vne espace; quant il luy ennuyroit, il auoit ses deux feurs, lune la royne d'Espaigne & lautre la royne de Portugal, ou il seroit bien recueilly sil y vouloit aller & ainsi quant il seroit deux ans en chascun desdictz trois lieux, il auroit finy le temps de son bannissement. Il print congie de son pere. Et quant il monta a cheual au partir de Londres, plus de XL mil hommes estoient par les rues qui crioient & ploroient apres luy si piteusement que c'estoit grant pitie de les veoir, difans que par enuie, cautelle, & traïson, on mettoit la fleur des hommes hors d'Angleterre. Le conte Derby ne fut pas conuoye ne

accompaigne a trompettes ne instrumens de Londriens, mais en pleurs & lamentacions; il entra en vne nef & vint arriuer a Calais. Et puis enuoya vng sien herault par deuers le roy de France & son frere le duc d'Orleans, & leurs oncles les ducs de Berry, de Bourgoigne & de Bourbon, pour scauoir sil leur plaïsoit quil venist tenir son estat a Paris, en bien païant ce que luy & ses gens prendroient. A ceste requeste firent le roy son frere & ses oncles si gracieuse responce que le conte Derby congneut que de sa venue ilz auroient grant ioye. Le herault darmes sen retourna & avecques luy enuoya le roy de France messire Charles de Hangeft pour faire ouurir citez & bonnes villes aux Angloys tout leur chemin venans a Paris. Et bien tost apres quilz furent arriuez a Calais, le conte Derby partit de Calais pour tenir son chemin droict a Paris.

Quant le roy de France sceut que le conte Derby saprouchoit de Paris, il luy feïst preparer son logis en lostel de Clifson. Et sortirent hors de Paris au deuant de luy les ducs d'Orleans, de Berry, de Bourgoigne & de Bourbon, & moult belle compaignye d'autres seigneurs. Et le conduisirent en lostel de Saint Pol, ou le roy estoit qui lattendoit. Et fut le conte Derby, le conte de Lancastre recueilly du roy de France moult chèrement. Et apres plusieurs priuees communications, le roy le feïst conduire en son logis. Et fut accompaigne & frequente par les seigneurs de France souuent, & luy faïsoit on parmy Paris & a tous ceulx de sa compaignie toutes les gentilleffes & gracieusetez dont l'on se pouoit aduifer, car ainsi auoit este ordonne de par le roy.

**L**E roy de France, enuiron iceluy temps qui fut l'an mil CCCLXXX dix sept, bailla au roy de Nauarre la seigneurie de Nemours qui lors fut faïcte duchie, & fut en recompense de la conte d'Eureux & autres terres qu'il auoit en Normandie quil bailla au roy.

Nemours erige en duchie.

**E**N celuy temps estoit pape Clement, qui se tenoit en Auignon, trespasse. Et les cardinaulx procederent a lelection dun autre pape. Et

pour ce faire se mirent en conclave & eslurent Pierre de la Lune & le nommerent Benedic XIII. Et regnoit lors a Romme vng autre pape nomme Boniface, & par ce moien y auoit scisme en l'Eglise, lequel y fut iusques au concile de Constance, & Martin sixiesme de ce nom, qui premierement auoit nom Odo de Colona, fut esleu. Frere Vincent de Valence, docteur religieux de lordre des freres prescheurs, estoit lors en Bretaigne preschant la parolle de Dieu.

**B**IEN enuiron celluy temps, le duc Iehan de Lencastre tumba malade en Angleterre dune griefue maladie dont il trespassa; de sa mort fut aduertie Henry de Lencastre conte Derby son filz, qui en fut tres desplaisant. Aussi furent dautres en France & en Angleterre. Bien tost apres, on voulut faire le mariage de la contesse de Dunois, fille du duc de Berry, qui ia auoit eu deux maris, cest assauoir le filz du conte de Bloys & depuis le conte d'Eu, & estoient tous deux trespassez, & la dame demoura veufue fort ieune, & y eust le conte Derby, qui lors estoit duc de Lencastre, voluntiers entendu. Et semblablement le roy de France & ses oncles; mais le roy Richard d'Angleterre empescha le mariage par le conte de Salsbery quil eunoia deuers le roy de France pour icelluy mariage empescher, car encores tenoit le roy d'Angleterre en sa main la conte de Lancastre, & ne vouloit que lheritier principal le conte Derby, messire Henry de Lencastre, la releuast de luy, combien que pour lors il fust en France.

Il courroit lors parmy le royaume d'Angleterre vng tres mauuais bruit contre le roi Richard & ny auoit si grand ne si petit qui ne sen plainnist. Car tous les princes, barons, cheualiers, escuyers, bourgeois & generallement tout le commun peuple se plaingnaient de luy & de son pere pour la grande despense quil faisoit. Si luy fut raporte que le conte de Northombelande & son filz en auoient parle autrement que a son plaisir dont il fut tres mal content. Et pour en faire la raison, le roy d'Angleterre se ordonna pour aller sur les marches d'Irlande, & quant il fut au chemin, il manda querir le conte de Northombelande & son filz pour le acompai-

gner, mais ilz ne voulurent aller & se excuserent au mieulx quilz peurent. Toutefois, le roy ne voulut recepuoir leur excuse & les bannist du royaume d'Angleterre; mais ilz nen voulurent sortir, & manda tous ses amys & aliez le conte de Northombelande venir par deuers luy pour luy tenir compagnie, & fist moult grande assemblee de gens. Et le roy tiroit tousiours son chemin sur les marches d'Irlande & se vint loger en la ville de Bristo & ses enuirs.

**L**E roy Richard estant sur les marches de Bristo, les seigneurs d'Angleterre se commencerent a esmouuoir par le conseil de ceulx de Londres pour courir fuz au roy Richard, & bien leur souuint comment autrefois la royne Ysabel, fille du roy Philippe le bel & femme du roy monseigneur saint Edouard d'Angleterre, mist son mary a la raison, pour ce quil estoit tout desfrige, par le conseil de messire Hue le despencier, car elle print son mary prisonnier & le fist mourir cruellement par iustice ainsi que vous auez cy deuant oy reciter au chappitre de Iehan duc de Bretaigne troisieme de ce nom qui fut filz du duc Artur de Bretaigne. Et a lexemple delle ceulx de Londres se vouloient esuertuer de oster le royaume d'Angleterre a Richard qui fut nasqui a Bordeaux, & de couronner roy d'Angleterre Henry de Lencastre qui estoit en France.

**C** Comment ceulx de Londres enuoient querir en France le ieune duc de Lencastre pour le faire roy d'Angleterre.

**L**ES citoyens de Londres comme chefz de la communaute du royaume d'Angleterre eurent secret conseil ensemble, & auecques eulx aucuns prelatz & cheualiers d'Angleterre; auquel conseil fut dit & arreste que lon enuoiroit querir le ieune duc de Lencastre qui se tenoit a Paris, & le feroit on retourner en Angleterre, & pour faire ce messaige, prièrent larcheuesque de Cantorbie, religieux honorable & d'excellente prudence, qui bien estoit pour faire vng tel messaige pour

## Le quatriefme

le prouffit du royaume d'Angleterre, lequel bien volentiers accepta celle charge. Si passa la mer l'archeuesque de Cantorbie sans auoir aucun estat, mais estoit seul comme vng moyne pelerin & tant fit quil vint a l'hostel de Vicestre pres Paris ou lors se tenoit le ieune duc de Lenca-  
5 castre.

Quant le duc de Lencaſtre vit l'archeuesque de Cantorbie ainſi deſguiſe comme pelerin ſans estat quelconque, il mua couleur & ſuppoſa  
10 quil eſtoit venu pour quelque grant affaire, car ceſtoit vng des plus eſtimez & excellens des prelatz d'Angleterre. Si parlerent ſecretement enſemble, & luy remonſtra l'archeuesque la debilité du royaume d'Angleterre, & les vio-  
15 lences & deſolacions qui y eſtoient en pluſieurs lieux & contrees. A quoy ceulx de Londres comme les plus grans du royaume vouloient pourueoir. Et a celle fin lauoiert enuoie par deuers luy, luy dire quil vouliſt retourner en  
20 Angleterre, & on le feroit roy, & que gracieuſement print conge du roy de France & des princes & ſeigneurs francoys.

Quant le ieune duc de Lencaſtre eut oy au long l'archeuesque de Cantorbie, il luy dit :  
25 Monſeigneur l'archeuesque, voz paroles me donnent diuerſes penſees. Enuis entreprendray ceſte choſe & enuis la laiſſe aller, car bien ſcay que de longtems ne puis retourner en Angleterre ſinon par le moyen que vous me dictes. Et  
30 d'autre partie trouue tant de douceurs & de humanitez au roy de France & es notables princes qui ſont au tour de luy, que ce meſt vng humain paradis; & me fait mal de les laiſſer, & bien volentiers y demoureroie toute  
35 ma vie pour lhonneur & la courtoisie que ie y trouue; toutefois, ie prendray conſeil ſur ce que vous me dictes avecques ceulx de noſtre nation qui ſont au tour de moy, & en voſtre  
40 preſence me conſeilleront de ce que ie airay a faire. Si aſſembla ſix notables cheualiers d'Angleterre qui eſtoient de ſa maiſon, & tint conſeil avecques eulx en la preſence de l'archeuesque qui leur recita tout ce quil auoit dit au duc de Lencaſtre. Et tous reſpondirent d'une  
45 ſuite & diſdrent : Monſeigneur, Dieu vous a regarde en pitie; gardez bien que ne reſuſez

ceſte requeſte, car iamais meilleure ne plus offre naurez, & qui voudroit bien enquerre de voſtre lignaige & dont vous venez & deſcendes, vous eſtes par droit de generacion a  
5 cauſe de veufue madame Blanche de Lencaſtre voſtre mere, le vray heritier du bon roy ſainct Edouard qui en lan de grace mil ſix ans regnoit paiſible roy d'Angleterre. Et pour ce prenez & acceptez ce marche, car ſi vous ne vous voulez  
10 aider Dieu ne autre ne vous aidera.

Quant le conte Derby duc de Lencaſtre eut oy parler ſon conſeil ſi acertes, il dit : Je feray ce que me conſeillez. Si fut aduiſe que chacun  
15 ſe ordonneroit pour voiajer; mais ceſte entreprinſe fut moult tenue ſecrete en l'hostel dudit duc de Lencaſtre. Et fut aduiſe quil prendroit ſon chemin par Bretagne pour le plus ſeur & le plus ſecret. Si vint le duc de Lencaſtre a Paris  
20 comme il auoit acouſtume de venir. Et vint par deuers le roy. Et apres pluſieurs plaiſantes deuſes entre eulx, le duc de Lencaſtre dit au roy de France quil ſe vouloit aller iouer & eſbatre en Bretagne & veoir le duc ſon oncle, car en premieres nopces il eut eſpouſe ſa tante,  
25 fille du roy Edouard.

**C** Comment le ieune duc de Lencaſtre ſe retira en Bretagne par deuers le duc qui luy baiſſa gens & nauires, & comment il paſſa en Angleterre & fut receu a  
30 Londres comme roy & ſeigneur.

**L**E roy de France ne penſoit que tout  
35 bien par quoy il le luy accorda bien legerement; ſi print conge du roy & des ſeigneurs de France qui la eſtoient. Et luy baiſſa le roy vng cheualier de ſa maiſon pour le conduire & guider que lon  
40 appelloit meſſire Guy de Baigneux. Et partirent de Paris tirans en Bretagne, & touſiours eſtoit l'archeuesque de Cantorbie en ſa compaignie. Si auoit le duc de Lencaſtre enuoye vng ſien herault deuant en Bretagne par deuers le duc pour l'aduertir de ſa venue.

Quant le duc de Bretagne entendit que ſon nepueu le duc de Lencaſtre le venoit veoir, il  
45 en fut moult reſioy, car il auoit fort ayme le feu

duc de Lencaſtre ſon pere. Si arriua le duc de Lencaſtre a Nantes ou le duc eſtoit, & fut moult honorablement recueilly du duc, de la duchefſe ſa femme qui eſtoit moult belle princeſſe, & des ſeigneurs de Bretagne.

Le duc de Lencaſtre vit & congneut par experience que le duc de Bretagne lauoit bien en grace & quil luy faifoit & faifoit faire toute la meilleure chere que poſſible eſtoit. Et quant il ſceut la bonne volonte du duc il luy declara le ſecret de ceſte entreprinſe en luy difant quil eſtoit venu par deuers luy comme par deuers celuy en qui plus il auoit damour & de fiance par deca la mer, pour auoir ſon conſeil & aduis en ceſte matiere, ſelon lequel il eſtoit delibere de ſe gouverner.

Quant le duc de Bretagne entendit ce propos, ſi diſt : Beau nepueu, de tous chemins doit on prendre le meilleur ; par le roy Richard, vous & aultres auez moult ſouffert & ſouffrires encores ſi lon ny meſt remede : vous me demandes conſeil, ie vous conſeille que vous croiez les habitans de Londres, car ilz ſont grans & uiſſans au pays, & ie vous aideray de nauires, d'argent & de gens, & de tout ce que meſtier vous fera pour faire le voyage. Et ſi vous aduertis, beau nepueu, que quant la grace de Dieu & la vertu de l'homme ſe ioignent enſemble, il neſt riens impoſſible a faire ne illicite a eſperer, car bien ſouuent Dieu meſt au pouoir de l'homme ce quil ne peut comprendre en ſa penſee. Et par ce ne vous faille le couraige; ie ſcay bien comment telz affaires ſe doiuent guider & conduire : ie lay ſi bien eſprouue que tous autres doiuent prendre exemple a ce que iay pourſuiuy, & comment il men eſt prins. De ce notable conſeil & auſſi de loffre du duc de Bretagne le remercia tres humblement le duc de Lencaſtre.

**A**INſI ſe porterent les conuenances & ordonnances, & fut par vng temps le duc de Lencaſtre avecques le duc, faignant y vouloir demourer, mais ce pendant le duc faifoit aprefter gens & nauires a vng port de mer en la baſſe Bretagne que lon appelle le port Blanc. Et la vindrent le duc, la duchefſe ſa femme &

le duc de Lencaſtre, & avecques eulx l'archeueſque de Cantorby que nul ne congnoiffoit fors les Anglois, & quant le vent fut venu a point le duc luy bailla trois mil hommes de guerre tous ſouldoies, & fiſt huyt bons nauires bien artillez pour paſſer la mer ſeurement. Si print le duc de Lencaſtre conge du duc ſon bon oncle & de la belle duchefſe ſa femme qui bien lauoit en grace, & les mercia humblement. Et le duc luy diſt : Beau nepueu, faiſtes moi ſcauoir comment il vous ira de voſtre entreprinſe, & ſi vous auez meſtier de gens, ie vous parfourniray iuſques a dix mil combatans tous ſouldoiez pour demy an. Monſeigneur, dit le duc de Lencaſtre, ie vous mercie tant humblement que ie puis. Si ſe miſdrent les nauires a la mer & ſinglerent tellement que en deux iours & trois nuiz ilz arriuerent au port de Pleumonde en Angleterre.

Quant le ieune duc de Lencaſtre avecques ſon armee fut arriuee a Pleumonde ilz ſe miſdrent a terre & entrerent dedens la ville petit a petit; le baillif de Pleumonde qui auoit la ville en garde de par le roy Richard fut tout eſmerueille quant il vit tant de gens darmes; mais l'archeueſque de Cantorbie le appaiſa, & ſi ne congnut aucunement le duc de Lencaſtre.

Incontinent quilz furent logez en la ville, l'archeueſque de Cantorbie aduertit ceulx de Londres de ceſte venue & la eſcripuit au maire de Londres. Et des ce que le maire eut veu ces lettres, il les enuoya aux officiers bourgeois & cheſz de la ville qui furent tous reſiois & en aduertirent en diligence tous les ſeigneurs & cheualiers du pays quilz congnoiſſoient auoir deſir de ceſte venue, & monterent a cheual a Londres plus de douze cens hommes pour venir au deuant du duc de Lencaſtre droit a Pleumonde.

Le duc de Lencaſtre ne tarda a Pleumonde que deux iours, car des que les cheuaults eurent eſte tirez hors des nauires & quilz eurent ſeiourne par vng iour ou deux, ilz partirent & prindrent le chemin de Londres. Le maire & les habitans de Londres furent les premiers quilz rencontrerent aux champs; le

## Le quatriesme

duc de Lencaſtre qui marchoit moult fierement comme en bataille avecques trois mil hommes de guerre & force pannonceaulx & bannieres femees darmines, ſi que il le faisoit moult beau veoir ainſi acompaigne. Si luy firent moult bien humble reuerence, & luy a eulx, & marcherent enſemble. Et par toutes les villes ou ilz paſſoient, les cytoiens de dedens, gens degliſe & autres venoient au deuant aux croix & relicques chacun au mieulx quilz pouoient, & fur le chemin vint tant de gens au deuant de luy que quant il arriua a Londres il auoit plus de ſix mil cheualx tous empoint pour l'accompaigner & aider. En celluy estat vindrent a Londres, & deuez ſcauoir que le iour quil y arriua toutes gens eſtoient ſi reſiois a Londres que nul homme de meſtier ne faisoit oeuvre emplus que le iour de Paſques, & furent fermees toutes boutiqueſ excepte les tauernes.

Quant le duc de Lencaſtre eut eſte trois ou quatre iours dedens Londres, fut aduiſe que lon renuoiroit en Bretagne les gens que le duc auoit baillez au duc de Lencaſtre pour le conduire, car ceulx de Londres ſe diſoient aſſez puiffans pour conduire ceſt entreprinſe, ſans ayde d'aultruy. Si furent deſpeſchez les gens darmes de Bretagne, & les remercia le duc de Lencaſtre, & leur fiſt moult de beaulx preſens. Puis ſen retournerent a Pleumonde ou leurs nauires eſtoient, & de la paſſerent iuſques en Bretagne.

Les habitans de Londres ſe delibererent a eulx mettre en armes pour acompaigner le duc de Lencaſtre & icelluy mettre aux champs, car ilz auoient tous iure quilz le feroient leur roy. Si furent tantost montez a cheual douze cens hommes tous armez avecques le duc de Lencaſtre, leſquelz partirent de Londres & cheuaucherent vers Briſto, & ainſi quilz cheminoient tous le pays ſefmouuoit & croiſſoit grandement la compaignie.

QUANT ces nouuelles furent venues en loſt du roy Richard qui eſtoit a Briſto, il fut moult eſbahy & non ſans cauſe, car ceulx qui eſtoient avecques luy, voire des plus prochains, labandonnerent & partirent ſans conge, & ſe ren-

dirent a loſt du duc de Lencaſtre, & entre autres ſe y rendirent Offrem de Cloceſtre filz au duc de Cloceſtre que le roy Richard auoit fait occire a Calais, & Richard d'Arondel filz au conte d'Arondel a qui le roy Richard auoit fait couper la teſte, leſquelz eſtoient avecques le roy Richard; mais ilz labandonnerent & ſe rendirent au duc de Lencaſtre qui gracieuſement les recueillit.

Le roy Richard voyant ces nouuelles fut moult eſbahy & congnot bien que ſa puiffance eſtoit nulle, car chacun labandonnoit; les archiers meſmes de ſa garde le laiſſerent tellement que avecques luy ne demoura pas deux cens perſonnes; il vit bien quil ny auoit remede que de ſauluer ſa perſonne ſi poſſible luy eut eſte. Et pource quil neſtoit pas ſeulement en la ville de Briſto, ſe retira en vng chaſtel qui eſt fort chaſtel, qui eſt ſur ces marches que lon appelle le chaſtel de Flinch. Le duc de Lencaſtre qui en fut aduert, fiſt tyrer ſon armee celle part, & quant il fut a vne lieue dudict chaſtel de Flinch, il fiſt la arreſter ſon armee & partyt a tout deux cens hommes & vint a la porte du chaſtel de Flinch, vng matin enuiron dix heures, & demanda a parler au roy pour releuer de luy ſa duchie de Lencaſtre.

### Comment le duc de Lancaſtre print dedens le chaſteau de Flinch le roy Richard & l'emmena a Londres.

LE roy Richard qui eſtoit audit chaſteau & nauoit avecques luy que xii cheualiers qui eſtoient de ſon eſtroit conſeil, qui luy conſeillerent de ouuir la porte au duc de Lancaſtre & a douze de ſes gens ſeulement. Si y entra ledit duc de Lancaſtre luy douziesme, & quant il fut entre on le mena deuant le roy, & quant il vit le roy il ne fiſt aucune reuerence, mais luy demanda: Monſeigneur, eſtes vous encores a ieun. Le roy reſpondit: Ouy, il eſt encores aſſez matin, pourquoy le dictes vous? Pour ce, diſt le duc de Lancaſtre, que vous auez a faire un grant chemin. Et quel chemin, diſt le roy? Il vous fault venir a Londres, diſt le duc de Lan-

castre. Si vous conseille que vous disnez pour auoir meilleur couraige. Si furent les tables couuertes & disna le roy bien en diligence. Quant il eut disne il se mist a la fenestre du chafstel & vit que le pays estoit tout couuert de gens darmes, & demanda le roy : Mon cousin, quelz gens sont ce icy. Et il respondit : Ce sont les habitans de Londres qui vous veulent auoir & mener a Londres, & mettre en la grosse tour, & ny pouez eschapper, encores estes en danger de pis auoir. Et il dist : Mon cousin, ie vous prie que me sauuez la vie & ie me rens vostre prisonnier. Bien, se dit le duc de Lancafre, mais si voz gens qui icy sont ne se rendent semblablement a moy ilz feront en danger de leurs vies. Si se rendirent les gens du roy au duc de Lancafre, & furent cheuaulx scellez & bridez, & fut le roy mis a cheual & ses gens semblablement prestz a par-tyr. Si fist le duc de Lancafre mestre hors du chasteau lung de ses gens, qui fist crier parmy lost a son de trompe que le roy Richard & gens estoient ses prisonniers, & quil les emmenoit a Londres, & fist faire deffences sur paine de la hart de non leur toucher ne leur dire chose deshonneste.

Ainsi que le roy & le duc de Lancafre descendoient du chasteau, aduint vne chose singuliere. Le roy Richard auoit vng leurier que lon appelloit Math, & ne vouloit ce chien congnoistre homme fors le roy; quant le roy voulut cheuaucher, celui qui lauoit en garde le lessoit aller, & ce leurier venoit faire chere au roy & non a autre, & luy mectoit les pieds sur ses épaules. Adonc aduint que le roy & le duc de Lancafre parlans ensemble en la court du chasteau de Flinch, le leurier sen vint au duc de Lancafre & luy fist toutes telles contenances que par auant il auoit acoustume de faire au roy, & luy assist les deulx pieds sur le col. Le duc de Lancafre demanda : Que veult ce leurier faire? Cousin, dit le roy, ce vous est bonne signifiante & a moy mauuaise. Le leurier me donne a entendre que vous estes roy d'Angleterre ou que vous le ferez, & ien feray depose. Si le tenez, cousin, lez de vous, car vous le trouuerrez bon singulierement & de vroye nature.

Le duc de Lancafre retint de ceste heure le leurier, lequel depuis ne voulut fuyuir le roy Richard. Si monterent les princes a cheual & toute la compaignie & en ceste maniere arriuerent & par hors la ville entrerent dedens le chasteau, & furent roy Richard & ses gens mis en la grosse tour, & tous ceulx de larmee sen retournerent chascun en sa maison.

Quant le duc de Lancafre eut mis son cousin le roy Richard dedens la grosse tour de Londres & ceulx de son conseil, il enuoya messagiers deuers le conte de Varuich, qui estoit forbany, & le conte de Northombelonde & son filz, & fist prendre & mestre en prison les quatre cheualiers qui dune toaille auoient estrangle a Calais son oncle le duc de Clocestre. Si fut assemble le conseil d'Angleterre, pour scauoir ce que lon deuoit faire de ce roy Richard.

**L**E grant conseil d'Angleterre fut assemble a Londres, & fut examinee la vie du roy Richard qui par le temps de xxii ans auoit regne roy d'Angleterre, & trouuerent que durant son regne il auoit commis vingt huyt enormes cas dignes de punicion capital, sil neust este roy, lesquelz furent redigez par escript en beaulx articles, on luy leust les articles, lesquelz il confessa estre vroyz; mais il se voulut excuser, disant que ce quil en auoit fait, il lauoit fait & fait faire par conseil & non aultrement, cuidant que on le excusast pour charger son conseil, autre chose ne respondit. Sur quoy les iusticiers de Londres se retirerent en leur consistoire, & tantost declarerent par leur sentence que les quatre cheualiers qui auoient estrangle le duc de Clocestre auoient les testes coupees, & fut ladicte sentence executee au pied de la grosse tour, & tout ce voyent, le roy Richard & les aultres de son conseil qui avecques luy estoient en prison.

Quant ces quatre cheualiers eurent este executez comme auez ouy, ceulx qui estoient prisonniers avecques le roy Richard luy dirent : Sire, noz vies sont en grant danger, vous voiez que de xii que nous estions avecques

## Le quatriesme

vous, les quatre sont vilainement executez & mors. Nous autres nattendons que l'heure que ainsi ne nous prengne : Dieu nous seroit grace si nous mourions ceans de mort naturelle, & non pas de mort honteuse. A ces motz commença le roy a plorer tendrement & tordre ses mains, & mauldire l'heure que iamais il auoit este ne pour prendre telle fin, si que les autres en eurent grant pytie, & luy dist lung deulx : Sire, il vous faut reconforter, Dieu vous monstre bien quil est le maistre, car autant luy sont les petiz que les grans. Si vous pouez sauuer vostre vie & les nostres, ce seroit bien exploicte, vous voiez que les Londriens veulent couronner vostre cousin de Lancastre roy d'Angleterre. Or nest possible de le faire que vous soiez en vie, si vous ne consentez que il puisse estre couronne. Si vous mectons en termes pour le meilleur que vous mandez le duc de Lancastre venir parler a vous, & luy venu, luy direz par douce parolles que vous voulez la couronne d'Angleterre & tel droit que vous y auez eu iusques icy au royaume, resigner purement en ses mains & voulez quil soit roy, & par ce moyen vous adoulcirez & appaiserez les Londriens, & puis apres vous luy prierez quil vous laisse icy viure ou ailleurs & nous aussi, & parfaire le cours de noz vies ou enuoyer hors d'Angleterre comme banniz, car qui pert la vie il pert tout.

Le roy Richard trouua ceste ouuerture tres bonne : si dist aux gardes quil prioit son cousin de Lancastre quil venist parler a luy, & que voluntiers il luy diroit quelque chose qui luy touche grandement.

Les nouuelles vindrent au duc de Lancastre que le roy le demandoit. Tantost partit secretement & vint au chasteau de Londres par deuers le roy qui estoit en la grosse tour. Si luy dist le roy : Cousin, iay & considere mon estat, & voy que ie ne vaulx pas pour iamais tenir royaume ne peuple gouverner, & pleust a Dieu que il me ostast de ce monde, & que le roy de France tenist sa fille; ie congnois mes deffaultes qui requerent griefue correction. Toutteffoys ie veulx, sil vous plaist, vous resigner la couronne ensemble le royaume, & vous

prie quil vous plaise accepter & prendre ce don.

Quant le duc de Lancastre eust ouy ceste parolle, il respondit & dit : Monseigneur, il conuiendroit pour ce faire, assembler les estatz d'Angleterre. Iay escript & mande de toutes pars venir prelatz, princes, nobles & suppostz de bonnes villes, & croy que dedens troys iours le aurons en assez suffisant nombre pour faire celle resignation, & croy que cela sera cause de adoulcir grandement le royaume d'Angleterre que tresmal auez traicte par cy deuant, vous auez trop ayme les Francoys, & auez tendu a faire vne paix a la confusion & honte de vostre royaume, & ceulx qui le vous ont remonstre auez fait villainement mourir; le sang en crie vengeance deuant Dieu qui vous enuoye visiter. Et quant a moy ie vous ay prins & vous deffendray & alongeray vostre vie par pytie tant que ie pourray & prieray tout le peuple pour vous. Grant merciz, dist le roy. Ie me confie plus en vous que a tout le demourant d'Angleterre. Si print le duc de Lancastre congie du roy & sen retourna a son logis.

**C** Comment es plains estatz d'Angleterre, le roy Richard se desista & desmist de la couronne royalle d'Angleterre au prouffict de Henry de Lancastre.

**L**E lendemain arriuerent a Londres le duc d'Yorch, le conte de Rostellent son filz, le conte de Northombelande & son frere, & grant nombre d'archeuesques, euesques & abbez, ausquelz le duc de Lancastre fist bonne chere. Si vindrent touz en bel ordonnance au chasteau de Londres, & fut le roy mis hors de la grosse tour & vint en la salle du chasteau qui tendue estoit moult richement. Si estoit le roy vestu de ses abillemens roiaux, la couronne sur la teste & le ceptre en la main, & se assist en la chayre royalle qui la estoit tendue. Et dist a haulte voix tellement que chascun le pouoit entendre :

Iay este roy d'Angleterre, duc d'Acquitaine & seigneur d'Irlande par le temps de xxii ans, &

si vous declaire a touz vous qui estes & presentez les suppostz des troiz estatz du royaume que liberallement & sans aucune induction ou contraincte, ie resine purement & quietement le royaume, ensemble la duche & la seigneurie deffusdictes, a mon cousin Henry de Lancastre qui cy est present, & luy prie que il en accepte la resignation & que en signe de possession il prenne le ceptre. Adonc tendit il le ceptre au duc de Lancastre qui le print, puis le bailla à l'archevesque de Cantorbie; puis apres le roy Richard print sa couronne & la mist deuant le duc de Lancastre & deuestit son manteau royal, & le tout fut baillie a l'archevesque de Cantorbie qui mist tout au coffre ou lon auoit acoustume de mettre les abitx royaux. Et la resignation ainsi faicte, le duc de Lancastre appella vng notaire publicque qui la estoit, & en demanda auoir lettres es presences des princes, prelatz & autres seigneurs qui la estoient.

Si sen retourna Richard de Bordeaulx en la grosse tour, & tous les autres seigneurs sen retournerent tous chascun en sa maison.

### **C** Du couronnement du roy Henry de Lancastre en Angleterre & de son sacre.

**L**E dernier iour de septembre lan mil ccc quatre vingts dixneuf, furent tenuz au palais de Woemonstier, qui est hors de Londres, les estatz & parlement d'Angleterre: present Henry de Lancastre, duc de Lancastre, lequel requist & demanda estre couronne roy d'Angleterre, pour tenir & possider le royaume dorenavant & ses enfants & heritiers apres luy, disant ledit royaume a luy appartenir pour trois raysons.

Premierement, par conqueste & faiz darmes.

Secondement, pour ce quil disoit estre le vray heritier du royaume.

Et tiercement par ce que Richard de Bordeaulx luy auoit resine le royaume & sen estoit desmis a son prouffict, en plains estatz. Si demandoit aux suppostz des estatz du pays que sur ce ilz declairassent leur volonte. Et incontinent respondit le peuple tout a vne voix quilz

vouloient quil fut roy d'Angleterre & non autre. Et lors se assist le duc Henry en siege royal & incontinent quil fut assiz, tout le peuple luy tendit les mains en luy promectant foy & loyaulte iusques a viure & mourir pour soutenir sa querelle comme a leur roy. Et lors furent les estatz & le parlement & les estatz conclutz.

Le iour de sainct Edouard, qui fut le lundy troysiesme iour doctobre prochain ensuyuant, fut assigne le iour du couronnement de Henry duc de Lancastre. Si partyt de son palais de Woefmonstier & vint a Londres avecques plusieurs princes & cheualiers; il auoit ordonne affaire cinquantesix cheualiers, lesquelz se baignerent tous celle nuyt en chascun son baing, & le lendemain, a la messe, les fist cheualiers & leur donna longues cottes vertes, a estroictes manches, fourrees de menu ver en guyse de prelatz, & auoient lesdicts cheualiers sur l'espaule fenestre vng double cordon de foye blanche a blanches houppes, & celuy iour apres disner partyt Henry de Lancastre du chasteau de Londres & vint tout nu teste au chasteau de Woefmonstier, & auoit a son col la deuise du roy de France & estoit acompaigne triumpamment, & en cest estat passa parmy la ville de Londres, & celuy iour par la ville festes & ioyes faictes, mais les Angloys noublierent pas a boyre dautant.

Celle nuyt fut baigne a Woefmonstier le duc Henry de Lancastre & le lendemain se confessa, dont il auoit bon mestier, car il ne lauoit este depuis Pasques, & puis ouyt troys messes. Si vint le clerge de lesglise de Woefmonstier le querir au palais & fut mene & conduit du palais a ladicte esglise & pres de luy estoient les ducs, princes & barons d'Angleterre vestuz de longues houppelandes descarlate & longs manteaux fourrez de menu ver & grans chaperons aussi fourrez de mesme, & sur le duc de Lancastre portoient quatre bourgeois de Doure vng ciel de drap dor & des deux costez de luy lon portoit deux espees nues, l'une estoit lespee de leglise, que le filz du duc de Lancastre portoit, & l'autre estoit lespee de iustice, que le conte de Nortombellande con-

## Le quatriesme

nestable d'Angleterre portoit, & le mareschal d'Angleterre corte de Westmelay portoit le ceptre, & enuiron neuf heures entrerent en cest estat en leglise de Woefmonstier.

Quant le duc de Lancastre fut entre en l'eglise, il vint ioignant le maistre autel pour estre sacre, & y auoit pour ce faire, deux archeuesques & dix euesques & la deuant lautel fut desuestu des abiz royaulx & fut mis tout nu iusques a lendroit de la saincture, & en present fut oinct & sacre. Cest assauoir sur le chef, en la poiétrine, sur les deux espaulles & derriere entre les espaulles, & es mains. Et puis on luy mist vng bonnet sur son chef, & ce pendant que on le sacroit & oignoit le clerge chantoit la letanye & tel office que lon dit a la benediction des fons. Et fut le roy vestu des draps de l'esglise comme diacre & luy chaussa lon vng veloux de vermeil, comme a vng prelat, & puis vng esperon a vne poincte sans mollette, & fut lespee de iustice tyree hors du fourreau & la fut beniste & puis baillee au roy qui la remist au fourreau, & luy fut seincte lespee & puis fut la apportee la couronne du roy sainct Edouard dont ledit Henry fut par larcheuesque de Cantorbie couronne. Et apres que la messe quil ouyt fut dicte, le roy vint au palais. Et tantost fut le disner prest & tables dressees; & apres disner chascun se retyra chez soy, mais non pas sans bien boire.

Touchant lestat de la ieune royne d'Angleterre il fut si brise que on ne laissa delez elle homme, femme ne enfant; touz furent mis hors, & ceulx de sa nation de France & ceulx de la nation d'Angleterre, & fut son estat renouvelle de dames & de damoiselles, dofficiers & varietz: elle se tenoit pour lors a Ledos, qui est vng chastel de plaissance assez prez de Londres, & tous ceulx que elle auoit auparauant & ceulx que depuis elle eust furent aduertiz & leur fut deffendu sur leurs vies, que ne feissent quelconque semblant de couroux vers la royne & de parler du roy Richard son mary: & fut la dame de Coucy & les Francoys, hommes & femmes que elle auoit avecques elle, enuoyez & conduiz en France, & furent payez plus que promis ne leur auoit este.

**C** Comment le roy Charles sixiesme, roy de France, fut aduertiz de la degradation du roy Richard d'Angleterre mary de sa fille.



A couroient en France les nouvelles de ces oultraiges que on faisoit en Angleterre: mais lon nen pouoit sauoir la certaine verite, pource que les passaiges estoient gardez.

Quant la dame de Coucy eust passe la mer & descendue a Bouloigne, elle hastia son affaire tellement que elle fut en troys iours a Paris, & se tyra a lostel de son mary le sire de Coucy; incontinent fut mandee venir a lhostel de saint Pol, par deuers le roy qui luy demanda de lestat du roy d'Angleterre & de sa fille; la dame ne le luy osa celer; mais luy recita de mot a mot toutes les nouvelles comme cy deuant auez ouy reciter & dire.

Quant le roy de France sceust ces nouvelles, si luy furent moult desplaisantes, car il scauoit les Angloys durs & merueilleux, & entre autres ces villains godaliers de Londres, qui sont pires & plus traistres que on ne scauroit reciter; le plus perilleux peuple qui soit au monde & le plus oultrageux & orgueilleux; ilz sont puiffans de mises & de gens, & se dient cheffz d'Angleterre, mais on les deust plus tost appeller chiens, ilz treuent bien du cloz de la ville de Londres, vingt quatre mil hommes armez de pie en cap & bien trente mil archiers quilz feront sortyr de leur ville du iour au lendemain; par quoy fut le roy de France moult trouble quant il sceust quilz estoient abandonnez du duc Henry de Lancastre contre le roy Richard son beau filz.

Le roy de France auoit este en fort bon point par vng long temps, mais il fut si courouze & si trouble de ces nouvelles quil retourna en sa maladie de frenaisie, dont les princes de France & touz autres furent amerelement courouzez.

Aduise fut par les princes de France, & ceulx de son conseil que lon enuoyeroit a Bordeaux & aulx fortes places de Guyenne pour scauoir comment ilz se voudroient porter &

se ilz se vouldroient point rendre au roy de France, car le roy Richard fut ne a Bordeaulx, & moult ilz laimoient, aussi faisoit il eulx & ceulx de Bayonne, Daux & des limites de Bordeaulx semblablement. Si y fut enuoye le duc de Bourbon qui vint iusques a la cite d'Agén pour traicter aux Bordelais, mais les Angloys y auoient ia pourueu, si sen retourna le duc de Bourbon sans riens faire.

Les princes & gens du grant conseil de France aduiferent pourtant que le roy auoit reprins sa maladie pour le grant ennuy de sa fille royne d'Angleterre, que le sire Dalbret & messire Charles de Hangest yroient en Angleterre pour veoir & scaoir lestat de la royne. Si partyrent de Paris & tyrerent a Bouloigne, & enuoyerent deuant vng herault pour auoir sauf conduyt du roy d'Angleterre, lequel herault fut soudainement despesche & retourna a Bouloigne avec son saufconduyt; ilz monterent sur la mer & descendirent a Douure, & la trouuerent vng cheualier de lostel du roy d'Angleterre qui estoit de leur congnoissance, qui les recueillit & les mena deuers le roy Henry quilz trouuerent a Alten. Et quant ilz eurent monstre au roy Henry leur charge, le roy leur respondit : Je ne veulx empescher que vous ne voiez la royne ma cousine, mais gardez que ne luy parlez pour quelque propos qui suruienne de Richard de Bordeaulx, ne vous ne personne des vostres. Si vous faictes le contraire soiez tous certains que vous courroucerez le pays d'Angleterre grandement & seroient voz vies en danger. Les deux ambassadeurs respondirent que nullement nyroient contre ses deffences, mais quilz eussent veu la royne & parle a elle, ilz se mectroient au retour.

Si furent menez deuers la royne & eurent ensemble plusieurs propos des nouvelles de France, puis apres prindrent congie d'elle & retournerent par deuers le roy Henry a Alten.

Quant ilz eurent parle au roy & demande leur congie pour eulx en retourner, le roy le leur donna voluntiers & leur fist plusieurs beaulx dons, & leur dist au departement : Messieurs les ambassadeurs, dictes a touz ceulx

qui cy vous enuoyent, que ma cousine la royne d'Angleterre naura ia mal ne encombrer, & tousiours tiendra son estat bien ordonne & iouyra de touz ses droitz, ainsi que promis a este en faisant son mariaige. De ces parolles dictes de la bouche du roy se contenterent les cheualiers, si sen partyrent, passerent la mer & furent deffroiez en Angleterre par touz les lieux ou ilz passerent. Et tant exploicterent quilz vindrent a Paris ou ilz trouuerent le roy & la royne & les seigneurs de France auquelz ilz rapporterent tout ce quilz auoient veu & trouue.

**P**OUR retourner aux affaires d'Angleterre, plusieurs argumens & questions furent entre les paisans de Londres & les principaulx de la ville, qui a toute heure remonstroient au roy Henry que si Richard de Bordeaulx viuoit encores gueres longuement, le roy Henry se pourroit trouuer en necessite, & luy disoient : Sire, la nation d'Angleterre & mesmes nous autres de Londres ne sommes pas les plus feaulx que on sache trouuer, car nous scauons bien quelque serment que nous ayons fait, si y en a il plusieurs qui ayment mieulx Richard de Bordeaulx que vous, & tost seroient esleuez contre vous, si quelque grant chef comme le roy de France qui est son beau pere, vouloit en entreprendre la querelle, & nous semble que tant quil sera en vie, vostre regne ne fera en seurete, & sommes daduis que on le doit tuer & mectre a mort. Le roy Henry leur respondit : Je vous aduertiz que iay moult grant pytie de luy. La prison quil feuffre suffit assez pour pugnacion des cas quil a commis, il sest rendu a moy par ce que ie luy ay promis faulner la vie, ie luy tiendray promesse iusque a ce que ie voye quil soustienne quelque querelle contre moy, ou que le roy de France ou aultre se vueille esleuer pour son party contre moy. Cestoit ce que le roy Henry leur respondit.

Le conte de Hastidonne frere de Richard de Bordeaulx, qui auoit a femme la fille de Lancastre seur du roy Henry, & le conte de Salbery ne pouoient oublier le dueil quilz auoient

## Le quatriesme

de lennuy de Richard. Si se tyrent vers Acquefort, & par deliberation de conseil quilz eurent ensemble, entreprendrent de mettre le roy Henry a mort & de le tuer, & deliurer Richard de Bordeaulx; & pour ce faire aduiferent que ilz feroient vnes iouxtes de vingt cheualiers dedens & xx escuiers, & que la feste se tiendroie a Acquefort, & prieroyent le roy de y venir, & la loccroyent, car ilz entendoient la estre les plus fors, & auoyent de leurs aliances le conte de Kent & le seigneur Despencier lun des plus grans barons d'Angleterre. Et vint le conte de Hastidonne a Windesore, prier le roy Henry quil se y voulsist trouuer, ce quil leur promist, car il ne scauoit encores rien de leurs entreprinse. Toutefois, le iour quil deuoit partyr pour y aller, luy fut reuelee ceste secreete entreprinse: a celle cause ny fut point & furent les iouxtes faictes sans luy.

**Q**UANT les contes de Hastidonne & de Salbery, & le conte de Kent & le seigneur Despencier virent quilz auoyent failly a leur entente, & que ia le roy estoit aduertie de leur entreprinse, ilz se delibererent daller par le royaulme d'Angleterre esmouuoir le pays, & disoyent quilz ne scauroient auoir si petite bende de gens, que ce ne fust assez pour faire passer les Francoys & les recepuoir au pays, & que silz pouoyent ilz prendroient le roy. Si assemblerent quelque nombre d'Angloys, & voulurent venir a Windesore prendre le roy qui y estoit, & leussent prinse bien facilement sil ne sen fut party, car on l'aduertit de leur venue, si sen partyt & tyra vers Londres ou il se sauua.

Les dessus nommez aduertiz que le roy nestoit plus a Windesore, sen retournerent a Souffestre, qui est vne grosse ville d'Angleterre, avecques leur host qui ia estoit moult grant, & le lendemain le conte de Salbery & le seigneur Despencier partyrent dauec les contes de Hastidonne & de Kent pour aller deuers le seigneur de Vercler le gagner & dautres seigneurs du pays. Les contes de Hastidonne & de Kent voulurent gagner pour leur entreprinse & par belles parolles le bailly & les ha-

bitans de Souffestre, mais ilz ne peurent, & quant ilz virent que par beau ne les pouoyent auoir, ilz se misrent en armes & voulurent brusler la ville, mais ceulx de la ville furent les plus fors, & tellement combatirent dedens la ville que les contes de Kent & de Hastidonne furent tuez & la pluspart de leurs gens, & les autres furent prins; le bailly fist apporter en plain marche les corps desdictz deux contes, puis le leur fist couper les testes, lesquelles il enuoya par vng varlet & vng cheual ainisque on porte maree a Londres pour resiouyr le roy & les godaliers de Londres; pareillement furent prins le conte de Salbery & le seigneur Despencier par le seigneur de Vercler, qui leur fist trencher les testes & les enuoya semblablement a Londres.

### **C** Comment en celuy temps la conte de Millan fut erigee en duche.

**A**UIRON celuy temps regnoit aux Allemaignes vng empereur nomme Wentzelaus, lequel fist de la conte de Millan vne duche.

### **C** De la mort du duc Jehan le conquerueur & comment il porueut a la garde de ses enfans.

**L**E noble duc de Bretagne Jehan, cinquiesme de ce nom, trespassa en la ville de Nantes le premier iour de novembre, lan mil ccc xcix, qui estoit la feste de Toussaincts. Et fut honorablement inhume au cueur de leglise cathedrale de Nantes. Il fut prudent & preux entre touz roiz & aultres princes tant chrestiens que infidelles, en maniere que depuis son trespas il a este & fera a iamais appelle le duc Jehan le preux & le conquerueur; il na pas seulement deffendu sa duche, mais la conquise par faiz darmes & par prouesse au moyen du bon droit quil y auoit ainque Dieu luy a monstre par la grace quil luy a impartie de ce faire & pour la gloire qui appartient a sa vertueuse personne. Iay bien voulu au long examiner & par es-

cript rediger plusieurs grans faiz darmes qui, durant son temps & son regne, sont suruenuz es royaumes de France, d'Espaigne & d'Angleterre, pour ce que en aucuns diceulx faiz darmes est de luy faicte mencion comme cy deuant auez peu veoir. Il delaiissa sa vesue dame Iehanne de Nauarre & du mariage de luy & delle iiii filz & iiii filles il eust : Iehan qui fut duc, Artur qui depuis fut duc & conestable de France, Richard qui fut seigneur de Clifson, & Gilles qui mourut ieune enfant; les filles furent : la première, Marie, que Alain vicomte de Rohan espousa; la ii<sup>e</sup> fut femme du premier duc d'Alencon, & la iii<sup>e</sup> fut mariee au conte d'Erminac.

Le duc Iehan le conquereur au temps de son trespas laissa ses enfans moult ieunes; a ceste cause il ordonna que le duc de Bourgoigne, comme leur plus prochain parent, fut leur gouverneur, & avecques luy le conestable de Clifson, quil congnoissoit vertueux cheualier.

Bien tost apres fist le duc de Bourgoigne reparer le chasteau de Nantes & y fist faire vne tour que lon appella la tour de Bourgoigne, laquelle iay veue sur bout, & a este abatue du temps du dernier duc, pour reparer le chasteau.

Jay leu en quelque abregee cronicque, que alors que le duc trespassa, Messire Oliuier de Clifson, conestable de France, estoit en son chasteau de Joffelin, & y estoit aussi dame Marguerite de Clifson sa fille, laquelle aduertye que le duc estoit trespasse & comment il auoit ordonne son pere a la compagnie du duc de Bourgoigne administrateur de ses enfans, elle se retyra au plus matin en la chambre ou son pere estoit encores couché, lequel estoit moult dolent du trespas du duc, & luy dist sa fille : Monseigneur mon pere, or ne tiendra il plus que a vous si mon mary ne recouure son heritaigne de Bretaigne; nous auons de si beaulx enfans, mon seigneur, ie vous supplie que vous nous y aydez. Par quel moyen se pourroit il faire, dist son pere. Ha, dist la dame, vous scauez comment le feu duc qui tant nous a fait de tort & de dommaige est trespasse & si vous

a ordonne le gouvernement de ses enfans avec le duc de Bourgoigne; par ce moyen seront lesdictz enfans entre vos mains, lesquels vous pourrez faire mourir secretement, deuant que le duc de Bourgoigne vienne par deca. Et en ce faisant sera nostre heritaige recouuert.

Ha, ce dist le conestable, cruelle & peruerse femme, si tu viz longuement tu feras cause de destruyre tes enfans dhonneur & de biens. Et en ce disant, il faist vng espieu quil auoit aupres de son lect & en cuyda enfermer sa fille; mais pour fuyr a la fureur de son pere elle se hasta tellement de deualer les degrez que tomba & se rompit une cuyffe dont depuis elle boeteusa. Le bon conestable luy predist ce que luy aduint, car par ses oultrageuses entreprinse elle destruisit ses enfans moult scandaleusement comme vous orrez cy apres.

**C** Comment le roy de France, apres le trespas du duc, enuoya le duc d'Orleans son frere sur les Marches pour cuyder recouurer les enfans du duc & en auoir la garde.



**L**ANTOST apres le trespas du duc le roy Charles sixiesme enuoya le duc d'Orleans son frere avecques vng nombre de gens darmes a Pontorson, qui est sur les Marches de Bretaigne pour que les barons & seigneurs de Bretaigne luy voulussent bailler entre ses mains les ieunes enfans du feu duc qui estoient a Nantes, & tendoit a les amener en France deuers le roy, disant pour ce quilz estoient myneurs que la garde en appartenoit au roy de France. Et furent les barons & grans personnaiges de Bretaigne a Pontorson par deuers le duc d'Orleans. Si luy remonstrerent que le feu duc leur pere auoit pourueu au gouvernement de ses enfans touchant ladministration de leurs personnes & de leurs pays & seigneuries, & quant ores il nen auroit pourueu le roy ny auoit que veoir, car iamais luy ne ses predecesseurs roiz de France neurent ce droit en Bretaigne : mais appartenoit aux suppostz du pays a y pourueoir; & a toute ceste responce sen retourna le duc d'Or-

## Le quatriesme

leans tout itel quil estoit venu, sauf quil emporta avec luy deuers le roy bonnes seurtez par gardes autenticques des trois Estatz de Bretagne que ilz ne prendroient point d'autre party de mariaige pour leur ieune duc que madame Iehanne de France, fille du roy.

**O**R retournons es affaires de Angleterre. Le roy de France fut aduertie comment le roy Henry d'Angleterre auoit fait trencher les testes aulx contes de Hastidonne, de Salbery & de Kent & au seigneur Despencier, qui auoient entrepris a occire le roy Henry & a mettre hors de prison le roy Richard de Bordeaulx, car le roy de France leur eust voluntiers ayde a leur entreprinse dont lauoient aduertie. Et a celle cause auoit fait descendre grant nombre de gens darmes sur les frontieres de Picardie & de Boulenoys, & fut grant bruyt en Angleterre que ilz vouloient passer la mer & y descendre. Si dirent les vilains de Londres au roy Henry : Aduisez vous, sire, car les Francoys monstrent quilz veullent la guerre; ia sont a Harfleu messire Charles Dalbret & le conte de Sainct Pol qui sont leurs pouruoyances de nauires pour passer la mer. Tant que Richard de Bordeaulx viue vous ne le pays ne ferez asseurez.

Le roy leur respondit : Ie croy que vous dictez la verite, mais quant a moy, ie ne le feray ia mourir tant que apparu me soit quil me aura fait trahison.

Depuis ne demoura gueres que le roy Richard de Bordeaulx fut trouue mort; la cause comme ce fut ie ne lay point trouuee escripte, mais lon peut assez supposer qui ce auroit fait. Apres que le roy Richard de Bordeaulx fut mort, il fut couche sur vne litiere dedens vng chariot couuert de drap noir, & estoient iiii cheuaults noirs attellez audit char, & deulx varletz vestuz de noir qui suyuoient ledict char. Et ainsi fut amene de la grosse tour de Londres tout au long de Londres par la rue du Cep, & la se arresterent deux grosses heures & plus de trente mil personnes le vindrent regarder sur la litiere ou il gysoit mort, le visage descouuert : les aucuns en auoient pitie, & les autres non.

### Exhortation singuliere a touz princes a lexemple de ce roy Richard de Bordeaulx.

**O**R confiderez, roiz, ducs, contes & toutes gens de hault sang & lignaige, comment les fortunes de ce monde tournent en diuerses manieres, combien que si vous entendez sainement ces affaires vous direz que a proprement parler fortune na pas este celle qui a deffait ce puissant roy Richard qui ia auoit regne xxii ans en grande prosperite, mais luy mesmes a pestry le leuain dont il a mange le pain, par ce quil ne cest voulu submeetre a la raison, mais enuers touz estatz a este defregle.

Iay leu que oncques roy d'Angleterre ne descendit a cent mil angeloz pres par an pour son estat seulement & hostel entretenir que fist en son temps par chascun an celuy roy. Il deuoit retenir en sa memoire la maniere de viure du prince de Galles son pere qui, pour fournir a loutrageuse & excessiue despense que luy & sa femme faisoient a Bordeaulx, ou ilz se tenoient, furent conseillez de tailler le peuple de Guyenne, lequel, a cause de la taille, se rebesla & semeust tellement quilz en chasserent hors les Angloys & que que soit en eurent dure guerre qui dura longuement.

**Q**U'EST roy Richard icy auoit plusieurs inhumaines conditions & en la fin se excusoit sur son conseil, qui est bien pouure excuse, car ie tiens & est verite que oncques ceste proposition ne fut & ne sera vraye. Il est bon prince & saige, mais il a de mauuais conseillers, cela est faulx, car veritablement touz princes, quelz quilz soient, ont des conseillers & gens autour deulx telz que les princes mesmes sont; silz sont bons & saiges, ilz trouueront foeson de gens bons & saiges pour les conseiller, & ia aupres deulx ne tiendront faulx ne mauuais conseillers, & si les princes sont inhumains, tyrans & infaciabes, ia pres deulx ne souffriront auoir credit ne approcher homme raisonnable, liberal, ne de prudent conseil, mais auront seruiteurs de mesmes eulx pour les seruir

felon leurs voluntez, fans compassion auoir de lindigence de leurs subiectz.

**L**A vertu, qui plus fait aymer le prince & fans laquelle il nest iamais ayme, defailloit en ce roy Richard; cest la vertu de liberalite: il vendoit a pris dargent ce que ses predecesseurs roiz souloient par gracieuse liberalite departyr & donner, & pour soubstenir ses iniques voluntez, il auoit autour de luy gens 10 clerics grandement lettrez qui disoient que par leurs droiz les princes peuent licitement ce

faire, & se fondoit en ces damnables conseilz, & gueres ne bailloit estat a personne quil nen eust quelque pris, & entre autres estatz combien que loffic de conestable dAngleterre appartienne par heritage au duc de Clocestre, & que par la mort de celuy qui fut estrangle a Calais, celuy office appartensist a son filz & heritier: ce neantmoins fans forme de proces ne de iustice le roy Richard bailla l'office au conte de Rostelant, moyennant vne grande somme de nobles dor quil luy en bailla. Et bien plus, car ce roy Richard auoit impose de



son temps vng tribut nouuel sur les marchans de son royaulme qui estoit tel que de toutes 15 les marchandises quilz vendoient il en auoit de cent liures treze, dont le peuple, qui auoit acoustume de viure en franchises & exemptions, se trouuoit fort greue, & aussi retint a luy la succession du duc de Clocestre, en fit son 20 prouffict, & ne eurent ses enfans riens parquoy puis ie bien dire que en son fait ny a riens de fortune, car fortune est vng fait inopine, qui suruient aux gens sans quelconque apparente preuision selon la diffinition de Quintilian au 25 liure *De causis*; mais ce roy Richard tenoit le chemin & tendoit de toute sa force a paruenir

a la fin quil a prinse. A quoy touz princes du monde, soient deglise ou seculiers, doiuent, ce me semble, prendre exemple, car ainsi quil est note en la glose ordinaire en lautenticque *des mandemens des princes* au paragraphe *Hac igitur*: Celuy est eureux & doit estre sage appelle que la periclitacion & trebuchement daultruy corrige & reprime de mal viure. Or, retournons a nostre hystoire de Bretagne.

**C** Comment le duc Jehan de Bretagne cinquesme de ce nom fist son entree a Rennes.

**L**EHAN cinquiesme de ce nom, filz aïfne du duc Iehan le preux & le conquerant, print en la ville de Rennes aux ferries de Penthecouste lan mil quatre cens les insignes du duc de Bre-  
 taigne; les contes, prelatz, barons & autres nobles personaiges du pays y furent en telle solennite que a ses predecesseurs ducs de Bre-  
 taigne auoient este. Et la fist le duc les sermens que les ducs de Bre-  
 taigne ont acoustume faire a leur reception, lesquelz sermens receut  
 le seigneur de Clifson quant a la secularite, & leuesque de Rennes quant a lespiritualite. Et  
 combien que lors le duc feust moult ieune, si receut il foi & hommaiges des cōtes, barons  
 & autres nobles seigneurs de Bre-  
 taigne.

**C Du mariage du roy d'Angleterre Henry 7 de la Veufue du duc Iehan.**

**L**AN mil quatre cens & deux fut fait le mariaige du nouveau roy Henry d'Angleterre & de dame Iehanne de Nauarre duchesse de Bre-  
 taigne, qui estoit veufue du feu duc Iehan le conquerant, fans ce que les barons de Bre-  
 taigne sceussent de ce mariage quelque nouvelle iusques a la conclu-  
 sion diceluy; ilz en aduertirent le duc Phe-  
 lippe de Bourgoigne, lequel bien tost apres vint en Bre-  
 taigne & en la ville de Nantes ou le ieune duc estoit; furent affem-  
 blez les estatz du pays en la presence du duc de Bourgoigne auquel  
 le feu duc auoit transmis la principale garde & administration du ieune duc son filz, & non  
 fans cause, car il estoit moult prudent & vertueux prince & le plus  
 prochain de lignaige diceluy ieune duc apres sa mere & ses freres,  
 car sa mere dame Iehanne de Nauarre estoit diceluy duc Phelippe,  
 fille de sa seur qui fut femme du roy Charles de Nauarre. Et la  
 mere du feu duc Iehan le conquerant, pere du ieune duc, fut seur  
 de la duchesse de Bourgoigne contesse de Flandres, femme  
 diceluy duc Phelippe. Et apres que en plains estatz les affaires  
 de Bre-  
 taigne & lestat du douaire de la veufue duchesse royne d'Angleterre  
 eurent este delibereez & concluz, le duc de Bourgoigne, par

laduis, deliberacion & consentement des seigneurs de Bre-  
 taigne, mena le ieune duc & ses freres a Paris par deuers le roy  
 ou ilz furent honorablement receuz & entretenuz pour vng  
 temps; mais ce pendant les faiz & affaires du pais de Bre-  
 taigne & les reuenuz diceluy furent administrez par ceux que  
 les estatz du pays y auoient commis, car ia Francoys ny eut  
 aucto-rite combien que le duc fust pour lors au royaulme de France.

**C Le trespas de Iehan de Bre-  
 taigne filz de Charles de Bloys conte de Pain-  
 thieure.**

**L**E seiziesme iour de ianui-  
 er lan mil quatre cens & troys trespassa a Lam-  
 balle Iehan de Bre-  
 taigne conte de Painthieure, viconte de Lymoges, seigneur d'Auennes & de Noyon, & gist en le-  
 glise des Cordeliers de Guingan; il delaisa de luy & de Margot de Clifson sa femme, quatre  
 filz : Olyuier, Iehan, Charles & Guillaume.

**C Comment le duc Iehan espousa la  
 fille du roy Charles sixiesme.**

**L**AN mil quatre cens & quatre le duc Iehan de Bre-  
 taigne, aage de quinze ans ou enuiron, estant encores en France, espousa dame Iehanne de France, fille de Charles sixiesme roy de France. Et apres que les nopces eurent este faictes, il sen retourna en Bre-  
 taigne, & son frere Monsieur Artur conte de Richemond demoura en la court du roy avecques le duc de Bourgoigne Phelippe le Hardi, & bien tost apres le duc de Bourgoigne se retira en Picardie & en Breban, & mena avecques luy le ieune conte de Richemond. Aussi fut faict celuy an le mariaige de Charles d'Orleans filz du duc Loys avecques Ysabel de France sa cousine germeine, qui auparauant auoit eu espouse le roy Richart d'Angleterre. Tantost apres en celuy an, le duc qui estoit a Nantes enuoya plusieurs seigneurs & dames de Bre-  
 taigne a Patis, querir la duchesse sa femme, laquelle luy fut honorablement enuoyee.

**L**AN mil quatre cens & cinq, Philippe le Hardi duc de Bourgoigne estant a noustre dame de Hant en Breban, trespassa; il y fut enterre, & son cueur fut porte aulx Chartreux de Dyion quil auoit fondez. Et le ieune conte de Richemond retourna a Paris & le recueillit le duc de Berry bien chèrement, car le nouveau duc Iehan de Bourgoigne, filz & heritier du duc Phelippe, ne luy fist point de recueil, & vng an apres ou deux retourna en Bretaigne le conte de Richemond par deuers le duc son frere. En iceluy furent faictes en general parlement tenant a Rennes certaines constitutions & ordonnances sur le fait de la iustice des iuges, aduocatz, greffiers & notaires, & aussi de la iustice du pais, lesquelles furent publiees a Rennes le quinziesme iour de septembre lan mil quatre cens & cinq.

**L**AN mil quatre cens & six les habitans de Sainct Briec oultragerent les officiers du duc, les batirent, rompirent & dessirerent les mandemens, & contre luy s'esleuerent moult scandaleusement. Et pour les submeetre a la raison, le duc y enuoia son frere le conte de Richemond qui nouvellement estoit venu de France, lequel appaisa celle emocion & fist griefuement & publiquement pugnir ceulx qui auoient este cause de loultraige & folle entreprinse dessusdit.

### **C** La mort & mutilacion du duc d'Orleans a Paris.

**L**AN mil quatre cens & sept, la vigille saint Clemens, vingt deuziesme iour de novembre, en la ville de Paris, le duc Loys d'Orleans venant du logis de la royne qui estoit lors logee en lostel de Barbecte pres la porte Barbecte, sur le paue a huit heures de nuit fut meurdry & mis a mort par certains garnemens dont estoit chef Raoul d'Atouuille, ilz labatirent premierement ius de sa mulle & luy coupperent le poing dont il tenoit larcon de la selle, & quant il fut tumbe a terre vng sien seruiteur se gecta sur luy pour le cuider fauluer, lequel fut mis a

mort comme son maistre & seigneur. Apres ce les malfauteurs sen fuyrent en lostel d'Artoys, & en fuyant gestoient chausses trappes apres eulx affin que on les fuyuit point. Le corps de luy fut ensepulture aux Celestins de Paris en grans pleurs & lamentacions, & non point sans cause, car de la sont venuz mauix si grans au royaume de France qui est impossible les declarer par escript. Le duc Iehan de Bourgoigne le fist tuer, & apres que le cas fut congnu, il sen fuyt incontinant en Picardie, & le premier iour tyra de Paris a Arras ou il y a xlii lieux; il auoit eu de long temps grosses rancunes & haynes contre celuy duc d'Orleans touchant le gouuernement de France.

### **C** La mort & trespas a Ioffelin du conestable de Clifson.

**E**N celuy an mil quatre cens & sept, trespassa en la ville de Ioffelin mesfire Olyuier de Clifson, conestable de France; le corps de luy fut ensepulture en leglise de Nostre Dame de Ioffelin. Il acquist la chastelenie de Montfaulcon en Aniou, qui lors valoist quinze cens liures de rente, & de celle chastellenie il fonda le colliege des chanoines de Nostre Dame de Clifson. Il delaisa deux filles ses heritiers dont le viconte de Rohan auoit espouse laisnee, & le conte de Painthieure la puyfnee, comme cy deuant auez peu veoir.

En ce mesme an fut lyuer si long & si dur que au degel les glacons rompirent les pontz de Paris qui estoient de pierre & plusieurs autres places sur les riuieres.

**L**AN mil quatre cens & huit, le duc de Berry, bon, prudent & saige, voiant les grans mauix qui en France pouoient aduenir, & le duc Iehan de Bourgoigne qui apres le fait sen estoit fuy, se retiroit aux Angloys & se alioit deulx, a celle cause traicta de sa paix, & fut le roy mene a Chartres, & la fut mande venir souz bonnes seuretez & hostages le duc de Bourgoigne, & y estoit present le bon duc de Bauiere nomme Guillaume, qui frere estoit

## Le quatriesme

de la royne, lequel moult trauailla pour cuider pacifier ses differens; finalement les princes partirent de ceste assemblee dacord comme il sembla a daucuns, & sen retourna le duc de Bourgoigne en ses pais, mais ce traictie gueres ne dura.

En celuy an, messire Guillaume de Tignonuille, preuost de Paris, fist par hastiute a torches pendre de nuit deulx escoliers qui auoient malicieusement tue vng homme dedans Paris. Mais luniuersite, qui lors estoit moult auctorisee & portee, porchassa tellement la court de parlement que par vertu de larrest dicelle au bout de quatre mois ilz furent despenduz, & y fut le preuost en personne qui les baifa en la bouche & les conuoya luy & les sergens depuis le gibet iusques au moutier ou ilz furent enterrez en les amenant en vne charrette; estoit le borreau qui les auoit penduz sur le cheual deuant, vestu dung sourpeliz comme vng prestre.

En celuy temps perdirent les François la cite de Gennes & mainctes places dont le mareschal Bouciquault estoit gouuerneur, & fut dommaige en France, car a loccasion de la seigneurie de Gennes, le roy de France tenoit en subiection tous les ports de mer iusques dedans Turquie, Tartarie, Cypre & Grece.

En celuy temps le roy de Nauarre fist hommaige au roy de France a Paris pour la duche de Nemours, & lors se alia au duc de Bourgoigne & firent couper la teste au seigneur de Montargis grant maistre dostel de France, pour auoir ses finances & le gouuernement du royaume.

**L**AN mil quatre cens & vnze, le duc Jehan de Bourgoigne print & pilla les ville & chasteau de Han & Vermendois que tenoient pour le duc dOrleans. Aussi le duc dOrleans print lors la ville de Saint Denis apres ce quil y eut mis le siege contre le prince dOrange tenant le party de Bourgoigne. Et le seigneur de Gaucourt print par eschelles & de nuyt le pont de Saint Cloud, mais tantost apres fut reconquiste par le duc de Bourgoigne, & y eut a celle reprinse enuiron mil combatans bretons

occis de la compaignie du ieune conte de Richemond, tenant la bende dOrleans avec grant nombre de prisonniers entre lesquelz prisonniers estoient le seigneur de Combour messire Guillaume Bataille & autres.

Lan mil quatre cens & douze, les Angloys descendirent a la Hogue Saint Vuaft en Normandie, venans au secour des ducs dOrleans, Berry, Bourbon & de leurs aliez, contre le duc de Bourgoigne, & lors fut assiegee la ville de Bourges par iceluy duc de Bourgoigne, mais le duc de Guyenne filz aifne de France, congnoissant que cela seroit cause de la destruction du royaume, sefforca de les appoincter. Et les Angloys apres auoir este aduertiz que ces princes se accordoient, ilz brullerent la ville & labbaye de Beaulieu pres de Loches & emmenerent labbe prisonnier, & avec ce emmenerent le conte dAngoulesme frere du duc dOrleans pour hostaige prisonnier en Angleterre pour la somme de cent mil escuz, & esparties du Perche & de Normandie le conte de Saint Pol conestable de France, tenant le parti de Bourgoigne, deconfit les seigneurs de Gaucourt & de Champaigne, & y furent tues quatre cens hommes darmes.

**C** Comment la duchesse de Bretagne alla a Paris veoir le roy son pere, lequel rendit lors la Ville de Saint Mallo.

**L**AN mil quatre cens & treize, la duchesse de Bretagne, dame Jehanne de France, acompaignee de Monseigneur Richard de Bretagne, seigneur de Clifson, qui depuis fut conte dEstampes, avec plusieurs autres seigneurs & dames de Bretagne, partit de Nantes & alla a Paris veoir le roy de France son pere, la royne sa mere & le duc de Guienne son frere aifne, qui la receuillirent moult honorablement. Et quant elle y eut feiourne tant que bon luy sembla, elle print congie du roy & de la royne & aussi des autres princes du royaume de France qui la estoient, & a son partement le duc de Berry luy donna vng tres excellent & riche ruby que lon appeloit le ruby de la Caille, lequel auoit

este autrefois au duc de Bretagne, ayeul du duc Jehan lors regnant. Et le roy, en la faueur de sa fille, rendit au duc son mary la cite de Saint Mallo de Lisle qui lors estoit en la main du roy, parce que les habitans dicelle festoient donnez durant les precedantes guerres eulx & ladicte ville au roy de France en hayne de ce que le feu duc de Bretagne, estant encores ieune, y auoit mis gens darmes en garnison, de laquelle garnison estoient les seigneurs de Chasteaugiron, de Montauban, de la Belliere & autres qui tres mal & tres ordemant traicterent les habitans de la ville, hommes & femmes, & leur firent plusieurs inhumanitez, lubricites & cruaultez; a celle cause ilz firent secretement asauoir aux gens darmes de France que filz en vouloient enuoier vne bonne bende par deuers eulx, ilz les metroient dedans la ville; les capitaines de France y entendirent voluntiers, & tellement fut la besoigne exploictee que vng iour, ainsi que le seigneur de Chasteaugiron festoit retire par deuers le duc & que les autres cheffz de la place estoient fortiz de la ville pour chercher le dedit de la chace & de la faulconnerie ou ilz furent depuis le matin iusques au soir; ce pendant, par terre & par mer entrerent les Francois dedans la ville par le moien des habitans dicelle, & misdrent hors tous les gens darmes bretons. Et depuis celuy temps, le roy de France tint & posseda la ville de Saint Mallo iusques a la venue de la ieune duchesse en France que, a sa requeste, le roy son pere rendit la ville au duc son mary, & fist le roy vider tous ses gens darmes. Et en ce faisant a la priere du roy le duc de Bretagne recueillit les habitans de Saint Mallo en sa grace & leur pardonna leur desloyalle offense. Et bien-toft apres, le duc de Bretagne se retira a Saint Mallo, & hors de la ville sortirent au deuant de luy tous les habitans dicelle ville, hommes, femmes & petiz enfans qui cheminer pouoient, touz vestuz de robes myparties de blanc & de noir. Et tenoient tous les enfans chascun vng pannonceau dermines en sa main, criant: Noel! & en tel estat entra le duc dedans Saint Mallo, & luy firent ceulx de la ville les sermens destre a iamais bons & loyaulx Bretons, & apres il

y institua officiers tant pour la garde de la ville que pour la iustice & aussi pour recepuoir les droictz & subsides, le tout pour le duc de Bretagne & en son nom.

Lan mil ccccxiixiii, le xi<sup>e</sup> iour de May, nasquit a Vennes monseigneur Francois, premier enfant du duc de Bretagne & de la duchesse sa femme, & fut baptise par messire Jehan de Malestroit bien renommé par tout le pays qui était pour lors euesque de Saint Briec, qui depuis fut euesque de Nantes & chancelier de Bretagne.

**C** Cy commence la descente des Anglois & de leur roy Henry de Lancastre en Normandie.

**V**ous auez cy deuant assez prochainement peu lire comment Henry conte Derby qui depuis fut duc de Lancastre, fut banny du royaume d'Angleterre par sentence du roy Richard & comment depuis il se retira en France ou il fut recueilly moult honorablement du roy & des princes & autres seigneurs de France. Et depuis se retira en Bretagne, & par le secours que le duc Jehan le conquerant luy donna il paruint a la couronne d'Angleterre, & par apres la mort diceluy duc Jehan il eut a femme dame Jehanne de Nauarre, vesue diceluy duc, qui lors estoit encores ieune dame. Or pour la retribution des biens, honneurs & dauantaige que en France lon auoit faiz a iceluy Henry de Lancastre roy d'Angleterre, il voulut par force darmes a luy vsurper le royaume de France. Et pour y paruenir il enuoya premierement troys notables ambassades successiuement par deuers le roy de France le sommer de luy rendre & restituer la duche de Normandie, disant que elle luy appartenoit par droit de heritaige. Et pour ce que lon seruit ses ambassadeurs de refus iceluy roy se mist armes passa la mer. Et vers la fin du moys d'Aoust, lan mil quatre cens & quinze, descendit a la bouche de Seine au pays de Caulx a moult grande puissance de gens de guerre. Et mist deuant la ville de Harefleur le siege qui y fut quelque espace de temps.

**C** De l'ambassade que le roy de France enuoya par deuers son beau filz le duc de Bretagne pour auoir secours contre les Angloys.

**L**E roy de France aduertiy de la descense dessusdicte assembla moult grant host & enuoya messire Martin Gouge euesque de Clermont, messire Bertrand de Montauban & autres en ambassade par deuers le duc de Bretagne son beau filz, par lesquelz le roy le prioit chèrement quil prenrist a desplaisir la descence des Angloys & que contre eulx il se voulüst mettre en armes pour luy venir secourir a chasser hors de son royaulme ce roy Henry d'Angleterre & son armee, & pour le soulday des gens de guerre que le duc mestroit suz pour cest affaire le roy luy enuoya cent mil francs & luy enuoya en oultre vng petit cheualet dor, du poix de dix ou douze marcs, tout esmaille de blanc, & la selle, la bride & le surplus du harnois estoient enrichiz & couuers de gros dyamans, rubiz, perles & esmerauldes & lestimoit on valoir cinquante mil escuz & plus.

Le duc receut benignement le present & renuoya par deuers le roy ses ambassadeurs garniz de la responce que le roy desiroit & requeroit. Si assembla le duc les nobles de sa duchie de Bretagne & les fist mettre en armes iusques au nombre de huyt a dix mil combatans, & se disposa le duc de sa personne de conduire son armee au pays de Normandie par deuers le roy de France son beau pere pour le secourir.

Alors estoit le conte de Richemont deuant Parthenay, tenant le siege, accompagne de messire Bertrand de Montauban, messire Jehan de Coitquen, messire Geffroy de Malestroit, messire Oliuier de la Feillee, messire Guillaume le Vayer & plusieurs autres notables cheualiers & escuiers bretons moult belle & grande bende avecques plusieurs gens de guerre de France & iusques a vi mil combatans.

Si fut le conte de Richemont mande par le roy & le duc de Guyenne & tout incontinent leua son siege & avecques ses gens darmes tyra

la part ou estoit le roy, & des ce quil y fut arriue le duc de Guyenne luy bailla conduite de ses gens darmes pour renforcer la bende, & puis il tyra son armee le long de la riuiere de Somme pour se joindre au seigneur d'Albret conestable de France, & aux ducs d'Orleans, d'Alencon, de Bourbon & de Breban; & y estoient semblablement les contes d'Eu, de Neuers, le seneschal Bouciquault & autres moult grande compaignie de nobles hommes & la faisoient leur assemblee pour combattre les Anglois; & avecques larmee du conestable d'Albret y auoit en oultre plusieurs nobles hommes de Bretagne iusques a cccc lances, dont le seigneur de Combour auoit la conduite.

Quant le duc Jehan de Bretagne eut mit suz ses gens darmes prestz a partir, il tyra a Dol & de la entra en Normendie, & marcha en pays tendant a se ioindre a larmee de France.

Ce pendant le roy d'Angleterre fist tellement battre la ville de Harefleu que les habitans dicelle qui nauoient aucune esperance de secour furent contrains de rendre la ville a sa mercy; touz les hommes de la ville furent prins prisonniers, les femmes furent mises hors la ville & les biens envoyez en Angleterre, & ce fait il laissa grosse garnison dedens Harefleu & tyra au long de la riuiere de Somme, laquelle il passa a Blangy cuidant recouurer la ville Calais ou il se vouloit avecques son armee retyrer pour ce que lhyuer estoit ia bien auant & faisoit diuers temps, mais larmee du roy de France tyra oultre & trauerfa le chemin aux Angloys en lendroit d'Agincourt, lesquelz par ce moyen furent empeschez daller plus auant.

Le roy d'Angleterre voiant le danger ou luy & son armee estoient enuoya par deuers les chefs de larmee de France & offrit de leur rendre la ville de Harefleu, & payer & restituer tous les dommaiges que ilz auoient faiz en Normendie & ailleurs en France pourueu que on les laissast passer saulement: mais les Francois ne leur voulurent octroyer; ains leur respondirent quilz les combatroient, & les auroient a leur mercy, dont tres mal leur print: mais cest la fin & lissue ou la folle & effrene

oultre cuydance des Francoys les mena, car ilz cuydoient deulx fans ayde ne secour daultroy deffaire les Angloys mesmes fans le duc de Bretaigne qui marchoit a tout viii ou x mil hommes la part ou estoit larmee des Francoys, & estoit ia oultre la ville de Rouen pres d Amyens & marchoit de iour en iour, mais les Françoys ne le voulurent attendre & si nestoient les Bretons que a deux iournees deulx, & encores firent les gens darmes de France tenir arriere leurs gros varletz de guerre & par leur orgueil ordonnerent que en leur bataille ny auroit que cheualiers & nobles hommes a touz esperons dorez, & ne vouloient que le duc de Bretaigne fut participant a la gloire de la victoire quilz esperoient auoir sur le roy d Angleterre & ses gens.

### ¶ La bataille de Agincourt.



QUANT le roy d Angleterre eust entendu la rigoureuse responce des capitaines & chefs de larmee de France, il aduertyt & pria ses gens deulx monstrier vertueux en leur remonstrant puis quil est question de mourir ce leur sera plus louable chose & a toute leur nation de mourir en vertueuse bataille que de submettre & habandonner laschement leurs vies soubz la vendication & cruaulte de leurs aduersaires. Or estoit lors larmee des Angloys pres du villaige de Agincourt, & la se parquerent les archers d Angleterre pres daucunes petites hayes, & les nobles hommes darmes qui estoient xv cens cheualx au meillieu deulx & estimoit on les gens de pie a viii mil hommes archers, Larmee de France, chez de guerre, capitaines, hommes darmes de France se aprocherent de larmee d Angleterre cuydans ioindre aux Angloys, mais les archers tyrerent de leurs arcs flechez a si grande multitude que tous les cheualx de lauant garde furent occis & plusieurs autres furent naurez & mis a pie, puis saillirent les nobles hommes darmes qui misdrent lauant garde de France en telle desconfiture que les Francoys de la bataille se misdrent en fuytte, & donnerent a daucuns les Angloys la chasse;

aucuns autres princes se voulurent efforcer dentrer en larmee, lesquelz furent occis partie deulx & autre partie prins prisonniers. Et finalement larmee de France fut deffaicte en celle bataille & y furent occis sur le champ le seigneur d Albret, conestable de France; le duc de Breban, le duc d Alencon, le conte de Neuers Iehan, monseigneur de Bar & plusieurs aultres grans personnages de France iusques a iiii mil nobles cheualiers. Et y furent prins le duc d Orleons, le conte de Richemont qui fut moult naure & trouue entre les mors, le duc d Alencon, le duc de Bourbon, le conte d Eu, le conte de Vendosme & grant nombre dautres hommes de France, lesquelz furent menez en Angleterre prisonniers; & des Bretons y moururent le seigneur de Combour & touz les ccc archiers bretons qui estoient soubz sa charge, sauf bien peu. Et aussi y moururent de la compaignie du conte de Richemont messire Geffroy de Malestroit, messire Bertran de Montauban, messire Iehan de Coitquen, messire Guillaume de la Forest, messire Guillaume le Vayer & tous les autres de la bende fors messire Edouart de Rohan, messire Oliuier de la Feillee, messire Iehan Giffart & le seigneur du Buffon, qui furent prisonniers. En ceste bataille moururent du party de France iiii mil nobles hommes a touz esperons dorez, car gueres ny auoit dautres gens en leur armee, & des Angloys ne fut occis pour grant personnage que le duc d Yorch, oncle du roy d Angleterre, & iii ou iiii cens Angloys telz quelz, & si estoient les Francoys en nombre iii contre vng Angloys. Ceste malle iournee fut a Agincourt le vendredi xxv iour doctobre, lan mil iiii cens xv, & lors estoit en la ville de Rouen le roy de France.

### ¶ Comment le duc de Bretaigne veytyra son armee & sen retourna en Bretaigne.



QUANT le duc Iehan de Bretaigne, lequel, comme dit est deuant, auoit ia passe la Seine & estoit pres de la ville d Amiens, cuydant se ioindre a

## Le quatriesme

l'armee de France & nen estoit que a deux iournees, sceut que les gens darmes de France furent desconfiz lesquelz nauoient extime son secours ne iceluy attendu, il fut moult dolent des morts & des prisonniers & aussi du grant deshonneur qui estoit aduenu au royaume par outrecuydance des cheffz dicelle armee & vit quil ny seroit plus a temps si se retyra bien desplaisant & toute son armee en son pays. Et quant il y fut il donna congie a ses gens de eulx retyrer, & ne voulut plus sentremettre de a guerre dentre les Francoys & les Angloys, mais se delibera de garder son pays & ses subgectz destre oprimez en maniere que des lors fut le pays de Bretaigne vng droit paradis terrestre. Et le royaume de France estoit en telle misere que personne ny pouoit trouuer refuge de seurete.

### De la descente du roy Henry d'Angleterre a Toucque en Normendie.

**A**u moys daoust lan mil cccc xvii, le roy Henry retourna a moult grande armee a Toucque, & print le chastelet ou il ne trouua aucune resistance, & de la en auant furent prinsez les villes & chasteaulx de Caan, Falaise & plusieurs autres places bien facilement, car au moyen de ce que les Francoys auoient este ii ans parauant deconfiz a Agincourt, la force de France estoit tellement attenuie que tout le peuple sen fuyoit au deuant des ennemys, & partyrent de Normendie plus de xv mil mesnages de hommes qui se retyrerent auecques leurs enfans & leurs biens en Bretaigne, deliberez dy faire leur residence, & furent liberalement recueilliz es villes, & entre autres lieux a Rennes, ou exercerent la drapperie, & aussi a Fougieres, Vitre & ses environs, & la vindrent en Bretaigne les drappiers qui premierement aprindrent a y faire les bons draps dont encores a present y est lusaige qui auparauant ny estoit.

En celuy temps, les habitans de Rouen se rebellerent contre le roy de France & occirent leur bailly nomme Raoul de Gaucourt. Et le duc de Bourgoigne print Tours, Rochecorbon,

Cormery & Asay sur Indre, & les Angloys tyrerent a Rouen & y misdrent le siege qui y fut si longuement quil nestoit plus question en la ville que de menger chatz, chiens & ratz, & y moururent trente mil personnes. Finablement ceulx de la ville voians quilz nauoient aucune esperance de secours, la rendirent aux Angloys par gracieuse composition, & depuis ne trouua le roy d'Angleterre aucune resistance en toute la duchie fors au mont Sainct Michel qui ne fut iamais Angloys.

En ce mesme an mil cccc xvii apres que le pape Gregoire eust renonce a sa papaulte & que Benedic & Iehan par le concille de Constance deposez, les cardinaulx en iceluy concille, esleurent sans quelconque contredit Octon de la Colonne romain pape, & fut nomme Martin cinquiesme, il regna xiiii ans pape, & deuant sa mort commanda assembler a Basle le concille pour ce que au precedent concille de Constance il auoit este ordonne & conclud que les papes des lors en apres feroient assembler de dix ans en dix ans le concille de toute lesglise vniuerselle.

En icelluy concille, la conte de Sauoie & la conte de Cleues furent erigees en duchez par lempereur Sigismond lors regnant.

### Le recouurement de Paris par les Bourguignons, & de la mort & occision du duc de Bourgoigne a Montereau au fourc d'Yonne.

**L**an mil quatre cens dix huyt, messire Iehan de Villiers seigneur de Listradan, a tout cccc hommes de guerre tenans le party du duc de Bourgoigne, entra dedens Paris, & incontinent la plus grant partie des habitans de la ville & entre autres ceulx du quartier des Halles prindrent la croix en saultouer qui estoit la liuree des Bourguignons.

Tantost apres furent occis troys mil hommes & plus dedens Paris, dont le conte d'Armignac conestable de France estoit lun, messire Henry de Marle chevalier, & plusieurs autres qui estoient en la ville tenans le party de monsei-

gneur le dauphin que lon appelloit Armignatz, pour lors se lon hayoit quelqun a Paris pose quil ne fut de lun ne de lautre party, il estoit occis & mis a mort, & si estoit monseigneur le dauphin Charles conte de Pontieu a Paris muce; mais messire Tanguy du Chastel, preuost de Paris, natif de la basse Bretaigne, print monseigneur le dauphin qui lors estoit ieune enfant, lenleua de son logis qui est en la rue de la Voierie ou il estoit loge lors, & lenmena a vng auesprant dedens la Bastille Sainct Anthoine & de la a Melun.

Bien tost apres monseigneur le dauphin accompaigne du conte de Vertuz, des seigneurs de la duche de Barbasan, de messire Pierre de Rochefort mareschal de France, & plusieurs autres print la ville de Tours par siege.

**L**E v<sup>e</sup> iour daueil audit an mil treis cens xviii, le glorieux confesseur & amy de Dieu frere Vincent Ferart, natif dArragon, religieux de lordre des Freres prescheurs, rendit a Dieu lesperit en la ville de Vennes en lostel dun bourgoys de la ville nomme le Faucheur. Il fut depuis honorablement canonise & reluit par miracles sainct en paradis; le corps de luy fut mis au cueur de leglise cathedral de Vennes, & pour congnoistre le moys & lan de son trespas, prenez les lettres nombrables de ce verset. *Inclite Vincenti capit heu te mors in Aprili.* Le bon sainct homme peu de temps auant son trespas se retira par deuers la duchesse de Bretaigne madame Jehanne de France, laquelle estoit enfainte, & apres aucunes deuises contemplatiues, elle luy requist quil priaist Dieu pour elle a ce que lenfant quelle portoit peust venir au sacrement de baptesme, & il luy respondit quelle estoit grosse dung filz qui seroit martyr; depuis elle enfanta vng filz qui fut nomme Gilles, dont cy apres ie reciteray la pitteuse mort.

**L**AN mil iiii cens xix, a Montereau ou fault Yonne fut en la presence de monseigneur le daulphin occist sur le pont dentre le chasteau & la ville en lendroit du moulin, le duc de Bourgoigne Jehan, & dit on que ce fut pour

aucunes arrogantes parolles quil profera a mon dit seigneur le daulphin dont messire Tanager du Chastel & aultres seruiteurs dudit seigneur qui la estoient, furent tellement esmeuz & irritez que lun deulx seigneur loccist dun coup de hache & labatit tout mort. Et si ny auoit en la compaignie que dix hommes pour la part de monseigneur le daulphin & dix hommes pour le duc de Bourgoigne.

**C** Comment Philippe duc de Bourgoigne liura es mains des Angloys le roy de France, sa femme, leur fille & la Ville de Paris.

**A**PRES la mort du duc de Bourgoigne, son ainse filz Philippe fist alliance aux Angloys & leur bailla en leurs mains le roy de France Charles VI, la royne sa femme & dame Catherine de France leur fille, & plus fist, car il bailla en la subiection des Angloys la ville de Paris & toutes les aultres villes, citez & chasteaulx de qui estoient nument au roy que iceluy Philippe tenoit en sa main es pais de France, Champagne, Brie, Vermandois & Bourgoigne, & fut aussi fait le mariage de la dessus dicte fille de France & du roy Henry dAngleterre, & a tout ce fut present le roy de France & dame Ysabeau de Bauiere, la royne sa femme, & de leur consentement. Et par le traicte dicelluy mariage le roy de France desheritoit son filz Charles daulphin & conte de Pontieu, car le roy de France auoit eu trois filz & deux filles; lun fut Loys, qui fut duc de Guienne; lautre Jehan, qui fut duc de Lorraine, lesquels moururent en laage de adolescence, & lautre plus ieune estoit Charles conte de Ponthieu, qui depuis fut roy Charles VII; des deux filles lune espousa ledit Henry roy dAngleterre, & lautre fut religieuse & prieuse de Poissy. Fut accorde que le roy dAngleterre seroit regent en France durant la vie du roy Charles VI & apres son trespas celuy roy Henry seroit roy de France, & apres luy seroient les enfans qui sortiroient de luy & de sa femme fille de France. Et ce fait tira le roy dAngleterre a Melun & assiegea la

ville deuant laquelle il tint longuement le siege.

**C** De la prinse du duc Jehan par ceulx de Pentheure a Chantoceaulx.

**P**ENDANT les desolacions au royaume de France estoit en ce temps & nauoit on esperance dauoir secours pour expulser les aduersaires mortelz ne retirer le roy ne les places hors des mains des Angloys, mais veoit on toute desesperance de ressource, dame Marguerite de Clifson contesse de Pentheure estoit veufue de feu messire Jehan de Bretagne, filz de feu messire Charles de Bloys, laquelle dame auoit eu dicelluy messire Jehan de Bloys son mary quatre filz, cest affauoir: Oliuier, Jehan, Charles & Guillaume, & nauoit auecques elle lors que les premier & troiziesme de ses filz, car Jehan estoit au seruice du roy de France & Guillaume, qui estoit ieune enfant, estoit a Angers auecques sa tante la royne de Cecille. Celle contesse, qui lors estoit en la place de Chantoceaulx & y faisoit sa residance, conspira en son couraige de prandre le duc de Bretagne & ses freres pour faire venir ses enfans a la principaulte de Bretagne. A telle fin, elle & ses deux filz Oliuier & Charles delibererent de faire venir le duc a Chantoceaulx soubz couleur de le festoier & luy faire vng banquet, car elle estoit garnye de foyson de ieunes damoiselles belles & frifques, & le duc estoit ieune & amoureux & moult beau prince, & leur sembloit bien que filz y pouoient tenir le duc comme les plus fors, ilz paruiendroient a leurs fins, car lors le roy de France son beau pere estoit en telle necessite que secours quelconque ne luy eust peu faire ne enuoier. Toutefois, deuant que mettre l'entreprinse a execution, la contesse de Pentheure fist par son filz aisne Oliuier de Bloys, conte de Pentheure, praticquer ceulx qui auoient plus grant prochainete & credit au tour de monseigneur le daulphin, qui pour lors se tenoit a Bourges, affin de recouurer des gens darmes si besoing en auroit, & ne voulut nullement descouurer ceste entreprinse a Jehan

de Bloys son second filz, car elle le congnoissoit homme droit & loyal qui, pour mourir, neust consenti a vne telle lachete, & scauoit bien que sil en eust sceu quelque chose, il eust empesche l'entreprinse, mais iceluy Oliuier conte de Pentheure gaigna le president de Prouence & le bastard d'Orleans qui grandement estoient auctorisez en la court de monseigneur le daulphin, lesquelz promidrent au conte de Pentheure beaucoup plus de choses que tenir ne luy peurent, & a toutes ces nouvelles sen retourna de Bourges le conte de Pentheure & vint a Chantoceaulx, ou il trouua sa mere, a laquelle il recita ce quil auoit trouue en court, & puis apres delibererent entre eulx de parfaire ce quilz auoient aduise, & partit de Chantoceaulx vng iour au moys de feurier Oliuier de Bloys conte de Pentheure pour aller a Nantes, & auecques luy son frere monseigneur Richard de Bretagne & quelque aultre nombre de nobles seigneurs qui y estoient venuz auec le duc, lequel auoit laisse a Vennes la duchesse sa femme & ses enfans messeigneurs Francoys & Pierre. Et apres auoir fait celuy Pentheure au duc la reuerence & parler d'aucuns propos selon le temps, il dist au duc que sa mere, qui estoit a Chantoceaulx, le supplioit tres humblement quil voulsist se transporter a Chantoceaulx, & que la elle luy donneroit le banquet gracieux ou il seroit seruy par les plus belles damoiselles que lon sauroit souhecter & y trouueroit du passe temps moult plaisant; a quoy le duc se condescendit volontiers & luy octroya quil yroit & y meneroit son frere; ces seigneurs appoincterent que peu de gens suyuroient le duc pour ce que si tout son train leust suyuy, il y eut deffaulte de logis. A celle cause ne mena le duc auecques luy pour parsonnages de nom que monseigneur son frere, le mareschal de Bretagne, le seigneur d'Odon & quelque autre petit nombre de gens. Le surplus demoura a Nantes. Si partit le duc de Nantes tirant a Chantoceaulx, & estoit Oliuier de Bloys en sa compagnie; la dame de Pentheure & ses enfans dessuidictz auoient fait mettre en embusche en vng petit bocage ioignant vng pont ou le duc auoit assez pres de Chantoceaulx

quelque nombre de gens de guerre que conduisoit son tiers filz Charles de Bloys, lesquelz estoient armez & montez. Et quant le duc & sa compaignie eurent passe le pont, incontinant Charles de Bloys & les gens de guerre de leur embusche faillirent suz & saisirent le duc & semblablement son frere avec le mareschal de Bretagne, le seigneur d'Odon & aultres de leurs compaignies, ce quilz firent facilement, car le duc ne ses gens nestoient aucunement armez ne embastonez. Si furent estroictement ferrez & amenez a Chantoceaulx, ou ilz furent emprisonnez en diuerses prisons, la detenuz en par quelque temps. Et fut ceste prinse le xiiii<sup>e</sup> iour de feurier lan de grace mil quatre cens dix neuf.

**I**NCONTINANT apres furent ces nouvelles sceues es enuirons & vindrent iucques a Nantes, par tout le pays de Bretagne, mesmement a Vennes, ou la duchesse estoit, & les barons, banneretz & les nobles hommes de Bretagne qui en furent aduertiz se retirerent a grant foulle de gens a Vennes par deuers la bonne duchesse, qui moult estoit dolente & triste de ceste piteuse nouvelle, aussi estoient les barons & tout le peuple de Bretagne. Et ny auoit celuy qui ne se deliberast de recourir le duc & de venger loultrage que on luy auoit fait. La duchesse, comme prudente, vertueuse princesse, fist assembler en vne grande salle au manoir de la Motte les barons, prelatz & autres seigneurs de Bretagne qui estoient venuz a Vennes pour cest affaire. Si leur remonstra la duchesse ayant avec elle monseigneur Francoys & monseigneur Pierre ses enffans, lamour & la grande dilection que le duc son mary auoit a ses subgectz & a tout son pais, en leur disant: Tres chers cousins, parans & amis, vous pouez auoir encore souuenance comme le bon duc Iehan dernier trespasse, que Dieu absolle, pere de monseigneur, a conquis & deffendu son pais & duche de Bretagne a lencontre de ses aduersaires par force darmes, en maniere quil en est demoure seigneur & paisible possesseur. Et combien que tout lennuy & la paine quil y a eue ait este au moyen du mariage de feu messire Charles de

Bloys & de sa femme dont sont issuz les enfans de Pantheure, lesquelz & leurs aliez ont este cause de toutes les consolations de ceste principaulte, & que a celle cause lon eust eu matiere de les extirper & leur nom a iamais, ce neantmainz iceluy bon duc Iehan les auroit recueilliz a sa grace, leur auroit baille bon & competant partage en ce duche, auroit reconcilie a luy messire Oliuier de Clifson son vassal & subget, lequel, en faueur du mariage de sa fille avec messire Iehan de Bretagne, filz dice-luy messire Charles, auroit tant fait & donne dennuys, de paines & labeurs au bon feu duc, que a moult grande paine sen est il peu resfourdre, encores pour plus monstrier sa prudence magnanimite, iceluy feu duc auroit, par son testament, ordonne que ledit de Clifson seroit lun des tuteurs & curateurs de monseigneur & de ses freres. Laquelle chose deuoit, par raison naturelle, inciter a iamais le cuer de sa fille, dame de Pentheure & les curateurs de ses enfans a le aymer, reuerer & doubter en sa vie & apres sa mort, semblablement aymer monseigneur qui est leur prince naturel seigneur. Et quant a vous autres, vous pouez a present veoir comment monseigneur vous entretient en paix & tranquillite en ce duche de Bretagne & comment il est delibere de ainsi le faire tant que Dieu luy donnera la vie.

Aussi auez tous connoissance comment la dame de Pentheure, fille diceluy de Clifson, & ses enfans, en mectant en oubliance a despritz la fidelite en laquelle ilz sont naturellement tenuz & obligez de ame & de corps, de biens enuers monseigneur, ont puisnagueres par leur machinee sourprinse mis & fait mectre en sa personne & en ceulx de sa compaignie les mains violement & par force lont emprisonne en leur place de Chantoceaulx, en laquelle il est detenu, & ne puis croire quilz ne le veillent si rigoureusement & estrangement traicter, puis quilz le treuent a leur plaisir que sil est gueres longuement lon ne le recouuera iamais assez tost en vie, & est bien vroysemblable quilz ne lont prins sinon pour le faire mourir, tendans par sa mort a estre seigneurs

## Le quatriefme

& maistres de ceste duche. Et vous aultres, qui estes clerks & entenduz, dictes & maintenez que vng tel cas est delectable crime de lese maieſte au premier chef qui est pugniffable non seulement es personnes de ceulx qui commectent le cas, mais es personnes qui sont de leur sang & du lignaige, lequel sang pour la putrefacion dont il a este infecte, a cause du cas commis par leur parant, doit estre pugny a tout le moins par priuacion, exheredacion des biens de celuy qui a commis le cas, & doit estre fortclos de toutes noblesses & dignitez.

Tres chers cousins, parens & amis, si vostre bon duc vous failloit en cest endroit, ie ne scay ou vous pourriez trouuer sublegement ne ayde, car vous saurez assez la necessite ou est le roy mon pere, lequel, par une semblable trahison, a este deliure entre les mains de ses anciens ennemis, parquoy seroit impossible chose a moy de recouurer secours ne ayde de celle part.

Vous voiez aussi laage de ses petiz enfans qui cy sont, lesquelz ne sont encores en estat ne en laage de meſtre la main a lespee; laifne est aage de cinq ans & le puisne de troys. Pourquoy vous prie trescherement que vous veillez tous monſtrer par bon & vray effect, que le cas tel quil a este commis vous desplaist, & a ceste fin vous meſtre en armes & tirer en toute diligence la part ou ilz detiennent monſeigneur, affin de le deliurer & venger lexcez & loultrage que ces vassaulx, hommes & subiectz ont perpetre contre sa maieſte. Et affin quil ne tiene a fraiz ne mises, ie deliureray promptement entre les mains de celluy que vous aduiserez pour deulx cens mil royaulx dor, de bagues & ioyaulx, que vous emploirez en ceste affaire.

Quant les prelatz, barons & autres seigneurs & nobles hommes de Bretagne la assemblez eurent ouy ce que dessus, que la duchesse de sa propre bouche leur remonſtra, en laquelle assemblee estoient les euesques de Dol, de Rennes, de Nantes & de Vennes, le vicomte de Rohan, les barons de Rieux & dAncenis, les seigneurs de Maleſtroict, de Combour, de Quintin, de Chasteaugiron, de la Hunaudoie,

& de plusieurs autres nobles hommes, ilz luy firent responce par la bouche de messire Iehan de Maleſtroict, chancelier de Bretagne & euesque de Nantes, en la maniere qui sensuit : Nostre souueraine dame, voz humbles & obeiffans subiectz qui sont presens, ont ouy & entendu ce quil vous a pleu leur remonſtrer. Et congnoiffant le feruent & singulier desir que vous auez a la deliurance de la personne du duc nostre souuerain seigneur & monsieur son frere & autres, que dame Marguerite de Clifſon & ses enfans ont ainsi laschement prins & emprisonnez, & aussi loffre que vous faictes employer voz bagues & iceulz pour fraier a la conduite de la vindication de ce crime qui, ainsi quil vous a pleu remonſtrer, est des plus grans pour crime de lese maieſte humaine que lon puisse perpetrer, Ma dame, il ny a celuy en ceste compaignie, mesmes monſeigneur le vicomte de Rohan qui cy est, lequel est cousin germain du conte de Pantheure, a qui la criminelle offense ne desplaist tellement, quilz sont tous deliberez de meſtre en armes eulx, leurs parens, amys, hommes & subiectz, pour tirer la part ou est le duc detenu, affin de le deliurer, & ceulx de sa compaignie. Et aussi venger loultraigeuse & mortelle iniure qui luy a este faicte, en maniere que tant que le monde durera il en fera memoire.

Ma dame, au regard de voz bagues & ioyaulx, il leur semble quil nest mestier encores de les y employer, car il y a grant nombre de finances qui furent recueillies & leuees en ce pays de Bretagne, par ordonnance du duc de Bourgoigne & du seigneur de Clifſon, durant la minorite du duc, duquel ilz estoient tuteurs & gardes, lesquelles sont au tresor de lespargne du duc; sil vous plaist ordonner que on les y employe on le fera. Et silz ny peuvent souffire, il ny a celuy de nous autres qui ny fraie & meſte ce quil pourra finer dor & dargent. A quoy la duchesse respondit que ce que le chancelier de Bretagne auoit remonſtre luy sembloit tres raisonnable. Si furent ordonnez certains tresoriers auquelz ces finances espargnees furent desparties & deliurees. Et a la requeste du vicomte de Rohan, a qui le cas desplaistoit

tant que merueilles, fut par laduis & conseil de la plus grande partie des assistans a iceluy vicomte baille la charge & principale conduicte de ceste armee, & a ce quilz pouoient estimer ce qui pourroient finer de gens de guerre trouuerent que en leur armee se trouueroient cinquante cinq mil combatans & plus.

Touttefois pource que aucuns des barons de Bretagne ne trouuerent pas bon que de ceste armee le vicomte de Rohan fust principal chef & fondoient leur dire sur ce quil estoit cousin germain de Olyuier de Bloys & nepueu de la contesse de Pantheure, combien que le vicomte de Rohan en estoit autant desplaisant que personne de la compaignie, & en desiroit la vengeance sans grace ne remission, mais peult estre que aucuns autres barons qui la estoient ou autres du pays, comme le baron de Vitre, eussent enuiron marche soubz sa conduicte, fut promptement aduise que lon enuoyroit en France par deuers le roy d'Angleterre qui tenoit prisonnier messire Artus de Bretagne, conte de Richemond frere du duc, affin de le deliurer pour estre chef de ceste armee & que ce pendant on en feroit les preparatifz & ne laisseroit larmee a marchez soubz iceluy de Rohan en attendant la venue du conte de Richemond. Si furent desputez & commis pour aller pourchaser cest affaire le chancelier de Bretagne euesque de Nantes & le seigneur de Montauban, qui tirerent a Melun, ou le roy d'Angleterre tenoit encores le siege & faisoit mener & tenir avecques luy deuant Melun le conte de Richemond & le roy Hamon d'Escoffe, qui tenoit prisonniers, mais ilz nauoient autre prison que larrest sur leur foy en compaignie du roy d'Angleterre seulement.

QUANT les ambassadeurs de Bretagne eurent propose leur legacion au roy d'Angleterre, il leur dist que le cas estoit vilain & detestable & digne de griefue pugnacion, touteffois il estoit si presse en laffaire ou il estoit quil ne les pouoit si promptement despeschier, mais que de brief il aduiferoit a leur faire telle responce quilz seroient contant de luy. A quoy le chancelier de Bretagne luy respondit : Sire, par le

corps de nostre dame, si vous ne nous baillez incontinent ce ieune prince pour conduire nostre armee, nous serons en dangier de tumber touz soubz la ligne de celuy qui tant vous a fait dennuy & de paine, & fera la duche de Bretagne tout francoys. A quoy le roy d'Angleterre respondit que la faison ny estoit pas disposee, & que si Bretagne estoit francoys, il seroit angloys bien tost ou du pays des Angloys, car il entendoit auoir en son obeissance dedans brief temps toute la monarchie. Et pour ce, leur dit que eussent vng peu de pacience, parquoy leur fut force de faire la residence pour vng temps.

La responce  
du roy  
d'Angleterre.

LES barons de Bretagne ne laisserent pas pour la deffaulte du conte de Richemond a eulx assemblez & mettre en armes a lencontre du conte de Pantheure & Sauoye, & assemblerent toute la grosse artillerie de Bretagne, qui estoit es villes & chasteaulx du pays & la firent charroyer droict a Odon, qui est deuant Chantoceaulx, la riuiere de Loire entre deux, larmee tiroit partie du coste de Poictou, autre partie du coste de Maulue & de Odon a grant foule droit a Chantoceaux, pour aller assieger la place.

Quant la contesse de Pantheure sceut la venue de celle armee, elle fist desplacer le duc & ceulx de sa compaignie, & affin quilz ignorassent ceulx qui les menioient & les lieux ou on les menoit, leur firent les yeulx bendez & les mains liees. Et en tel estat furent conduitz de nuyt par Oliuier de Bloys conte de Pantheure & Charles de Bloys son frere, avec vne bonne bende de gens de guerre en Poytou, en vng fort chasteau a eulx appartenans, appelle le chasteau des Effars, ou ilz furent curieusement gardez. Et fut la conduicte faicte de telle sorte que personne ne scauoit ou estoit le duc, fors ceulx qui luy auoient conduit & mene. Et la contesse de Pantheure demoura dedans la place de Chantoceaux avec ses filles & femmes de sa court & vng nombre de gens darmes pour icelle defendre, car lon estimoit la place imprenable, tant estoit forte.

Les barons & autres gens de larmee de Bre-

Embassadeurs  
enuoiez de  
Bretagne  
deuers le roy  
d'Angleterre.

## Le quatriesme

taigne, qui cuidoient veritablement que les prisonniers fussent encores dedans la place de Chantoceaulx, firent a diligence passer l'artillerie a trauers la riuere & firent leurs approches tellement que en peu de temps le siege fut assis, ferme & clos a lenuiron de Chantoceaulx, & fut vers la fin du moys de mars lan dessus dit mil ccccix. Et comme iay dit deuant la place de Chantoceaux estoit si tressorte, que lon neust sceu trouuer en guerres de pays plus forte place pour la difficulte du lieu ou elle estoit assise, & lestimoit on imprenable. Les barons de Bretaigne fermerent & cloyrent leur siege de gros merrains & gros arbres a fossez largez & parons, de telle sorte que plustost feust on entrez en vne forte ville que sur eulx, & tous furent encloz en celle closture ou ny auoit que trois portes garniz de troys gros bouleuars de terre, faiz de telle sorte que par artillerie on les pouoit greuer. Et ordonnerent leur batterie assez pres des murs de la place, pour icelle battre & endommager; car ilz scauoient bien que la place estoit a prendre, & se doubtoient de Iehan de Bloys, qui estoit le ii<sup>e</sup> filz de la dame de Pantheure, lequel residoit aux guerres du roy, & craignoient les Bretons quil neust fait assemblee de gens pour venir leuer le siege, a celle cause se estoient ilz ainsi fortifiez en leur siege. Toutefois, iceluy Iehan de Bloys neust iamais faict telle entreprinse, car il fut si tres desplaisant de la prinse du duc & de ce que sa mere & ses deulx freres firent quil ne cessoit de soupirer & de gemir, & sil eust sceu ou le duc estoit, il leust mis a plaine deliurance sil eust este le plus fort, & oncques puis naima ses deulx freres ne bien ne leur voulut. Bien peu de temps apres que le siege fut clos & ferme, les barons de Bretaigne furent aduertiz que le conte de Pantheure & son frere auoient retire & enleue de Chantoceaulx le duc & les autres prisonniers, & quilz les auoient transportez en Poitou, en lune de leurs places, ne scauoient bonnement en laquelle, car ilz estoient seigneurs de Chasteaumur, des Essars, de Bourg Nouveau, de Peroux & de Paluau, qui sont cinq fortes places situees en Poitou. Mais tout ce nonobstant delibere-

rent ceulx du siege par entre eulx de prendre la place de Chantoceaulx, car silz feussent marches en Poictou & eussent laisse derriere eulx Chantoceaulx, on les eust trop endomaigez. A celle cause fut la place de Chantoceaulx batue moult asprement en plusieurs endroitz & sans cesser de icelle battre & endomager, y fut le siege par le temps de troys moys & plus & de iour en iour augmentoit le nombre des gens de guerre du siege & leur venoient de toutes pars viures, finances & secour, & estoient ceulx qui estoient dedans la place en telle necessite, que personne nen eust peu sortir. Et estoient contrains de eulx tenir aux caues basses pour les grosses boules de fer & de pierre que lon faisoit cheoir par engins sur leurs logis qui tuoient & endomageoient tellement que a grant peine pouoient ilz aller de lun logis en lautre, sans dangier de mort ou destre naurez lourdement.

Quant la contesse de Pantheure veit la perseuerance & continuation de sy rigoureuse guerre que sa place estoit batue & ferussee, & la mort de plusieurs hommes & femmes qui occis auoient este dedans & chascun iour y entuoit on & ne oyoit nouvelle de quelconque secours ne de aide elle fist sonner sa trompette & requerir ceulx qui tenoient le siege de parler a eulx, ce que luy fut consenti par les barons de Bretaigne, lesquelz de prime face ne luy voulurent accorder traictie quelconque, sinon que ilz eussent la personne du duc & des autres prins & detenez avecques luy. Et aussi auroient les personnes dicelle dame contesse de Pantheure, ensemble les personnes de Olyuier & Charles de Bloys & autres qui auoient faict ladicte prinse ensemble, la place de Chantoceaulx pour du tout faire a leur plaisir & volente. Toutefois fut autrement conclud leur traictie, car la dame de Painthieure en premier lieu promist a ceulx du siege remectre les personnes du duc, de monseigneur Richart son frere, & des autres personnaiges qui prins & detenez avecques luy, estoient tous sains saulues dedans la place de Chantoceaulx & leur bailler & deliurer pleinement. Leur promist aussi bailler & deliurer la place de Chantoceaulx pour en faire

à leur plaisir & volente, & promist que elle & ses enfans, quon disoit estre coupables du cas, comparastroient en personnes en la court de parlement de Bretagne, qui prochainement seroit assigne en la ville de Vennes, pour oyr droit & iugement sur laccusation que le procureur general de Bretagne feroit contre eulx & aussi sur les autres conclusions quil vouldroit prandre fauf la grace du duc, en ce que estoient leurs vies, dont si son pleisir estoit il leur seroit remission, autrement non. Et feut accorde que si a celuy prochain parlement ilz ne comparoifsoient, lon procederoit a lencontre deulx nonobstant leurs absences, comme si presens y estoient en leurs personnes. Et pour seurete de comparoir en iceluy parlement en personne lesser a droit & fournir larrest qui donne en seroit, la dame de Pantheure donneroit telz personnaiges en hostaige que il seroit aduise par les barons de Bretagne. Et fut ce traicte facilement accorde par icelle pour sauuer sa vie a celles de ses enfans, car elle sauoit bien si la place eust este prinse dassault que elle & tous ceulx qui dedans estoient eussent este tous mis a mort sans mercy. Aussi le voulurent ceulx de lost pour le grant desir que ilz auoient de recouurer la personne du duc.

**P**OUR parfaire ceste deliberation furent treues accordees par ceulx du siege pour vng bref temps, affin que ce pendant la dame de Pantheure peust faire ses diligences, mais ce fut sans aucunement le siege desemparer. Si enuoya la dame par deuers ses enfans aux Effars leur signifier ce traictie, & mande querir son second filz Iehan de Bloys & aussi le dernier & puisne Guillaume de Bloys, lequel estoit a Angiers avec sa tante. Olyuier & Charles de Bloys qui detenoient aulx Effars le duc & les autres prisonniers furent bien courroucez de ses nouvelles; toutefsoiz ilz amenerent & rendirent dedans la place de Chantoceaulx, le duc, monseigneur Richard son frere, le mareschal de Bretagne, le seigneur d'Odon & autres prisonniers; se y trouuerent aussi Iehan de Bloys & Guillaume son frere, lequel Iehan de Bloys se excusa bien humblement deuers le duc &

ses barons du mauuais cas dessusdict dont il auoit ses deux freres qui coupables en estoient en hayne mortelle. Et fut accorde & passe entre les parties le traicte tel que dessus est recite, & pour seurete de comparoir & ester adroit, la contesse & ses deux filz baillerent en ostaige Guillaume de Bloys, filz dicelle contesse, lequel estoit tous eage de x a xii ans, & aucuns autres personnaiges. Et partant fut le duc mis en pleine deliurance & liberte, & fut recueilli ensemble son frere & les autres personnes a grant ioye & lyesse par ses subgectz, les barons & autres Bretons qui estoient au siege, & furent les hostaiges mis en leurs mains. Ce fait, la contesse, ses enfans & autres gens estans dedans Chantoceaulx vuiderent la place avecques leurs bagues & ioyaulx, & les laissa lon aller paisiblement, ainsi que promis auoit este, & ny lesserent vaillant vng fer desguyllecte. Et fut ceste deliurance faicte comme iay trouue en aucuns hystoires au moys de May, & en autres hystoires ay leu que ce fut moys de iuillet lan mil quatre cens & vngt.

Incontinent apres le duc avec tous ceulx qui prisonniers auoient este & aucuns des barons & seigneurs dessusdictz sen partirent du siege garniz de leur hostaiges & se retirerent a Nantes. Le sourplus des Bretons estans au siege entrerent dedans la place de Chantoceaulx, lesquelles ilz abatirent & arraserent ensemble toutes les maisons, eglises & autres edifices, tellement quil ny demoura clousture, logis ne habitacion quil ne feust rucee ius iusques a la pleine terre. Et par ce peult on bien veoir que la prophecie du seigneur de Clifson, pere de la dessusdit contesse, est acomplye la ou il dit, comme cy deuant est recite apres le trespas du duc Iehan le Conquereur, que si elle viuoit, elle seroit cause de destruyre ses enfans de honneur & de biens.

**A**LORS que le duc fut deliure de la prison & detencion de ceste contesse de Pantheure estoit encores par deuers le roy d'Angleterre les ambassadeurs de Bretagne, lesquelz furent aduertiz comment le duc auoit este deliure & que la place de Chantoceaulx estoit rucee ius &

## Le quatriefme Liure.

nauoient encores eu responſe du roy d'Angleterre touchant la deliurance du conte de Richemond, ilz demanderent au roy congie pour eulx en retourner, & luy dirent que laffaire pour lequel ilz eſtoient par deuers luy auoit prins fin, touteſſois tant fut explecte que le roy d'Angleterre octroya & promiſt au conte de Richemond quil fuſt avec le conte de Suffort qui reſidoit en Normandie, parce quil promiſt ne partir de la compagnie diceluy de Suffort fans le congie du roy Henry, & a tant prindrent les ambassadeurs congie & ſe retirerent a Vennes par deuers le duc, qui y eſtoit avec les barons & autres grans perſonnaiges de ſa duche, & auoit ia le duc faiſt assigner la court de parlement a tenir en la ville de Vennes, en laquelle les deſſusditz de Pantheure auoient adiournement perſonnel.

### **C** Carreſt de parlement donne contre ceulx de Pantheure.

**B** IEN toſt apres le parlement general de Bretagne fut assigne en la ville de Vennes, tenir par le temps de troys mois en pleine court, a la requēſte du procureur general de Bretagne, appelez dame Marguerite de Clifſon veſue de feu meſſire Iehan de Bretagne, Olyuier & Charles de Bloys ſes filz & autres qui assignacion y auoient. Mais ni comparurent point ne autre qui excuſer les vouliſt, & furent par ſuffiſans interuallez contumaces tellement quil fut delibere & conclud par la court que lon procederoit contre eulx en leur abſence, tout ainſi que ſi preſens y eſtoient, en enſuiuant les concluſions qui contre eulx auoient eſte prinſes par le procureur general dont il auoit ſuffiſamment informe la court, furent les deſſusditz par arreſt de la court de parlement declerez criminelz du crime de leſe maieſte, & furent tous leurs heritaiges & biens meubles conſiſques, & par conſiſcation appliquez au duc, & fut ordonne que leurs hoſtaiges tiendroient priſon iuſques quilz veniſſent eſter a droict, & au ſurplus que les chasteaux, maiſons fortes autres baſtiment de la conte de Pantheure & des autres ſeigneuries qui appartenoint au

deſſusditz au temps du crime par eulx commis ſeroient demoliz & abatuz, & les cloſtures de leurs villes arrafees iuſques a plene terre, & les arbres des foreſtz & buiſſons de leurs dictes ſeigneuries ſeroient coupeez a la haulteur de deulx toiſes, en ſigne de perpetuelle malediction, & que la memoire ſoit & demoure a iamais entre les hommes.

**Q** EST arreſt duquel ny auoit appel ne reſſort, car en matieres crimineles les ſentences de tous les iuges de Bretagne quelz quilz ſoient, ſont executees & neſt aucunement difere a lappel, fut promptement mis a execution, car les villes & chasteaulx de Guingamp, Lemballe, La Roche Derian, & autres fortes places appartenans aux condempnez furent bien toſt apres le deſſusdit arreſt prononce abatues, & leur foreſt de Grello coupee chaſcun arbre comme par la moitie. Et le petit Guillaume de Bloys qui preſent auoit eſte a la prononciacion de ceſt arreſt, fut comme leur hoſtaige mis en priſon au fort chasteau d'Aulray, que le roy Artus auoit fait edifier, auquel chasteau fut detenu par le temps de xxvii ans, plorant & gemiſſant ſi amerement, le maleureux cas qui commis auoit eſte, que par force de plourer il y deuint aueugle, & aueugle en fut mis hors lan mil cccc xlviij comme vous oirez cy apres. En celuy parlement furent faiſtes conſtitutions & ordonnances ſur le fait de la iuſtice de Bretagne & de la pollice du pays, leſquelles furent publies a venir audit parlement le viij<sup>e</sup> iour doctobre.

**L** AN mil cccc & xx, la ville de Melun fut rendue aux Angloys. En ceſte ville de Melun fut prins le vaillant ſeigneur de Barbazan & amene priſonnier en Normandie ou il fut leſpace de vii ans. Pareillement fut prins Meaulx par les Angloys & Bourguignons, & ſi tenoient toutes ces villes pour le roy, dont ce fut grant pitie, car les Angloys & Bourguignons qui tenoient le roy en leurs mains le menoient deuant toutes les villes ou ilz alloient, pour les induire & ſommer a les rendre a ſes aduerſaires, incontinant le roy



d'Angleterre qui auoit este a ses sieges sen  
partit de la, & tyra de la a Sainct Fiacre en  
Brye, & fit prendre le glorieulx corps sainct  
& le fist enleuer pour le cuider emporter en  
Ybernie dont il estoit, mais tresmal luy en  
print, car incontinant deuint malade de fix &  
de morroides, & pour se faire pincer se retira  
aux boys de Vincennes lez Paris, & congnois-  
sant son offense, ordonna que le corps sainct  
fut remis au lieu ou il estoit 'alors quil fust  
enterre.

En celuy temps estoit le conte de Riche-  
mond auecques le duc de Suffort en Norman-  
die, & en sa compaignie voyageoit par tout ou  
il alloit & nauoit prison ne detencion que son  
serment. Le conte de Suffort pour lentrete-  
nement & reparacion des haures & places de  
Normandie voyageoit par le pais & vint a Pon-  
torson ou il se tint par quelque temps, & estoit  
son prisonnier tousiours en sa compaignie. Si  
fut faicte par aucuns seigneurs bretons quelque  
entreprinse secreta pour cuider enleuer le conte  
de Richemond, & secretement len enuoierent  
aduertir; mais il respondit & leur manda que  
pour mourir il ne faulceroit sa foy ne le ser-  
ment quil auoit faict au roy d'Angleterre, le-  
quel combien quil fust prisonnier de bonne  
guerre, luy auoit baille si gracieuse prison  
comme de le laisser aller partout sur sa foy,  
& ceste responce rapportee ainsi au seigneur  
de Combour & de Montauban qui la ses-  
toient transportez sur les frontieres pour cest  
affaire, ilz sen retournerent en leurs places.  
Et bien tost apres le duc de Bretagne, par  
traicte faict entre luy & le conte du Suffort,  
se transporta sur le pont de Pontorson en seurte  
& soubz bons ostaiges, & la parlerent longue-  
ment ensemble le duc & son frere le conte de  
Richemont; mais finalement le conte de Ri-  
chemond neust froisse pour mourir le serment  
de sa prison, & apres quilz eurent parle en-  
semble, de touz leurs affaires, le duc se retyra  
a Vennes & le conte de Richemond se trans-  
porta par deuers le roy d'Angleterre qui pres  
de Paris estoit, & moult prisâ & extima le roy  
d'Angleterre la vertueuse loyaulte du bon Artur  
conte de Richemond.

Le roy d'Angleterre fut aduertir que monsei-  
gneur le dauphin, regent de France, auoit este  
consentant du cas que ceulx de Painthieure  
auoient commis contre la personne du duc  
leur naturel seigneur. Et a la verite lon disoit  
communement & si ne scay comme il en y a  
que lon auoit trouue en la place de Chan-  
toceaulx le selle de monseigneur le dauphin, par  
lequel y promectoit aider & secourir ceulx de  
Panthieure a leur entreprinse. Mais ie croy, fil  
en fut quelque chose, que mondit seigneur le  
dauphin fut sollicité, induit & conseille a ce  
faire, par les faulces subornacions du bastard  
d'Orleans & du president de Prouence qui le  
gouernoient entierement & en faisoient lors  
ce quilz vouloient, car il nest pas vroysemblable  
que monseigneur le dauphin eust voulu iouer  
dun si mauuais tour au duc qui estoit son beau  
frere, & aussi veu la desolation ou pour lors  
estoit le royaulme, car la principale actente  
que monseigneur le dauphin auoit ou deuoit  
auoir destre secouru, cestoit par le duc de Bre-  
taine, veu laliance dont il estoit a luy alye;  
mais par ennuy & cauteleuses persuasions les  
plus fermes trebuchent bien aucunesfois, & de  
leur propos ioinct le credit que ceulx qui les  
persuadent ont a eulx, car cest chose trop dan-  
gereuse a vng grant prince pourueu dentende-  
ment de donner si grant credit & si grande  
auctorite autour foy a personne quelconque, &  
pour ses doubtes le roy d'Angleterre voiant  
quil nest pescher que en eaue trouble, voulut  
pour son profit & aduentage attirer a luy &  
de son party le duc de Bretagne alencontre du  
roy de France, & luy enuoyoit souuent embas-  
sadeurs, & le duc nestoit pas asseure de monsei-  
gneur le dauphin, veu quil estoit si fort boute  
de ce bastard d'Orleans qui mal luy vouloit; a  
celle cause craignoit despartir de laliance d'An-  
gleterre, combien que fil eust este certain da-  
uoir aliance de seurte en France il eust bien  
tost monstre le dos aux Anglois, & faignant les  
entretenir il enuoyoit par deuers eulx souuent  
quelque ambassadeur.

**C** Comment monseigneur le dauphin  
purchassa & poursuyuit laliance du duc

de Bretagne contre les Angloys & autres  
aduersaires du royaume de France.

**M**ONSEIGNEUR le dauphin fut aduerty  
de ses cheuauces qui se faisoient si  
souuant de Bretagne deuers le roy  
d'Angleterre & du roy d'Angleterre  
deuers le duc. Si luy fut remonstre par les  
princes du royaume qui avecques luy estoient  
que sy le duc de Bretagne se rendoit du party  
des Angloys, a grant peine veoirroit on iamais le  
royaulme de France hors des mains des Angloys,  
veu que ia ilz tenoient toutes les principalles  
places de ce royaume, toute la duché de Nor-  
mandie, & la personnes du roy & de la royne  
qu'ilz auoient entre leurs mains; veu semblable-  
ment que le duc de Bourgoigne, qui estoit le  
plus puissant prince de toute la parrye de  
France, estoit ia tout Angloys, & que les An-  
gloys nauoient volle & ne volloient d'autres  
aelles que des fiennes. Si fut conseille de pour-  
chasser lamour, laliance du duc, quoy que luy  
coutast, & que en diligence il meist gens en  
besongne pour rompre lentreprise qui ia bien  
auant estoit en termes entre le roy d'Angleterre  
& le duc. Et pour ce faire, enuoya monsei-  
gneur le dauphin vne bien honorable ambaf-  
sade par deuers le duc son beau frere. Et fut  
appointe avecques ses ambassadeurs que mon-  
seigneur le dauphin & le duc son beau frere se  
rendroyent en la ville de Sable pour illec com-  
municquer des enfans du royaume & conclure  
vne bonne & concordable paix entre eulx.

Le premier iour de lan mil quatre cens xxi,  
se rendit en la ville de Sable monseigneur le  
dauphin, & aussi se y rendit le duc de Bre-  
tagne avec les gens de leur conseil. Et apres  
qu'ilz eurent par entreulx mys en termes les  
affaires pour lesquelz ilz estoient illec assemblez,  
paruindrent ces seigneurs a traicte daccord &  
de bonne paix, dont furent ordonnees & escriptes  
chartres & lettres, lesquelles iay bien icy voulu  
inferer de mot a mot ainsi quil sensuit :

**C** Le traicte daccord fait a Sable  
entre monseigneur le dauphin, regent de  
France, & le duc de Bretagne.



**C**HARLES, filz du roy de France, regent  
au royaume de France, daulphin de  
Viennois, duc de Berry, de Touraine,  
& conte de Poitou, & Iehan duc de  
Bretagne, conte de Monfort & de Richemond,  
a tous ceulx qui ces presentes lectres voirront,  
salut. Comme les Angloys, anciens ennemis &  
aduersaires de France, & qui de tous temps se  
font efforcez & sefforcent doccupper le royaume  
de France sont depuis aucun temps enca des-  
cenduz en iceluy royaume, auquel tant pour  
leur entreprinse comme a locasion des diuisions  
qui ont este & sont & des fauteurs adherans &  
aydans que ilz ont euz & trouuez, ilz y ont eu  
tel aduantage que a present ilz occupent grant  
partie du royaume & detiennent les personnes  
du roy nostre seigneur & pere & de la royne  
nostre dame & mere hors de leur liberte & en  
leur seruitude, en eulx efforsant de vsurper le  
royaulme & de bouter & priuer de la succes-  
sion de nostredit seigneur & pere Charles re-  
gent dessusdit, qui sommes son vray & naturel  
heritier & successeur de sa couronne, & les  
autres parans de monseigneur qui a luy pour-  
roient par droit succeder apres nous, laquelle  
chose, si elle demouroit selon l'intencion de  
noz ennemis & leurs adherans, seroit en grande  
scandalle, lesion & dommaige, & a lexheredation  
de la maison & lignee royal & au grant reproche  
de nous & de tous les autres vassaux & sub-  
gettz de mondit seigneur & pere en especial  
de nous Charles, regent dessusdit, & de nous  
Iehan duc de Bretagne, qui par le plaisir de  
Dieu avec les autres obligations naturelles &  
de lignage en quoy sommes tenuz enuers mon-  
seigneur le roy, auons espouse nostre treschere  
& tresamee compaignie sa fille, fauoir faisons  
que les choses dessusdit considerees par nous  
Charles regent & Iehan duc de Bretagne  
dessusdit, eue aussi consideration que nous en-  
semble aliez avec laide de Dieu le createur,  
auons bien pouoir de resister auxditz ennemis  
& de conferuer le royaume, noz pays &  
subiectz, & aussi de resister a tous autres qui a  
nous ou a aucun de nous auroient fait ou  
pourté guerre, deshonneur, desloyaute, preiudice  
& dommaige, & iceulx pugnir comme les cas

## Le quatriesme

le requierent, & entre autres Olyuier & Charles de Bloys, desquelz, Nous Iehan duc de Bretagne dessusdit, sommes seigneur & prince naturel, & ce nonobstant par raison & felonnie nous ont puis peu de iours enca prins & tenu 5 prisonnier & nostre trescher & tresame frere Rychard de Bretagne, au tresgrant desplaisir de nous Charles regent & Iehan duc de Bretagne dessusditz, apres grande & meure deliberation de conseil, auquel estoient plusieurs 10 seigneurs du sang royal, des prelatz & autres conseillers de monseigneur & de nous Charles & aussi daucuns des prelatz, barons & gens de conseil de nous Iehan duc de Bretagne, & por ce auons icy amenez & faiz assembler, auons 15 oultre & par dessus les amitez, alliances & autres obligacions, en quoy nouz sommes lun vers lautre pour plus grande fermete & accroissement de bonne amour par entre nous faict, accorde, traictie & promis foy, fraternite, confederacion lun vers lautre tant pour nous comme 20 pour noz pays & subgectz en la maniere qui sensuit, cest a sauoir que nous Iehan duc de Bretagne, tant pour nous & en nostre nom comme pour nos barons, vassaux, pais & subgetz, cherirons & honorerons nostre tresredoubte seigneur & frere Charles regent de France dessusdit, & luy complairerons en toutes manieres ainsi que raison est & que tenus y sommes : & luy ayderons & donnerons conseil, 25 confort, ayde & secours a lencontre des Anglois, anciens ennemys dessusditz & autres leurs adherans, aliez, aydans & complices, - au recouurement de la personne du roy nostre dit seigneur & pere, & ses pais occupez par lesditz 30 anciens ennemis & leurs aliez de toute nostre puissance, sans y espargner chose dont nous puissions finer, & nous opposerons & emploierons de nostre puissance contre tous qui sefforceront de endommaiger la seigneurie du roy & celle 40 de nostredit seigneur & frere, leurs personnes, honneurs & dignitez, ainsi que filz & loyal parent de mondit seigneur le roy & comme bon frere de mondit seigneur le regent deuons faire. Et a ceste cause mettons nous noz pays 45 & subgectz en guerre ouuerte contre lesdictz anciens ennemys, leurs aliez & complices, &

declarons que nous renonceons plainement & entierement a toutes aliances, traictes & parlemens que nous aurions fermez, tenuz ou enconuenancez tant ausdictz anciens ennemys que a leurs aliez a quelconque occasion que ce soit, attendu que iamais a eulx ne entendismes auoir trefue sinon sur lintention que pendant icelle nous puissions enuoyer par deuers lesdicts ennemys pour traicter du bien de paix si faire se pouoit, & que a present sommes bien acertenez que ilz ne veulent accord ne appoinctement, mais tendent a eulx attribuer la couronne & seigneurie royal de France. Et a ceste cause nous cassons, froissons & annullons la trefue & abstinence de guerre que noz ambassadeurs pourroient en nostre nom auoir fermee & prinse auecques eulx, leurs aliez & adherans, & nous Charles regent dessusdit, congnoissans la bonne affection que nostredit frere a enuers mondit seigneur & nous : iceluy aymerons & cherirons & luy garderons ses droictz, honneurs & dignitez en tant que a nous touche & luy complairons en toutes manieres raisonnables comme a nostre trescher & tresame frere, & auec ce luy ayderons & donnerons conseil, confort, secours & ayde a lencontre de ses anciens ennemys & leurs adherans & touz autres qui quelque chose entreprendre voudroient contre sa personne, ses pays & subgectz, & singulierement luy ayderons a lencontre de Olyuier & Charles de Bloys & leur mere, leurs aliez & complices pour paracheuer de mettre a execution larrest & sentence de son parlement donne a lencontre deulx pour raison du crime de lese mageste par eulx commis a lencontre de luy qui est leur naturel seigneur & prince. Et a ceste fin, contre tous les dessusdicts nous mettons des a present nous, noz pays & subgectz en guerre, en renonceant a toutes aliances, promesses a ce contraires ; promettons de bonne foy nous Charles regent & Iehan duc de Bretagne dessusdict en parolles de princes & sur les sainctes euangilles pour ce par nous reellement touchees & soubz lobligation de tous noz biens meubles & heritaiges tenir, acomplyr & auoir a agreables chascun de nous en son regard toutes les choses dessusdictes, & chascune

dicelles tant par nous que par nosdicts pays & subgectz, sans iamais venir a lencontre, fraulde deception ne mal engin, & si aucun de nous scauoit & congnoissoit que lon vouldist faire quelque entreprinse contre ne au preiudice des choses dessusdictes, il le reuelera & fera ascauoir a lautre en toute diligence, & ne ferons aucun traicte ou alliance quelconque avecques les dessusdicts anciens ennemys, leurs adherans ne autres contre lesquelz a este faicte ceste presente alliance sans le consentement lun de lautre, & voulons ces presentes estre publiees dune part & dautre par tous les lieulx ou ont de coustume estre faictes publications sollenelles, en maniere que personne ny puisse pretendre cause dignorance. Et aux vidimus dicelles faitz soubz les seaulx autenticques, voulons estre foy adiouxee comme a ce present original, en tesmoing de ce nous auons faict mettre noz seaulx a ces presentes. Donne a Sable, soubz noz seaulx, le viii<sup>e</sup> iour de may lan mil iiii cens vingt & yng.

**O**ULTRE le contenu en ce present traicte, fut conueni & accorde par entre ces ii seigneurs que monseigneur le daulphin bannyroit & feroit vider hors de sa court le president de Prouence, le bastard dOrleans, Guillaume dAuagour & autres leurs complices, qui auoient pourchasse & conseille a ceulx de Pantheure la prinse du duc, & ainsi le promist & iura sur les sainctes euangilles le dessusdict monseigneur le daulphin, car autrement iamais le duc neust fermee laliance cy deuant escripte. Et apres que touz ces traictez furent accordez, ses deux seigneurs se departyrent de Sable, & chascun avecques sa bende se retyra en son quartier pour pourueoir aux affaires accordees par le traicte. Et fist monseigneur le dauphin toutes les diligences quil peust dasssembler gens darmes de sa part.

**L**E duc sen retourna a Vennes, & la manda & fist venir les prelatz, barons & autres grans personaiges de Bretagne, ausquelz il communicqua laccord & traicte daliance dentre monseigneur le daulphin & luy, tel que cy

dessus auez ouy, qui leur sembla trefbon & le consentirent & eurent pour agreable. Puis fut aduise de mettre suz en armes yng bon nombre de gens de guerre, dont lon bailla la conduytte a monseigneur Richard de Bretagne conte dEstampes, lequel de trefbon cueur print ceste charge, & a toute ceste armee ou bien pouoit auoir seize mil combatans, marcha en Normandie iusques a Coisnon, contre les Anglois; mais quant le roy dAngleterre sceust ces nouvelles, il manda au conte de Suffort que en toute diligence il allast en Bretagne par deuers le duc, & quil menast avecques luy le conte de Richemont pour empescher que le conte dEstampes avecques larmee de Bretagne ne marcheast plus auant, car il estoit aussi aduertie que monseigneur le daulphin assembloit dune autre part moult grant nombre de gens darmes. Si arriuerent a Vennes les contes de Suffort & de Richemont par deuers le duc qui les recueillist moult honorablement, & apres quilz eurent mis en termes leurs propos, le duc & les dessusdicts en sa compagnie partyrent de Vennes & vindrent a Rennes, & la assemblerent les prelatz & barons du pays pour auoir leur aduis sur cest affaire, mais le duc ne fut pas conseille de contreuenir a laliance qui auoit este fermee entre monseigneur le daulphin & luy iusques a ce que on eust sceu pour certain que monseigneur le daulphin leust de sa part froissee, & a tant sen retournerent les ambassadeurs dAngleterre sans riens faire, & tousiours marcherent en pays le conte dEstampes & son armee.

**L**ES contes de Suffort & de Richemont se retirerent en leurs garnisons en Normandie, & firent scauoir ces nouvelles au roy Henry dAngleterre, dont il ne fut gueres ioieulx.

**Q**E pendant que le conte dEstampes marchoit cheualereusement a toute son armee en Normandie contre les Anglois, le duc de Bretagne son frere qui estoit a Rennes fut conseille de faire enclorre les faulxbourgs de Rennes, car depuis la descense des Anglois en Normen-

## Le quatriefme

die, au temps de la bataille d'Agincourt, que le roy Henry print la ville de Harfleu, les Normans qui festoient retyrez a Rennes auoient tellement peuple les faulxbourgs qui estoient en partie presque aussi grans que la moitie de la ville, & estoient touz drappiers & gens ourans de laines, dont la ville valloit de moult mieulx. A celle cause, pour les conseruer comme ceulx de la ville, le duc ordonna que les faulxbourgs feroient enclos avecques la ville, & que lon feroit au tours des faulxbours des fossez qui seroient si parsons, que partye de la riuere de Vilaine, qui passe parmy la ville, passeroit & entreroit par dedans ses nouveaulx fossez, & dist on que le conte de Richemont quant il estoit a Rennes avecques le conte de Suffort, en aduisa premierement le duc son frere. Si furent de toutes pars mandez pionniers & besons pour cest affaire, & y fut faicte telle diligence que en peu de iours les fossez feurent paracheuez & furent les faulxbourgs enclos par fossez & par gros palis de boys, en attendant que lon eust peu faire la closture de gros murs, de tours & de portaulx comme a present elle est.

**A**U mois d'Auril apres Pasques, lan mil quatre cens vingt deux, dame Katherine de France, royne d'Angleterre, femme du roy Henry & fille du roy Charles sixiesme, acoucha dun filz qui fut nomme Henry, dont le metrificateur composa en latin vng petit verset en mettre par lettres nombrables duquel lon peut congnoistre lan de la dessusdicte natiuite, contenant :

NASCITUR HENRICUS FRANCIS INSIGNIS AMICUS.

**E**T au moys de septembre prochain ensuyuant, trespassa au boys de Vincenne le roy Henry d'Angleterre son pere, dont le metrificateur dessusdict fist ce present verset :

COR VULT SEPTEMBER VINCENNIS CLAUDERE  
PARDO.

**E**T le vingt vniesme iour du moys doctobre en celuy mesme an quatre cens vingt &

deux, trespassa le roy Charles sixiesme, & pour congnoistre le iour, le moys & lan de son trespas, le dessusdict metrificateur composa le petit verset qui sensuyt :

SEXTUS OBIT KAROLUS OCTOBRI PECTORE  
CLEMENS.

**A**PRES la mort du roy Henry d'Angleterre, le duc de Bretfort, prudent & sage cheualier, print le gouvernement du petit Henry & se attiltra regent du royaume de France soubz le nom dicelluy Henry quil en disoit estre roy par le traicte qui fait auoit este entre le roy Charles sixiesme, le roy Henry & le duc de Bourgoigne, comme il est cy deuant recite, & a ceste regente le duc de Bretfort auoit este commis par le roy Henry peu de iours deuant quil allast de vie a trespas.

Incontinent apres le roy d'Angleterre, le conte de Richemont, messire Artur de Bretagne, qui son prisonnier auoit este par le temps de sept ans, sen retourna en Bretagne franc & quicte de sa rançon, & aussi de son serment dont il estoit deliure a plain parce quil nestoit prisonnier, sinon du roy d'Angleterre, & a luy seul auoit fait le serment de tenir sa prison avec le conte de Suffort, & par tant, depuis que le roy d'Angleterre estoit mort, il se disoit quicte & deliure du serment quil luy auoit fait.

**A**PRES la mort du roy Charles sixiesme, son filz Charles septiesme se attiltra nom & tiltre de roy de France, comme raison estoit, combien que il ne fut pas incontinent couronne, car le chemin estoit empesche pour aller a Rains, & aussi que plusieurs villes se tenoient pour le petit Henry d'Angleterre, le duc de Bourgoigne & ses complices.

Entre les autres villes, Paris, cite capitale, tenoit pour le petit Henry d'Angleterre, lequel se disoit roy de France. Et pour ceste cause en la chancellerie a Paris on seeloit au nom de Henry, en le intitulant roy de France & d'Angleterre, & au grant seau estoient deux escusons, lun de France & lautre d'Angleterre, &

y auoit vng roy affiz en vne chaire, deux ceptres en ses ii mains; du coste de dextre estoit lescu de France, & du coste fenestre lescu d'Angleterre, & au contrefeul y auoit vng angle tenant les deux escuz. On fist lors monnoye de deux blancs en laquelle estoient par deuers la pille les deux escuz & en la supercription :

## HENRICUS REX ANGLIE &amp; FRANCIE.

Et deuers la croix auoit vne petite croix dung salut, dung coste vne fleur de liz, de lautre coste vng liepart. Et pareillement monseigneur le dauphin se intituloit roy de France & tel se faisoit nommer par ses lettres patentes & en son grant feul Charles par la grace de Dieu roy de France, & des celle heure se leua plus forte guerre contre les Angloys & leurs adherans que il nauoit fait parauant le trespas de son pere.

Bien tost apres que le conte de Richemont fut venu en Bretaigne par deuers le duc son frere fut entrepris par ses parents & amys le mariage de luy & de la fille aisnee du duc de Bourgoigne, qui veufue estoit du duc de Guyenne, filz aisne du roy de France Charles fixiesme. Et finalement fut accorde pour yceluy mariaige conclurre, que le duc de Bretaigne & son frere de Richemont, & le duc de Bourgoigne se rendroient dans la ville d'Amyens. Et furent tresues octroyez par les Angloys au duc de Bretaigne, pour durant icelle faire ce voyage. Le duc de Bretaigne, qui grandement desiroit ce party, pour lamour quil auoit a son cousin le duc de Bourgoigne, partyt de Bretaigne a tout quatre mil hommes a cheual, bons gens darmes, & son frere le conte de Richemont en sa compagnie, & au iour qui auoit este assigne se trouua a Amiens; en chemin se rendit a luy le duc de Betfort, qui luy fist compagnie iusques a Amiens, & la se rendit le duc de Bourgoigne, & apres que ces seigneurs eurent bien debatue leur affaire, ilz se condescendirent toutz dung accord a la conclusion de ce mariaige, & tantost apres le duc de Bretaigne print congie de la compagnie & sen retourna en Bretaigne,

le duc de Betfort tousiours en sa compagnie, pour mieulx meure sa personne en seurte, car force luy estoit passer le pays de Normendie, qui tout estoit peuple de gens darmes angloys. Et le duc de Bourgoigne avec le conte de Richemont sen allerent a Diion, & la le conte de Richemont espoufa ma dame de Guyenne, & puis resida en la court du duc de Bourgoigne, en ses pays de Flandres & de Bourgoigne par le temps dun an; & iusques vers la fin de lan mil quatre cens vingt & troys. Puis apres monta en Flandres sur la mer & vint descendre a saint Mallo, & de la se tyra à Venues par deuers son frere.

EN celuy an mil quatre cens xxiii, le troysiesme iour de iuillet, dame Marie d'Aniou, royne de France, femme du roy Charles septiesme, lequel nestoit encores couronne roy, acouchea dung filz nomme Loys, qui fut dauphin & depuis roy de France, & pour retenir a memoire lan de sa natiuite le metrificateur fist ce petit verset :

La natiuite du roy Loys xi.

## DELPHINI FRANCI LUDOVICI DEDITIS ORTUM.

Après que le roy de France Charles vii fut aduertie du retour en Bretaigne du conte de Richemont, il le desira grandement auoir en sa court, affin de luy donner la principale charge & conduycte de sa guerre, car il le congnoissoit vertueux, veritable & loyal par suz touz autres nobles princes. Et a ceste cause enuoya le roy par deuers le duc plusieurs foiz & bien curieusement le prioit quil voulsist permettre que son frere le conte de Richemont venst par deuers luy pour conduire son armee & que il luy donneroit vng tel estat que ses parans & luy en seroient contans. Le duc, apres auoir communicque cest affaire aux barons de son pays & que le conte de Richemont estoit content de faire en ceste matiere ce que le duc son frere conseileroit & ordonneroit, octroya au roy sa requeste. Si partit bien tost apres de Bretaigne le conte de Richemont, acompaigne des seigneurs de Lual, de Porhoet, de Chasteaubriand, de Malestroit, de Montauban, de

## Le quatriesme

la Belliere, de Rostrenan, de Beaumanoir & de plusieurs autres nobles hommes bretons, & se rendit a Angiers, ou le roy estoit, qui moult chèrement le recueillit.

**L**AN dessusdit mil quatre cens vingt troys, messire Iehan du Bellay, acompaigne de deulx cens combatans, fut desconfit par soixante Angloys.

Les contes de Salbery & de Suffort, Angloys, & le mareschal de Bourgoigne desconfirent deuant Crauant les Francoys, entre lesquelz estoit le seigneur d'Eruelle Escot, conestable d'Escoce, qui fut prins, & plusieurs autres y furent prins & occis, iusques a troys mil Francoys. Et peult on congnoistre lan que ce fut par les lectres nombrables de ce verset :

CRESCEIT IN AUGUSTO COR PARDIS ANTE  
CRAVENTUM.

En celuy temps Iehan de Harcourt conte d'Ammalle, messire Andre de Laual, Loys de Laual, messire Ambroys de Lore, Pierre bastard d'Alencon & autres pres de Laual en Bourgneuf, en vng lieu appelle la Broffonniere, pres de la Grauelle, sur les marches du Maine, tyrant en Normendie, deffirent & tuerent xiii Angloys a vne rencontre, & deux ou troys se fauluerent a la fuytte & par les lettres nombrables de ce verset :

ANGLORUM PULLOS CONTRIUIT LIBRA GRAVELLE

peult on scauoir & retenir que lan mil CCCXXiii fut celle desconfiture, & fut la fait cheualier Andre de Laual, pour ce que moult vertueusement il se porta en cest affaire.

Lan mil CCCXXiiii, vers la fin du moys de iuillet, le duc d'Alencon, les contes d'Aubmalle & de Boucquan conestable de France, le viconte de Nerbonne & autres Francoys prindrent les ville & chasteau de Vernoil au Perche, qui lors appartenoit au duc d'Alencon, ce quilz ne tindrent pas longuement, car tantost fut la bataille de Vernoil au Porche, ou fut occis quatre mil Francoys & plus, dont estoient

le conte du Glas, & Iames son filz, le conte de Boucquan conestable de France, le conte d'Aubmalle, le viconte de Narbonne, le conte de Vandadour, le seigneur de Grauille & grant nombre d'autres gens de nom & le duc d'Alencon, le bastard d'Alencon, le seigneur de la Faiette mareschal de France & plusieurs autres furent prins prisonniers, & fut la iournee perdue pour l'auarice des Lombars qui estoient du party des Francoys, lesquelz se misrent a piller auant quil en fut temps, & estoit le duc de Betfort principal en l'armee des Angloys.

### La prinse de la Ville du Mans par les Angloys.

**A**U moys daoust lan mil cccc xxv, le conte de Salbery Angloys, assiegea la ville du Mans & la mist en lobeyfance du roy d'Angleterre, & permit que les Francoys qui dedans estoient, y vydassent moyennant quinze cens escuz quilz luy payerent. Par les lettres nombrables de ce verset :

VILLA CENOMANIS FIT IN AUGUSTO LOCUS ANGLIS

peult on retenir lan & le moys que ce fut.

### Comment le conte de Richemond fut conestable de France.

**A**PRES la mort du conte de Boucquan, conestable de France, le roy Charles septiesme voulut donner l'office de conestable au conte de Richemond, ce quil differa accepter iusques a ce quil eust eu le consentement du duc son frere & du duc de Bourgoigne son beau frere, & fut le roy moult content de ceste responce, & luy chargea faire diligence den scauoir leur volonte. Si enuoya le conte de Richemond des plus notables personaiges de sa compaignie, les vngs deuers le duc de Bretaigne son frere, & les autres par deuers le duc de Bourgoigne. Aufquelz il escripuit que bien voluntiers il accepteroit celle charge, puis que le plaisir du roy estoit de la luy donner, pourueu que ces deulx princes le voulsissent consentir, autrement non.

Les meffaigniers quil auoit enuoye par deuers le duc de Bretagne, apres auoir acompli leur charge, sen retournerent par deuers le conte de Richemond, & luy rapporterent que le duc en estoit tres content & que le conte de Richemond auoit bien fait den scauoir le plaisir du duc de Bourgoigne. Le duc de Bourgoigne qui pensoit que le duc de Richemond estant conneftable de France, auroit plus grande aucto-rite autour du roy pour traicter dune bonne paix, a celle cause luy fist scauoir que il est daduis que il deuoit benignement recepuoir ceste charge, & quant a luy il se consentoit volontiers. Quant le conte de Richemond eut eu responce de ces deulx seigneurs, il se retyra a Chynon par deuers le roy de France, & luy dit ce que ses deux princes luy auoient respondu. Adonc luy donna le roy loffice de conneftable, luy bailla lespee & receut de luy le ferment acoustume a faire en tel cas.

**A**PRES que le conte de Richemond fut conneftable de France, le roy luy ordonna que il se retirast en Bretagne par deuers le duc, & que en toute diligence il assemblast des gens darmes ce quil en pourroit finer pour aller faire la guerre aux Anglois. Monseigneur le conneftable deuant que partir dauecques le roy, luy supplia que son plesir fust mestre hors du royaume, & en faire vider le president de Prouence, le bastard dOrleans, Guillaume dAuaugour & Fortier, qui auoient baille le conseil a ceulx de Pantheure de prendre le duc a Chantoceaux. Et combien que le roy par le traicte de Sable eust promis au duc de Bretagne dainsi le faire, ce neantmoins il nauoit riens encores fait. A celle cause doubtoit monseigneur le conneftable sil alloit en Bretagne par auant que le roy eustourny a cest article que le duc son frere ne souffriroit pas que lon en tyrast des gens darmes pour seruir le roy, & doubtoit que par faulte de faire vider hors du royaume les deffusdictz, le duc ne voulsist rompre ce traicte de Sable qui seroit vng trop grant dommage pour le roy. Aussi requeroit que messire Tanguy du Chastel, preuost de Paris, vuidast le

royaulme, & quil en feust mis hors semblablement, non pas pour ce quil fust cause de la prinse du duc, mais pour ce que lon disoit quil estoit lun de ceulx qui tuerent le duc Jehan de Bourgoigne au Fault Yonne. Et pour ce que monseigneur le conneftable auoit eu espousee la fille diceluy duc de Bourgoigne, ses parens & amys luy pourroient imputer quelque laschete sil ne luy couroit fus, & tous deulx estoient seruant & residens en vne court. A quoy le roy respondit que tres volontiers il feroit & promist faire vider hors de son royaume les deffusdictz, qui cause auoient este de la prinse du duc de Bourgoigne son bon frere, ainsi que promis luy auoit par le traicte de Sable, mais que enuiz feroit il vider messire Tanguy du Chastel, pour ce quil laymoit moult, & de bon courage lapelloit son pere a loccasion de ce quil le faulua, luy estant ieune, & lenleua de nuyt & mena en la bastille de Saint Anthoine a Paris, & le lendemain lemmena a Melun. Et plus y a, car le roy le descouloit de la mort du duc Jehan de Bourgoigne, disant quil ne lauoit fait ne fait faire; mais quant aux autres, il promettoit les faire vuyder hors de son royaume. Et sur ces promesses partit monseigneur le conneftable dauecques le roy & bailla charge a leueque de Clermond & autres ses amys qui en court residoient de souuent solliciter & aduertyr le roy de faire vider hors du royaume les deffusdictz.

**M**ONSEIGNEUR le conneftable se retira en Bretagne par deuers le duc son frere pour assembler & mettre sur le plus grant nombre de gens de guerre que possible luy seroit. Et le duc, se confiant a la promesse que le duc luy auoit faicte de en enuoyer hors de son royaume ses hayneulx, permist que les nobles de sa duche se misdrent en armes pour acompaigner monseigneur le conneftable a faire la guerre aux Anglois.

Or, depuis que monseigneur le conneftable fut party dauecques le roy, le president de Prouence & ses aliez, qui auoient este aduertiz de la promesse que le roy luy auoit faicte

## Le quatriesme

de les faire vuidier, trouuerent moien de gagner le roy par leurs faux & desloyaulx rapports en maniere quilz firent chasser de la court du roy leuesque de Clermond, lequel se retira a Angiers, & mirent le roy en vne merueilleuse suspicion contre monseigneur le conestable, dont il fut aduertiy; mais tout ce neantmoins ne laissa il pas parfaire son entreprinse, car bien tost il assambla & mis fus vng bon nombre de bons gens darmes quil auoit mene en Normandie sen estoient retournez en Bretagne, & les auoit le duc contremandez en hayne de ce que le roy nauoit pas chaste ses hayneux hors de son royaume comme promis luy auoit a Sable. Si sen partit de Bretagne monseigneur le conestable, acompaigne de monseigneur dEstampes son frere, du conte de Porhoet, des seigneurs de Beaumanoir, de Chasteauneuf, de Rostrenen, de Montauban, & grant nombre dautres nobles hommes de Bretagne, tirans par deuers le roy. Et passa monseigneur le conestable par Angiers, & la leuesque de Clermond luy dist comment il nestoit plus homme de court, en hayne de ce quil auoit poursuiuy enuers le roy que le president de Prouence, le bastard dOrleans & autres de ceste bande voidassent de ce que monseigneur le conestable fut party dAngiers pour venir a Chynon, ou le roy estoit, se rendirent a luy iusques aux fauxbourgs dAngiers moult grant nombre de barons & nobles hommes de Berry, Auuergne, Saintonge & Poitou; cest asauoir le seigneur de Chauigny, le viconte de Thouars, le seigneur de Prie, les gens du seigneur de Partenay, le seigneur de Bresseure, le seigneur dAlegre, le seigneur de la Greue, le seigneur dArgenton, le seigneur de la Tour & grant nombre dautres nobles moult acompaignez de gens de guerre, touz deliberez de seruir soubz la conduite de mondit seigneur le conestable a faire vuidier & chasser hors du royaume les Anglois & leur faire mortelle guerre, lesquelz mon dit seigneur le conestable recueillit ioyeusement.

Le roy fut aduertiy comment monseigneur le conestable venoit par deuers luy ainsi bien acompaigne, dont il ne se contantoit pas trop

bien, & tendoit a se retirer en maniere que monseigneur le conestable ne le trouuast & se deslogeoit de place en place; mais monseigneur le conestable le suyuoit de pres, car il vouloit en diligence mettre ordre au fait de la guerre, & ceulx que le roy deuoit bannir de son royaume par le traicte de Sable estoient encores avecques luy en grande auctorite & nosoient attendre la venue de monseigneur le conestable. A ceste cause le faisoient desloger souuent & s'esloigner. Mais finalement force leur fut passer par la, car le duc de Bretagne, le duc de Bourgoigne, monseigneur le conestable & leurs parens & amys auoient cest affaire tant a cuer que merueilles. Et le roy estoit lors en moult grande necessite, parquoy fut le roy delibere dacomplir sa promesse & enuoya en Prouence le president & sa femme; Guillaume dAuugour & Fortier furent banny de court & du royaume. Aussi fut le bastard dOrleans, mais pour ce quil estoit moult vaillant homme en fait de guerre & de tresbonne conduite, monseigneur le conestable trouua bien tost apres moyen enuers le roy de le faire rappeler & lembesoigna au fait de la guerre ou il fist moult de beaux faiz darmes & fut prudent & saige.

Messire Tanguy du Chastel, preuost de Paris, congnoissant la suspicion que le duc de Bourgoigne & ses parens & amys auoient contre luy, voiant aussi que pour chose quelconque, le roy ne le vouloit esloigner de luy, se retira par deuers le roy & luy dist: Sire, iay sceu que vos parens le duc de Bourgoigne & monseigneur le conestable vous pressent de men enuoier hors de vostre court & de vostre royaume, disant que iay este aidant a la mort du feu duc de Bourgoigne. Sire, fil y a personne qui veille soustenir que ie y aye mis la main ne que par moy il ait este occis, ie soustiendray le contraire sur ma vie. Toutefois, ie voy que ces seigneurs ne se veulent approcher de vous si ie ne vuyde; ne laissez pas, sire, pour si petit personnaige que ie suis a recueillir pres de vous les seigneurs de vostre sang, car vous en auez a present plus grande necessite que iamais; retirez les & les approches de

vous, & faictes quilz se ioignent a vous pour aider a deschasser vos ennemys, & si vous me chassez hors, au moins pouruoiez le bon vieil homme de quelque estat dont il se puisse entretenir & seurement preseruer de cheoir au danger de ses ennemis, & en touz sens enuoiez moy hors du royaume, affin que vos parens ne prennent sur moy leur excuse.

**A**LORS le roy, moult desplaisant de ce quil failloit quil desemparast, luy dist : Preuost de Paris mon amy, ie vous appelleroy a iamais mon pere, & puis que vous consentez aller hors du royaume, retirez vous en la cite de Beaucaire & vous tenez la, ie vous donne loffic de feneschal de Beaucaire, qui chascun an vous vaudra vi cens liures de gaiges; vous retiendrez aussi vostre office de preuost de Paris, qui vous vaudra v cens liures de gaiges, combien que les Angloys y soient, & vous donneray outre bon estat par pension chascun an. Et pour la conseruation de vostre personne ie veulx que vous aiez quinze archiers de vostre garde, telz que voudrez eslire, lesquelz ie feray payer par chascun an. Sil vous souruient ce pendant quelque affaire, enuoiez par deuers moy & ie y pouruoiray. Et a tant print messire Tanguy congie du roy & sen alla resider a Beaucaire, ou il fut tout le parfus de ses iours.

Après que ces gens furent hors de court, monseigneur le conestable arriua par deuers le roy moult bien acompaigne. Et fut aduise que le roy renuoieroit en diligence en Bretagne par deuers le duc le prier que il se mist en armes, pour luy ayder a deschasser ses anciens ennemys hors de son royaume. Le duc aduerti comment le roy auoit banny hors de sa court & de son royaume les dessusdictz ses hayneux luy fist scauoir que tres volentiers il feroit assembler en armes les nobles hommes de sa duche, & ce quil pourroit finer de gens de guerre. Et fut accorde entre le duc & les ambassadeurs du roy que le roy se rendroit a Saumur, a vng iour nomme, & celuy iour se y trouueroit le duc & la ensemble communicueroient de touz les affaires du royaume, esquelz il estoit mestier de pourueoir.

Le duc se disposa de partir pour aller a Saumur, au iour qui auoit este aduise & mena avecques luy moult belle compaignie de prelaz, barons & nobles hommes de Bretagne. Et en son chemin, pres de la ville d'Angiers, il rencontra monseigneur le conestable son frere, qui venoit au deuant de luy, & passerent par saint Florant, ou estoit la femme de mondit seigneur le conestable, que le duc nauoit encores point veue. Et apres auoir communicque quelque peu avecques les dames, le duc se rendit a Saumur & se logea sur les pontz. Tantost apres arriua le roy au chasteau de Saumur & le lendemain luy fut faire la reuerance & longuement parlerent ensemble des affaires de la guerre. Et furent ces princes ensemble a Saumur par le temps de douze iours & tellement accorderent leurs affaires ensemble que de rechief ilz confermerent et iurerent le traite fait a Sable. Si print le duc a Saumur congie du roy & sen retourna en Bretagne & monseigneur le conestable demoura pour accompagner le roy qui alloit en Auvergne & en Bourbonnoys.

**C** Du siege de saint Iame de Bouueron assis par les Bretons, lequel fut leue a leur confusion.

**L**E duc de Bretagne se retira a Rennes & fist assembler ban & arriere ban et toutes gens qui en guerre pouoient seruir, & les fist tenir sur les marches de Normandie. Le conte de Richemond conestable, quand il eust conduit le roy en Bourbonnois, se retira a Rennes par deuers le duc son frere & trouua larmee de Bretagne toute preste a marcher, & de ceste armee monseigneur le conestable eut la charge & conduite, & a Antrain assembla ces capitaines, & par la deliberation de tous ilz allerent assieger le chasteau de saint Iame de Bouueron, que les Angloys tenoient, & fut en Karesme lan mil quatre cens vingt cinq. Si fut le siege clos & la place batue fort & ferme, & huit ou dix iours apres que les Bretons furent arriuez deuant la place, ilz voulurent donner lassault. Et

## Le quatriesme

pour iceluy assault donner, ordonnerent partie deulx & autre partie pour garder les destroitz, affin que aucun secours ne vint aux Anglois, car monseigneur le conestable estoit tout adverti que les contes de Suffort & d'Escalles estoient dedans Auranches a grant puissance d'Anglois, & auoit monseigneur le conestable ordonne deulx mil hommes de guerre pour aller garder ses passaiges, cependant que lon donnoit l'assault. Et quant ilz eurent aux champs bien ferche & descouuert & quilz ne virent personne, ilz retournerent touz en ordonnance de bataille par deuers ceulx qui donnoient l'assault, lesquelz cuyderent que ce fussent Anglois qui contre eulx venissent pour donner secours a ceulx de la place. Et partie de ceulx qui donnoient l'assault se retirerent en fuisse & laisserent partie de leurs compaignons qui ia estoient par eschelles au hault des murs, combatans main a main avec les Anglois. Et les Anglois de la place qui aduiferent ceste retraicte saillirent a puissance sur ceulx qui estoient demourez, lesquelz se cuiderent sauluer a trauers vng marchesage qui est illec pres. Mais ilz fondoient en la fange si auant que il y en demoura grant nombre. Les autres que les Anglois peurent atteindre furent occis, comme les seigneurs de Coitguy & de Mollac, messire Alain de la Motte, Guillaume de la Motte, & plusieurs autres nobles hommes y furent tuez. Ceulx qui se sauluerent se retyrerent deuers monseigneur le conestable & par deuers le seigneur de Penhoet, admiral de Bretagne, qui tenoit le camp a demy quart de lieue de la, & en diligence rassemblerent leurs gens darmes & retournerent par deuers la place pour cuider combattre les Anglois, lesquelz festoient ia remparez & enfermez au chasteau. Et pour ce que la nuyt obscure & noire suruint, ceulx du siege se retirerent les vngs qui estoient blecez pour eulx faire penser, & les autres pour les acompaigner, & misdrent le feu en leurs logis, & ne fut pas en la puissance de monseigneur le conestable ne des autres chefs de l'armee de les rassembler ne quilz se deseparassent. Et fut ceste desconfiture en Karesme, au signe de *pisces* lan mil quatre cens vingt cinq, comme lon peult re-

tenir a memoire par les lectres nombrables de ce petit verset :

DESPICIT ARMORICOS BEURO SUB PISCIBUS ACTUS.

Lan mil quatre cens vingt six, le conte de Richemond conestable de France voiant que chose impossible estoit soubstenir le faix de la guerre sans finance, car en telz affaires l'argent est les nerfs des batailles & est appelle le sang polliticque & que le seigneur de Gyac, qui lors estoit le premier chambellan conseiller & prochain du roy Charles septiesme, recueilloit toutes les finances de France, lesquelles il conuertissoit en acquisitions de chastellenies & grans heritages pour luy & en son nom, le tout a son particulier profit, & laissoit les gens darmes sans estre paieez & contentez, a raison de quoy les compaignies estoient desemparees & le peuple commun pille & menge. A celle cause monseigneur le conestable fist prandre & enleuer de nuyt celuy seigneur de Gyac, qui fut trouue couche pres de sa femme; fist sommairement faire son proces & finalement son proces parfait, il le fist sans le feu du roy gecter en la riuere & noyer.

Après Gyac fut en bruit touchant le fait des finances Le Camus de Beaulieu, & pour pareille cause fut tue a Poitiers par les gens de monseigneur le conestable.

En celuy an, monseigneur le conestable, acompaigne des seigneurs de Grauille, de Gaucourt, la Hyre & autres, leua le siege que les contes de Vuaruich & de Suffort, Anglois, tenoient deuant Montargys. Et lors, le duc Jehan d'Alencon qui prins auoit este des Anglois a la iournee de Vernueil, fut deliure moiennant deulx cens mil escuz quil paya pour sa rançon.

### Le siege de Pontorson & comment les Anglois desfirent les Bretons.



EN celuy an mil quatre cens vingt six, enuiron la feste de saint Michel, monseigneur le conestable de France fist remparer la ville de Pontorson

en Normandie, pour tenir frontiere aux Anglois, qui estoient en garnison a Auranches. Et apres que la place eust este fortifiee, les conestables de France & d'Ecosse qui y estoient retournerent par deuers le roy de France. Et les seigneurs de Rostrenen & de Beaufort demourerent pour garder la place, tantost apres le partement des dessusdictz conestables, le seigneur de Rostrenen fortit avecques quelque nombre de gens hors de la place, pour courir droit a Auranches, & rencontrerent les Anglois qui les deffirent, & en ceste defaict fut Rostrenen prins des Anglois. Et apres sa prinse, le duc de Bretaigne enuoya le seigneur de Chasteaubriend & le mareschal de Bretaigne son frere a Pontorson, lesquelz renforcerent & reparerent la place, & la garnirent mieulx que deuant, de viures & d'artillerie. Et bien tost apres, le conte de Varloine, lieutenant en Normendie pour le roy anglois, les seigneurs de Talbot, d'Escalles, de Ros, de Voirdery, de Fastol & autres chefs de guerre avec leur suite, vindrent assieger la place de Pontorson, laquelle n'estoit de defence, car impossible chose estoit la fortifier ne faire difficile a prendre a telle puissance que estoit celle que les Anglois auoient en ces parties, touteffois les capitaines & gens de guerre bretons qui dedans estoient, se delibererent de tenir bon. Le siege y fut le mardi deuant Karesme prenant lan dessusdit mil cccc xxvi. Et fut la place assiegee si longuement que les viures deffailirent a ceulx de dedans.

Le duc de Bretaigne qui scauoit la necessite ou estoient ceulx qui tenoient la place, enuoya vne grosse bende de gens darmes, celle part pour donner des alarmes aux Anglois, & les conduisoient le seigneur de Chasteaugiron & le viconte de la Belliere. Ces Bretons tyrerent la part ou ilz pensoient trouuer les viuandiers qui apportoient les viures a lost des Anglois. Et se rendirent en la greue du mont Sainct Michel pres bas courtiz ou ilz trouuerent quelque nombre de godons qui conduyoient les viures au siege, lesquelz ilz assailirent. Et les Anglois moult roydement se defendirent. Ceulx du siege qui en furent aduertiz se desempererent, & en

diligence marcherent pour defendre leurs viures & secourir leurs gens, & chargerent de telle forte sur les Bretons quil nen eschapaist vng seul qui ne fust occis ou prins. Et y furent tuez de la partye des Bretons les seigneurs de Couloines, de Chasteaugiron & de la Hunaudaye, messire Guillaume Leuesque, messire Oliuier Thoumelin & grant nombre d'autres Bretons. Et le viconte de la Belliere & plusieurs autres y furent prins. Apres ceste victoire, les Anglois retournerent a leur siege, & fut ceste aduventure le iedi absolu lan dessusdict quatre cens xxvi.

Bien tost apres, ceulx qui tenoient la place de Pontorson furent aduertiz comment le secours que le duc leur auoit este enuoye auoit ainsi lourdement defaict. A celle cause aussi que plus ny auoit de viures en la place, consentirent la rendre, leurs vies saulues tant seulement, & en tel estat en fortirent & demoura la place entre les mains des Anglois qui y entrerent au signe de *Thaurus* le viii<sup>e</sup> iour de may lan mil quatre cens vingt sept, comme vous pourrez retenir par les lettres nombrables de ce verset.

OCCUPAT URSONIS PONTEM LEX ANGLICA TAURO.

**C** Du traicte de paix qui fut faict entre les commis & lieutenants du roy d'Angleterre d'une part & le duc de Bretaigne & les prelaz & nobles hommes de son pays d'autre.



APRES que les Anglois eurent recouuert la place de Pontorson, le duc de Bethfort, lieutenant general du roy d'Angleterre soy disant regent le royaume de France qui lors estoit a Rouen, descendit a moult grant puissance d'Anglois droit a Pontorson, pensant entrer en la duche de Bretaigne & icelle destruire & piller. Le duc Jehan & les prelaz, barons & autres nobles seigneurs du pays en furent moult espouventez & non fans cause, car l'armee des Anglois estoit moult fiere & deliberee de tout le pays degaster, & la resistance de Bretaigne n'estoit

## Le quatriefme

suffisante pour soustenir le faiz, & dautre part le roy de France ne luy eust peu aider. A celle cause, par le moien daucuns mediateurs fut traicte la paix entre le roy d'Angleterre & ses pays & subgectz & le duc & les siens, parce que le duc promettoit faire hommaige au roy comme roy de France & garder le traicte de paix final dentre les deulx royaulmes, selon quil est contenu es lectres dont la teneur en-

conque, & iamais a nul autre comme a roy de France, sinon a mon dit seigneur le roy de France & d'Angleterre, & a ses hoirs roys de France nobeyrons. En tesmoing de ce, nous auons signe ces presentes de nostre main, & fait sceller de nostre seel, le viii<sup>e</sup> iour de septembre lan mil quatre cens xxvii. Ainsi signe par le duc. Par le duc & de son commandement. I. Godart.

### La teneur des lectres du traicte.

**I**EHAN, par la grace de Dieu duc de Bretagne, conte de Montfort & de Richemond, a tous ceulx qui ces presentes lectres verront salut. Sauoir faisons que pour le bien de paix & demourer en la bienueillance & obeissance de monseigneur le roy de France & d'Angleterre Nous auons renonce & renoncons par ces presentes a toutes aliances par nous faictes au preiudice de mondit seigneur le roy, faucunes en auons faictes, & iurons & promettons par la foy & serment de nostre corps & en parole de prince, pour nous & noz hoirs, que sans dol, fraude, ne mal engin Nous garderons & ferons garder & obseruer les appointemens & traictez de paix final des deux royaulmes de France & d'Angleterre, sans iamais venir au contraire, & que a mondict seigneur le roy de France & d'Angleterre, & a mon trescher & tresame frere le regent le royaulme de France, duc de Bethfort, durant sa regence es choses touchans & conservans le fait & gouvernement dudit royaulme, & de la chose publique diceluy obeyrons sauf en ce noz droiz royaulx, libertez & nobleffes. Et promettons estre, ferons & demourrons perpetuellement hommes de mondit seigneur le roy, & de ses hoirs roys de France, luy ferons hommaige, luy venu & estant en son royaulme de France, ou a ses successeurs roys de France, dedans trois mois apres que nous en ferons requis, en telle maniere que noz predecesseurs ducz de Bretagne ont acoustume de faire a roy de France, sans opposition, contradiction ou difficulte quel-

**H**URENT aussi baillees lettres conformees a celles du duc par les seigneurs & suppostz des Estatz de Bretagne cy apres nommez :

Francois aifne, filz du duc de Bretagne, conte de Montfort.

Richart, filz & frere du duc de Bretagne.

Iehan, par la grace de Dieu euesque de Nantes, chancelier de Bretagne.

Estienne, par la grace de Dieu euesque de Dol.

Iehan Mangiennen, licentie es loix, procureur avec suffisant pouoir quant a ce de reuerend pere en Dieu Guillaume, par la grace de Dieu euesque de Saint Mallo.

Iehan Cheualier, licentie es loix & en decret, procureur avec suffisant pouoir de reuerend pere en Dieu B., par la grace de Dieu euesque de Cornuaille.

Amaury, par la grace de Dieu euesque de Vennes.

Pierre Marion, licentie es loix, vicaire general de reuerend pere en Dieu leuesque de Saint Briec.

Iehan, euesque de Treguer.

Alain de Rohan conte de Porhoet.

Iehan sire de Rieux & de Rochefort.

Robert de Dinan sire de Chasteaubriand & de Montailliant.

Oliuier viconte de Coetmen.

Gilles sire de la Hunauldaye.

Charles de Rohan, seigneur de Guemene & Guingamp.

Iehan, sire d'Actigue & de Fontenay, & Iehan de Blossac, seigneur de Blossac.

Geoffroy, sire de Combour & de Derual.

Iehan, sire du Perier.

Raoul, sire de Coetquen.

Iehan, fire de Penhoet, admiral de Bretagne, & Oliuier feigneur du Chastel, cheualiers.

Iehan de Malestroit, feigneur de Kaer & de Beaumont.

Guillaume, feigneur de Ploer, Iehan de Lirmelle, feigneur de Chasteaugal, cheualiers.

Lhumble chapitre de Dol.

Guillaume cheualier, licentie es loix, & Pierre Apucill bachelier en decret, chanoine de Nantes, procureur au suffisant pouoir quant a ce du chapitre de Nantes.

Pierre du Pleffeis licentie es loix, procureur au suffisant pouoir quant a ce du chapitre de Cornuaille.

Iehan Coetquin licentie es loix, archediace & chanoine de Leon, procureur du chapitre de Leon.

Iehan de Nungrie maistre descolle, & Vincent Ducamptoire chanoine de Treguer, procureurs au suffisant pouoir quant a ce du chapitre de Treguer.

Les humbles doyen & chapitre de Saint Brieuc.

Les citoyens, bourgeois & habitans des ville & faubourgs de Dol.

Nous les bourgeois & habitans de la ville de Kemper Corentin.

Nous les bourgeois & habitans de la ville de Saint Paoul de Leon.

Roland de Coetmen cheualier, Iehan de Kerxfaliou feigneur de Launay, Herue feigneur de Neuet, Herue du Huch, Charles de Lescauf, Oliuier Arrel & Charles de Villeaudran, cheualiers.

Siluestre, feigneur de la Feullee.

Iehan de Maschecol cheualier, feigneur de Vieille Vigne.

Oliuier de Pluscalec.

Iehan de Malestroit feigneur de Mefange.

Guillaume feigneur de Montauban.

Iehan de Beaumanoir cheualier, feigneur du Bois de la Mote & de Tremeret.

Iehan Gaudin, feigneur de Martigne.

Iehan, feigneur de Tierczant, cheualier.

Et chascun des dessusdictz bailla particuliere-ment ses lettres en forme & autentique, en la forme & maniere qui ensuit (*mutatis mutandis*).

**N**ous, etc. Salut. Comme nostre prince & feigneur le duc de Bretagne en certain accord faisant entre treshault, tresexcellant & trespuissant prince le roy de France & d'Angleterre & nostredit feigneur, iceluy nostre feigneur ait iure garder & obseruer les appointemens & traictez faiz entre les deux royaulmes de France & d'Angleterre, & aussi ait promis faire hommaige & recongnissance audit roy de France telz que ses predecesseurs ducs de Bretagne lont acoustume faire au roy de France en le gardant es honneurs, priuileges, franchises, libertez, vsages & preeminences dont les ducs de Bretagne ses predecesseurs ont acoustume iouyr & vsfer, nous auons iure & iurons par la foy & ferment de nostre corps tenir & garder ledit traicte & appointement de paix final fait entre lesdictz deulx royaulmes ainsi que nostredit feigneur & prince la promis & iure fans en aucune maniere venir au contraire. Et auons renonce & renoncons a toutes aliances & promesses faictes au preiudice de ladicte paix final, reserue les seaulte & obeissance que nous deuons a nostredit feigneur & prince. En tesmoing de ce nous auons mis & appose a ces presentes le feel, etc, le viii<sup>e</sup> iour de septembre, lan mil iiii cens xxvii.

**L**AN mil iiii cens xxviii, au moys de may, la ville de Nantes & toute la terre es environs trembla si espouventablement que lon cuidoit que le monde deust finir. Et pourrez retenir le temps que ce fut par les lettres nombrables de ce verset :

SUBTUS CONCUTITUR MAIO NANNETICA  
TELLUS.

**E**N celuy an les Angloys prindrent les places de Genuille en Beaulse, Boisgenfi, Meun sur Loire & Gergueau; & puis mirent leurs bastilles deuant la ville d'Orleans quilz assiegerent, par lequel siege furent abastues xxii eglises es faulxbourgs de la ville : comme labbaye de saint Euerter, leglise collegial de saint Aignan & autres. Ce siege espouuenta moult le roy de France & tous ceulx de sa court.

Le siege assis  
par Anglois  
deuant  
Orleans.

## Le quatriesme

En ce temps messire Jehan Fastel & messire Symon Mohier, preuost de Paris, Angloys qui venoient aitailler le siege d'Orleans & conduisoient grant nombre de cheualx chargez de harans, desconfirent les Francoys pres de Genuille en Beaulse, car les Francoys qui aduertis auoient este comment les dessusdictz Angloys estoient partis de leur siege pour aller au deuant des harans que on leur apportoit, allerent bonne & grosse bende pour assaillir les Angloys, mais mal leur en print, car le seigneur Destruart, conestable d'Escoffe, le seigneur Dorual, frere du seigneur d'Albret, & grant nombre d'autres Francoys y furent occis. Le duc de Bourbon, la Hire & aucuns autres sen fuirent & y en eut grant nombre de prisonniers; & fut ceste rencontre appelee la bataille des harans, pour les harans que les Angloys conduisoient, car lors estoit le caresme & fut au signe *de pisces* vers la fin du mois de feurier lan mil iiii cens xxviii, comme vous pourrez retenir a memoire par les lettres nombrables de ce petit verset :

PARDUM FOVERUNT PISCES ALLECTIBUS  
AUCTI.

**C** De Jehanne la pucelle qui vint au roy de France durant le siege d'Orleans.

**B**IEN tost apres que le siege des Angloys fut assis au deuant de la ville d'Orleans, & durant celuy siege, messire Robert de Baudricourt, capitaine de Vaucouleur en Lorraine, lors estant en loist du roy, se adressa vne ieune pucelle du vilaige dudit Vaucouleur, nommee Jehanne, aagee de xviii ans, laquelle estoit grande & moult belle, & auoit este toute sa vie bergere gardante les brebis aux champs. Auquel capitaine elle dit & pria que il la presentast au roy de France, car Dieu luy auoit fait reueller par la Vierge Marie & par madame sainte Katherine & madame sainte Agnes aucunes choses bien singulieres pour le recourement de son royaume, lesquelles elle ne oseroit declarer a autre personne que au roy. Et de ce fut moult ennuyement

prie, requis & presse ce capitaine par ladessusdicte pucelle. Lequel capitaine adiouxta quelque foy. Si en aduertit le roy & les grans personnaiges qui autour de luy estoient, mais les vngz nen vouloient faire conte, disans que cestoit vne reuerie & que on nen deuoit point prester loireille, les autres estoient de contraire oppinion & disoient que Dieu vouloit releuer le poure royaume de France par le sens & la conduite de celle que luy seul inspireroit par sur la conduite des entendemens humains, en donnant a tous a entendre que par luy seul regnent tous roys & seigneurissent tous seigneurs. Toutefois il fut aduise deuant que passer plus auant que lon enuoieroit en diligence a Vaucouleur querir le pere ou la mere de ceste pucelle, ce qui fut fait, & quant ilz furent en court ilz furent interrogez comment leur fille auoit vescu, de quel mestier, & comment elle auoit eu celle aduision & que ce estoit. Ilz respondirent que elle estoit leur fille & que ilz auoient habituee & mise des son ieune aage a garder leur bestial aux champs, & que depuis peu de iours elle leur auoit dit par plusieurs fois que la Vierge Marie mere de Dieu, & aucunes saintes de paradis se estoient apparues a elle & souuent lauoient admonestee de se retirer par deuers le roy de France pour l'aduertir daucunes choses ou il estoit tresnecessaire de besongner diligement affin de recouurer son royaume, & que pour ce faire elle se estoit partie dauec eulx & estoit venue parler au capitaine de leur place qui estoit en court & se estoit adreesee a luy pour ce quelle lauoit souuentessoiz veu en leur pais; & autre chose ne leur dirent si non que leur fille se estoit tousiours portee humble, sobre, chaste & deuote enuers Dieu & le monde, en la pourete ou ilz estoient & en laquelle ilz lauoient nourrie & esleuee, & n'estoit fine, caulte, subtile ne iangleresse. Apres auoir este les pere & mere oys parler de lestat & de la vie de leur fille, fut aduise quelle seroit interrogee par le confesseur du roy & par aucuns docteurs en theologie & aucunes gens du grant conseil du roy, deuant que permettre que elle parlast au roy. Si fut Jehanne la pucelle examinee & bien amplement interrogee par les dessusdictz auf-

quelz elle dist & declara les aduisions & apparicions qui aduenues luy auoient este sans aucunement leur reueler ce quelle auoit a dire au roy, & fut gardee par aucuns iours & chascun iour elle estoit interroguee de plusieurs interrogacions dignes & humaines, mais finalement on la trouua si constante & si bien moriginee quil fut aduise que on la feroit parler au roy. Si fut amenee en vne salle ou le roy estoit, lequel elle congneut & apperceut entre les autres seigneurs qui la estoient, combien que on luy cuydast faire entendre que quelque autre de la compagnie estoit le roy, mais elle disoit que non & monstra le roy au doy disant que c'estoit a luy que elle auoit a faire & non a autre, dont tous ceulx qui la estoient furent esmerueillez & esbahis.

**Q**UANT Iehanne la pucelle eut apperceu le roy elle se aprocha de luy & luy dist : Noble seigneur, Dieu le createur ma fait commander par la Vierge Marie sa mere & par ma dame saincte Katherine & ma dame saincte Agnes, ainsi que iestoie aux champs gardant les aigneaux de mon pere, que ie laissasse tout la & que en diligence ie me retirasse par deuers vous pour vous reueller les moyens par lesquels vous paruiendres a estre roy couronne de la couronne de France, & mettres voz aduersaires hors de vostre royaume. Et ma este commande, noble seigneur, que autre personne que vous ne sache ce que ie vous ay a dire. Et quant elle eut ce dit & remonstre, le roy fist reculer au loing au bas dicelle salle tous ceulx qui y estoient, & a lautre bout ou il estoit assis fist approcher la pucelle de luy, laquelle par l'espace dune heure parla au roy sans que autre personne que eulx deux sceust ce que elle luy disoit. Et le roy pleuroit, lermoyoit moult tendrement, dont ses chambellans qui veoient sa contenance se vindrent approcher pour rompre le propos, mais le roy leur faisoit signe qui se reculassent & la laissassent dire. Quelles parolles ilz eurent ensemble, personne nen a peu riens scavoir, si non que on dit que apres que la pucelle fut morte, le roy, qui moult dolent en fut, dist & reuela a quelque vng que

elle luy auoit dit comment peu de iours par auant que elle veneist a luy, luy estant vne nuyt couche au lit, alors que tous ceulx de sa chambre estoient endormis, il filogisoit en sa pencee les grans affaires ou il estoit & comme tout hors desesperance du secour des hommes se leua de son lit en sa chemise & a coste de son lit hors iceluy se mist a nulz genoulz & les lermes aux yeulx & les mains ioinctes, comme soy reputant miserable pecheur indigne de adresser sa priere a Dieu, supplia a sa glorieuse mere qui est royne de misericorde, consolation des desollez, que fil estoit vroy filz du roy de France & heritier de sa couronne il pleust a la dame supplier son filz que il luy donnast ayde & secour contre ses ennemis & mortelz aduersaires en maniere que il les peust chasser hors de son royaume & iceluy gouuerner en paix, & fil nestoit filz de roy & le royaume ne luy appartenist, que le bon plaisir de Dieu fust luy donner pacience, & quelques possessions temporelles pour viure honorablement en ce monde. Et dit le roy que a ces parolles que portees luy furent par la pucelle il congneut bien que veritablement Dieu auoit reuele ce mistere a ceste ieune pucelle, car ce quelle luy auoit dit estoit vray, & iamais homme autre que le roy nen auoit riens sceu.

**I**NCONTINENT que Iehanne la pucelle eut acheue son propos, le roy se leua & fist approcher de luy ses gens & leur dit & commanda que ilz eussent a faire & pourfuir touchant le fait de sa guerre, tout ce que Iehanne la pucelle leur diroit, car il estoit delibere de y besongner par son conseil, dont les princes & seigneurs qui la estoient furent moult esbahis & non sans cause, car ce mistere passoit leur entendement. Et fut la venue de la dessusdicte pucelle par deuers le roy en la premiere semaine du moys de mars lan mil quatre cens vingt & huyt, comme il appert par les lettres nombrables de ce petit verset :

APPLICAT AD KAROLUM SUB PISCIBUS AUSA  
PUELLA.

## Le quatriesme

**O**N demanda a Iehanne la pucelle en quel estat elle vouloit estre abillee, & elle respondit que elle vouloit estre armee de bon & dur harnoy & vouloit auoir compaignie de gens darmes soubz sa conduicte, & requist au roy 5 quil luy pleust enuoier vng de ses armuriers en vne eglise de Touraine qui estoit fondee de ma dame saincte Katherine, ou y auoit eu autrefois grant cours & voyage de pelerins, & que entre les ferrailles des prisonniers qui se-  
toient recommandez a saincte Katherine lon  
trouueroit vne espee qui, par la grace de Dieu,  
long temps auoit este en icelle eglise, & en  
ceste espee y auoit de chascun coste quatre  
fleurs de liz empraintes. Laquelle chose luy fut  
accordee en luy demandant se elle auoit oncques  
este en ce lieu. Elle respondit que iamais ny  
auoit este, mais bien fauoit par reuelacion di-  
uine que ceste espee y estoit, & par le moien  
dicelle espee elle deuoit leuer le siege d'Orleans,  
combatre les Anglois & mener le roy oingdre  
& couronner a Rains.

Après lesquelles parolles pour ce que lon entendoit certainement que le voyage dont elle parloit estoit saincte Katherine de Fierboys, fut de par le roy vng armurier enuoye cele part, lequel trouua lespee entre les ferrailles qui en icelle eglise estoient. Et ny auoit espee quelconques marquee de ladessusdicte marquee que celle la & la apporta au roy, lequel la fist  
bailler a Iehanne la pucelle & la fist armer  
comme vng homme darmes de pie en cap. Et  
en son harnois tresbien se manyoit & auoit  
bonne contenance. Si fut ordonne par le conseil de Iehanne la pucelle, que lon allast  
aui-tailler ceulx qui dedans Orleans estoient, qui  
lors estoient affamez, & pour ce faire se mist  
aux champs la pucelle a banniere desploiee,  
acompaignee du bastart d'Orleans, de La Hire,  
du seigneur de Lore, de messire Robert de  
Baudricourt & autres seigneurs & gens de  
guerre que le roy auoit ordonnez pour estre  
soubz sa bende, & malgre les Anglois elle fist  
conduire & mettre par deux foiz force viures  
dedans la ville. Et puis bien tost apres elle  
print d'assault moult vaillamment la bastille de  
Saint Loup & fist mettre a mort tous les An-

glois qui y furent trouuez; de son espee elle en occist plusieurs, & le lendemain print le bouleuart de la ville que les Anglois tenoient, & vne autre bastille ou furent occis trois capitaines anglois, cestassauoir le seigneur de Moulins, le milort de Pommays, & messire Guillaume Glucidal, principal gouverneur du siege, & dautres iucques au nombre de v cens & plus. Et a ceste prinse se porta la pucelle  
aussi vaillamment que capitaine ne hommes  
darmes qui fust en la bende, combien que elle  
y fut nauree dun vireton au bas de la iambe.  
Mais bien tost elle en fut saine & guerie. Le iour de celle conqueste le conte de Salbery, lieutenant general du roy d'Angleterre esdictes parties,  
estant en vne tour qui est sur le pont d'Orleans,  
fut tue d'un traict de canon venant de lostel  
de la ville, & reputeoit on ce coup auoir este  
fait diuinement, car lon ne peut iamais fauoir  
qui bouta le feu au canon dont la pierre  
faillit.

**Q**UANT les autres capitaines anglois, cestassauoir le seigneur de Talbot, le conte de Suffort, le seigneur d'Escalles & messire Iehan Fastol acompaignez de iiii mil Anglois estans en iceluy siege virent comme Iehanne la pucelle les touchoit de pres, doubtans que ce fust chose diuine, car Anglois de leur nature sont moult superstitieux, voians aussi que le conte de Salbery estoit occis, ilz se desemparent du  
siege & se retirerent au bas pais du Maine,  
tirans en Normandie partie deulx, autre partie  
se retirerent aux garnisons des places quilz  
tenoient sur Loire & en Beaulse.

**C**ESTE pucelle estoit moult prudente, & disoit on que elle estoit inspiree diuinement, car pose que elle ne fut point au conseil des capitaines, si fauoit elle leurs deliberacions & conclusions aussi bien que si elle y eust este presente, lesquelles iamais nestoient mises a execution si elle mesme nen auoit fait louerture, dont les cappitaines se esmeruilloient moult, & si neust este que toutes ses entreprinse estoient a louer & venoient au profit & a lonneur du roy & du royaume lon eust contre elle grandement

Le siege  
d'Orleans leue  
par Francoys.

Merueilles de  
la pucelle.

murmure & eust este affollee par enuies. Elle montoit sur vng cheual & le cheuauchoit armee de toutes pieces aussi vertueusement que eust sceu faire homme d'armes de la compaignie, couroit la lance, faisoit choses semblables touchant la guerre, picquoit son courcier & manioit hache & espee aussi bien que si elle y eust este nourrie de son enfance. En toutes choses elle estoit bien simple fille, en menant vne vie honneste, jeunoit aucuns iours la sepmaine, se confessoit & receuoit le corps de nostre seigneur pres que toutes les semaines, elle vestoit abillemens à usage de homme pour oster la concupiscence charnelle des gens de guerre avec lesquels elle conuersoit iournellement, & quant elle alloit par pays, au logis elle faisoit venir coucher avec elle lostesse du logis ou ses chamberieres, & nentroit en sa chambre homme quelconque que elle ne feust abillee & preste, sur paine de la hart. Et tousiours auoit en la bouche le nom de Ihesus & partout ou elle commandoit disoit : Faictes de par Ihesus, allez de par Ihesus, ou nen faictes riens de par Ihesus. Ainsy fut le siege d'Orleans leue par la pucelle au signe de *Gemini* qui fut vers la fin du moys de May lan mil quatre cens vingt & neuf, ainsy quil appert par les lettres nombrables de ce verset :

ECCE PUELLA VALENS GEMINIS IUVAT  
AURELIANOS.

**L**E seigneur de Talbot, acompaigne d'une grande bende d'Anglois apres ce quilz furent retournez du siege d'Orleans, print le chasteau de Laual par eschelles, qui estoit entre les mains de messire Andre de Laual seigneur de Loheac. Et d'autre part les Francois prindrent par assault Iargueau & prindrent aussi Boysgenci par composition. Le tout par la conduite de la pucelle qui conduisoit ceste armee, en laquelle estoient le duc d'Alenczon, le sire de Bouffac mareschal de France.

**A**U moys de Iuing vers la fin diceluy moys, lan mil iiii cens xxxi, les Anglois festoient retirez en cueur de Beaulse en vng gros village

nomme Patay, & y estoient le seigneur Talbot, le seigneur d'Escalles, messire Gaultier d'Hongrefort & plusieurs aultres grans chefs de guerre anglois, acompaignez de v a vi mil Anglois, & y eut plusieurs cappitaines du party du roy qui furent d'opinion que lon ny deuoit point aller; touteffoiz Iehanne la pucelle fut de contraire opinion qui dist, de par Ihesus que tous les seigneurs de France se missent en armes & que on la fuyist, car elle esperoit que Dieu donneroit au roy la victoire contre eulx. Si se misdrent en armes par l'aduis de la pucelle, & avecques elle le duc d'Alenczon, le conte de Richemond, le conestable de France, le conte de Vendosme, les seigneurs de Beaumanoir & de Lore, le bastard d'Orleans, La Hire, Poton & cinq ou six mil hommes de guerre francoys qui marcherent en bel ordre droit a Patay. Et la rencontrerent les Anglois & donnerent dessus de telle vertu quilz deffirent les Anglois, & estoit la pucelle tousiours des premiers en la bataille, en laquelle furent occis de deux a trois mil Anglois, & y furent prins les seigneurs de Talbot & d'Escalles, messire Gaultier d'Hongrefort & bien xii cens aultres prisonniers, & le surplus senfuit, & des Francois y furent bien tuez xii xx ou iiii cens. Et fut ceste victoire au signe de Cancer l'an dessusdit iiii cens xxix, comme il appert par les lettres nombrables de ce petit verset :

VICTRIX IN CANCRO FUIT A PATAY MARTE  
PUELLA,

& fut appelle la bataille de Patay.

**L**AN dessus dit mil iiii cens xxix les Anglois menerent en Angleterre leur petit roy Henry, & en laage de xi ans le couronnerent roy d'Angleterre, & puis rapassa la mer & vint en Normandie avecques son armee.

**A**PRES que les Anglois eurent este deffaiz a Patay Iehanne la pucelle entreprint de mener le roy Charles VII à Rains pour estre couronne. Les prince & cappitaines de France ne furent pas d'opinion pour ce que toutes les places

Destrouse a  
Patay sur les  
Anglois.

## Le quatriesme

dentre Chinon & Rains estoient occupees par  
 les Anglois, & n'estoit l'armee du roy assez  
 puissante pour les combatre. Mais la pucelle,  
 qui tousiours auoit son esperance au nom de  
 Ihesus, fist tant avecques le roy quil fut ordonne  
 que au conseil de la pucelle seroit obey. Si  
 5 partit le roy par la conduicte & deliberacion de  
 la pucelle, acompaigne des ducs d'Alenczon &  
 de Bourbon, des seigneurs d'Albret, de Ven-  
 dosme, de Laual, de Loheac & de Rais, &  
 10 bonne & grosse compaignie de gens darmes, &  
 mena en cest estat la pucelle le roy a Rains, &  
 fut sacre, oainct & couronne roy de France. En  
 y allant furent reduites en obeissance du roy  
 les villes de Troies, Challons, Sainct Florentin  
 & Rains, & messire Regnaud de Chartres ar-  
 15 cheuesque de Rains & chancelier de France,  
 sacra & oignist le roy & fist le seruice diuin,  
 & les ducs de Bar & de Lorraine & le seigneur  
 de Commerci se rendirent la au roy pour luy  
 20 faire seruice, & apres que le roy fut couronne,  
 furent reduites places de Velly, Laon, Soef-  
 son, Chasteautierri, Prouins, Coulemiers, Cressi,  
 Compiagne, Sanlis, Sainct Denis & plusieurs  
 aultres fortereffes.

Et fut ce couronnement au mois de Iuillet  
 lan dessus dit mil iiii cens xxix, comme il  
 appert par les lettres nombrables de ces deux  
 petiz versetz :

GRATA PUELLA SCIO KAROLI SEXTI BONE NATE  
 REMIS AD SACRA TE SISTAT IN JULIO.

**L**E conte de Richemond conneftable de  
 France ne fut pas a ce sacre pour quel-  
 que desplaisir que le roy auoit contre luy sans  
 cause quelconque, comme lon dit, mais par  
 ymaginacion quil auoit contre luy par lennor-  
 temment daucuns de son conseil. A celle cause  
 fut aduise par les princes du royaume que  
 monseigneur le conneftable ne seroit point le  
 voyage. Si se retira a Partenay ou il seiourna  
 ce pendant que le roy fut a son sacre. Et fut le  
 roy en danger destre combatu en son voiaige,  
 car le duc de Bethfort se mist aux champs a  
 45 tout viii ou x mil Anglois, & a Montspilouel  
 rencontra le roy de France & luy presenta la

bataille, mais pour ce que monseigneur le con-  
 nestable ny estoit pas le roy ne fut pas conseille  
 de combatre les Anglois, & ceulx qui auoient  
 mis le roy en ceste fantaisie contre monseigneur  
 le conneftable en furent moult blasmez par la  
 pucelle & par les princes & chefs de guerre  
 de l'armee de France & furent esloignez de la  
 personne du roy.

**Q**U'E pendant que monseigneur le conneftable  
 estoit a Partenay seiournant il fist traicter le  
 mariage de son neueu monseigneur Pierre de  
 Bretagne, filz de Guingamp, second filz du  
 duc & de damoiselle Francoyse d'Amboyse,  
 15 seulle fille & presumptiue heritiere du viconte  
 de Thouars. Et pour cest affaire vint en Bre-  
 taigne monseigneur le conneftable par deuers  
 le duc son frere, lequel se accorda a ce ma-  
 riage, & monseigneur le conneftable ramena  
 20 son neueu a Partenay ou il seiourna longue-  
 ment avecques sa tante ma dame de Guienne,  
 femme de monseigneur le conneftable, & puis  
 apres parfirent le mariaige.

**L**AN dessusdit mil iiii cens xxix, au moys  
 de Iuillet, le roy Charles VII erigea la  
 seigneurie de Laual en conte comme il ap-  
 25 pert par les lettres nombrables de ce petit  
 verset :

SUB JULIO CLARUS FIT REGE LAVAL  
 COMITATUS.

**A**PRES que le roy Charles VII fut couronne  
 roy de France les habitans de Beauuois qui  
 neutres festoient tenuz enuoierent a Compiagne  
 ou le roy estoit luy faire plaine obeissance  
 combien que iamais neussent este Anglois. Et  
 en la fin du moys d'Aouft, la pucelle cuida  
 40 prendre la ville de Paris sur les Anglois, &  
 par la porte Sainct Honore y cuida entrer  
 avecques vne bonne bende de gens darmes  
 francois & print le bouleuart dicelle porte &  
 entrerent iucques dedans l'riere fosse cuidant  
 45 escheller la ville, ce que faire ne peurent pour  
 leaue qui trop grande estoit. Et a celle prinse  
 se porterent moult vaillamment la pucelle, le

Laual est fait  
 comte.

fire de Sainct Vallier, le fire de Montmorancy & autres. Et y fut la pucelle nauree dun vireton par la iambe. Et de la tira la pucelle a Sainct Pierre le Moustier & print la ville d'asault sur les Anglois qui la tenoient lors, & de la retourna la pucelle enuiron Paris, & icelle acompaignee de messire Geffroy de Sainct Aubin & autres Escossois rencontra iiii ou v cens Anglois entre Paris & Laigny, lesquelz furent par elle & ses gens tous mors ou prins. De la sen alla la pucelle tenir garnison dedans Compiegne, ou estoit Guillaume de Flauy, cappitaine.

**L**AN mil iiii cens xxx, vers le commencement du mois de Iuing, messire Iehan de Lucembourg, les contes de Hantonne & d'Arondel, Anglois, & vne moult grande compaignie de Bourgoignons mirent le siege deuant Compiegne & fut aduise par Guillaume de Flauy qui en estoit cappitaine que la pucelle yroit en diligence par deuers le roy pour recouurer & assembler gens affins de leuer ce siege. Mais celuy de Flauy auoit fait ceste ordonnance pour ce que il auoit ia vendue aux dessus dictz Bourgoignons & Anglois la pucelle, & pour paruenir a ses fins il la pressoit fort de sortir par lune des portes de la ville, car le siege nestoit pas deuant icelle porte. La pucelle vng bien matin fist dire messe en leglise saint Iacques, se confessa & receut son createur, & puis apres se retira pres dun des pilliers dicelle eglise & dist a plusieurs gens de la ville qui la estoient, & y auoit cent ou six vingts petiz enfans qui moult desiroient a la veoir : Mes enfans & chers amis, ie vous signifie que lon ma vendue & trahie, & que de brief seray liuree a mort, si vous supplie que vous priez Dieu pour moy, car iamais nauray plus de puyffance de faire seruice au roy ne au royaume de France.

Et ces parolles ay ouy reciter a Compiegne lan mil iiii cens iiii xx xviii, au moys de Iuillet, a deux vieulx & anciens hommes de la ville de Compiegne, aagez lun de iiii xx xvii ans, & lautre de iiii xx & vnze, lesquelz dient auoir este prins en leglise de saint Jacques de Com-

piegne, alors comme la dessusdicte pucelle prononcza celles parolles.

**Q**UANT la pucelle, acompaignee de xxv ou xxx archers, fut sortie hors de la ville de Compiegne, Flauy, qui bien scauoit lembusche, fist fermer les barrieres & la porte de la ville, & quant la pucelle fut a vng quart de lieue, elle fut rencontree par Lucembourg & autres Bourgoignons, si les aduisa les plus puiffans, par quoy elle sen retourna a course de cheual par deuers la ville, cuidant y entrer pour soy fauluer. Mais le traire de Flauy luy auoit faict clore les barrieres & ne voulut luy faire ouuerture. A celle cause fut par les Bourgoignons la pucelle prinse aux barrieres de Compiegne, & par eulx livree aux Anglois lan dessusdit iiii cens xxx, au signe *de Gemini*, comme il appert par les lettres nombrables de ce petit verset :

NUNC CADIT IN GEMINIS BURGUNDO VINCTA  
PUELLA.

Et pour ce que par la iustice des hommes celuy de Flauy ne fut pugny de ce cas, Dieu le createur, qui ne veult delaisser vng tel cas impugny, permist depuis que la femme dicelluy de Flauy, nommee Blanche d'Auurebreuch, qui moult belle damoiselle estoit, le suffoqua & lestrangla par layde dun sien barbier alors quil estoit couche au liect, en son chastel de Neelle en Tardenoys, dont depuis elle eust grace & remission du roy Charles VII, par ce que elle prouua que son dessusdit mary auoit entrepris de la faire noyer.

Quant la pucelle fut entre les mains de Iehan de Lucembourg il la regarda quelque peu de temps & puis la vendit aux Anglois qui luy en donnerent grant pris, & les Anglois la menerent a Rouen ou elle fut en prison & durement traictee.

Tantost apres la prinse de la pucelle, le conte de Vendosme, lieutenant du roy de France, & le seigneur de Boffac, mareschal de France, leuerent le siege deuant Compiegne, qui par vii ou viii moys y auoit este.

Lan dessusdict mil iiii c xxx, au moys de feurier,

## Le quatriesme

trespassa le pape Martin cinquiesme, comme il appert par les lettres nombrables de ce petit verset :

MARTINUS QUINTUS FEBRUO CECIDIT NENCE  
TINCTUS.

Et au moys de mars prochain ensuyuant fut le pape Eugene quatriesme couronne, comme vous pourrez retenir a memoire par les lettres nombrables de ce verset :

QUARTO CUI LICUIT CLAVES DEDIT EUGENIO  
MARS.

**L**ES Anglois firent faire le proces de la pucelle a Rouen, & soubz couleur de iustice, sans touttefois que en elle ilz eussent trouue vice, macule ne crime quelconque, mais pource que publicquement elle portoit habit de homme iacoit ce que leur eust dit & declere que elle le faisoit affin que les hommes avecques lesquels luy estoit force de frequenter pour les affaires du royaume, ne prenissent en elle charnelles ne lubricques fantaisies. Tout ce neanmoins ilz la firent par vng Anglois, euesque de Beauuois, condamner & declerer hereticque, & par leur iuge seculier fut condempnee estre brullee au marche de Rouen, ou a present est leglise de monseigneur saint Michel. Et fut celle sentence executee en la fin du moys de May, lan mil quatre cens trente & vng, comme il appert par les lettres nombrables de ce petit verset :

IGNIBUS OCCUBUIT GEMINIS ILLUSA PUELLA.

Et son corps fut reduit en cendres qui depuis furent gectees au vent hors la ville de Rouen. Oncques puis les Anglois ne prospererent en France.

**L**AN dessusdict mil quatre cens trente & vng, le ieudi apres le dimanche de *iubilate*, le duc Iehan de Bretagne fist tenir a Vennes sa court de Parlement pour vider les appellacions des sentences interlocutoires, en laquelle court

furent faictes, establies & publiees loys & constitucions touchant les retraiz, lignagers & instances de promesse des heritaiges venduz & alienez a pris d'argent, par laquelle constitucion fut ordonne que toute personne qui possede par dix ans notoirement vng heritaige par luy acquis comme dessus, & il aura faict bannir publicquement son contraiet, vne fois seulement il en est aproprie contre tous. Et aussi par la possession notoire & paesible de quinze ans sans bannir. Laquelle ordonnance est tenue pour loy & obseruee & gardee en Bretagne.

Au moys daoust lan dessusdit mil quatre cens trente & vng, monseigneur Francoys conte de Montfort, filz ainsne du duc Iehan de Bretagne, espousa en la cite de Nantes dame Yollant d'Aniou, fille du roy de Iherusalem & de Cecile, duc d'Aniou. Ceste dame Yollant neust point enfans & trespassa au moys de iuillet lan mil iiii cens xl.

**L**AN dessusdit mil iiii cens xxxi, le premier dimanche des auants de Nouel, Henry roy d'Angleterre, aage de xi a xii ans, filz du roy Henry qui trespassa au boys de Vincenne, & de dame Katherine, fille du roy de France Charles VI, fist son entree en la ville de Paris & estoit acompaigne du duc de Betfort son oncle, du duc d'Yorch, du cardinal de Vicestre, des euesques de Beauuois, Noyon, Therouenne & d'Euureux, des contes de Varvich, d'Estamfort, de Salberi, d'Arondel, de Mortaign & de plusieurs aultres princes & seigneurs. Et les habitans de Paris le receurent moult honorablement comme leur roy & le acompaignerent tous iusques dedans leglise de Nostre-Dame de Paris, en laquelle il fut oainct & couronne roy de France par le cardinal de Vistre.

Aux feriers de Nouel, lan dessusdit quatre cens trente & vng, le duc Iehan d'Alenczon vint a Nantes par deuers le duc de Bretagne son oncle, qui moult honorablement le festoia, & quant il y eut reside quelque espace de temps il sen voulut retourner. Si luy donna le duc aucuns dons & presens de pris & luy bailla son chancelier, messire Iehan de Malestroit, euesque de Nantes, pour le acompaigner. Mais

La pucelle est  
brullee a  
Rouen.

le duc d'Alençon qui fauoit que le chancelier de Bretagne estoit moult riche dor & d'argent le fist mener & conduire comme prisonnier en son chasteau de Pouence, ou il le detint par force en bien estroicte prison. Quant le duc de Bretagne fut aduertit de cest excès & oultraige a luy fait par son neveu que tant chèrement il auoit recueilly, festoye & chery, il en fut moult desplaisant & encores fut plus triste & dolant de ce qu'on luy rapporta que le duc d'Alençon ne estoit venu en Bretagne pour aultre cause, si non pour cuider trouuer le moyen de prendre le conte de Montfort filz aisné du duc de Bretagne, lequel il cuidoit sourprendre & enleuer & lamener prisonnier en son chasteau de Pouence, pour le detenir iusques a ce que le duc de Bretagne luy eust paye quelque grande somme de finance qui encores restoit du mariage de sa mere, seur du duc de Bretagne. Si sen retourna le duc a Rennes, & la fist assembler les nobles hommes de sa duché, & par deliberation des estatz de Bretagne fut ordonné que tous les habitans se mettroient en armes pour aller assieger la place de Pouence & venger cest oultrage, & pour conduire ceste armee manda le duc ses deux freres, monseigneur le connestable & le conte d'Estampes, lesquels se rendirent a Rennes. Et quant l'armee du duc fut essemblée près de Rennes, le duc en bailla la conduite a monseigneur le connestable & au conte d'Estampe ses freres, lesquels firent marcher l'armee de telle forte que la veille des roys lan dessusdict cccc xxxi, ilz arriuerent deuant Pouence & y assirent le siege de telle sorte que la place fut enclose. En ceste place estoient dame Marie de Bretagne seur du duc & mere du duc Jehan d'Alençon, la duchesse d'Alençon sa femme & quelque nombre de gens de guerre, que le duc d'Alençon y auoit commis pour garder la place.

DE pendant que le siege estoit deuant Pouence, le duc de Bretagne fut aduertit que son nepueu le duc d'Alençon, qui estoit en la court du roy de France, faisoit moult grande assemblée de gens de guerre pour venir leuer ce siege. Si enuoya le duc vng sieur heraulx en

Normandie par deuers aucuns seigneurs d'Angleterre qui bien estoient ses amys & les aduertit de ceste entreprinse en les priant quilz luy enuoyassent du secours. Sur quoy le conte d'Escalles, le seigneur Derby, messire George Riquemen & aultres capitaines anglois se rendirent en armes au siege des Bretons a Pouence. Puis apres le duc de Bretagne marcha iusques a Chasteaubriand ou il se tint durant le siege, & fut la place de Pouence tellement batue d'artillerie que ceulx qui dedans estoient furent contrains de entendre a traicte de paix & d'accord. Si enuoya la veufue duchesse d'Alençon qui dedans estoit par deuers le duc son frere a Chasteaubriand, luy supplier quil voulsist a son filz, qui estoit son neveu, pardonner la griesue & scandaleuse faulte que il auoit commise contre luy & mander a messieurs les connestable & conte d'Estampe ses freres, qui faisoient ainsi battre la ville & le chasteau, que cessassent en attendant que elle eust escript & mande au duc d'Alençon son filz, quil vinst reparer ceste iniure & oultrage. Et tellement fut ceste entreprinse poursuiuie, que le duc d'Alençon consentit a soy retirer par deuers le duc son oncle, lui rendroit son chancellier & du cas requeroit pardon au duc qui en ce faisant le luy pardonneroit. Lesquelles choses furent ainsi faictes & acomplies. Et par ce traicte ceulx qui le siege tenoient se retirerent chascun en son parti & se departit l'armee du duc par ce moyen.

L'AN mil cccc xxxii, au commencement du mois de septembre, fut par les Francoys leue le siege que le duc de Betfort tenoit deuant Lagny sur Marne & fut laide dessusdicte au signe de *Virgo*, comme il appert par les lettres numbrables de ce verset :

VIRGINE LIGMACUM LINQUIT VELOCIOUS ANGLI.

Lan dessusdict fut encommencee l'estude & vniuersite a Poitiers comme vous pourrez retenir par les lettres numbrables de ce verset :

INCIPIENS STUDIUM PICTAVIS VNDIQUE CRESCAT.

## Le quatriefme

Lan mil cccc xxxiiii, au moys de Iuing, les Angloys reprindrent la ville & le chasteau de Montargis comme il appert par les nombrables lettres de ce petit verset :

SUB IUNIO MONTARGIS ADEST VACUUS CRUCE  
FRANCA.

Au moys de septembre, vers la fin, ma dame Iehanne de France duchesse de Bretagne, femme du duc Iehan lors regnant, trespassa en la ville de Vennes, & fut son corps inhume en leglise cathedral de Vennes. En celuy an les seigneurs de Varennes & de Cortigny entrerent de nuyt les plus puissant dedans le chasteau de Chinon ou le roy estoit, & y prindrent le seigneur de la Trimouille, principal conseiller & gouverneur du roy, & le mirent en prison au chasteau de Montrefor.

Lan mil cccc xxxiiii, au moys d'Auril, fut encommence le portail de leglise cathedral de Nantes en moult grande sollempnite, car en presence de leuesque qui y estoit en habis pontificaulx avecques les gens de son eglise, le duc Iehan y assist la premiere pierre.

En ce mesme an, le peuple de la basse Normandie vers Caen & Bayeux estime a lx mil hommes dont estoient conducteurs messire Thomas du Boys, le seigneur de Mereuille & Quentepie se mirent sus contre les Angloys & prindrent tous la croix blanche. Et fut lan dessusdict cccc xxxiiii, au moys de Ianuier, comme il appert par les lettres nombrables de ces deux petis versetz :

DISCAS IN IANO LEOPARDI FRAUDE PRACTICA.  
EST A NORMANO POPULO CRUX ALBA LEVATA.

Et lan ensuyuant mil cccc xxxv, le commun peuple de Caulx se rebellerent contre les Angloys & sur eulx prindrent la ville de Dieppe & les ville & chasteau de Lisbonne ou fut premierement edifie le premier chasteau de Montiuillier de Tancarville & presque toutes les forteresses du pays. Et fut ceste entreprinse faicte & conduite par messire Pierre

de Rochefort & de Rieux, mareschal de France, natif du pays de Bretagne, lan dessusdit mil cccc xxxv, comme il appert par les lettres nombrables de ces deux petis versetz :

EUGE MARESCALE P. DE RIEUX BONE SERVE FIDELIS.  
CELATI CEPTA RESTITUENS KAROLO.

Lan mil cccc xxxv, le conte d'Arondel, acompaigne de xii cens Angloys, fut destrouffe par les Francoys a Gerberay par vne rencontre ou furent tuez iiii cens Angloys & plus & ii ou iii cens prisonniers, le sourplous le gaignerent a fuyr. Et fut au moys de May lan dessusdict xxxv, comme il appert par les lettres nombrables de ces deux versetz mettez :

PER VALIDOS FRANCOSA GERBERAY LESUS ARONDEL.  
SUB MAIO CUBUIT ET SUA GENS ALIBI.

En celuy an cccc xxxv, fut fait & conclut a Arras le traicte de paix entre le roy de France & le duc de Bourgoigne auquel estoient presens le cardinal de sainte Croix, bon preudomme chartreux, le cardinal de Cipre, messire Adan de Cambray & plusieurs aultres notables gens de conseil. Et en ce traicte furent determinees maintes choses preiudiciables au royaulme de France, lesquelles furent consenties par le roy Charles VII & les seigneurs du sang royal desirant le restaurement du bien publique de France. Et combien que en ce traicte y eust xxxi articles, toutefois ne feray icy mencion que daucuns plus especiaux.

Lun est que le roy de France seroit tenu fonder a Montereau ou Fault Yonne, a ses propres despens, vne chapelle vallant lx liures parisins amorties & entretenir de liures, calices, chasubles & aultres ornemens, tellement que la chapelle soit souffisante pour la vie dun chapelain qui sera tenu dire messe des trespassees chascun iour pour les ames de Iehan duc de Bourgoigne & du seigneur de Nouaille qui avecques luy y fut tue, & de ceste chapelle le duc de Bourgoigne & ses hoirs auront la colacion.

Item lon doit faire construire & edifier a

Montereau ou au plus pres vng prieure de char-  
treux a xii religieux vallant viii cens livres de  
fondation amorties.

Item faire edifier sur le pont de Montereau  
vne croix moult sumptueusement faicte au lieu  
ou le duc fut tue.

Item sera tenu fonder une messe des trespas-  
sez, qui sera celebree a note, au lieu ou repose  
le corps du duc, pour laquelle entretenir il fon-  
dera cent liures parisis de rente amorties avec-  
ques ornemens.

Item le roy augmentera les seigneurs dicelluy  
duc de Bourgoigne, & de ses hoirs masles ou  
femelles des pays de Masconnoys & de Sainct  
Jeugon avecques leurs appartenances; lhom-  
mage referue au roy que le duc fera tenu de  
faire en parrie, & fera le bailliage de Sainct  
Jeugon annexe au bailliage de Mascon.

Item que le roy laissera iouyr le duc de  
Bourgoigne & son premier heritier leur vie  
durant; seulement des aides du grenier a sel,  
impositions, tailles, fouages & aultres subsides  
acoustumez a mettre es pays de Mascon, Chal-  
lons, Oston & Langres & mesmement par toute  
la duche de Bourgoigne, la conte de Charoloys  
& des pays dedans enclaeuz.

Item iouyra le duc & son premier heritier  
de la conte d'Auxerre totalement leurs vies  
durans seullement. Et apres ce retournera a la  
couronne de France en telle nature comme par  
auant, & y aura ballif especial.

Item renoncera le roy es maens du duc &  
de ses hoirs legitimes au chasteau de Bar sur  
Saine avecques toutes ses appartenances.

Pareillement laissera en la main du duc de  
Bourgoigne & de ses hoirs masles perpetuelle-  
ment les villes, chasteaux & chastellenies de  
Peronne, Montdidier & Roye.

Item baillera le roy la conte d'Artoys & de  
Bologne & le pays denuiron, ensemble toutes  
les cites, villes & chasteaulx appartenant a la  
couronne de France assises sur la riuere de  
Somme, tant d'une part que d'autre. Cestaf-  
fauoir: Amyens, Sainct Quentin, Corbie, Ab-  
beuille, avecques toute la conte de Ponthieu  
des deux costez de Somme, comme Dourlans,  
Sainct Requier & le pays en allant d'Auxerre

en Flandres & Henault, l'hommage referue au  
roy & la souuerainnete a la court de parlement.

Toutes lesquelles possessions le roy pourra  
racheter en payant a deux termes quatre cens  
mil escuz.

Item le duc de Bourgoigne ne fera tenu de  
faire hommage au roy ne a ses successeurs de  
ses propres seigneuries, ne de ce qui luy pourra  
eschehir au royaume de France pour le temps  
aduenir, mais apres le deces de Philippe duc  
de Bourgoigne son hoir fera tenu faire enuers  
le roy de France ce que doit faire vassal & sub-  
gect a son souuerain.

Item que les vassaulx du duc de Bourgoigne,  
a cause de ses seigneuries, seront tenuz de venir  
au mandement du duc & le seruir en armes ou  
aultrement, premier que le roy en portant l'en-  
seigne & faultouer. Et mesmement en la pre-  
sence du roy & de son conestable ne pourront  
estre contrains porter aultre enseigne, fors celle  
des Bourgoignons, qui est la croix en faultouer  
ia soit ce quilz soient actuellement mandez au  
seruice du roy.

Plusieurs aultres articles moult deraisonnables  
furent par contraincte accordez en ce traicte  
de la part du roy par ses embassadeurs pour  
acheter paix a la chose publicque, lesquelles  
estoyent moult preiudiciables a la couronne. Par  
ainsi fut cesse le discord qui dure auoit l'espace  
de xx ans. Et fut comme dit est ce traicte lan  
dessusdit cccc xxxv, soubz le signe de libra,  
comme lon peult retenir a memoire par les  
lettres nombrables de ces deux petis versetz  
mettez :

PRESENTATUS APER CERVO SOCIARE LEONEM.

SUB LIBRA NOVIT CANTIRIS ATRABATI.

L'AN mil cccc xxxv, la vigille de la feste de  
la Natiuite sainct Iehan Baptiste, nasquit  
Francoys de Bretagne, filz de monseigneur  
Richart de Bretagne conte d'Estampes & sei-  
gneur de Clifson, & de ma dame d'Orleans  
sa femme, qui fille estoit de Loys duc d'Or-  
leans & de Valentine de Milan, & eurent  
lesdictz conte & contesse d'Estampes vng aultre  
filz qui mourut en enfance & gist aux Carmes

## Le quatriefme

du Bondon les Vennes; eurent aussi trois filles dont lune fut princesse d'Orange, l'autre abbesse de Fronteuraulx, & la tierce nommee Ysabeau mourut ieune.

Lan dessusdit mil cccc xxxv, pendant que lon composoit le traicte d'Arras, fut la ville de Sainct Denis reprinse par les Angloys: lesquelz apres l'auoir reprinse abbatirent toutes les muralles, maisons & edifices, excepte la grande eglise & le couuent & vne tour du couuent appellee la tour du venin.

ET apres le traicte de paix fait a Arras, iceluy venu a la congnoissance de la royne de France dame Ysabel de Bauiere, veufue du roy Charles vi, elle estante malade lors en lostel de Sainct Pol, en eut si grant lieffe quelle trespassa de ioie le dernier iour de septembre, laquelle prinse de Sainct Denis & le trespas de la royne furent lan dessusdit cccc xxxv, au signe de libra, comme il appert par les lettres nombrables de ces deux petis versetz:

DEDITUR IN LIBRA SANCTUS DIONYSIUS ANGLIS.  
MIGRAT ET A FRANCIS REGINA SENEX YSABELIS.

La dessusdicte royne Ysabel fut longuement entre les mains des Angloys en tresgrande indigence & pourete.

Lan mil cccc xxxvi, a vng iour de mardi feriers de Pasques, messire Artur de Bretagne conte de Richemond & conestable de France, acompaigne du bastart d'Orleans & aultres, rencontra entre Paris & Sainct Denis messire Thomas de Beaumont, lieutenant du roy angloys, auecques moult grande compaignie d'Angloys qui tiroient a Sainct Denis, cuidans ayder a leurs compaignons qui y estoient a piller la ville & leglise, maiz ilz furent desconfiz par les Francoys iouxte le pont de la ville & la furent occis viii cens Angloys & plus, au fourplus leur fut donnee la chasse iusques aux portes de Paris.

Comment les Francoys a layde du conestable de Richemond recouurerent Paris.

**L**E vendredi ensuiuant qui fut le xx<sup>e</sup> iour d'Auril l'an mil cccc xxxvi, le dessusdit conestable de France se approcha de Paris auecques moult belle compaignie de Francoys, dont il auoit aduertit les habitans de la ville tenans le parti du roy de France, lesquelz se esleuerent & esmeurent contre les Angloys y estans par moult impetueuse tumulte, & pendant ladicte commotion monseigneur le conestable auecques sa bende entra par la porte Sainct Iacques dedans Paris, & en chassa les Angloys, dont plusieurs furent tuez; le residu se retira dedans la bastille Sainct Anthoine qui tantost apres fut rendue, entre lesquelz estoient pour le roy d'Angleterre le seigneur de Villy capitaine de Paris, messire Symon Mohier preuost de Paris, leuesque de Theroenne, chancelier de France pour le roy angloys, & plusieurs aultres. Audit an le xxiiii<sup>e</sup> iour de Iuing, monseigneur le daulphin Loys espousa a Tours ma dame Marguerite, fille du roy d'Escoffe.

Paris recouuert par les Francoys.

Item celuy an trespassa dame Katerine de France, seur du roy Charles vii & femme du roy d'Angleterre.

Enuiron celuy temps, monseigneur le conestable de France chassa & fist vider les Angloys de la ville de Sainct Denis & des places de Chevreuse, Montlhery, Marcouffy, du pont Sainct Cloud & du pont de Charenton.

Lan mil cccc xxxvii, monseigneur le conestable de France & le conte de la Marche prindrent d'assault sur les Angloys la place de Chasteaulandon & Nemors par composition, & d'assault prindrent la ville de Montereau ou Fault Yonne, & le chasteau fut depuis rendu par composition.

Incontinant apres le roy Charles vii fist son entree a Paris ou il fut receu moult honorablement comme roy de France.

EN celuy an, au moys de Iuillet, trespassa en Angleterre ma dame Iehanne de Nauarre, royne d'Angleterre, laquelle au parauant eust espouse le duc Iehan de Bretagne le Conquerant, & estoit mere du duc Iehan lors regnant, & des contes de Richemond & d'Estampes.

Lan mil cccc xxxviii, le roy d'Escoffe couche en son lit fut occis en la presence de sa femme par ceulx mesmes de son royaume; il auoit este par xv ans prisonnier aux Angloys.

En ce mesme an cccc xxxviii, le lundi des 5 ferries de Penthecouste, ii de Iuing, trespassa au chasteau de Clifson monsieur Richart de Bretagne conte d'Estampes & seigneur de Clifson, & fut moult honorablement porte & inhume en leglise cathedral de Sainct Pierre 10 de Nantes, avec son feu pere, & son filz monseigneur Francoys, aage de troys ans, luy succeda.

En celuy an le duc Philippe de Bourgoigne, a tout grant nombre de Flamens, mist le siege 15 deuant Calays ou il fut par deux moys & puis fen retourna, sans faire autre chose pour le desordre de ses Flamens, nombres a xxx mil & plus, qui se departirent du siege contre sa 20 volunte apres ce quilz eurent tue lun de ses cheualiers nomme messire Iehan Honore.

En ce temps, diuerfes parties de gens de guerre desapointez se misdrent sur les champs iusques a viii mil cheuaucheurs, dont vng Espaignol nomme Rodrigues de Vilendras estoit 25 capitaine, lesquelz firent moult d'oppressions au peuple de France, tellement que iustice nauoit lieu ou ilz habitoient.

Lors fut a Paris si grande pestilence de mortalite, que personne ny residoit, & enuiron 30 Paris & dedans la ville courroient les loups en telle habundance que lon n'osoit aller de nuyt par pays, ne mesmement parmy Paris par les rues destournez; au plat pays ilz en estranglerent plus de LXXX personnes au tour de Paris. 35

Lan mil cccc xxxix, monseigneur le connestable de France print par assault sur les Angloys la cite de Meaulx & par composition print le 40 marche de Meaulx, de la vint mettre le siege deuant Auranches, lequel tantost apres fut leue par les Angloys.

Lan mil cccc xl, au moys de iuillet, trespassa au logis de Plaisance lez Venues dame Yolant, fille du roy de Cefille & femme du conte de Montfort, filz aïné du duc, & fut son corps 45 inhume en leglise des freres mineurs a Venues; de ce mariage issit vng filz qui mourut en enfance.

**C** De la condemnation de messire Gilles, baron & seigneur de Raiz, mareschal de France, & de sa mort par iustice.

**L**AN dessusdit mil cccc xl, vers la fin du moys doctobre, messire Gilles de Raiz, seigneur & baron de Raiz & mareschal de France, fut accuse 5 en Bretagne, par deuant maistre Pierre de l'ospital president de Bretagne, dauoir use de lart & science de nicromancie comme en la premiere partie de ceste oeuvre il appert que Baldud, roy de la grant Bretagne, en vsoit, & 10 pour sa diabolique science excercer il fut accuse & atteint dauoir fait par deux de ses seruiteurs, appelez l'un Henriet & lautre Poton, murtrier & occire grand nombre de ieunes enfans soubz laage de deux ans, affin den auoir 15 & recueillir le sang dont il escriuoit les caracteres de deuinemens requis pour inuoker les infernaulx esperitz, tendant paruenir par leur moyen a recouurer grans tresors & richesses, & de ces cas detestables fut atteint & conuaincu, tant par sa confession que par les depositions 20 de ses dessusditz seruiteurs & autres preuues, ioinct les corps mors desdictz petiz enfans que depuis lon trouua. A celle cause fut par iceluy president condemne en l'auditoire de 25 Nantes a souffrir mort. Cest assauoir a estre pendu, estrangle, & brusle & ses deux seruiteurs semblablement. Celuy de Raiz eut moult belle repentance, & a sa requeste fut executee par auant ses deux seruiteurs, dont ilz prindrent 30 plus facilement la mort en pacience, car ilz pensoient quil neust pas souffert mort pour lexcellence de son estat, laquelle chose leur eust este moult griefue a porter, veu que il les auoit mis en besoigne & par son commandement auoient commis les cas pour lesquelz ilz furent executez, & fut ceste execution faicte 35 en la pree de Biece, ioygnant les pons de Nantes, au lieu ou est a present vne croix de pierre. Et le corps diceluy de Raiz, apres auoir 40 este estrangle & suffoque par le feu, fut tire hors & fut enseuely par femmes religieuses, & apres fut par les Carmes de Nantes aporte en

Le baron de Raiz brusle a Nantes par sentence.

## Le quatriesme

leur eglise ou il gist. Et par ce cas peult on veoir a quelle fin paruiennent ceulx qui font leurs dieux des richesses temporelles & qui si auant mettent leur cueur en lauarice & insaciabile conuoitise diceulx quilz oublient la crainte de Dieu.

Lan mil cccc xli, le iour de Nostre-Dame de Chandeleur, trespassa a Paris la dame de Guienne, contesse de Richemond, aisnee fille du duc de Bourgoigne & femme de monseigneur le conestable Artur de Bretagne. Et gist le corps d'elle en leglise des Carmes a Paris, pres lautel Nostre Dame.

Lan mil cccc xlii, le xxix<sup>e</sup> iour d'Aoust, monseigneur le conestable conte de Richemont espousa la fille du seigneur d'Albret, mere du conte de la Marche, & furent leurs noces a Nerac.

### De la mort du duc Jehan.

**L**E duc Jehan de Bretagne trespassa au manoir de la Tousche pres Nantes, au moys d'Aoust, lan mil cccc xlii, apres auoir regne par xliii ans duc de Bretagne; il regna si prudemment que au temps de sa mort il laissa son pays paisible, riche & opulant de tous biens. Et fut son corps enseuely en leglise cathedral de Nantes, pres du duc Jehan le conquereur son pere; de son trespas peult on scauoir les an, moys & iour par les lettres nombrables de ces deux petis versetz :

AUGUSTI TERNA RETRO SCILICET. J. BENE MANE.  
DUX LAPSA CARNE SIBI QUERIT REGNA SUPERNA.

Celuy duc Jehan auoit eu vne singuliere deuotion au glorieux confesseur monseigneur saint Yves, par les prieres duquel il disoit auoir euite plusieurs dangiers & estre paruenue a moult de ses bonnes intencions; a celle cause il fonda, en son viuant, en leglise cathedral de Treguer, vne chappelle en lonneur de Dieu & dudict saint Yves, laquelle richement il dota, & pour ce quil ordonna a sa mort que son corps y fust inhume, les gens du chapitre de

Treguer firent telle poursuite de recouurer ce corps, que ix ans apres, cest assauoir lan mil cccc li, il leur fust deliure & furent les ossemens de luy portez en leglise cathedral de saint Tidual de Treguer & y reposent.

Ce duc Jehan icy, qui fut Jehan v de ce nom, fut en son temps lung des plus honorables & prudens princes que lon sceust trouuer nulle part. Pource que son filz aisne monseigneur Francois conte de Montfort estoit lors en viduite & nauoit aucuns enfans, lon venoit deuers le duc son pere, de plusieurs contrees luy offrir des dames & princesses, & luy faisoit on les rappors de leurs discretions & sagesse & comment elles auoient belles & prudentes facondes, bien emparlers & de plaissant entretenement, mais mot ne respondoit. Si luy vindrent nouvelles dune fille du roy d'Escoce nommee Ysabel, laquelle on voulut bailler a femme pour son filz, il enuoya veoir la ieune dame par aucuns cheualiers de sa maison a luy feaulx, lesquels luy raporterent a leur retour que elle estoit assez competamment de belle forme, mais de grant ne subtil langaige ne lauoiert pas trouue, & sembloit estre moult simple dame. Il leur demanda si elle estoit de corfaige compose de porter enfans, lesquels luy respondirent que a leur aduis elle sembloit estre pour auoir plusieurs enfans, & quelle auoit le corps droit & bien forme. Adonc le duc leur dist : Chers amys, ie vous prie que vous retournez en Escoce & que vous la me amenez, elle est de la deuise que ie la desire, ces grans subtilitez en vne femme nuyent plus quelles ne seruent. Par saint Nicolas ie tiens vne femme assez saige quant elle scait mettre difference entre sa chemise & le pourpoint de son mary. Ie vous prie faictes diligence de la me faire venir, ie nen veulx point d'autre. Les cheualiers partirent pour retourner en Escoce querir ceste dame, & ce pendant quilz furent en leur voyage le bon duc trespassa; il honoroit en son viuant & seruoit Dieu & moult le craignoit a offenser, il faisoit excercer tres bonne iustice en sa duche, les prelatz, barons & nobles hommes entretenoit en douceur, & aymoit moult les passe temps pour le vol & pour la chace que nobles

Le corps du duc Jehan porte en leglise de Treguer.

Profitable auctorite.

Le duc Jehan est trespasse & enterre a Nantes.

princes doiuent desirer, & bien honorablement se vestoit de bons & riches draps dor & de foye, & singulierement aux quatre festes annuelles, mesmement le iour de la feste saint Michel vestoit ses beaulx habiz, pource que celuy iour son pere gaigna la bataille pres d'Aulroy; il estoit liberal a toutes gens a qui il le conuenoit estre; a celle cause il auoit le cuer & lamour de tout le peuple, il visitoit souuent son pays par toutes les parties dicelluy pour resiouir & consoller ses subgectz, & pour reprimer les griefz & tours que on y pouoit faire, & aussi pour despendre ses finances parmy son pays, dont le commun peuple se sentoit moult soulege; il escoutoit volontiers ceulx qui vouloient parler a luy & benignement les renuoioit contans, autant les petis que les grans.

**C** Du duc de Bretagne Francois premier de ce nom, comment il espousa madame Ysabel d'Escoce, fille du roy d'Escoce, & de son entree comme duc a Rennes.

**F**RANCOYS, premier de ce nom, fut en laage de xxviii ans duc de Bretagne par le trespas du bon duc Iehan son pere, qui comme dit est deuant, trespassa au moys d'Aouft quatre cens quarante deux. Et ordonna le duc Francoys faire son entree a Rennes au moys de decembre ensuiuant.

Bien tost apres le trespas du duc Iehan arriuerent en Bretagne les ambassadeurs d'Escoce qui amenerent madame Ysabel fille du roy d'Escoce, laquelle estoit propre seur de madame la daulphine, femme de monseigneur le daulphin, filz aïne du roy de France. Et vint icelle dame moult noblement acompaignee de plusieurs princes & seigneurs d'Escoce, & voulut bien le duc les expedier deuant que se faire receuoir duc, il espousa ladicte dame Ysabel au chastel d'Aulroy, le xxx<sup>e</sup> iour d'octobre lan dessusdit mil iiii cens xlii.

Après que le duc Francoys eust espouse ceste notable dame d'Escoce, il fist disposer les affaires de son entree a Rennes. Et pour le accompagner a ceste sollennelle feste, il en-

noya par deuers le roy de France son oncle, certains ambassadeurs par lesquelz il le supplioit quil voulüst enuoier en Bretagne, pour assister a son entree duchalle, monseigneur le connestable son oncle & aucuns autres seigneurs de France, ce que le roy luy octroya facilement. Si partirent de la court du roy pour venir en Bretagne a ce couronnement monseigneur le duc d'Orleans, monseigneur le duc Iehan d'Alençon qui cousin germain estoit du duc Francoys, Monseigneur le connestable son oncle, l'arceuesque & duc de Rains, les contes de Vendosmes & de Dunois, & plusieurs autres grans personnaiges qui tous tirerent a Ploermel ou le duc estoit. Et se y trouuerent semblablement monseigneur Pierre de Bretagne, seigneur de Guingamp, frere du duc; monseigneur Gilles de Bretagne, seigneur de Chantoce, aussi son frere; le viconte de Rohan, conte de Porhoet; le conte de Laual, baron de Vitre; le seigneur de Leon, filz du viconte de Rohan; les euesques de Rennes, de Dol, de Nantes, de Saint Mallo, de Cornouaille, de Vennes, de Saint Briec, de Leon & de Treguier. Les barons de Chasteaubriand, de Rais, d'Ancenis, de la Roche Bernard, de Pontchateau & de Lannaux; les seigneurs de Coetmen, de Montafillant, de Guemene, de Malestroit, de Combour, de Quintin, de Montauban, de la Hunauldoye, du Pont labbe, du Chastel, de Penhoet, de la Feillee. Et plusieurs autres grans personnaiges du pays de Bretagne, auecques les abbez de Redon, de Saint Meleine, de Saint Meen, de Quemperle, de Saint Jagu, de Saint Mahe, de Landeuenec, de Lantenac, de Rays, de Saint Gueldas, du Tronchet de la Haume, de Blanche Couronne, de Begar, de Bufay, de Prieres, de Saint Aulbin, de Bouquien, de Langonnet, du Melleray, de Lannaulx, de Saint Marfaut, de la Vielz ville, de Montfort, de Beau lieu, de Saint Iehan des Pres, de Rille, de Sainte Croix, de Douglas, de Porinc de Beauport, de Kermannen, de Genescon & de Coetmaloen. Lesquelz tous assemblement accompagnerent le duc de Ploermel iusques a Rennes.

Quant le duc fut pres de Rennes, ou il ar-

Lentree du duc Francois premier de ce nom a Rennes.

Venue de la duchesse Ysabel en Bretagne.

## Le quatriefme Liure.

riua le huitiefme iour de decembre, il se logea en labbaye de Sainct Melaine lez Rennes, & la y geut celle nuyt. Et le lendemain, qui fut le neufiefme iour, il partit enuiron vne heure apres midy de Sainct Melaine en habit noir, & se retira en leglise de Monsieur Sainct Estienne qui est es faulxbourgs de Rennes, & y fist ses oraisons & prieres. Et a liffue de leglise, on luy presenta vng cheual moult richement acouf-  
tre, autre que celuy fur lequel il auoit este  
deuant, & y auoit sur la croppe de ce cheual  
vng petit fardelet de drap descarlate qui estoit  
sur vng coeffin atache a la selle comme vng  
fardeau de marchand. Si monta le duc sur ce  
cheual & fut conduit par les princes & seigneurs  
deffusdictz depuis leglise Sainct Estienne iusques  
deuant la porte de la ville qui est pres de  
leglise cathedral. Et la descendit de cheual &  
tout a pie marcha droit a la porte de la ville  
pour y cuider entrer, mais la trouua close &  
fermee. Leuesque de Rennes, qui estoit en habit  
pontifical pres de celle porte, acompaigne des  
autres euesques de Bretagne, luy ouurit le  
guichet & pont leuis, & luy demanda que il  
queroit, & le duc luy respondit que il vouloit  
entrer en sa cite. Si luy presenta leuesque le  
liure au quel estoient escriptes les euangilles, &  
luy fist faire le serment comme auoient fait ces  
predecesseurs, roys, ducz & princes de Bre-  
tagne en leur temps, de bien garder & deffendre  
leglise & ses ministres ensemble tout le clerge  
de Bretagne en leurs anciennes libertez &  
franchises.

**E**t apres que leuesque eut pour leglise receu  
le serment du duc, le viconte de Rohan,  
qui semblablement estoit a la porte, dist & re-  
monstra que deuant entrer plus auant il conue-  
noit que il feist pareil serment de bien & loyau-  
ment garder & maintenir en leurs libertez &  
franchises les barons, nobles hommes, gens  
des citez & bonnes villes, marchans &  
commun peuple de Bretagne, comme les des-  
susdictz predecesseurs auoient fait, ce que le  
duc iura & promist faire. Et lors luy fut la grant  
porte de la ville ouuerte. Et deuant que y en-  
trer il se retira en quelque petite chambrette

que lon auoit preparee illec pres, & fut deuestu  
de son habit de deuil & fut vestu de robe &  
vestment de riche drap dor, & en tel estat  
entra en leglise cathedrale de Rennes qui est  
pres celle porte, acompaigne des deffusdictz sei-  
gneurs chascun en son ordre, & furent vespres  
follennellement chantees. Puis apres vespres se  
retira en vne chambre que lon auoit acoustree  
en icelle eglise, en laquelle le duc avec aucuns  
de ses plus familliers veilla toute la nuyt. Et le  
lendemain au plus matin il se retira en son logis  
qui pres de leglise estoit, & la se rafraichist  
iusques a leure quil fut temps de aller au ser-  
uice de leglise.

Celuy iour enuiron neuf heures du matin,  
le duc partit de son logis vestu dabillemens  
royaulx. Cest assauoir dune tunicque de drap  
de pourpre fourree dermynes, & par dessus  
auoit le manteau royal de mesmes. Les sei-  
gneurs de son sang & les barons de Bretagne  
estoient la pour laccompaigner, lesquelz auoient  
semblablement vestuz moult riches vestemens.  
Les chez doffice estoient aussi en habit royal  
comme le chancelier : les seigneurs de Mon-  
tafillant mareschal, le viconte du Fou admiral  
& plusieurs autres. Et en tel estat retourna le  
duc a leglise cathedral de saint Pierre de  
Rennes : & leuesque en habit pontifical avec-  
ques les chanoines & chappellains de son eglise  
se trouuerent au deuant de luy a la porte de  
leglise & laccompagnerent iusques deuant le  
grant autel. Et la le duc estant a genoux la  
teste nue, leuesque fist les seruices & oraisons,  
ensemble luy fist les benedictions qui sont or-  
donnees pour telle sollennite. Et entre autres  
mastres luy mist sur le chef vng bonnet de  
veloux de couleur de pourpre, lequel estoit  
fourre dermynes : & puis apres luy mist dessus  
la teste vne tresriche couronne dor a haultz  
florons tous dune haulteur, qui est la couronne  
royalle que les ducz de Bretagne ont voulu  
porter depuis quilz nont plus voulu auoir ne  
porter nom ne tiltre de roy. Et puis apres que  
leuesque eut dit plusieurs autres oraisons &  
suffrages il luy mist en la main vne espe nue  
pour deffendre leglise & tout le sourplus de sa  
duche. Et puis incontinant que leuesque eut

Le couronne-  
ment du duc  
de Bretagne.



## Le quatriesme

acheué le mistere qui est tout itel que celuy du couronnement dung roy, ne reste que lunction, sen partit le duc de leglise de saint Pierre, le clerge deuant & en belle proces- sion alla a leglise de nostre Dame de la Cite en telle ordonnance quil appartenoit. Et le seigneur de Blossac, lequel a cause de son heritaige est grant escuier de Bretagne, portoit lespee en vng fourreau moult richement couuert, & les quatre bacheliers de Bretagne portoient sur le duc vng riche poille. Et apres que loraison fut dicte, ilz se departirent de leglise de Nostre-Dame & retournerent en leglise de saint Pierre ou la fut dicte & celebree la messe par leuesque de Rennes. Le seigneur de Guemene osta la couronne duchalle de dessus la teste du duc & la posa sur vng riche coesinet de drap dor moult richement couuert. Et puis apres leuangille, apres lofferte, Monseigneur le conestable fist le duc cheualier. Et puis apres le duc fist plusieurs cheualiers qui la se presenterent pour lestre. Et quant la messe fut dicte & celebree le duc en tel habit royal se retira a son logis acompaigne comme deuant. Et fut le disner moult triumphant : car chascun y estoit assis & serui selon son estat de tout ce quil leur estoit possible de finer & selon la seison. Apres le disner tous les barons qui la estoient firent leurs hommaiges de ce quilz tenoient du duc, & puis les hommaiges faiz furent faictes & demenees dances moult honorables a sons de tresplaisans instrumens. Et dura ceste feste toute celle sepmaine ; & telle fut la feste & entree du duc Francois en sa duche de Bretagne.

**C** La prinse de la Guerche par le duc de Soubresset anglois & du siege de Pouence.

**L**AN mil cccc xliiii, au moys dAoust, le conte de Soubresset a tout vii mil Anglois descendit a Cherbourg & cheuaucha par les pays de Normandie, du Maine & dAniou, pillant & degastant par tout ou il passoit iusques a la ville dAngiers, vint aux faulxbourgs dAngiers &

se logea avec son armee en labbaye de saint Nicolas ou il se tint deux ou trois iours, lequel auoit en sa compaignie aucuns autres capitaines anglois comme le conte dHorset, Mathego & autres vaillans cheuetaines, lesquels partirent incontinent des fauxbourgs dAngiers, & allerent assieger Pouence & y tindrent le siege par le temps de trois sepmaines. Pendant lequel siege Mathego acompaigne de quinze cens Anglois se mist aux champs, & fourprint au logis vne bende de Francois en laquelle estoient le mareschal de Loheac, le seigneur de Bueil & Loys de Bueil son frere, & les dessirent sauf Loys de Bueil & aucuns autres Francois quilz prindrent, & fut en vng villaige appelle le Neufborg saint Quentin, le fourplus se faulua a la fuitte. Quant le conte de Soubresset eut tenu le siege par le temps de trois sepmaines deuant Pouence, voiant quil perdoit temps il leua son siege de nuyt & vint deuant la ville de la Guerche en laquelle il entra facilement, parce quil y auoit treues entre les Bretons & les Anglois. A celle cause ceulx qui dedans la ville estoient qui ne se doubtoient deulx furent prins au despourueu ; touttefois bien tost apres les Anglois se retirerent & deliurerent la ville aux gens du duc.

**C** Comment le duc de Bretagne Francois premier de ce nom fut a Tours par deuers le roy de France pour assister au traictie du mariage du roy Henry dAngleterre & de dame Marguerite dAniou, fille de Rene roy de Cecille & duc dAniou.

**L**AN lan mil iiii cens quarante quatre au mois de Mars le conte de Suffolk & le priuesel dAngleterre vindrent a Tours en ambassade par deuers le roy de France pour traicter le mariage du roy Henry dAngleterre & de dame Marguerite dAniou fille du roy Rene de Cecille duc dAniou. Le roy voulut bien auoir sur ceste matiere laduis des princes de son royaulme & autres ses aliez & amis, & entre autres du duc de Bretagne, si enuoya le roy monseigneur le conestable par deuers le duc son nepueu a

Nantes & luy escript ceste entreprinse en le priant quil se voullist trouuer a Tours afin que par bonne & meure deliberation ce mariage fust traicte, lequel pourroit estre cause dune bonne paix en France. Quant le duc eut veu ses lettres & ouy ce que monseigneur le connestable luy remonstra, il se delibera de partir & fist ordonner & apprestier son affaire pour partir de Nantes apres la feste de Pasques qui prochaine estoit.

Le mardi des series de Pasques lan mil quatre cens quarente cinq, partit le duc de Nantes acompaigne de monseigneur le connestable & de la plus grande partie des barons, cheualiers & gens destat de Bretagne. Il arriva tantost apres a Tours, par deuers le roy qui moult honorablement le recueillit. Et tantost apres en la ville de Tours, ou tous les princes & gens de grant conseil de France estoient assemblez pour cest affaire, fut le mariaige accorde & conclud. Et fut accorde entre le roy pour luy les roys dEspaigne & dEscosse, le duc de Bretagne & leur pais dune part, & le roy dAngleterre & ses pais dautre, vne treue de cinq ans sur esperance de paix. Et la conclusion dessusdite prinse & accordee. Le duc print congie du roy son oncle & des autres princes & seigneurs de France & sen retourna a Nantes.

Au mois de septembre ensuiuant trespassa la femme de monseigneur le connestable, fille dAlbret. Aussi trespasserent en celuy an la royne dEscosse & ma dame la dauphine sa fille.

**C Du mariage de monseigneur le connestable & de madame Katherine de Luxembourg.**

**L**AN mil cccc xlvi, le dernier iour de Iuing, fut traicte le mariage de mesire Artus de Bretagne conte de Richemond, connestable de France, & de ma dame Katherine de Luxembourg, fille du conte de Saint Pol. Et au mois de Iuillet ensuiuant furent les nopces.

**C Cy commence le proces de la prinse, detention & execrable mort de monseigneur**

**Gilles de Bretagne, frere du duc Francois.**

**L**AN dessusdit mil quatre cens quarante six fut quelque different suscite entre le duc Francois de Bretagne & monseigneur Gilles son frere, & la couleur & entree de ce discord fut touchant le partaige que monseigneur Gilles demandoit auoir pour son droit heredital en la duchie de Bretagne; pour ce que le duc Jehan leur pere, par son testament & derniere volonte auoit ordonne monseigneur Francois son filz aisne duc de Bretagne, comme la raison le vouloit; & la seigneurie de Guingamp ordonna a monseigneur Pierre son second filz; & a monseigneur Gilles son tiers filz laissa seulement la seigneurie de Chantoce. Iceluy monseigneur Gilles a ceste cause sestoit plusieurs foiz complaint au duc son frere en disant quil nauoit partaige quelconque au duchie de Bretagne & quil estoit filz, & par consequant heritier du feu duc son pere, lequel par la loy du pais ne le pouoit priuer de sa succession attendu quil nauoit commis quelconque chose qui le meritast. Et au regart de Chantoce cestoit vng heritaige situe en Aniou que le duc son pere auoit acquis & nestoit de son patrimoine du demaine de Bretagne, aussi nestoit partaige souffisant; ces raisons ici auoit monseigneur Gilles plusieurs fois remonstre au duc son frere & luy auoit fait remonstrer par les grans personnaiges qui autour de sa personne estoient. Mais nous auons icy a presupposer que vng ieune seigneur de Bretagne nomme Artur de Montauban auoit lors tel assez & telle prochainete enuers le duc Francois quil ny auoit homme quelconque en sa court qui ne fust de par luy ou qui ne tinst son party. Finablement il faisoit du duc & de la duchie de Bretagne a son vouloir. Et pource que iceluy de Montauban estoit si tresbeau que nul autre nen approchoit en beaulte, le duc lauoit ainsi auant fiche en son amour & en sa grace, voire trop plus auant que raison & nature ne permettoient, & peult bien estre que celle excessiue & indecente amour a este cause de priuer & forclorre de

Monseigneur Gilles frere du duc Francois.

## Le quatriesme

succeder a la duche & principaulte de Bretagne ceulx qui sont yffuz de la lignee diceluy duc Francois; touteffois les iugemens de Dieu procedent dung abisme si tresprofond quil nest creature quelconque qui ofast presumer de sca-  
5 uoir quel il fait au fond de cest abisme si non par ce que lon voit auenir. Et bien y a plus, car pource que monseigneur Gilles, de leage de dix a vnze ans, auoit espouse vne ieune dame de Bretagne nommee dame Francoyse de Dinan, laquelle estoit dame de Chasteaubriand, de Montafilland, de Beaumanoir & autres  
10 grandes seigneuries, le dessusdit Artur de Montauban eut volontiers veu la mort & trespas diceluy Gilles pour par apres sa femme espouser, & luy sembloit bien que facilement il y paruiendroit si le dessusdit Gilles estoit mort; & comme lennemy de nature humaine incite les  
viteulx a proceder de vice a vice, celuy Artur de Montauban, qui pour la cause dessusdicte  
20 procuroit la mort dudit ieune seigneur, auoit gaigne messire Iehan Hingant & aucuns autres gens de court par lesquelz il faisoit mettre monseigneur Gilles en la mal veillance du duc son frere & fondoient leur dire sur ce que monseigneur Gilles auoit este nourry ieune enfant en  
la court du roy d'Angleterre, car le feu duc Iehan son pere lauoit enuoye des leage de  
30 quinze ans avec son chancelier messire Iehan de Malestroit, euesque de Nantes, en Angleterre par deuers son ayeulle dame Iehanne de Navarre royne d'Angleterre, qui femme auoit  
este au parauant du duc Iehan le conquerer, & y fut iusques a leage de xxi ans, & vouloient  
soubstenir ses hayneulx que a celle cause monseigneur Gilles ayuoit moult les Angloys &  
35 quil auoit entendement secret a eulx & plusieurs autres faulses choses dont ilz faisoient le rapport au duc son frere, lequel a ce par leurs faux rapports le print en telle indignation que  
vne seule douce parolle ne luy vouloit dire, mais parloit a luy en le menassant par parolles  
toutes plaines de rigueur. A celle cause fut monseigneur Gilles contrainct de laisser & abandonner  
40 la court du duc son frere & se retyra tresmalcontant aillieurs en Bretagne en ses places quil auoit a cause de madame sa femme.

**M**ONSEIGNEUR le conestable, qui estoit lors en la court du roy de France, fut aduertie de ce discord & sen partit hastiuement pour  
5 venir en Bretagne par deuers le duc son neueu, auquel il remonstra les grans inconueniens qui pouoient aduenir sil deschaffoit ainsi son frere, & quant ores il auroit quelque mauuaise  
intencion que non si le deuroit il par douceur attirer a luy & gracieusement le traicter pour  
10 euitier les scandalles qui en pouent venir. Finalement il fist tant que le duc rappella monseigneur Gilles son frere & les mist daccord pour celle foyz, & puis sen retourna en France monseigneur le conestable, & aussi monseigneur  
15 Gilles se retira au Guilledo, qui est vng chasteau assis sur le riuage de la mer, a luy appartenant a cause de sa femme. Apres le departement de monseigneur le conestable, les hayneux de monseigneur Gilles donnerent entendre au duc  
20 que veritablement monseigneur Gilles son frere auoit enuoye par deuers le roy d'Angleterre & secrettement luy auoit escript & fait quelque entreprinse contre le roy & le royaume de France & contre le duc & le pays de Bretagne;  
25 & tellement besongnerent que le duc print son frere en hayne plus que deuant. Et fut le duc conseille par Artur de Montauban & ses aliez daller en France par deuers le roy son oncle, faignant fere le voiage pour quelque autre  
30 faire. Si partit le duc de son pays de Bretagne & sen alla a Chinon par deuers le roy qui lors y estoit. Et apres plusieurs comunicacions le duc fist remonstrer secrettement au roy comment son frere monseigneur Gilles auoit este nourry  
35 ieune enfant en la court du roy d'Angleterre iusques a son eage de xxi an, & lauoit le roy d'Angleterre tellement en sa grace quil luy auoit offert son ordre de la Jarretiere, avecques le  
40 voulut faire chief & prince de tous les cheualiers de son ordre, & disoient que encore ne scauoit le duc ce quil en estoit. Mais il estoit certainement aduertie que de moys en moys & plus souuent il enuoyoit par deuers le roy d'Angleterre & secrettement luy escriuoit que sil  
45 loit enuoyer des gens darmes en Bretagne il les feroit recueillir & les mettroit en France par les pays de Normandie, d'Aniou & le

Maine, & plusieurs aultres remonstrances controuuees luy imposerent, misdrent suz que iamais la verite de ceste besoigne ne seroit attaincte si monseigneur Gilles n'estoit prins au corps & constitue prisonnier. Mais toutesfoiſ le duc ne vouloit pas ordonner de sa prinſe, disans ces faulx detracteurs que ce seroit chose plus conuenable que le roy de France le feist prandre & quil le liurast entre les mains du duc son frere pour luy faire son proces & le pugnir selon iustice. Et finalement tant firent les hayneux de monseigneur Gilles enuers le roy de France quil feut conclud que tantost apres le partement du duc en Bretagne le roy enuoieroit vng bon nombre de gens darmes pour prandre au corps monseigneur Gilles, & ceste entreprinſe tenue ſecrete de paour que monseigneur Gilles ne mist sa personne en ſeurete ſil en estoit aduertiy. Et puis apres que ce propos fut arreſte le duc partit de Chinon & tyra en Bretagne.

Messire Pierre de Breze.

**T**ANTOST apres que le duc fut arriue en Bretagne, partit de la court du roy de France, pour tyrer en Bretagne messire Pierre de Breze, a tout quatre cens lances francoys, lesquelz arriuerent deuant la place du Guilledo a vng dimenche xxvi du mois de Iuing, lan mil ccccxlvi. En ce chasteau estoient monseigneur Gilles auecques les dames, cest assauoir ma dame sa femme, ma dame Katerine de Rohan mere dicelle dame, & plusieurs autres dames & damoiselles qui ne se doubtoient de ceste entreprinſe. Et auoit monseigneur Gilles auecques luy lors en ceste place quelque petit nombre d'archiers anglois quil auoit mandez de Normendie venir a luy pour le deduit & le pafetemps de larc, car pour ce que monseigneur Gilles auoit prins plaisir, alors quil estoit en Angleterre, a tyrer de larc & a en veoir tyrer ces Anglois, qui sont moult bons archers, il ne passoit gueres le temps a autre chose si non que souuent il tyroit de larc ou en faisoit tyrer deuant luy. Lon vint aduertir monseigneur Gilles de ceste bende de gens de guerre qui se aduouoient du party de France, & comme celuy que aucunement ne se doubtoit de leur

entreprinſe fist ouuir les portes de son chasteau esperant les recueillir honorablement pour la reuerance du roy son oncle. Et des ce quilz furent dedans la place ilz se faesirent des clefs des portes & prindrent au corps assez lourdement de monseigneur Gilles, le tyrerent hors de place & le menerent en la ville de Dinan, ou le duc son frere estoit. Le duc ordonna dautres gens de guerre auquelz y fist deliurer la personne diceluy monseigneur Gilles en garde & renuoya les gens darmes francois. Et pour principaulx de la garde d'iceluy monseigneur Gilles, deputez de par le duc estoient Olyuier de Mes, Robert Rouxel, Iehanin de la Cheſe Maletouſche, Iehan Raiart & Pierre Salomon, lesquelz cinq personnes estoient les principaux amys & familiers de Arthur de Montauban & portoient son affaire autant ou plus que luy mesme. Si le fist le duc mener a Chasteaubriend qui a cause de sa femme luy appartenoit, & le fist garder par les deſſusdictz pour long-temps.

**D**es estatz de Bretagne qui furent assemblez en la Ville de Redon pour auoir aduis sur le faict de monseigneur Gilles.

**L**AN mil cccc quarantefix, au moys d'Auguſt, furent par le duc Francoys de Bretagne les estatz du pays assemblez en la ville de Redon, & en plains estaz, le duc absent, furent par le procureur general de Bretagne remonstrez plusieurs mauuais cas contre monseigneur Gilles, disant quil les auoit commis & perpetrez & pis encores eust fait sil neust este prins & detenu de sa personne. A celle caute le duc auoit mande les suppostz des estatz du pays afin de leur donner a entendre la raison qui l'auoit meu de le constituer prisonnier, qui estoit afin de le pugnir selon que iustice le requerroit, car non seulement Bretagne, mais aussi le royaume de France entreprenoit de destruyre & y mettre les ennemys. Et vouloit bien donner le duc a congnoistre au roy de France que les deſſusdictz entreprinſes luy desplaioient. A ceste cause requeroit le procureur general que lon tyraſt

## Le quatriesme

La conclusion  
du procureur  
general de  
Bretaigne.

auant en son proces iusques a l'execucion dice-  
luy inclufiement en difant que les cas estoient  
dignes de mort. A celle opinion se condescen-  
doient par faulte de vertu ceulx qui la estoient  
assemblez pour complaire aux gouuerneurs des-  
fufdictz, fauf le feigneur de Combour, labbe  
de Bufay & trois ou quatre autres fuppoftz  
desdictz eſtatz, leſquelz se leuerent fur piez &  
par la bouche diceluy feigneur de Combour  
dirent publiquement que a la ſentence de mort  
diceluy monſeigneur Gilles ilz ne bailleroient  
aucun conſentement, mais formellement ſi op-  
poſerent en remonſtrant comment par enuye  
on luy auoit contre droit & raiſon ſufcite leſ-  
dictz cas & ſcauoient bien dont cela procedoit  
qui ne ſe deuoit pas celer, diſoient auſſi que  
depuis le retour d'Angleterre diceluy monſei-  
gneur Gilles, ilz auoient conuerſe, beu &  
menge auecques luy, auoient congneu de toutes  
ſes ſecretes entreprinſes, & ſauoient a quoy  
iornallement il vacquoit & entendoit & quelz  
gens venoient par deuers luy & leſquelz de ſes  
gens il enuoioit dehors, mais ilz prenoient ſur  
leur vie que en toute laſſemblee ny auoit point  
de meilleur Breton que luy ne qui plus par-  
faictement aymaſt la couronne de France & le  
roy ſon oncle. Et pour ce requeroit iceluy ſei-  
gneur de Combour que monſeigneur Gilles  
feuſt de ſa perſonne mis a pleine deliurance &  
que il fuſt ouy a droit en ſes iuſtifications &  
luy faire proces ordinaire en remonſtrant veu  
lauctorite de ſa perſonne, luy qui estoit frere  
du duc ne deuoit aucunement eſtre ainſi  
ſcandaleuſement traicte.

**A** celle remonſtrance & propoſition ſe diuer-  
tirent & retournerent la plus grande partie  
de ceulx qui la estoient iacoit ce que au para-  
uant ilz fuſſent de contraire opinion. Et a celle  
cauſe ne fut plus auant traictee la matiere ſub-  
gecte, mais fut aduiſe que monſeigneur Gilles  
demouroit encores priſonnier ſans aucunement  
toucher a ſon proces iusques a ce que lon euſt  
trouue d'autres preuues & coniectures contre luy.

**C** Comment le duc Francoys conſentit  
l'appointement dentre luy & Jehan de

## Bretaigne touchant ſa prinſe de Chanto- ceaulx.

**A**u moys de May lan mil ccccxlviij,  
le feigneur de Leigle Jehan de Bre-  
taigne filz ii<sup>e</sup> de Marguerite de Clif-  
ſon ſe retira par deuers le duc eſtant  
a Nantes & luy remonſtra comment ſa mere &  
ſes deux freres Olyuier & Charles qui coul-  
pables estoient de ſa prinſe estoient trespassez &  
que a luy appartenoint les ſeigneuries & terres  
qui pour raiſon dudit cas estoient ſaiſiz & em-  
peſchez, luy remonſtra auſſi comment iamais  
luy ne ſon frere Guillaume ne furent cauſe ne  
coupables dudit cas. Par quoy ſupplioit au  
duc en conſideracion de leur innocence & que  
ſon dit frere Guillaume auoit eſte detenu en  
eſtroicte priſon par le temps de xxviii ans ou  
il auoit tellement plore les crimes commis par  
les deſſufdictz quil en estoit deuenue aueugle &  
auoit perdu la vue, quil pleuſt au duc le  
mettre en la ioyſſance & ſeigneurie deſdictes  
choſes ſaiſies pour en ioyr enſemble des droitz  
& eſperance de ſucceſſion qui leur auoient eſte  
reſeruez au duche de Bretaigne par le traicte  
de Guerande qui fut fait entre le feu duc  
Jehan le conquerant & ſa tante dame Jehanne  
de Bretaigne, veufue de feu meſſire Charles de  
Bloys. Finablement le duc Francoys meue de  
compaſſion conſentit & octroya au feigneur de  
Laigle ſa requeſte, & par ce moien fut le duc  
Guillaume deliure de priſon. Iay veu & leu par  
eſcript que en faiſant ce traicte ledict Jehan de  
Bretaigne diſt & declaira expreſſement quil  
n'entendoit aucunement comprendre en ce  
traicte au droit de ſucceder au duche, lequel  
par aucuns moiens & condicions luy fut par  
ledict appointement reſerue, les enfans dudit  
Charles ſon frere puisne en hayne du cas par  
luy commis qui trop luy venoit a deſplaiſir &  
y auoit l'an mil iiii cens xc, teſmoins encore  
viuans qui furent preſens audit traicte qui  
repportoient pour verite, ainſi le luy auoit ouy  
dire iasoit ce que la lettre dudit appointement  
ne le contienne. Dicelluy Charles fut fille &  
ſeuil enfant Nicole de Bretaigne, femme de  
meſſire Jehan de Bresse feigneur de Boſſac; de

Oliuier son frere ainsne ne fortirent aucuns enfans; ledit Guillaume de Bretagne espousa dame Yfabeau de la Tour, fille du conte de Bouloigne, dont yffit Francoyse qui fut femme de Allain seigneur d'Albret; ledit Jehan qui fist ledit appointment neust point denfans.

**C** La prinse de Foulgeres par Francoys l'Arragonnoys & les Angloys.

**L**AN cccc xlviij, pendant les treues qui lan XLV auoient este acordez cy deuant entre les roys de France & d'Angleterre, leurs pais, subietz & alliez, esquelles le duc de Bretagne & ses pays estoient comprins, les Angloys qui se tenoient en garnison a Sainct James de Bouuron, dont messire Francoys de Surgeres des partis d'Arragon estoit capitaine, furent la ville & le chasteau de Foulgeres prinsez de nuyt par eschelles & demblee par les dessusdictz Angloys & leur capitaine, laquelle ville ilz pillerent & en emporterent les biens qui y estoient en leur garnison & tindrent a force de gens darmes la ville & le chasteau : dont yffit grant scandalle pour ce que la treue duroit encores. Le duc enuoya en diligence son roy darmes sommer le comte de Soubresset qui se tenoit a Rouen, lequel estoit lieutenant du roy d'Angleterre, de luy faire rendre la ville & les biens pillez aux habitans dicelle. Mais pour toute responce il dist quil ny scauroit que faire & quil n'aduouoit pas ceulx qui auoient fait celle prinse. Le duc de Bretagne aduertit de la responce des Angloys enuoya par deuers le roy de France leuesque de Rennes & le seigneur de Guemene en embassade pour luy faire remonstrance de lexcès & outrage qui fait luy auoit este a faulces enseignes. Mais le roy, qui de cest affaire auoit este aduertit, auoit ia enuoye en Angleterre par deuers le roy angloys, le sommer de rendre la ville de Foulgeres & reparer les excès & outrages que ses gens auoient faiz en la ville & aux habitans dicelle. Et fut aux ambassadeurs du duc respondu que si le roy d'Angleterre ne vouloit obtemperer a la sommacion que le roy luy faisoit, le roy de France aideroit au duc de

Bretaigne son neueu de gens & d'argent pour la ville recouurer & auoir restitution des pilleries & rapines dessusdictes. Et a toute celle responce sen retournerent en Bretagne les ambassadeurs du duc.

**C** De l'ambassade que le roy de France enuoya a Rennes par deuers le duc pour traicter de la deliurance de monseigneur Gilles & des sedicieuses lettres que ses hayneux conspirerent pour empescher sa deliurance.

**A**PRES que les ambassadeurs de Bretagne furent retournez par deuers le duc, le roy de France, a qui chascun iour lon remonstroit les rigoureux termes que le duc faisoit tenir a son frere monseigneur Gilles & comment le duc estoit abuse en cest affaire par Artur de Montauban & ses adherens. A celle cause & que monseigneur Gilles estoit neueu au roy, par quoy sa detention si longue luy desplaisoit moult, le roy enuoya le baron & seigneur de Raiz en Bretagne par deuers le duc & le chargea de ces affaires & de poursuivre sa deliurance selon les articles qui par le conseil luy auoient este baillez.

**Q**UANT le seigneur de Raiz eut au duc recite la charge que le roy luy auoit commise, qui ne tendoit si non a la deliurance de son nepueu dont le roy le prioit trescherement, le duc se y consentit bien liberalement en faueur du roy, & dist que pour lhonneur & lamour de luy il mettroit en oubly tout ce que rapporte luy en auoit este. Si furent par le commandement du duc baillez au seigneur de Raiz lettres missiues & patentes adressantes a Oliuier de Mes, a Alain Roufel & aultres qui en garde auoient monseigneur Gilles, par lesquelles le duc leur mandoit & commandoit que incontinent & sans delay ilz eussent a mettre hors de prison monseigneur Gilles son frere & mettre sa personne en son liberal arbitre & plaine deliurance, & au fourplus quilz adioustassent foy & credence a ce que le seigneur de Raiz leur diroit touchant cest affaire.

## Le quatriesme

Le seigneur de Raiz partit de Vennes avecques ses lettres patentes & missiues pour aller a Montcontour, ou monseigneur Gilles estoit detenu prisonnier, & y arriua a vng iour de lundix de May lan mil cccc xlviij. Quand il fut arriue & acoustre il se retira au chasteau par deuers les gardes, leur presenta les lettres du duc, & apres les auoir veues & entendues ilz menerent le seigneur de Raiz par deuers monseigneur Gilles, qui moult gracieulx accueil luy fist. Et apres leurs comunicacions & deuise fut delibere que dedans deux ou troys iours lon dresserait & mettroit apoint les cheuaults & besongnes diceluy monseigneur Gilles, & puis partiroit le dessusdit seigneur de Raiz en sa compaignie pour aller par deuers le duc son frere, & de la deuoient ensemble aller en France par deuers le roy.

Or est il que Artur de Montauban, qui present auoit este a lexpediton du seigneur de Raiz, nauoit ose deuant luy conseiller au duc de refuser au roy sa requeste, doubtant que sa malicieuse hayne neust este descouuerte, & faingnit estre dauis que le duc deuoit obtemperer a ce que le roy luy requeroit. Mais ainsi que le diable qui entretient les mauuais en leur obstination pour de pis en pis conduire & mener les ouurages que par sa malicieuse inspiration ilz ont entrepris fut par iceluy de Montauban & ses adherans mise sur vne traifon merueilleuse qui fut telle. Artur de Montauban & aulcuns aultres qui de son accord estoient en court alors que le seigneur de Raiz y estoit susciterent vng poursuiuant parlant angloys dun homme incongneu, lequel arriua a Vennes des le lendemain que le seigneur de Raiz en estoit parti pour tirer a Montcontour, & ce adressa ce poursuiuant au duc & luy presenta vnes lettres que il faingnit luy estre enuoyees par le roy d'Angleterre. Ces lettres auoient este faictes & composees par vng traistre garson nomme Pierre Rose, qui longuement auoit seruy lun des secretares du roy d'Angleterre & scauoit moult subtilement son faing & son seel contrefaire. Et contenoient ces lettres commandement au duc de mettre a plaine deliurance monseigneur Gilles son frere,

lequel il detenoit prisonnier en hayne de luy : & si le duc ne le faisoit deliurer le roy d'Angleterre enuoieroit en Bretaigne xxx mil Angloys en armes pour le mettre a plaine deliurance & auoir reparacion de liniure que faicte luy auoit este & dont ledit monseigneur Gilles auoit plusieurs fois requis secour & ayde en cest affaire a celluy roy d'Angleterre, & estoient ces lettres signees comme il sembloit du faing du roy d'Angleterre & seellees de son seel, mais le mauuais garson Pierre Rose auoit le tout contrefaict.

**L**E duc, apres auoir receu & eu ces lettres, appella Artur de Montauban & aultres de son estroit conseil qui bien scauoient ceste fiction, & par leur conseil & aduis fut delibere que monseigneur Gilles seroit encores detenu prisonnier, & plus que iamais fut en lindignation du duc son frere. Si fut soudainement depesche vng poursuiuant appelle Montfort pour aller en diligence par deuers Oliuier de Mes & ses fathellites a Montcontour, & par luy leur manda & escripsit le duc que sur leur vie ilz ne meissent point monseigneur Gilles hors de prison & quilz noptemperassent point aux lettres patentes ne missiues que le seigneur de Raiz leur auoit portees, car depuis son partement de Vennes le duc auoit eu daultres nouvelles qui lauoiert meu de changer propos. Et au regart du seigneur de Raiz le duc luy rescripuoit quil rappassast par luy pour quelque chose quil auoit a luy dire.

**M**ONTFORT le poursuiuant avec ses lettres partit de Vennes & arriua a Montcontour le iour dont le lendemain monseigneur Gilles & monseigneur de Raiz en deuoient partir, il presenta ses lettres a Oliuier de Mes & ses compaignons, qui a tresgrant ioye les receurent, car veritablement ilz auoient este fauorifans & aydans a la malicieuse inuencion des lettres que Pierre Rose auoit contrefaictes; ilz monstrerent au seigneur de Raiz ce que le duc escripuoit, dont il fut moult triste & dolant; aussi fut le noble cheualier monseigneur Gilles, a qui les ioyeuses nouvelles de sa deliurance

ne tindrent gueres compaignie, car incontinant il fut referre & enclos.

**L**E seigneur de Raiz retourne a Vennes par deuers le duc & des ce qui il y fut luy monstra les lettres que le messaigier d'Angleterre luy auoit apportez, dont il fut bien esbahy, & fut delibere & aduise que le seigneur de Raiz sen retourneroit en France par deuers le roy & luy porteroit ces lettres pour mieulx le informer comment le duc auoit matiere de faire emprisonner son frere & que le roy ne luy en deuoit aulcune faulte imputer.

Si sen retourna le seigneur de Raiz par deuers le roy & luy dist & declara ce quil auoit en Bretagne exploicte, & luy monstra les lettres d'Angleterre, dont le roy & ceulx de son conseil furent moult esmerueillez; toutesfoys aucuns de ceulx qui autour du roy estoient & lesquelz scauoient de certain les nouvelles d'Angleterre de iour en iour iugerent & dirent que ces lettres estoient contrefaictes & quilz ne contenoient verite pour ce que bien scauoient que en Angleterre se faisoit aucune entreprinse pour descendre en Bretagne ne ailleurs.

**C** Comment le roy de France enuoya Vne ambassade en Bretagne par deuers le duc pour dresser le fait de la guerre dun commun accord contre les Angloys en hayne de la prinse de Foulgeres.

**L**AN dessusdit mil cccc xlviij retournerent par deuers le roy ses ambassadeurs quil auoit enuoyez au roy d'Angleterre & son lieutenant en Normandie pour le recourement de Foulgeres. Et pour ce que on leur auoit respondu qui est prins si est prins & aultres remede ny vouloient les Angloys ordonner, a celle cause le roy de France enuoya en Bretagne par deuers le duc en ambassade le conte de Dunoyz ladmiral de France, le seigneur de Precigny & maistre Estienne Cheuallier secretaire, avecques toute puissance de former & traicter vne entreprinse de guerre contre les Angloys. Ces ambassadeurs de France arriuerent a Vennes

par deuers le duc qui aduerti estoit de leur venue, & pour aduiser a laffaire auoit fait venir a Vennes les barons & grans personnages de son pays. Finablement fut entre les ambassadeurs du roy pour luy ses pays & subiectz dune part, & le duc, ses pays & subgetz daultres traictee, accordee, promise & iuree vne bonne & vertueuse entreprinse contre les Angloys pour les faire vider de Foulgeres, de Normandie & des aultres parties du royaume. Et quant a ce traicte les dessusdictz princes, cest assauoir le roy de France par ses ambassadeurs & le duc & ses barons en personne promisdrent ayder & subuenir les vngs aux aultres bien & loyalement selon les points & articles diceluy traicte.

**A** ceste conclusion prandre & former furent presens avecques le duc de Bretagne: monseigneur Pierre de Bretagne, seigneur de Guingamp & de Chasteaulin; Adam viconte de Rohan, conte de Porhoet, seigneur de Leon & de la Gafnache; Guy, conte de Lual, seigneur de Vitre, de Montfort & de la Roche Bernard; Francoys, seigneur de Rieux, de Rochefort & d'Anceux; Iehan, seigneur de Malestroit & de Largooet, viconte de la Belliere; Iehan, seigneur de Derual & de Chasteaugiron; Iehan, seigneur de Montauban & de Landal, mareschal de Bretagne; Loys de Rohan, seigneur de Guemene, Guingamp, de la Roche au Moynne & de Gye; Tristan, seigneur de Quintin & de la Roche Dire, & plusieurs autres seigneurs de Bretagne, lesquelz iurerent la dessusdicte entreprinse & les lettres qui faictes & formees en furent signerent & y firent apposer leur seaulx. Et ce faict sen retournerent en France les ambassadeurs du roy.

**O**R pour ce que lors duroit encores la treue qui prinse & accordee auoit este entre les roys de France & d'Angleterre, le roy de France se feust volentiers passe de faire la guerre aux Angloys. Mais pour ce que le duc de Bretagne ny estoit plus lye ne comprins en tant que les Angloys par la prinse de Foulgeres auoient brise celle treue contre luy, fut accorde que tous les chefs de guerre & gens darmes

## Le quatriefme

bretons & aultres qui en France au seruice du roy estoient se retireroient en Bretagne par deuers le duc & luy mesmes feroit conduire la guerre en son nom. Si se retirerent en Bretagne monseigneur le conestable de France, conte de Richemond; le seigneur de Loheac, monseigneur Iaques de Sainct Pol, Ioachin Rouauld, & plusieurs aultres chefz de guerre de France, & trouuerent le duc en armes & prest a marcher & estoit ia sur les marches de Foulgeres & de Normandie. Et fut aduise que le duc marcheroit auant iusques a sainct Aulbin du Cormier sur la frontiere de Normandie & laisseroit enuiron Foulgeres monseigneur Pierre son frere & vng bon nombre de gens darmes. Si furent ordonnez quatre cens lances pour aller prendre la place de sainct Iames de Bouron, lesquelz conduisoient le seigneur de Loheac, messire Geffray de Couuran, Oliuier de Bron & Ioachin Rouauld. Et des ce quilz furent deuant la place, ilz la firent battre par quelques endroiçtz & puis liurerent lassault moult asprement & tellement que les Angloys furent contrains de la rendre & sen aller chascun vng baston au poing.

**A**PRES marcherent auant le seigneur de Loheac, monseigneur Iaques de sainct Pol qui estoit lieutenant de la compaignie de monseigneur le conestable, le seigneur de Derual, le seigneur de Montauban mareschal de Bretagne, le seigneur de la Hunaudaye & Joachin Rouauld, avecques leurs gens darmes dont ilz estoient cappitaines, & allerent liurer lassault aux Angloys qui estoient dedans la place de Mortaign, & fut moult vertueusement la place deffendue & tellement que depuis dix heures du matin lassault dura iusques a la noyre nuyt & y eut fort grande occision dune part & daultre. Le lendemain les Angloys rendirent la place a laube du iour, & estoit lors le duc avecques le fourplus de son ost a sainct Aulbin du Cormier.

**B**IEN tost apres, moyennant quelque subtil entendement, fut entrepris daller fourprendre la ville du Pont de l'Arche, & pour ce

faire y furent de par le duc enuoyez messire Pierre de Breze, Floquet & Iaques de Clermont avecques vne bonne bende de gens darmes. Et par le moyen dvng marchant de Louuiers qui par charroy menoit souuent a Rouen marchandise & passoit pres le Pont de l'Arche, vng matin comme il entroit avecques sa charrette par dessus le pont en l'entree de la porte, il couppa soudainement les traiz de ses cheualx & les chassa dedans la ville & occist ledit marchant lun des portiers, & incontinent les gens darmes bretons qui pres dillec estoient en embusche entrerent dedans la ville a la foulle crians tous Bretagne, Bretagne; les Angloys qui dedans estoient furent surprins, partie de eulx se cuiderent mettre en deffence, mais ilz furent occis & les aultres prisonniers, & fut celle surprinse enuiron la feste de l'Ascension, au moys de May.

Enuiron celuy temps furent en Bordelais prinse sur les Angloys par les gens du duc de Bretagne les places de Coignac & Sainct Margrin. En Beauuoisin semblablement fut prinse la place de Gerbray par le seigneur de Moucy, de par le duc de Bretagne, laquelle xxx Angloys gardoient qui y furent tous tuez. Aussi print le baillif d'Euureux la ville de Conches, & plusieurs aultres places furent prinse en Gascoigne & Normandie sur les Angloys soubz ladueu du duc de Bretagne seulement.

Quant les Angloys se virent ainsi de toutes parts assailliz, ilz furent moult couroucez, & en especial ceulx de Bordeaulx, lesquelz enuoyerent par deuers le roy de France vng herault d'Angleterre pour auoir sauconduit pour l'archevesque de Bordeaulx & aultres seigneurs quilz vouloient enuoier par deuers luy en ambassade poursuivre la restitution des deffusdictes places. Le roy de France fist responce au herault quil nauoit prins ne fait prendre lesdictes places, & si naduouoit ceulx qui les auoient prinse, mais si le duc de Bretagne son neueu sestoit reuenche, il auoit fait comme vertueux prince, veu quil estoit comprins en la treue & que pendant icelle on auoit prins la place de Foulgeres, & a ce que son dit neueu auoit enuoye par deuers le roy Angloys & par deuers son lieutenant en

Normandie pour luy faire rendre ladicte place de Foulgeres comme la raison estoit, on ne luy auoit respondu que chansons. Et au regart du faufconduit que le herault demandoit, le roy nen fist conte & sen retourna le herault par deuers ses maistres a toute icelle responce.

**O**R en celuy temps estoit le duc de Bretagne avecques son ost pres de sainct Aulbin du Cormier sur les frontieres de Normandie. Et apres les conquestes cy dessus tous les capitaines & gens de guerre qui les auoient conquises, referuez ceulx que on y auoit laisse en garnison, se retirerent a sainct Aulbin, par deuers le duc, iusques au nombre de six mil combatans, entre lesquelz estoient avecques le duc monseigneur le conestable, le viconte de Rohan, le seigneur de Loheac, le seigneur de Raiz, le seigneur dActigne, le seigneur de Montauban, messire Geoffray de Couuran, Oliuier de Broon & aultres iusques a celuy nombre. Et le duc acompaigne des dessusdictz entra dedans le pays de Normandie iusques a Coustances. Et incontinent quilz furent deuant la ville, dont vng Anglois nomme Estienne Montfort estoit cappitaine, ceulx de la place composerent & par composition sen allerent des le lendemain, & y demoura pour la garde dicelle messire Geffroy de Couuran & quelque nombre de gens de guerre.

De la tira le duc a sainct Lo & enuoia son auantgarde deuant la place que les Anglois receurent fierement & y eut plusieurs faiz darmes ruez dune part & dautre, & sur le soir les Anglois se retirerent dedans la place. Le matin le duc de Bretagne y arriua avecques son armee, & quant les Anglois qui nestoient que deux cens Anglois dedans, virent si grande puissance deuant leur place & que lon affustoit ia lartillerie pour battre la ville, ilz composerent par tel si que ilz sen allerent avecques leurs bagues & quicterent au duc & a ses Bretons la place.

Et puis tirerent plus auant le duc & les Bretons & prindrent au moys de septembre audit an mil iiii cens xlix, les places de Thoriguy, de Chauille, de Reneuille le Hommet, Beuf-

feuille, Hambre, la Mote lEuesque, la Haie du Puis, Chanteloupt & plusieurs autres places dillec enuiron.

**E**NUIRON celuy temps le roy de France Charles vii mist fuz priuement les francs archers par toutes les villes & villaiges du royaume. Et le xviii<sup>e</sup> iour daoust audit an xlix, fut par le conte de Dunoyz prins sur les Anglois le chastel de Harecourt par composition.

Au moys doctobre ensuiuant pource que la treue dentre les Francoys & les Anglois estoit faillye fut par les Francoys mis le siege deuant Rouen & y fut par le temps de vi semaines, & en la fin fut la ville reduicte par layde principalement des habitans qui en chacerent hors les Anglois, lesquelz cest assauoir le duc de Sombreffet & le seigneur de Talbot se retirerent dedans le palays & chasteau qui incontinent apres fut assiege. Mais les dictz Anglois y furent si pressez quilz se rendirent leurs biens & leurs personnes faulues.

**C** Comment le duc apres les conquestes dessusdictes retourna mettre le siege deuant la place de Foulgeres.

**A**PRES que le duc Francoys de Bretagne premier de ce nom eut ainsi que dessusdit conquis en Normandie plusieurs citez, villes & chasteaulx, il sen retourna en Bretagne, & estoient en sa compaignie monseigneur le conestable & les autres barons, cheualiers & gens darmes de son ost, & fut la place de Gauray, que les Anglois tenoient, prinse par les dessusdictz en retournant. Comme le duc approcha de Bretagne il fut aduerti que monseigneur Pierre son frere, acompaigne des seigneurs de Leon Rieux, de Montauban & autres compaignies qui estoient demeurez en Bretagne, sur les frontieres de Normandie, auoient assis le siege deuant Foulgeres. Le duc en toute diligence tira celle part & si rendit & de la basse Bretagne se rendirent plusieurs a cheual & a pie que messire Henry de Ville blanche auoit assemblez, & fut tellement la place batue

## Le quatriesme

& assaillie de toutes pars que Francois de Surienne dit l'Arrongnois, & autres Anglois qui y estoient prierent le duc de les recevoir a composition; finalement ilz composerent de telle sorte quilz sen allerent avecques chascun deulx vng fardellet de leurs bagues, tel que chascun le pourroit porter fust a pie ou a cheual, puis se retira le duc a Dinan & monseigneur le connestable a Partenay, & les gens darmes en leurs partiz.

### La bataille de Fremigny ou les Angloys furent desconfiz par monseigneur le connestable & aultres dont il estoit chef.

**A**U commencement de feurier lan desusdict mil quatre cens quarante & neuf, apres le recourement de Foulgeres, monseigneur le connestable se retira a Dinan par deuers le duc qui y estoit, & tout le karesme residerent a Dinan & disposerent leur affaire pour retourner en Normandie faire la guerre aux Anglois, car nouvelles estoient venues que grant nombre d'Anglois iusques a xii mil estoient descenduz a Cherbourg & que ilz auoient assiege la place de Valoignes. Apres les pasques faictes fut aduise que monseigneur le connestable, avecques quelque nombre de gens de guerre, marcheroit en Normandie droit a Valoignes, & que le duc demourroit encores sur les marches de Dinan & de Dol, & la assembleroit ce quil pourroit de gens pour courir encores la basse Normandie es places ou les Anglois se tenoient. Si partit monseigneur le connestable dauecques le duc & tira droit a Grantville & a Conflans.

Les Angloys tindrent le siege longuement deuant Valoignes & tant que Rene Rouaud qui en estoit cappitaine fut contrainct de rendre la place aux Anglois & sen alla les bagues faulues. Toutefois les Francois sestoient de toutes pars mis suz & tenoient les chams, cuidans venir leuer le siege de deuant Valoignes. Les Anglois en furent aduertiz & se mirent vi cens Anglois qui estoient a Caen aux champs soubz la conduicte de messire Robert Vers, leur cappitaine; sortirent aussi de Bayeux

huyt cens que messire Mathego menoit; de Vire, v cens soubz la conduicte de messire Henry Norbery, qui tous sestoient ioingtz avecques larmee qui estoit descendue a Cherbourg & qui auoit prins Valoignes, si que ilz estoient xiiii mil Anglois.

Le conte de Clermont frere du duc de Bourbon, le conte de Castres, messire Pregent de Caityni admiral de France, & le grant senechal de Normandie, qui tenoient les champs avecques bonne & grosse armee, escripsirent a monseigneur le connestable qui a Coustances estoit, comment les Anglois auoient prins Valoignes, & quilz estoient encores celle part & leur sembloit que monseigneur le connestable se approchast & tirast a saint Lo, ce quil fist. Et ia sestoient les Anglois desemparez de Valoignes & auoient passez les guez saint Clemens tirans a Bayeux.

**L**ES Francoys qui de ce furent aduertiz les suyirent en tresbelle ordonnance & de si pres que le quatorziesme iour d'Auril lan mil quatre cens cinquante, messire Geffroy de Couran, Oliuier de Broon & Ioachin Rouaud qui mennoient lauant garde des Francoys, ruerent sur l'arriere garde des Anglois & plusieurs en tuerent, & fut sur le soir dudit iour. Ces nouvelles furent toute nuyt mandees a monseigneur le connestable, lequel partit le lendemain xv d'Auril & se rendit a Triuieres. Les Francoys en marchant rencontrerent les Anglois pres Fremigny entre Triuieres & Baieux & leur presenterent la bataille. Les Anglois semblablement se misdrent en bataille en bel ordre. Or, monseigneur le connestable qui auoit compose son armee en tres belle ordonnance enuoia son auantgarde en laquelle estoit le seigneur de Loheac, messire Iacques de Saint Pol, le seigneur de Boffac & le bastart de la Tremoille, droit aux Anglois pour les escarmoucher, & arriuerent de lautre part de larmee de France, monseigneur le connestable suyuant son auantgarde assez loing & estant en sa bataille acompaigne du viconte de Rohan, messire Iehan de Malestroit, Phelippe de Malestroit, messire Gilles de saint Symon, Pierre

Valoignes  
prins par  
Anglois sur  
les Francoys.

du Pan, Yuon de Treanua, Iehan Budes, Ector Meriadeuc, Guillaume Gruel & aultres nobles hommes auecques bonne & grosse benche de gens a cheual & a pie, & auoit aussi son arriere garde bien notablement ordonnee, & en toute diligence cheuacha auecques son armee vers Fremigny. Et ce pendant quilz venoient, les Angloys & Francoys fescarmoucherent ou ilz furent plus de trois heures sans oser lun lautre assaillir. Et aussi que les dessusdictz Francoys & Angloys fescarmouchoient passa monseigneur le conestable auec toute son armee par Triuieres sans y seiourner, & arriua a vng moulin a vent qui est sur vne hautiere si pres du lieu ou estoient les Angloys & Francoys que ilz pouoient veoir lun lautre & cuiderent de prime face les Angloys de monseigneur le conestable que ce fust secours que on leur enuoyoit de Rouen & autres garnisons dont les Angloys renforcèrent tellement leur couraige que quatre cens Angloys qui de leur bataille se desemparèrent, frapperent de tel effort sur lauanguardes des Francois quilz la misdrent en desordre & en fuite & prindrent quelques faulcons & grosses couleuurines que les Francois ne peurent sauuer. Les Angloys estoient de cinq a six mil, & Bretons & Francoys ny auoit que trois mil six cens y comprins larmee du conestable. Monseigneur le conestable qui apperceut ceste deffaicte se hastia de passer vne petite riuere qui estoit au bas du moulin a vent entre luy & les Angloys, & fist haster son auant garde. Luy mesmes en sa bataille & aussi son arriere garde donnerent moult asprement a trauers la bataille des Angloys, lesquelz moult vertueusement recueillirent les Bretons. Le conte de Cleremont & les Francoys voyans comment monseigneur le conestable estoit ia dedans bien auant, frapperent semblablement parmy les Angloys dune & aultre part, & y eut la moult grande occision, & y furent faiz dune part & dautre plusieurs cheualereux faiz darmes, & ne dura pas le combat demye heure, car tout incontinent furent les Angloys deffaiz & deulx se sauuerent seulement ceulx qui fuyr peurent, comme Mathego qui se sauua & sen fuit a Bayeux & Robert Vers a Caen auecques quel-

que nombre d'Anglois auquelz on donna la chace iusques aux portes; iiii mil vij cens lxxiiii Angloys furent occis, quatorze cens furent prins & le fourplus se sauua a la fuite, & ny mourut que huyt ou dix que Bretons que Francoys, qui fut chose miraculeuse. Le lendemain furent les mors enseueliz, & monseigneur le conestable, les contes de Cleremont, de Castres, & autres seigneurs francoys & bretons apres ceste conqueste se rendirent auecques leurs gens a saint Lo pour eulx rafraischir, & puis allerent tous ensemble mestre le siege deuant la ville de Vire, qui fut rendue par composition.

**C** Comment le duc Francoys de Bretagne marcha en Normandie & mist le siege deuant Auranthes & de la piteuse mort de monseigneur Gilles son frere.

**L**E duc de Bretagne qui pendant ces entrefaites se tenoit es enuiron de Dinan & auoit ia assemble vng bon nombre de ses Bretons, fut aduertie de la deffaicte des Angloys a Fremigny. Si se delibera de marcher en la basse Normandie & de plaine arriuee assiegea la ville d'Auranthes en laquelle y auoit cinq mil Angloys de defense, & en estoit lors cappitaine vng Anglois appelle Lampet. Et deuant celle ville fist le duc assorter son artillerie quil auoit eue deuant Foulgeres.

Quant monseigneur le conestable qui tenoit le siege deuant Vire sceut que son neueu le duc de Bretagne auoit ia assiege Auranthes ilz se delibera dy aller, a celle cause il receut les Angloys de Vire a composition, moyennant iiii mil escuz pour la rencon de leur cappitaine nomme messire Henry de Norbery qui present auoit este a la rencontre de Fremigny, & aussi parce quilz rendirent la ville entre les mains dudit monseigneur le conestable. Et ce fait, se departirent ceulx qui deuant Vire tenoient le siege, car monseigneur le conestable & sa benche tirerent au siege d'Auranthes & les contes de Cleremont & de Castres sen allerent ioindre a ceulx qui vouloient mestre le siege deuant Bayeux.

## Le quatriesme

Monseigneur le conestable arriua fort bien acompaigne a Ponts soubz Aurenches le dernier iour d'Auril lan deffusdict mil quatre cens cinquante, & la se logea pour celle nuyt, car encores nestoit prins son logis au siege. Le lendemain qui fut le premier iour de May, il se retira au siege par deuers le duc Francois son neveu, & apres quelques deuises que le duc & luy eurent ensemble, ilz aduiferent de presenter aux Anglois quelque assault pour leur planter le May. Mais ilz ne firent pas grant chose, car bien tost apres cessa cest assault pour les dangers ou les Bretons se virent par la vertueuse resistance des Angloys.

**P**ENDANT le temps que le duc & monseigneur le conestable faisoient la guerre aux Angloys en la basse Normandie, Monseigneur Gilles de Bretagne estoit detenu prisonnier au chasteau de Hardoynaie en la garde de Oliuier de Mes, Robert Rouxel & autres dessus nommez qui auoient expres commandement de par Artur de Montauban de le murdrir & occire. Et leur donnoit entendre celuy de Montauban : que ce quil en faisoit faire cestoit par ordonnance du duc, mais pour ce quil ne leurs en estoit riens apparu par lectres autentiques, ilz craignirent loccire de glaiue de peur den estre reprins. A celle cause, le reserrerent estroitement dedans vne grosse tour en vne chambre basse, & delibererent de le faire mourir de fain, car ilz furent par le temps de six semaines sans luy bailler que manger ne que boire, tellement que le bon prince quant il veoit par la grille de la chambre ou il estoit passer les gens, il crioit a la fain, suppliant humblement les passans quilz eussent pitie de luy, mais personne nen osoit faire semblant fors vne ieune femme voyfine du chasteau qui se aduantura vne nuyt dentrer es fossez en lendroit de sa chambre, & par la grille luy mectoit dedans sa chambre du pain tel que elle en auoit, dont il fut substente par six semaines, & vne nuyt ainsi que iay ouy reciter a aucuns anciens de celuy temps, ladicte ieune femme fist venir a ceste grille par deuers monseigneur Gilles & a sa requeste vn religieux

de lordre de monseigneur saint Francois, auquel il recita son piteux traictement, & comme on le vouloit faire mourir sans confession, & supplia a ce religieux quil le voulsist reconcilier & recevoir au sacrement de penitence, ce qui luy octroya & louyt en confession, & apres quil eust este confesse & absoubz, il en chargea le religieux que incontinent quil seroit aduertit de sa mort quil sentoist estre prochaine, il se tira par deuers le duc son frere quelque part quil fust, & que a sa requeste il luy assignast iour a comparoir en iugement en personne par deuant Dieu au quarantiesme iour apres le iour quil les luy seroit assauoir, pour auoir reparation de la douloureuse mort que a tort & sans cause il auoit soufferte & enduree par sa coulpe & deffault de iustice, dont il se portoit pour appellant, ce que le religieux luy promist faire.

**O**R est il que ces mauuais garnemens icy qui en garde ce ieune prince auoient, furent moult effroyez de ce que il viuoit si longuement sans prendre quelconque corporelle refection, car il ne sauoient riens de ce que la femme luy portoit de nuyt ne de ce que elle visitoit aucunes foiz. Et pour ce quil nestoit question que de le faire mourir, Oliuier de Mes, qui le principal estoit de ceulx qui lauoient en garde, auoit enuoie en Lombardie lun de ceulx qui soubz luy estoient commis pour le garder appelle Iehan Rageart, querir des poisons, pour toxionner iceluy monseigneur Gilles & faire plus occultement mourir. Et quant ces poysons furent apportees, Oliuier de Mes les voulut esprouuer sur vng chien & sur vng chappon & leurs en donna sur autres viandes, & tout incontinent moururent en la place. Quant il fut certain de la vertu de ceste damnee marchandie, il alla visiter monseigneur Gilles, & luy dist que leur seruiteur auoit oublie a luy apporter a manger de quoy repaistre & que il luy auoit ordonne longtemps afin que chascun iour deux foiz il eust le repas, mais pour ce quil en auoit este abuse, luy mesme luy auoit apporte des viures quil luy laissa en sa chambre pour en prendre a son plaisir quant

bon luy sembleroit. Et en tout ce quil luy auoit apporte, tant pour manger que pour boire, y auoit de ces poysons a grande habondance. Monseigneur Gilles, qui moult grant appetit auoit, mengea de ce que on luy auoit 5 apporte, & depuis plusieurs foiz en la presence des gens qui en garde lauioient, beut & mangea de ces viandes plaines de poysons, mais mal quelconque nen sentit, dont ces gardes furent moult espouentez, car plusieurs foiz ilz 10 essaierent de leurs dessusdictes poysons pour en faire menger aux bestes, lesquelles tout incontinant quilz en auoient dedans le corps enfluoient soubdainement & sur le champ mouroient. Finablement aussi & que lennemy de 15 nature humaine guide & conduit de mal en pis les damnees entreprinſes de ces seruiteurs & feaux furent par son exortation les dessusdictz gardes deliberez de suffocquer & estrangler ce ieune cheualier & prince, & pour leur 20 inhumaine & cruelle deliberacion executer vng iour de samedi vingt & quatriesme iour d'Auril lan mil quatre cens cinquante au plus matin, Oliuier de Mes & trois autres de ses compaignons entrerent en sa chambre en laquelle ilz le 25 trouuerent couche au liſt, & de plaine arriuee luy misdrent autour du col vne longue seruiette ou touaillon dont ilz luy auironnerent la gorge, & lun tiroit decza & lautre dela de toute leur force & les deux autres tenoient le corps affin 30 quil ne se remuast, & tellement le presserent que entre leurs mains le ieune seigneur rendit lesprit ayant les yeulx enflez & sanglans, & par la bouche, par le nes & oreilles, & aussi par les autres conduiz du corps il rendoit le sang 35 pour loutrageuse oppression dont il fut contrainct. Et telle fut la douloureuse fin de ce ieune prince par laquelle fut accomplie la parole que monseigneur sainct Vincent auoit dicte a la bonne duchesse sa mere estante lors enczaincte de luy, laquelle luy pria quil luy 40 voullist reueller quel enfant elle portoit, & il luy dist que elle estoit grosse dun martyr. Il fut detenu depuis sa prinſe iusques au iour de sa mort par le temps de troys ans & dix mois, 45 tousiours entre les mains de ceulx que Artur de Montauban y auoit commis.

La cruelle  
occision de  
monseigneur  
Gilles.

**A**PRES quil eust rendu lame, Oliuier de Mes & les autres ses complices luy desflacerent la longere dautour du col & nectoierent bouche, ieulx, nez, oreilles & autres conduiz quil auoit sanglans, & le coucherent dedans le lit quilz dresserent & misdrent a point, & puis se retirerent aux champs pour gibayer comme acoustume auoient avecques aucuns nobles hommes dentour la place quilz auoient de le soir deuant mande, se trouuerent aux champs auxquelz ilz 5 dirent que ilz estoient moult perplexe, de ce que cinq ou six iours auant monseigneur Gilles quilz auoient en garde festoit trouue tout mal dispose & que ilz doubtoient sa maladie & estoient deliberez denuoier iusques a Rennes querir quelque medecin pour en son cas pourueoir; ces compaignons gibayoient xv ou xx cheuaux depuis soleil leuant iusques apres midy. Et en ces entrefaictes souruint vng de leurs 10 seruiteurs tout fait a la main qui acourut au deuant de Olyuier de Mes, Robert Rouxel & leurs complices quil trouua chassans en la compagnie de dix ou douze nobles hommes denuiron la Hardoynaye, & tout explore leur dist que monseigneur Gilles estoit trespasse nauoit 15 pas vne heure, dont ces galans feignirent mener moult grant deuil, & supplierent aux gentilzhommes quilz voullissent venir veoir comment il en estoit alle, les gentilzhommes qui bien se doubtoient de leur malice ny voulurent aller & se excuserent enuers eulx. A quoy les 20 paillars murdries responderent : Or ca, messeigneurs, nous vous prions bien cherelement sil souruint quelque scandalle de ce faict que il vous souuiegne bien que alors quil trespassa nous nestions presens ne avecques luy, mais estions avecques vous autres & que nous vous auions recite parauant comment il estoit 25 malade dune maladie dont nous esperions quil ne reschaperoit pas. Et les gentilzhommes leur responderent que filz en estoient interrogez ilz nen diroient si non ce quilz auoient veu & oy, mais que du surplus ilz nauoient aucune charge & nyroient aucunement avecques 30 eulx.

**C** Comment labbe de Boquien pres sa

## Le quatriesme

*Hardoynaie Vint avecques ses religieuz querir le corps de monseigneur Gilles.*

**C**ES cruelz & inhumains homicides enuoierent des celuy iour de samedi sur la vespree par deuers labbe de Boucquan qui pres dillec estoit en son abbaye, l'aduertir de ceste piteuse fortune & le prier que au lendemain qui fut le dimanche xxv d'April, il voulsist venir avecques son couuent querir le corps de ce ieune prince pour l'inhumer en son esglise. Celuy iour du dimanche enuiron viii eures du matin, labbe & les religieuz se transporterent a la Hardoynaie, & la se trouuerent messire Geofroy de Beaumanoir & aucuns autres gentilzhommes du cartier qui auoient este aduertiz de ceste mort. Et fut le corps porte enterrer dedans lesglise de nostre dame de Boucquan qui est la principale esglise de labbaye, & deuant le grant autel fut ensepulture.

*Comment la Ville d'Auranches qui assiege estoit par le duc Francoys de Bretagne fut rendue par composition.*

**L**E duc Francoys de Bretagne avecques ses barons, banneretz, cheualiers & nobles hommes tenoient lors le siege deuant la ville d'Auranches, & y estoit monseigneur le connestable son oncle, comme cy deuant auez oy reciter; ilz furent tous aduertiz des le dimanche matin de la mort de monsieur Gilles, mais la verite de la maniere dicelle nauoit pas este publiee, car les mauuais garnemens qui le murdriront firent semer quil estoit mort d'une apoplexie, toutefois monseigneur le connestable & les barons & grans personnaiges qui autour du duc estoient furent moult desplaisans & tristes de ceste fortune, car de leur part ilz auoient tendu formellement a sa deliurance ou que son proces fut fait en iustice par gens de conseil non suspectz telz que les estatz du pais esliroient, mais le duc estoit si tressort enflambe & embrasé de lamour indecente de cest Artur de Montauban quil ny auoit ne Dieu ne sa loy, ne sem-

blement honneur ne crainte quil ne abandonnast pour luy complaire & en parloit en moult estrange forte. A celle cause ne s'esmouoit le duc de tout ce bruyt que bien a point, & peu a peu cesserent les plaintes & clameurs que ces seigneurs menoient de ceste piteuse mort.

**L**E siege auoit ia este par xxvi iours deuant la ville d'Auranches, laquelle auoit este bastue par artillerie en plusieurs lieux. Mais de rechef feist lon telz efforts que par baterie qui dura plus de xxx iours, il en tumba vng grant pan de mur qui fist vne voye sitresgrande que dix charectes y eussent entre de plain franc, lune iognant lautre. Les Anglois qui dedans estoient craignant lassault traicterent d'accort avecques le duc de Bretagne lequel les receut a composition, qui fut telle que tous sen fortiroient vng baston blanc en la main, leurs vies faulues seulement, & en cest estat en fortirent les Anglois, & fut le mardi xxxviii<sup>e</sup> iour de may lan dessusdit mil ccccl, & dedans la ville entrerent. Celuy iour le duc de Bretagne monseigneur le connestable & ceulx du siege y trouuerent moult de bagues & de richesses que les Anglois y auoient assemblees, & ce fait le duc commist le seigneur d'Estouteuille pour capitaine & garde de celle ville, auquel il bailla quelque nombre de gens de guerre. Et le dernier iour de may partit le duc d'Auranches, & en sa compagnie monseigneur le connestable, & tyrerent au mont saint Michel. Et le lendemain le duc feist faire vng seruice sollennel en labbaie du Mont pour lame de son frere monseigneur Gilles, ou il fut & monseigneur le connestable & tous les barons & nobles hommes de la compagnie.

Ce pendant que le duc seiourna au mont saint Michel il enuoya a Tumbelaine quelque nombre de gens de guerre faire desloger cent ou fix vings Anglois qui y estoient, & le vii<sup>e</sup> iour de Iung monseigneur le connestable print congie du duc Francoys de Bretagne son neveu, & se retira par deuers les contes de Clermont, de Castres & de Dunois, qui auoient assiege la ville de Bayeux, & se tint vng temps au siege avec eulx.

**C** Comment Vng cordelier signifia au duc Francois de Bretaigne estant en la greue du Mont saint Michel, la piteuse charge que feu monseigneur Gilles luy auoit baillee touchant sa mort.

**A** PRES que monseigneur le connestable fut party du mont saint Michel, le duc Francois de Bretaigne, le lendemain iour du samedy viii de Iuing, se mist a chemin apres auoir oy la messe, tirant en Bretaigne, & comme il cheuauchoit a l'entree de la greue sortant du mont saint Michel, se approcha ioignant le courcier qui cheuauchoit le cordelier a qui feu monseigneur Gilles festoit confesse, & luy dist : Monseigneur, iay a vous dire quelque chose qui vous touche & est de tres grande consequence. Le duc se arresta & luy estant tout a cheual se baissa sur larcon de sa selle pour escouter ce que le beau pere luy vouloit dire : lequel luy dist en ceste maniere : Monseigneur, iay ouy en confession monseigneur Gilles vostre frere peu de iours par auant son trespas, lequel me chargea vous annoncer que de par luy comme appellant de vous de deffault de droit & de la cruelle mort dont vous le faisiez ou souffriez mourir par faulte de iustice ie eusse a vous assigner iour de huy a XL iours-a comparoir en personne par deuant Dieu le createur, pour veoir reparer en iustice les tors & griefz dessusdictz. Et pour ce monseigneur ie vous signifie la charge que le bon trespasse ma baillee, laquelle iay bien volu accepter comme ministre de Dieu. Et vous aduertis & conseille de penser en cest affaire & pries Dieu assiduellement quil luy plaise auoir pitie & merci de vous. Apres lesquelles parolles le cordelier se retira droit au Mont, & le duc comme tout estonne cheuaucha plus auant en la greue avecques la notable compagnie de barons & autres nobles hommes quil auoit, & plus dune lieue cheuaucha sans parler. Et quant il eut vng peu repris ses esprits il vit autour de luy Artur de Montauban, lequel il appella & luy dist la piteuse assignation que le cordelier luy auoit donnee, dont il entra des lors en vne tres aspre fieure. Peu de gens

auoient veu ce beau pere parler au duc & ne peult on scauoir ce quil estoit deuenue. Si furent enuoiez en diligence messagiers au Mont & par tout ou lon pouoit ymaginer quil se feust retire, mais on ne le trouua point. Si tira le duc auant tout malade droit à Vennes, combien quil eust delibere dentrer dedans Rennes, principale cite de sa duche, en triumphe comme glorieux & victorieux, mais sa maladie len empescha. Et sans se arrester chascun iour plus dune nuyt en chemin il tyra iusques a Vennes ou il arriua tout malade en son chasteau de lErmine le vendredy quatorziesme iour de Iung lan dessus dit mil CCCCL.

**L**E duc voyant laffaire ou son oncle monseigneur le connestable estoit qui ia festoit ioint aux contes de Clermond de Castres & de Dunoys, qui tenoient le siege deuant Bayeux il leur enuoya de Vennes son mareschal de Bretaigne seigneur de Montauban, a tout cent lances, lequel tyra au siege de Bayeux. Et quant il y arriua les Anglois auoit ia rendu la ville aux Francois. Puis apres les Bretons qui soubz la charge de monseigneur le connestable estoient, tyrerent a saint Saulueur dYue qui leur fut incontinent rendu. Puis tyrerent Francoys & Bretons mettre le siege deuant la ville de Caen, & se y rendit le roy de France Charles vii, & estoient en la ville de Caen le duc de Soubresset & sa femme & ses enfants & plusieurs autres grans personnaiges anglois, iusques a iiii mil cccc hommes de guerre. Finablement apres plusieurs bateries & assaulx les Anglois renderent par composition la ville aux Francois & en misdrent les clefs entre les mains de monseigneur le connestable, lequel conduisit & acompaigna le duc de Soubresset, la duchesse sa femme & leurs enfans hors des destrois des gens darmes francois; tantost apres Falaise fut rendue aux Francoys & y fut le roy & monseigneur le connestable avec ses Bretons allerent assieger Cherbourg, & le seigneur de Montauban mareschal de Bretaigne avec ses cent lances, & quelque autre bende de gens submisdrent Carentan & Valoignes en lobeyssance du roy de France.

Bieux  
recouuert par  
Francoys.

Saint Saulueur  
dYue rendu.

Caen rendu  
aux Francoys.

Falaise rendu.

Carentan &  
Valoignes  
rendu.

## Le quatriefme

### De la mort du duc Francoys de Bretagne premier de ce nom.

**L**E duc Francois de Bretagne premier de ce nom estoit lors malade grieffement lez la ville de Vennes en vne maison quil auoit fait bastir que lon appelle Plaisance. Et de iour en iour se affaiblissoit. Il manda venir par deuers luy monseigneur Pierre son frere & autres personnaiges de son sang & de son conseil. Et combien quil ne se couchast & neust lentendement affoybly, si doubtoit il sa maladie qui telle estoit que medecin quelconque ny congnoissoit riens & se sentoit touche a la mort. Et comme bon catholique vouloit disposer de deulx choses : lune du fait de sa conscience, lautre du fait de sa duche, de sa femme & de ses enfans. Au regard du proces de sa confession, il y besongna par le conseil de leuesque de Laudes, son confesseur, moult prudemment & deuotement. Touchant le fait de sa duchie & autres negoces temporelz il veoit bien que son frere monseigneur Pierre luy venoit prochainement a succeder. Et si ledit monseigneur Pierre mouroit sans enfans malle & que mondit seigneur le conestable son oncle le fouruesquist iceluy monseigneur le conestable seroit par droit duc de Bretagne deuant les filles de luy. Il auoit sa femme la duchesse Ysabeau fille du roy d'Escoffe, & deulx filles, Marguerite & Marie. Et pour ce quil se doubtoit que monseigneur Pierre ne monseigneur le conestable son oncle nauoient aucuns enfans, voiant quil ny auoit enfant malle de la lignee du duc Iehan le conquereur son ayeul, fors monseigneur Francois conte d'Estampes, qui estoit son cousin germain filz de monseigneur Richard frere du dernier duc Iehan & de monseigneur le conestable, a celle cause, pour euiter le peril & le dangier qui pourroit fouruenir en Bretagne, il ordonna que monseigneur Pierre apres quil seroit duc de Bretagne, traictast & feist le mariage diceluy conte d'Estampes & de ma dame Marguerite son ainsnee fille, car si elle seroit ailleurs mariee il se pourroit esmouoir guerre mortelle entre celuy qui son mary seroit & ledit monseigneur Francois conte d'Estampes,

Le testament  
du duc  
Francoys.

tout ainsi & en cas semblable que fut le discord dentre le conte de Montfort pere du duc Iehan le conquereur & messire Charles de Bloys mary de ma dame Iehanne de Bretagne fille de monseigneur Guy de Bretagne, dont en ce liure cy deuant auez veu lystoire. Aussi conseilloit que on fist le mariage de ma dame Marie sa seconde fille & du filz ainsne du viconte de Rohan, car cest celuy qui plus droictement de toute anciennete est yssu de la ligne royal de Bretagne, comme cy deuant auez peu veoir au ii<sup>e</sup> liure de ce present oeuvre. Plusieurs autres ordonnances fist le duc par son testament, & entre autres choses recommanda la duchesse Ysabeau sa femme & ses filles, & aussi ses seruiteurs a son frere monseigneur Pierre. Tantoist apres la maladie le pressa tellement que plus porter ne se peult. Si receut moult deuotement tous les sacremens que tout bon crestien doit recepuoir a sa fin, & bien tost apres il entra es traiz extremes de la mort ou il fut depuis le ieu di quinziesme iour de Iuillet iusques au samedi prochain ensuiuant, xvii dudit Iuillet, que il rendit lesprit a Dieu. Iceluy iour estoit la feste de saint Arnoul. Et estoit celle annee le pardon general a Rome, qui navoit este depuis lan mil quatre cens.

Le duc Francoys trespasse.

**E**N celuy temps se tenoit en la ville de Vennes le chappitre general de lordre saint Francoys, & a celle cause estoient assemblez a Vennes moult grant nombre de cordeliers, lesquelz avec les collieges de lesglise de Vennes, des Carmes du Bodon & autres esglises denuiron, acompaignerent & conduisirent le corps du duc trespasse depuis le manoir de Plaisance iusques dedans le monastere de saint Saulueur de Redon, & y estoient presens plusieurs prelatz, barons & autres nobles hommes du pais, & fut ensepulture en lesglise de Saint Saulueur deuant le grant & maistre hostel dicelle esglise.

Après la mort du duc Francois, Artur de Montauban, qui se sentoit grieffement coupable du detestable crime de homicide qui commis auoit este en la personne de monseigneur Gilles, se retira secretement en France par deuers ses amis. Et pource que le seigneur

de Grauille auoit espouse vne de ses parentes, il se rendit a luy a Marcoucis pres Montlhery, qui appartenoit a celuy de Grauille, & si tint secretement pour vng temps.

### La prinse de Cherbourg contre Anglois.



Le xii<sup>e</sup> iour d'Aoust lan dessusdit mil quatre cens cinquante, les Anglois rendirent la ville & le chasteau de Cherbourg a monseigneur le con-

nestable conte de Richemond, & fut la derniere place de Normendie conquise par les Francois contre les Anglois qui lauoient tenue depuis lan mil cccc xxvii, que elle fut conquise par le roy Henry filz de Henry de Lencastre, alors qui descendit atout que comme cy deuant auez veu que sont xxxiii ans sans ce que les Francois laient peu recouurer iusques a present. Et puis apres monseigneur le connestable commist le seigneur de Bueill pour la garde de la place & se retira a Partenay, & le roy Charles de France qui pendant le siege de Cherbourg



auoit mis Falaise & Dampfront en son obeissance, se retira a Vauours.

### Comment le duc Pierre fist son entree a Rennes.



Pierre de Bretagne frere du feu duc Francois fut au moys d'Aoust lan dessusdit mil cccc l. couronne de la couronne duchalle de Bretagne en la ville de Rennes comme ses predecesseurs auoient este, & y tint feste grande & planieres. A ceste feste monseigneur le connestable conte de Richemond son oncle, & les prelatz, ba-

rons, banneretz & autres nobles hommes de Bretagne y furent, & dura ceste feste par le temps de viii iours. Puis apres partit le duc de Rennes pour tyrer a Nantes ou il fist sa premiere entree, & de la alla a Vennes faire semblablement son entree, & tousiours estoit acompaigne de son oncle & de la plus grande partie de ses barons. A Vennes seiourna le duc par quelque espace de temps pendant lequel le conte Guy de Lual qui en premieres nopces eut espouse dame Ysabel de Bretagne seur diceluy duc Pierre, espousa en secondes nopces dame Francoyse de Dinan qui lors estoit vesue de feu monseigneur Gilles de Bretagne, & estoit dame

## Le quatriesme Liure.

de Chasteaubriend; a leurs nopces furent le duc & la duchesse, monseigneur le connestable & plusieurs autres seigneurs & dames.

**C**omment le duc Pierre de Bretagne fut en France par deuers le roy pour luy rendre lobeissance & lommaige quil luy estoit tenu faire a cause de ses seigneuries.

**L**e tiers iour de Nouembre audit an mil cccc l, le duc Pierre de Bretagne partit de Vennes en la compagnie des seigneurs dessusdit & sen alla en France par deuers le roy, lequel il trouua a Montbafon pres Tours, & la luy fist la redeuance que tenu estoit luy faire a cause de sa duche, & aussi luy fist lhommaige a cause de la conte de Montfort & autres seigneuries quil tenoit en France. Et seiourna le duc a Montbafon par le temps de xv iours, & puis sen retourna en Bretagne par eue, depuis Tours iusques a Nantes.

**D**e la prinse de Oliuier de Mes & autres ses complices. Et comment ilz furent executez par iustice.

**P**endant que le duc estoit a Montbafon, monseigneur le connestable qui avecques luy estoit, fut aduertit que Artur de Montauban, Oliuier de Mes & leurs complices sestoient retirez a Marcourcy lez Montlbery. Et enuoya Eustache de Lefpinay, Oliuier de Quelen & quelque nombre darchiers celle part, lesquels prindrent seulement Oliuier de Mes, lequel ilz lierent & garroterent & en tel estat le menerent iusques a la riuere de Loire & la le chargerent en vng basteau & le menerent iusques a Nantes : le roy en fut aduertty dont il fut tres-mal content du duc & de monseigneur le connestable, & pour en auoir la reparation le roy enuoya en Bretagne par deuers le duc vne moult sollempnelle ambassade & par le chef dicelle ambassade fut remonstre au duc que il

auoit entrepris de faire prendre en la terre du roy, en laquelle le duc ne pouoit prendre aucun droit a luy appartenir, vng homme appelle Oliuier de Mes sans requerir obeissance ne congie dont le roy se donnoit grant merueille, car cestoit explecter contre toute disposition de raison escrite & de coustume. A ceste cause il sommoit le duc de rendre ledit Oliuier de Mes en la terre du roy & entre les mains de ses iusticiers & officiers, & sil auoit commis quelque cas de crime, le roy estoit tout prest de faire besongner en son proces comme par raison il appartiendroit, & disoit que a luy & a sa iustice en appartenoit la congnoissance, attendu que il estoit trouue & apprehende en son royaume en ensuiuant la sainte escripture qui dit : *Vbi te inuenero, ibi te iudicabo*, & a celle cause sil estoit coupable de crime, il deuoit la estre iuge. De la part du duc fut remonstre aux ambassadeurs du roy que si le roy se donnoit merueille de ce que Oliuier de Mes auoit este par les gens du duc prins en France & mene en Bretagne, encore sesmerueilloit plus le duc de ce que le roy auoit retire a tout le moins souffroit en son royaume les faulx & traitres homicides qui auoient son bon frere occis & mis a mort ainsi cruellement, lequel estoit propre nepueu du roy filz de sa seur, & estoit le plus beau, le plus grant & le plus aduenant prince qui fust nulle part de son aage, & qui pis est, ceulx par le commandement desquelz ces traitres homicides perpetrerent le cas, lesquels selon la loy commune sont & doiuent estre plus griefuement pugniz que les homicides mesmes, le roy les soustenoit, souffroit & tolleroit en son royaume, comme Artur de Montauban, lequel sestoit retire au couuent des Celestins a Paris, pource quil ne se sentoit pas seurement aux Celestins de Marcourcy. Et a ce que les gens du roy disoient que a luy appartenoit la congnoissance, fut respondu que leur reuerence sauue, mais au contraire, elle appartenoit au duc pour deux raisons : lune pour cause du delict qui commis auoit este par eux en sa duche ; lautre pour raison de leur domicile, car ilz estoient Bretons, subgetz du duc & demourans en son



## Le quatriesme

pais, par quoy le duc estoit leur naturel & souuerain seigneur, naturel en tant quilz sont natifz de son pays & souuerain en tant que de la sentence des iuges en matiere de crime le roy ne autre prince na que veoir, car en cela le duc ne recongnoist point de souuerain. Et des droitz dessusditz est le duc en bonne possession, & iamais les roys de France ne voulurent au contraire faire quelque entreprinse, ains y ont renonce & ont declare ny auoir aucun droit comme appert par leurs chartres & anciens traictez, & ne fert aux gens du roy auoir allegue leuangille qui dit : *la ou ie te trouueray ie te iugeray*, car cela ce doit entendre ou ie te trouueray commettant delit ou ayant la ton domicile, car en aultre maniere ne peult iuge quelconque faire le proces d'vng delinquant sil nest originaire de sa prouince ou sil ny a commis le delict, mais le doit renuoier au iuge du lieu ou il a delinque ou au lieu dont il est sans aucunement en congnoistre; toutefois il peult bien faire du cas information & la renuoier auecques le crimineulx a son iuge, & ainsi se doit entendre la matiere subiecte sauf en ce que sont les vagabons qui nont pais ne prouince, ceulx la peuent estre iugez par le premier iuge qui les apprehende, iasoit ce quilz ny aient commis le delict, mais le delinquant doit estre pigni, non pas selon la coustume du lieu ou il est iugie, mais selon la coustume du lieu ou il a commis le crime.

Ceste matiere fut bien aigrement debatue dune part & dautre pour la consequence qui sen pouoit ensuir a cause de ce que lon auoit fait la prinse en la terre du roy. Toutefois il fut aduise pour lexpediant que Oliuier de Metz seroit remis au lieu ou il auoit este prins dedans le royaume, cest assauoir au lieu de Marcourciz, ce que fut fait, & puis par requisitoire fut baille aux gens du duc qui le ramenerent en Bretagne : a Vennes fut fait son proces & fut confronte aux autres, cest assauoir : a Iehan Rafart, Robert Rouxel, Maletousche, Iehan de la Chese & autres ses complices qui prins estoient; a touz furent les proces faiz & par sentence & iugement furent condemnez a auoir

les testes trenchees sur vng eschaufaut publicquement, & puis apres les quatre membres principaulx coupez & les testes & membres atachez a potences sur les grans chemins des villes notables de Bretagne & les corps penduz au gibet. Laquelle sentence fut en celle maniere executee a Vennes au marchez publicquement. Et les autres qui du cas estoient coupables que lon ne peult apprehender, lon proceda contre eulx par deffaulx & bannies selon que de droit & de coustume il est permis en tel cas.

Artur de Montauban aduerti comment lon auoit traicte ceulx quil auoit mis en besoigne se rendit pour la seurete de sa personne religieux profes au couuent des Celestins de Paris ou il fut iusques a laduenement du roy Loys, lequel tantost apres quil fut roy luy fist donner au pape larceuesche de Bordeaulx. Et pour lexpedition de ses bulles ala iceluy de Montauban a Romme, & depuis luy estant Celestin fut archeuesque de Bordeaulx & mourut archeuesque.

### Comment le duc Pierre de Bretagne tint son parlement general en la Ville de Vennes.

**L**E duc Pierre de Bretagne qui nouvellement auoit fait son entree comme duc en sa ville de Rennes & aussi en ses villes de Nantes, Vennes & autres citez de Bretagne, tint son parlement general en la ville de Vennes au moys de May lan mil CCCCLI, auquel parlement il se assist en habit royal, acompaigne des seigneurs de son sang & des prelatz, barons, banneretz & autres nobles seigneurs & des suppostz des trois estatz de Bretagne. Et fut le duc assis en vne haulte chaire richement paree & aornee. A son dextre coste estoient assis monseigneur le conte de Richemont connestable de France son oncle, & monseigneur Guy conte de Lual, non pas comme baron, mais pour ce quil auoit eu espouse la seur du duc & estoit son beau frere. Et la cause pour laquelle il ne fut pas assis au renc & en lordre des barons fut pour ce que il vouloit estre assis au dessus du vicomte de Rohan seigneur de Leon, ce que le seigneur de

Rohan ne voulut souffrir, disant que tant par raison de ses progenitures dont il est heritier que a cause de ses terres & seigneuries en Bretagne, il estoit de plus grande & excellente maison & moult plus ancienne que n'estoit ledit monseigneur Guy de Lual, & a celle cause disoit quil deuoit preferer tous autres en lordre des barons de Bretagne, & que le conte de Lual a cause de sa conte ny deuoit auoir renc ne siege. Toutefois le duc qui moult aymoît le conte de Lual & ses enfans, qui ses neuuez estoient yssuz de sa seur, ordonna par le conseil de sa court de parlement que le premier iour de son parlement le conte de Lual n'auoit point d'assiette comme baron, mais seroit assis au siege des seigneurs de sang, & que celuy premier iour, le viconte de Rohan seroit assis le premier, & le premier lieu auroit au siege des barons de Bretagne. Et pour ce que le conte de Lual auoit encore viuante sa mere dame de la baronnie de Vitre, pour raison de laquelle baronnie iceluy conte de Lual, comme baron de Vitre, pretendoit estre assis apres le trespas de sa mere au dessus du viconte de Rohan, fut appointe par le duc que sans preiudice du droit des parties, le second iour dudit parlement le conte de Lual seroit assis au dessus du viconte de Rohan & auroit le premier lieu au siege des barons, & le tiers iour le viconte de Rohan auroit celuy premier lieu, & ainsi doresnauant auroient ces deux seigneurs alternatiuement leur renc & leur siege aux parlemens & estatz de Bretagne iusques a ce que le differend & proces dentre eulx feust vuide. Et au parfus furent sur celuy proces appointez a informer & en droit. Le second iour de l'assiette de parlement le conte de Lual fut assis le premier au siege & renc des barons; mais le viconte de Rohan ne se y trouua point celuy iour, pour quelque inconueniant de maladie comme lon disoit a celle cause se fit excuser.

Or pour retourner a nostre assiette, furent assis au coste dextre du duc messire Jehan de la Riuiere chancelier de Bretagne, & les euesques de Dol, de Rennes, de Cornuaille, de Vennes, de Sainct Briec, de Leon & de Treguer. Le-

uesque de Nantes fut excusé pour sa maladie. Et pour ce que leuesque de Sainct Mallo estoit en proces entre maistre Jacques d'Espinau & maistre Jehan Lespernuer, qui contendoient chascun deulx a luy leuesche appartenir, fut pour celle fois le siege de leuesque de Sainct Mallo vacant a ladicte assiette, sans que personne y comparust comme euesque du lieu. Apres les euesques & de leur coste furent assis les abbez de Bretagne qui sont : les abbez de Redon, de Sainct Melaine, de Sainct Meen, de Kemperle, de Sainct Mahe, de Sainct Iagu, de Landenec, de Ruys, de Sainct Guedas, de Lantenac, du Tronchet, de la Chaulme, de Blanche couronne, de Begar, de Busay, de Preieres, de Sainct Aulbin, de Boucquien, de Langonnet de la Vielz ville, de Villenefue, de Sainct Jacques pres Montfort, de Beaulieu, de Sainct Jehan des Prez, de Rille, de Saincte Croix, de Dongois, de Pornic, de Beauport, de Karmaoen, de Geneston & de Coitualon. Et au fenestre coste du duc furent sur vng siege moult eminent les barons de Bretagne. Cest assavoir : le viconte de Rohan seigneur de Leon, qui estoit le prochain du duc de celuy coste, & puis apres en celuy mesme siege estoient les autres barons assis, qui sont de toute anciennete neuf; mais il ny en auoit que deux en assiette avecques le seigneur de Rohan, cest assavoir le baron d'Ancenis & le baron de Pont Chasteau, car les baronnies d'Auaulgour, de Fougères & Lanuau, qui sont trois des anciennes baronnies de Bretagne, estoient annexees & vnies au demaine de Bretagne. Et le conte de Lual representoit le baron de Chasteaubriand a cause de sa femme qui en estoit dame & a cause de son propre heritaige la baronnie de la Roche Bernard. Et le baron de Raiz qui est le quart au nombre des barons, estoit lors absent aux guerres du roy de France.

**C** Comment le duc Pierre de Bretagne erigea & crea trois baronnies au lieu des baronnies d'Auaulgour, Fougères & Lanuau qui estoient unies au demaine de Bretagne.

## Le quatriesme

**P**AR lordonnance du duc Alain iiii<sup>e</sup> de ce nom, duc de Bretagne, en son general parlement, tenu lan mil quatre vingtz & quatre, laquelle cy deuant auez peu veoir au iiii<sup>e</sup> liure, il ordonna avec les euesques, dont lung est metropolitan, neuf baronnies, desquelles neuf baronnies y en a eu apres trois qui ont este vnies & ioinctes au demaine de Bretagne, partie par acquisition & autre partie par confiscation, en quoy le nombre des dessusditz neuf barons estoit tellement diminue quil ny en auoit plus que six. Le duc Pierre voulant entretenir les anciennes noblesses de ses predecesseurs & aussi de tout le pays de Bretagne au lieu des trois dessusdictes qui vnies estoient a son demaine, il erigea nouuellement trois autres baronnies. Cest assauoir Derual, Malestroit & Quintin. Et en ce faisant fut le seigneur de Derual cree septiesme baron, le seigneur de Malestroit viii<sup>e</sup> & le seigneur de Quintin ix<sup>e</sup>. Lesquelz le duc Pierre fist asseoir en leur renc apres les six autres barons anciens; aux pieds du duc estoient assis le seigneur de Guemene Guingamp qui tenoit la couronne duchalle du duc moult enrichie de precieuses pierres, & la tenoit sur vng coeffin couuert dun riche drap dor.

Les mareschal, admiral, grant maistre dostel, presidens, maistres des requestes, conseillers en parlement, feneschaulx, bailliz allouez & le procureur general de Bretagne y estoient honorablement assis chascun selon que a son estat appartenoit.

**L**ES banneretz & bacheliers de Bretagne comme le seigneur de la Hunauldoye, le seigneur de Combour, le seigneur de Matignon, le seigneur de Chasteauneuf, le seigneur de Montauban, le seigneur de Coetquen, le seigneur de Maurre, le seigneur de Mollac, le seigneur de la Muce, le seigneur de Kaer, le seigneur du Pontlabbe, le viconte de Coetmen, le viconte du Fou, le viconte de Pomerich, le seigneur de Keimerch, le seigneur d'Attrigne, le seigneur de Montrelaiz, le seigneur de Plusquellec, le seigneur de la Feillee, le seigneur

de Beaufort, le seigneur du Chastellier, le seigneur de Lesuen, le seigneur du Luch, le seigneur du Chastel, le seigneur de Kaermanoan, le seigneur de Odon, le seigneur de Martigny Ferchault, le seigneur de Monbourtier, le seigneur du Brais de la Mote & plusieurs autres nobles hommes, seigneurs des anciennes cheualeries & nobles maisons de Bretagne furent appelez, dont les vngz furent presens & les autres non; furent semblablement appelez les chappitres & aussi les bourgeois & habitans des citez & bonnes villes de Bretagne, cest assauoir de Rennes, de Dol, de Nantes, de Saint Mallo, de Cornouaille, de Vennes, de Saint Briuc, de Leon, de Treguer, de Guerrande, de Redon, de Ploermel, de Foulgeres, de Dinan, de Quemperle, de Henbont, de Morlaix & de Guingamp, lesquelz se comparurent tous par procureurs.

Ce parlement fut par trois iours entiers tout ainsi que cy deuant auez oy reciter. Et puis apres se retirerent ces seigneurs chascun en son party comme bon leur sembla.

En ce parlement fut entre les autres establissements ordonne que gens roturiers de simple estat & basse condicion ne doiuent possider, acquerir ne hereditairement tenir terres feodales, iuridicions ne fiefz nobles subgetz aux armes, pource que lesditz gens roturiers ne se y fauroient adresser ne les exercer, mesmement quand ilz vsent & viuent de bourse commune & marchande praticiens ou autres qui ne sont de noble generation, ausquelz est deffendu acquerir, retirer ne auoir en Bretagne heritaiges ou fiefz nobles sans le congie du duc sur paine diceulx heritaiges perdre au profit du duc, & seront audit cas les contraz nulz & les contrahans condamnez en grosses amendes arbitraires.

**C** Comment les Francs a layde des Bretons desconfirent a Castillon les Angloys, dont le seigneur de Talbot estoit capitaine, & du traicte de mariage de monseigneur de Rohan & de la fille puisnee du feu duc Francs.

**D**EUX ans ou enuiron apres la conqueste de Normandie, les Angloys recouurerent la ville de Bordeaulx par le moyen daucuns seigneurs de Gascongne, & y descendi le sire de Talbot avecques moult grant nombre de gens de guerre anglois. Le roy de France pour les en mettre hors rassembla ses gens darmes & enuoya par deuers le duc Pierre de Bretagne luy prier quil luy voulsist enuoyer deux cens hommes darmes. Le duc qui menasse estoit des Anglois pour ce que son frere le feu duc Francois leur auoit mene dure guerre en Normandie n'ouoit se deffaire de ses gens darmes, toutefois il vouloit bien subuenir au roy. A celle cause luy enuoya cent lances bien fournies dont il feist chef & conducteur monseigneur le conte d'Estampes son cousin germain, & pour ce quil estoit lors ieune seigneur eage de xvi a xvii ans, il luy bailla le seigneur de Montauban & le seigneur de la Hunauldaye pour le guider & conduire. Si partirent ces cent lances de Bretagne & tirerent droit a Bordeaulx, mais le roy de France manda aller par deuers luy le conte d'Estampes pour ce quil ne le vouloit pas aduenturer a la fortune de la guerre pour son ieune aage. Les cent lances de Bretagne se ioignirent a l'armee du roy de France & assemblement allerent assieger la place de Castillon que les Anglois tenoient, & en estoit chef le seigneur de Talbot, lequel voulut empescher les Francois de asseoir leur siege a vne barriere. Y eut moult de beaulx faiz darmes exploictes, tant d'une part que d'autre : finalement les Francois a laide du secours du duc de Bretagne deffirent les Anglois, & y fut Talbot tue & plusieurs autres Anglois, le parfus se mist en fuite sauf quelque nombre d'Anglois qui furent prins & retenus prisonniers.

Le x<sup>e</sup> iour de feurier lan mil cccc liiii, entre le duc Pierre, la duchesse Ysabeau, Alain, viconte de Rohan & autres parans, fut accorde le mariage de dame Marie de Bretagne, fille puisnee du feu duc Francois, & de Jehan monseigneur de Rohan viconte de Leon, lors aage de deux ans ou enuiron, & renonca ladicte dame Marie a tout le droit qui luy appartenoit a la

succession de ses pere & mere moienant cent mil escuz qui furent promis par le duc, dont quatre vingt dix mil seroient conuertiz en iiii mil liures de rente sur la seigneurie de la Chese pour estre propre heritaige de ladicte dame. Et le viii<sup>e</sup> iour de mars mil cccc lxi, lesdictz futurs conioinctz furent par messire Jehan Pregent euesque de Saint Brieuc, espousez en la chapelle de la Chese, presens le duc Francois, le viconte de Rohan, le conte de Harcourt, Tanguy du Chastel grant maistre doctel de Bretagne, capitaine de Nantes & autres nobles personnaiges.

**C** Comment le duc Pierre de Bretagne traicta le mariage de monseigneur Francois de Bretagne conte d'Estampes et de madame Marguerite de Bretagne aisnee fille du duc Francois & niepce du dit duc Pierre.

**L**E duc Pierre de Bretagne fist assigner son parlement en la ville de Vennes, au moys de may lan mil cccclv, auquel parlement il fist assembler tous les prelatz, barons & autres seigneurs & grans personnaiges des estatz de sa duchie. En ce parlement furent faictes aucunes constitutions & ordonnances touchant le fait des aduocaz & procureurs des barres & iuridicions de Bretagne de leur creacion & institution. Et comment ilz se doiuent traicter & gouverner au fait des plaidoiries des causes, & comment ilz doiuent former & dresser les proces chascun en son regart. Et aussi fist le duc mettre en deliberation en plain parlement le testament du feu duc Francois son frere, par lequel entre autres choses il auoit ordonne que lon feist le mariage de la fille aisnee madame Marguerite & de son cousin monseigneur d'Estampes. Et furent sommairement interrogez par serment en plaine court publicquement aucuns anciens prelatz, barons, gens de conseil & autres nobles hommes qui la estoient si ilz auoient veu oy dire ne leu croniques, fondacions dabbayes & autres anciennes chartres que fille ait autrefois succede par droit hereditaire comme duchesse a la

## Le quatriesme

duche de Bretagne plusieurs desquelz tesmoi-  
gnerent que veritablement ilz auoient veu &  
leu en aucuns liures, chartres & autres lettres,  
aufquelles on adioustoit foy que plusieurs filles  
ont este duchesses de Bretagne en diuers  
temps, & paisiblement ont tenu & posside &  
leurs mariz a cause delles, la deffusdicte duche  
sans contredit ou empeschement quelconque  
par ce quil ny auoit aucun hoir masle viuant de  
la ligne des ducs de Bretagne, mais ou les  
ducs trespassez ont eu oncles paternelz, freres  
ou neueuz qui feussent enfans de freres ou  
cousins germains, yffuz de leurs oncles pater-  
nelz, iamais nont ouy dire ne leu que en ce  
cas les filles diceulx ducs aient succede a la  
duche ne doiuent estre duchesses. Sur quoy fut  
publicquement dit & ordonne par loy, edit &  
constitution en confermant les anciennes cou-  
tumes de Bretagne quant a cest affaire que les  
femmes ne feroient doresnauant aucunement  
receues a succeder a la couronne duchalle de  
Bretagne ne a en estre dames & duchesses,  
pourueu quil y eust enfant masle yffu par maf-  
culine generation de duc de Bretagne. Et puis  
apres cest edit prononce fut aduise que lon  
pouruerroit a la ieune dame de curateur, pour  
plus seurement traicter le deffusdit mariage. Si  
luy furent les viconte de Rohan & conte de  
Lual ordonnez & baillez a curateurs, & pour  
le bien & aduancement de ce mariage fut or-  
donne par deliberation des estatz que on don-  
neroit cent mil escuz a monseigneur le conte  
dEstampes pour le mariage de luy & de madame  
Marguerite, lesquelz furent fiancez solemnelle-  
ment par messire Raoul de la Mouffaye euesque  
de Dol. Et ce fait le parlement & les estatz prin-  
drent fin, & sen retournerent tous ces seigneurs  
ou bon leur sembla, & depuis furent les noces  
faictes de ces deux ieunes seigneur & dame.

### De la canonisation du corps de monseigneur Sainct Vincent a Venues.



AN mil CCCCLvi, le v<sup>e</sup> iour de Iung  
heure de mynuit au matin diceluy  
iour fut leue de terre & solemnelle-  
ment canonise le corps de monsei-

gneur Sainct Vincent confesseur, par messire  
Alain de Coitiny cardinal de leglise de Romme  
& legat du siege apostolicque. Et furent presens  
a ce beau seruice le duc Pierre de Bretagne,  
auecques les barons & notables seigneurs du  
pays, & y assisterent quatre archeuesques,  
x euesques & plusieurs abbez & autres seigneurs  
deglise.

Le premier iour de Mars an lvi, le duc  
Pierre crea & erigea de nouveau par grande  
deliberation en la ville de Rennes, vng siege &  
iuridicion de preuoste, oultre les autres sieges  
& iuridicions ordinaires anciennement exercees  
qui demeurent en leur estat. Par deuant le pre-  
uost seront intentees, poursuyuies & terminees  
toutes causes mobilieres dont la court ordinaire  
de Rennes peult congnoistre en chef en icelle  
chastellenie de Rennes; & aussi de toutes causes  
criminelles qui sortiront des causes mobilieres  
ia intentees par ladicte preuoste, lesquelles  
poursuyura le procureur du duc a Rennes par  
deuant ledit preuost, que le duc cree iuge or-  
dinaire en icelles causes & tiendra sa court or-  
dinairement sans cesser pour plez generaulx a  
tel iour que bon semblera audit preuost, du-  
quel les appeaulx des sentences interlocutoires  
iront aux nouveaulx iours & plez sur sepmaine  
de Rennes. Et des sentences diffinitives aux  
plez generaulx par rendue aux plez sur sep-  
maine, & par appel desditz plez sur sepmaine  
audit plez generaulx & de la en parlement, &  
seront a ladicte preuoste creez quatre sergens  
tant seulement qui nauront puissance daiourner  
si non en ladicte preuoste & non ailleurs.

### De la mort du duc Pierre de Bre- tagne.



U moys d'Aouust lan mil CCCCLvii, le  
duc Pierre de Bretagne deuint en la  
ville de Nantes malade tres griefue-  
ment. Monseigneur le conestable  
son oncle, qui lors estoit a Paris, en fut aduerti,  
lequel sen partit en diligence & tira a Partenay  
ou madame sa femme estoit, laquelle auoit este  
semblablement malade, mais elle estoit ia guerie,  
ilz auoient souuent nouvelles que le duc estoit

en tres mauuaise disposition & que de iour en iour luy empiroit. Si sen partirent de Partenay monseigneur le conestable & sa femme & tirerent a Nantes ou ilz arriuerent le xvi<sup>e</sup> iour de septembre. Et le xxii<sup>e</sup> iour diceluy moys trespassa le duc sans delaisser aucuns enfans de luy procrees. Tantost apres lon disposa de ses funerailles moult honorablement & fut enterre au cueur de leglise collegial de Nostre Dame de Nantes.

Celuy duc Pierre auoit regne en grant gloire & felicite, & estoit tout curieux de exfaulcer le fait de la iustice de sa duche : il auoit eu es-

pouse vne notable princesse & dame, nommee Francoise, qui estoit fille de Loys viconte de Thouars & de dame Marie de Rieux sa femme. Laquelle duchesse vesquist longuement apres le trespas de son seigneur, & fut tant plaine de deuocion que elle se rendit religieuse en vng couuent, lequel elle auoit fonde aux Coez sur la riuere de Loire, au dessoubz de Nantes, & la trespassa la dicte dame.

**C** Du couronnement du duc Artur de Bretaigne & de son entree a Rennes.



**M**ESSIRE Artur de Bretaigne frere du duc Jehan derrenier de ce nom & oncle du feu duc Pierre, comme le prochain hoir masle diceluy duc Pierre, fist la feste de Toussains lan mil cccclvii son entree duchalle en la ville de Rennes comme ses predecesseurs ducz auoient fait. Et furent a ceste sollennelle feste le conte dEstampes son neueu, le viconte de Rohan, le conte de Laual, & les autres barons & nobles seigneurs de Bretaigne; y fut aussi monseigneur Iacques de Saint Paul frere de la duchesse, femme diceluy duc Artur; Jehan de Lorraine conte de Harcourt & autres. Tantost apres ce partit le duc de Rennes

& alla faire son entree en la ville de Nantes, ou il fut honorablement recueilly par les habitans de la ville & de la conte, & y resida iusques a la feste des Roys. Enuiron celuy temps le roy de France Charles vii enuoya par deuers luy le prier quil se voulfist rendre a Tours pour vne moult honorable ambassade que le roy de Hongrie enuoioit en France par deuers le roy, pour le mariage de sa fille dame Magdelaine de France & diceluy roy de Hongrie. Si se disposa le duc de voiajer, & pour le acompaigner en le celuy voyage, manda venir par deuers luy les barons & autres nobles seigneurs de sa duche. Quant les barons & grans personnaiges

## Le quatriesme

de Bretagne furent venuz a Nantes deuers le duc, ilz luy remonstrerent comment les predecesseurs roys & ducz de Bretagne ses predecesseurs auoient tous lors entretenu le pays en excellence de noblesse sans participation estrange dignite & a ce quil luy pleust de son temps les entretenir, ainsi ilz luy supplierent de rendre loffic & lespee de conestable au roy de France, car la dignite du duc de Bretagne ne pourroit bonnement souffrir celle charge. Le duc leur respondit qu'il nentendoit pour loffic de conestable quil tenoit augmenter la dignite & la noblesse du duc de Bretagne, mais il auoit le royaume de France tant a cueur quil vouloit bien decorer & augmenter lexcellence de sa noblesse, en occupant par luy comme duc de Bretagne loffic de conestable de France, lequel pour le bien du royaume pourroit bien engager la tierce partie diceluy pour sa rancon, sil estoit prisonnier de guerre, par quoy les pria le duc quilz voulsissent ce propos mettre hors de leurs entendement, car de loffic de conestable il nentendoit aucunement diminuer la noblesse du duc de Bretagne, mais la desiroit entretenir aussi bien que iamais fist duc. Ce propos fini, le duc se mist en voie avecques son train pour venir a Tours deuers le roy, & en chemin fut aduertit de la mort du roy de Hongrie, dont ses ambassadeurs estans a Tours auoient eu nouvelles certaines, & que ia sestoient departiz de Tours pour eulx retourner en Hongrie. Mais pour tout cela ne laissa pas le duc a tirer deuers le roy, ainsi que entrepris auoit; & quant il fut a Tours il fut moult honorablement recueilly du roy & des seigneurs de sa court, & y entra comme duc de Bretagne & conestable de France. Il fut en la court du roy a Tours par le temps dung moys entier, & la fut festoye & chery en tout ce quil fut possible; mais on luy cuida brasser a la fin vng tour de queue, car apres quil eust dispose de son parterment de Tours & quil fut prest a desloger pour retourner en Bretagne, en prenant conge du roy, & luy fut dit quil estoit bien requis & conuenable quil rendit au roy le deuoir quil luy estoit tenu faire pour raison de sa duchie de Bretagne, ce

que le duc Artur consentit bien volontiers, offrit au roy luy faire la submission a cause de sa duchie en la propre maniere que ses predecesseurs ducs de Bretagne auoient acoustume faire, mais le roy len refusa, disant que il ne le recepuroit aucunement sil ne luy faisoit hommaige lyge & serment de fidelite, comme a son souuerain & naturel seigneur en toutes choses.

Le duc qui se veoit prest a surprandre, considerant quil nestoit pas le plus fort, respondit au roy : Monseigneur, ce que vous me demandez ne vous pourroie pour ceste fois bonnement accorder, veu que mes predecesseurs ne le firent iamais a vous ne es vostres si les suppostz des trois estatz de ma duchie ne le consentoient bien volontiers, moy retourne les feray assembler & leur mettray ceste matiere en termes, & au prochain voiage vous fera ytout & tel deuoir que il fera aduise, tellement que au plaisir de Dieu vous aurez matiere den estre contant. Et sur ces termes print le duc congie du roy & de sa court & sen retourna en Bretagne tout delibere de iamais ne retourner deuers le roy que tout premierement cest article ne feust acorde par entre eulx.

### Comment le duc Artur de Bretagne fut a Vendosme pour le proces de son nepueu le duc d'Alencon.

**C**ERTAIN temps apres que le duc Artur fut retourne en Bretagne, il feut aduertit que le duc d'Alencon qui son nepueu estoit filz de sa seur, estoit en France detenu prisonnier, & que pour le condamner a mort comme criminel de lese maieste, le roy de France Charles vii & les pers de France estoient assemblez en la ville de Vendosme & y auoit on fait amener iceluy duc d'Alencon. Aucuns de ses amis enuoierent en diligence par deuers le duc de Bretagne luy supplier qui se voulsist trouuer a ce proces pour la vie fauluer a son dessusdict nepueu, & fut es mois de septembre & octobre lan mil quatre cens cinquante huit. Le duc a qui le fait desplaisoit grandement se trouua a

Vendosme en celuy temps tellement acompaigne de gens de conseil & aussi de nobles hommes de son pays que lon eust enuiz entrepris chose qui fust a son desplaisir & singulierement pour la bonne iustice dont il estoit plain, il auoit lors avecques luy ses gens de conseil & entre autres son chancelier qui maistre Jehan du Celier auoit nom, lequel estoit homme discret & prudent autant que homme de lettre qui fust en l'assemblee. Finablement le duc de Bre-  
taigne fist tant iacoit ce que le duc d'Alencon eust este declare par arrest des pers de France, coupable de lesfemaïeste pour quelque entre-  
prise par luy faicte contre le royaulme par entendement quil auoit aux Angloys, ainsi que on luy mettoit sus & quil confessa, que veritablement lexecution dudit arrest qui estoit estre decapite fut a sa supplication du duc Artur remise soubz la grace & misericorde du roy, & par ce moyen luy fut la vie sauuee.

**P**UIS apres le duc de Bretagne Artur offrit au roy luy faire & rendre la redeuance en quoy il estoit tenu pour raison de sa duché. Le chancelier de France & autres gens du conseil du roy tendoient a ce quil feist hommaige lyge, & luy dist le chancelier de France : Monseigneur le duc, vous estes assez certifie comment vous estes vassal du roy & que tant a cause de vostre duchie de Bretagne comme de vostre conte de Montfort que vous tenez de luy a foy & hommaige, vous estes son homme & son subgect, & pour raison de ce luy deuez foy & hommaige lyge. Aucuns de vos predecesseurs ont differe a luy faire & tendre celle redeuance, mais a la fin mal leur en est prins, vous scauez comment il en aduint au duc Jehan vostre pere, lequel pour ses rebellions & desobeïssances fut mis a la raison comme il appert par le traicte qui fut faict au moy d'April lan mil trois cens quatre vings, entre les seigneurs de Coucy, de Rayneual & autres procureurs de feu le roy Charles vi, dernier trespasse, & les seigneurs de Lual, de Montafillant, d'Acerac & autres procureurs diceluy duc vostre pere. Il na pas long temps que vous estant a Tours alors quil fut question de ceste

matiere, requistes au roy auoir temps de parler aux barons & a autres gens des estatz de vostre duchie & promistes que au prochain voyage que feriez deuers le roy vous acquitteriez enuers luy touchant cest affaire, tellement quil seroit contant de vous. Il na pas voulu par cy deuant courir suz a vostre frere le duc Jehan, dernier trespasse, ne a ses deux filz, qui lun apres lautre ont este ducs de Bretagne, mais les a gracieusement receuz a cest hommaige faire en termes generaulx, cest assauoir tout ainsi que les autres ducs de Bretagne leurs deuanciers ont fait sans autrement exprimer ne declarer la maniere & nature de lhommaige. Or veult le roy que vous mettez enuers luy en vostre deuoir ainsi que tenu y estes & que faire le deuez.

Le chancelier de Bretagne respondit pour le duc, en parlant a la personne du roy Charles, en ceste maniere : Le duc mon fouuerain seigneur qui cy est present, ne veult pas nyer que pour raison de sa conte de Montfort quil tient de vous a foy & hommaige lige il ne soit tenu a vous faire ladicte foy & hommaige tout ainsi que son fief le requiert, & est tout prest, sire, de ce faire quand il vous plaira. Mais au regard de sa duchie de Bretagne il nest tenu de vous faire autre redeuance si non hommaige simple sans ligence quelconques, car par la raison commune vng vassal nest cense ne repute homme lige de son seigneur si non pour raison de lheritaige que iceluy son seigneur luy a de sa grace octroye & impartie pour feodale-  
ment le tenir de luy en ligence sans diceluy heritaige exclurre, reseruer ne excepter aucune chose hors de lhommaige, en ce faisant deuient le vassal homme lige de son seigneur auquel par ce moyen sont subgettes deux choses. Lune & la premiere cest la personne du vassal qui est a ceste loy liee, car homme lige selon la vraye interpretation de ligence est en quasi seruitude comme lye ou subgect a obseruer legalite. Lautre chose qui est soumis au seigneur cest lheritaige que liberalement il a otroye au vassal, voire quant a la seigneurie vtile seulement, car le seigneur feodal retient a luy la propriete & directe seigneurie de lheri-

## Le quatriesme

taige quil a octroye a son vassal dont il est homme lyge, & nen a le vassal que lusuffruit & vville seigneurie.

Or, sire, le propos de monseigneur le chancelier de France qui dit que le duc vous doit pour raison de sa duche de Bretaigne foy & hommaige lyge, ne se pourroit bonnement accorder a ceste interpretation, veuz les tiltres & anciennes chartres qui de ceste matiere furent premierement accordees & composees, qui ne sont de plus ancien temps que de lan de grace mil trois cens xxxi, car par auant celuy temps iamais il nauoit este question de ceste matiere, comme il appert par la chartre originalle qui porte ces motz : *quamuis idem dux nec sui predecessores non consueuerunt vnquam tale homagium seu submissionem facere.* La diction *quamuis* est diction aduersatiue qui donne a entendre que iamais le cas nestoit adueni, car la verite est telle que iamais roys de France ne donnerent & octroierent la duche de Bretaigne, aussi ce ne fut oncques leur heritaige, comme la chose est toute notoire.

Et a ce propos peult on dire & soubstenir que vng roy ou prince qui ne recongnoist autre seigneur temporel, ne peult submettre son royaulme ou sa principaute soubz la lygence & seruitude daultroy prince, & aussi a este le cas pratique pour le roy Iacques de Maiorque soubzmist son royaulme soubz la ligence du roy d Arragon, quelle submission fut declaree nulle; toutefois le duc ne veust pas si auant entrer dans la discussion de ceste question, il se veult bien renger a la loy que ses predecesseurs ont fermee tenue & garde.

Quant au second point, sont excluz, reseruez & exceptez de lommaige ou submission dont ladicte chartre fait mencion, plusieurs droiz royaulx, superioritez & prerogatiues que le duc a en sa duche dont il est souuerain seigneur, car il nen recongnoist aucun seigneur temporelz, ces droiz de souuerainete icy nappartiennent pas a luy ne a ses predecesseurs de huy ne dhier, mais moult par auant que iamais y ait eu es Gaules roy francois exempt des subsides romaines; pour lesquelles causes, Sire, vous ne saurez au pays de Bretaigne ne en la personne

du duc pour raison de sa duche reclamer droit ne ligence pretendre; aussi ni auez vous quelconque seigneurie soit directe ou vville, parquoy faut-il de necessite inferer que lommaige que le duc vous doit a cause de sa duche est seulement hommaige simple sans lygence. Et ne sera point trouue la reuerance de vostre roialle maieste faulue, que les ducs de Bretaigne vous aient iamais fait pour leur duche autre redevance, ne a voz predecesseurs aucune mention de hommaige lyge.

Et pour satisfaire a ce que monseigneur le chancelier de France a icy dit que par le traicte de lan mil ccclxxx, il appert que le duc Iehan le conquereur fut bien mis a la raison par le roy vostre pere.

Sire, le duc Iehan le conquereur fut contrainct pour le recouement & conseruation de sa duche que les roys de France lors regnans luy voulurent a force darmes oster en faueur de Charles de Bloys, de foy ayder des Angloys iacoit ce quilz soient anciens ennemys de France, les feist descendre en sa duche pour le secourir, dont tresbien luy est prins, car par leur aide & moyen a recouert son heritaige de Bretaigne. Et si en vng tel affaire il neust sceu trouuer secours si non celuy des Sarrasins & infideles, permis luy estoit selon les droiz diuins & humains les appeller & prandre leur alliance, deux choses considerees, lune puis que a bon & iuste tiltre il querelloit son heritaige, lautre pour ce quil ne pouoit recouurer secours autre part, car necessite nous exempte de toutes les reigles communes; il est escript, Sire, au xxiiii<sup>e</sup> chappitre des Actes des Apostres, que sainct Pol pour son ayde procura laliance des pharisees, qui nestoient de sa loy ne de sa secte, & requist auoir de leurs cheualiers pour preseruer sa personne. Les Machabees qui furent saintes gens se alierent aux Rommains, qui payens estoient & gens de secte autant reprouuee que les Sarrasins sont des crestiens. Abraham se confedera aux Scolles & sen seruit en ses guerres, & si nestoient de sa secte ne de sa loy comme nous auons au xiii<sup>e</sup> liure de Genese. Puis doncques quil est permis aux princes crestiens faisant iuste guerre eulx allier en cas de

necessite des infidelles, par plus forte raison estoit il permis au duc Iehan le conquereur foy allier des Angloys qui sont crestiens & de la même secte que nous tenons.

Au regart de ce que fut appoincte par le traicte deffusdit de lan CCCLXXX, que ledit duc Iehan le conquereur requerroit pardon au roy de ce quil auoit fait descendre en la duchie de Bretagne les Anglois, dont les pays du roy auoient este greuez, le duc comme conte de Montfort le voulut bien iusques a ce point tant humilier enuers le roy & luy promectre quil luy seroit bon & loyal subgect, car en cela il estoit son homme lyge. Aussi pour ce que en le faisant il acquerroit lialiance du roy, qui promectoit plus ne luy faire guerre en ses pays, par quoy nauroit plus le duc mestier de retirer les Anglois a luy ne de sen ayder, & par ce moien cesseroient les inhumanitez qui es pays de France & de Bretagne estoient peptrees par la guerre, dont le duc auoit telle compassion, quil nestoit chose quil ne feist pour auoir paix, a laquelle il ne pouoit autrement paruenir ne ataindre.

A ceste cause fut ce traicte de paix entrepris & accorde, mais comme duc de Bretagne il ny seroit iusques la tenu selon raison, comme bien appert par ledit traicte dappoinctement vers le commencement diceluy, qui contient que le duc de Bretagne se aliera pour luy & son pays de Bretagne au roy & au royaume de France, & le roy pour luy & son royaume se aliera au duc de Bretagne & a ses pays, qui est bien pour monstrier que le duc de Bretagne pour raison de sa duchie nest pas homme lyge du roy, car sil estoit son homme lige, le roy ne prandroit pas a luy & a ses pays aliance de paix ne le duc au roy ne a ses pays, il y auoit contrariete en lobgect. Aussi vers la fin diceluy traicte sont escriptz ces mots : Et ne fera fait aucun preiudice pour le temps a venir par ce present traicte aux droiz roiaux, superioritez & prerogatiues des ducs & subgetz de Bretagne. Mais demourront en lestat quilz estoient par auant iceluy traicte. Lesquelles parolles donnent bien a entendre que lhumilite a laquelle il fut dit que le duc se rengeroit ne

fut pas comme duc, mais comme conte de Montfort.

Bien y a plus, car sur les remonstrances que feu prince, de louable memoire, le duc Iehan iii<sup>e</sup> de ce nom duc de Bretagne & viconte de Limoges feist au roy de France Loys, filz ainsne du feu roy Phelippes le Bel, duncunnes entreprinsees que la court de parlement de Paris & aucuns autres baillifz, seneschaux, preuostz, huissiers & sergens de France, faisoient chascun iour ou sefforcoient faire en Bretagne contre les droiz & prerogatiues du pays & des subgectz diceluy en eulx efforcant dy exploicter & executer par eulx mesmes leurs appoinctemens, sentences & lettres royaulx de la chancellerie de France & de plusieurs tors & griefs, ledit Loys Hutin roy qui fut lun des plus grans iusticiers qui iamais fut en France, car il mist toutes les iustices, parlement de Paris & de Thoulouse & leschiquier de Normandie avec les seneschaulces & bailliages en lordre auquel ilz sont a present declaire lesdictes execucions & exploiz nulles & de nul effect, & deffendit de plus y retourner ne contre leditz droictz royaulx & prerogatiues des duc & duchie de Bretagne ne de ses subgectz aucune chose entreprendre, comme il appert par les lettres qui en forme de chartres furent de ce faictes & octroyees a Saint Germain en Laye au mois de mars lan mil troys cens & quinze. Lesquelles declairation & defences furent lan ensuiuant apres le trespas dudit roy Loys Hutin confermees par le roy de France Phelippe le Long, frere dudit roy Loys Hutin, comme il appert par ses lettres donnees a Paris au moys de mars lan mil ccc & xvi. Et depuis le roy de France Phelippe de Valoys par ses lettres donnees a Paris lan de grace mil trois cens vingt & huit au moys de Iuing, & le roy Iehan filz diceluy Phelippe de Valoys, par ses lettres donnees a Paris au moys de Iuillet lan de grace mil trois cens cinquante deulx, furent les deffusdictes defences & declaracions par leurs chartres autentiques confermees, & vous, Sire, auez, vous estant aux Montils, descerne au feu duc Francois de Bretagne vostre nepueu, chartres de pareilles declaracions & deffenses,

## Le quatriefme

datees de lan mil quatre cens quarantesept au  
moys de feuurier.

Par lesquelz moyens il appert clerement que  
le duc, a cause de sa duchie de Bretagne, ne  
vous doit redeuance faire si non simple submis-  
sion, & est seulement pour raison du ressort par  
appel en vostre parlement de son reffus de ad-  
ministrer iceluy duc iustice a ses subgetz ou  
des appeaulx que lesditz subgetz interiecteront  
de son parlement de Bretagne a vostre parle-  
ment de France. Et a autre deuoir ne vous est  
tenu par droit ne tiltre, & aussi nen avez eu  
ne vos predecesseurs autre possession quel-  
conque.

**Q**E propos fut longuement debatu dune part  
& dautre. Finablement fut appoincte que  
le duc de Bretagne, pour raison de sa conte  
de Montfort, feroit au roy homaige lyge, ce  
quil feist lors. Puis apres, se leua le duc sur  
bout, recignist son espee, & sur piez feist au roy  
la submission ou hommaige a cause de sa  
duchie tout ainsi que ses predecesseurs ducs de  
Bretagne ont acoustume faire aux roys de  
France depuis le duc Pierre Mauclerc, comme  
cy deuant auez peu veoir.

Après que ces choses furent exploictées &  
faictes, le duc print congie du roy & sen par-  
tirent de Vendosme luy, le duc dOrleans, &  
tyrerent a Fronteuraux veoir leur niepce lab-  
besse de Fronteuraux, fille de monseigneur Ri-  
chard de Bretagne. Et quant ilz y eurent reside  
quelque temps, ilz prindrent congie lun de  
lautre, & se retourna le duc en Bretagne,  
tout mal dispose, car des Vendosme il se sentoit  
tresmal. Et pour ce que en celle court il auoit  
quelque malveillans lon poursuiua quon luy  
auoit fait menge quelque mauuais morceau.

Bientost apres que le duc fut retourne a  
Nantes, suruint vng tresaspre different entre  
luy & leuesque de Nantes qui messire Guil-  
laume de Malestroit auoit nom, pour les droitz  
que leuesque disoit auoir en la cite de Nantes.  
Et fut ceste question cause dun tresgrant mal.  
Toutefois fut ce different long temps depuis,  
cest assauoir du temps du duc Francois dernier  
trespasse, & de messire Pierre du Chaffault,

ueuesque de Nantes, homme de treffaincte vie,  
appoincte & accorde par moiennant la grace  
de Dieu comme ie reciteray cy apres.

Le duc Artur, qui comme dit est deuant  
estoit malade, fut contrainct de garder la  
chambre depuis la feste de la Conception  
Nostre Dame iusques au iour de Nouel, &  
congnoissant sa fin approcher, il disposa moult  
prudemment de ses affaires tant spirituelles  
que temporelles; il ouyt tout le seruice de la  
nuyt & du iour de Nouel, feist ses ordonnances  
& receut les sacremens de penitence, de lautel  
& dextreme vnction. Et le iour sainct Estienne,  
le lendemain de Nouel, enuiron six heures  
apres mydi, rendit lesprit a Dieu lan mil  
cccclviii. Puis apres furent faictes ces obseques  
& funerailles en tel honneur qui luy appar-  
tenoit, & fut le corps de luy inhumé en la  
chappelle qui est dehors la ville de Nantes,  
tyrant a Sainct Donatian, laquelle auoit fait  
edifier le duc Iehan son frere, & y auoit le  
duc Artur fonde vng couuent de chartreux.

**C** Comment Francois de Bretagne  
nepueu du duc Artur dernier trespasse  
fist a Rennes son entree comme duc de  
Bretagne.

**L**E bon duc Artur conneftable de  
France ne laissa point denfans; a  
ceste cause luy succeda a ses sei-  
gneuries monseigneur Francois de  
Bretagne, conte dEstampes, filz de feu mon-  
seigneur Richart de Bretagne, qui frere estoit  
diceluy Artur. Et fut ledit duc Francois ii<sup>e</sup>  
de ce nom duc de Bretagne. Estoit son entree  
en sa ville de Rennes le samedy deuant la  
Chandeleur lan dessusdit mil quatre cens cin-  
quantehuit. Et furent presens le viconte de  
Rohan, le conte de Lual & les autres barons,  
banneretz & nobles seigneurs de Bretagne; y  
estoiert aussi Iacques monseigneur de Sainct  
Pol, Iehan monseigneur de Lorraine conte  
de Harecourt, & plusieurs autres nobles sei-  
gneurs du royaulme de France; il fist a son  
entree plusieurs cheualiers & fut la feste moult  
honorable. Bien tost apres que le duc Francois

eust fait son entree comme duc a Rennes, il se retira a Nantes, ou semblablement il fist honorable entree; & y estoient les seigneurs dessusdit. Il resida vng an ou deulx a Nantes avec la duchesse madame Marguerite de Bretaigne sa femme, faisant gaye & ioyeuse chere, car en celuy temps regnoit en France le roy Charles septiesme qui auoit deschasse tous ses aduersaires de son royaulme & nestoit lors question que de gaudir & faire chere lye.

**C** Daucuns officiers qui furent broillez enuers le duc a son nouuel aduenement.

**A**U nouuel aduenement de ce duc Francoys furent suspesconnez maistre Iehan du Celier, qui chancelier auoit este au temps du duc Artur, Iehan Ruffier seigneur du Brays, Jacques Bouchart, secretaire diceluy feu duc, & aucuns autres officiers dauoir quelque entendement a madame la princesse d'Orange seur diceluy duc Francois, & au seigneur d'Arguel, filz dicelle dame, disant quilz vouloient soubstenir que aucun droit leur appartenoit en la duche, autres causes que on leur mettoit sus, & furent les dessusdictz prins & emprisonnez par quelque temps; toutefois lon ne trouua contre eulx chose quelconque par quoy on les deust maltraicter: a ceste cause furent mis a plaine deliurance, sans desdictz cas auoir este trouuez aucunement chargez. Et fut loffice de chancelier baille a Guillaume Chauuin, homme de bonne & vertueuse prudence; depuis fut ledit maistre Iehan du Celier premier president de Bretaigne.

Lan mil quatre cens cinquante neuf, au moys d'Aoust, vindrent au duc Francoys nouvelles que le roy d'Escoffe, frere de la duchesse Ysabeau, vefue du feu duc Francois, auoit fait en son royaulme d'Escoffe fondre vne moult grosse bombarde, laquelle il voulut veoir essaier, & des ce que le feu fut mis en la pouldre dont elle estoit chargee, au descharger rompist lassuz dont elle estoit affutee, & dung esclat fut le roy d'Escoffe attainct si durement quil en mourut sur le champ, qui fut

tresgrant dommaige. Il laissa plusieurs enfans filz & filles.

**C** Des guerres qui furent lors en Angleterre.

**L**AN mil quatre cens soixante furent en Angleterre moult grandes diuisions, batailles, murtres, occisions & pilleries, les vngs contre les autres, pour les diuersitez & contans dentre Henry de Lencastre & Edouart. Les vngs, comme le duc de Soubresset & autres, tenoient le party de Henry qui estoit roy & auoit espouse la fille du roy de Cecille Rene duc d'Aniou. Les autres, comme le comte de Salbery, le conte de Vuaruich & autres, tenoient le party de Richart qui estoit duc d'Yorch & pretendoit estre roy. Et fut cause de ceste emocion vng cardinal de Romme que pape Pie lors regnant enuoya legat en Angleterre, auquel se ioygnist le cardinal d'Yorch. Ce legat prescha tellement la commune de Londres & autre peuple en faueur de Richart contre & au preiudice du roy Henry, que moult de seigneurs & autres nobles hommes & bourgeois & commun peuple qui est dassez ligere creance & facile a subuertir s'esleua contre le roi Henry, sa femme & le prince de Gualles leur filz. Et conduisoit ceste esmocion contre eulx le conte de Vuaruich. Les princes icy se misdrent aux champs en ordonnance de guerre se parqua le roy avecques plusieurs ducs & princes tenans son party, & en ce parc y auoit huyt entrees dont auoient la garde huyt barons du pays qui tous estoient traitres a leur roy, car des ce quilz virent marcher droit au parc le duc d'Yorch en bataille deuers ledit parc, ilz le laisserent entrer sans resistance avec le conte de Vuaruich & autres gens de guerre de son party, & fut le roy Henry prins & faisy au corps, & furent occis les princes & seigneurs qui avec luy estoient sauf le duc de Soubresset qui senfouyt, & puis apres Richart duc d'Yorch amena le roy Henry a Londres deuant la grosse tour en laquelle estoient les barons du pays, notables chevaliers, dont le

## Le quatriefme

conte d'Escales estoit lun, lesquelz de par le roy Henry gardoient la place; si fut contrainct le roy Henry de leur dire que sortissent dehors & qu'il y vouloit entrer. Ces cheualiers icy firent difficulte de ce faire, mais Richart & le conte de Vuaruich les prierent de ce faire en leur promectant foy de prince & de noblesse que en leurs personnes ne en leurs biens nauoient aucun ennuy ou destourbier, & leur iurerent assurance & loyaulte autant que possible estoit daffermer en tel cas & leur en baillerent lettres, & moyennant ce sortirent hors de la grosse tour ces quatre barons soubz la confidence desdictes promesses. Et quant ilz furent hors de la tour lun deulx, cest assauoir le conte d'Escales, fut sur le champ occis, & le lendemain les autres trois furent escartelez deuant ladicte tour, leurs lettres de seurte pendues a leur col, nonobstant les seurtez deffusdit, mais ce fut en ensuiuant la loyaulte d'Angleterre. Et pour ce si fye quil vouldra. Apres ceste expedition fut le roy Henry mis & enclos en ceste grosse tour & luy furent bonnes gardes ordonnees.

Certain temps depuis ceste desconfiture, comme quatre ou six moys apres, par lenhortement de la royne d'Angleterre, le duc de Soubresset, qui cousin estoit, assemblea bonne & grande compaignie des nobles parans de ceulx que Richard d'Yorch auoit occis a la prinse de Henry, & se trouuerent en moult grant nombre, marcherent en bataille, tenans les champs contre Richart duc d'Yorch, lequel ilz trouuerent aux champs es plaines Sainct Albons tresbien acompaigne, frapperent desluz moult asprement & y fut loccision moult grande, & des la premiere poincte le duc d'Yorch Richart fut rue ius & prins avec son second filz & le conte de Salbery. Tantost apres furent decapitez, & sur le bout dune lance furent porter la teste de Richart d'Yorch, couronnee dune couronne de feurre, en derision de ce quil se vouloit faire roy. Auecques luy furent occis cent ou six vingt barons, cheualiers, escuiers & gens de nom, & fut le roy Henry mis hors de la tour de Londres en sa royalle liberte. Le conte de Vuaruich eschapa de celle & sen fuyt

a Calaiz en vng petit batel a peu de gens, & fut ceste desconfiture le premier iour de janvier lan mil CCCCLX.

**T**ANTOST apres, enuiron la my carefme prochaine ensuiuant, Edouart conte de la Marche, qui filz ainsne estoit de Richart duc d'Yorch, feist moult grande assemblee de gens comme du conte de Vuaruich & autres barons & nobles seigneurs d'Angleterre, lesquelz se misdrent en armes aux champs suyans le duc Edouart & tenans sa querelle. Edouart tyra son armee droict a Yorch, ou estoient la royne d'Angleterre, le duc de Soubresset & leurs alliez en moult grande puissance, qui les attendoient en bataille. Finablement, ilz prindrent iour pour combatre au iour des pasques fleuries, vingthuitiesme iour de mars audit an mil quatre cens soixante. Le iour venu, les contes de la Marche & de Vuaruich enuoierent deuant leur auant garde que loncle du conte de Vuaruich menoit, & ceste auant garde trouua si dure rencontre que tous y demourerent, parce que trop festoient esloygnez de leur bataille, parquoy ne peurent estre secouruz.

Le duc de Soubresset cuidoit auoir tout gaigne, & se misdrent ses gens apres ceste defaite a la piller & a despougler & defarme les mors. Ces dures nouvelles vindrent au conte de la Marche Edouart & a son ost qui encores estoit entier, & ce commencerent fort ces gens a effroier, & comme desesperez marcherent auant tellement que les deulx batailles se ioignerent moult fierement lun a l'autre, & si horriblement donnerent de dedans chascune part que la meurtre y fut merueilleuse, car ilz combatirent par trois iours, tuans & affolans lun l'autre, & si horriblement que cest chose fort a estimer tellement quon neust sceu iuger a qui aduendroit la victoire; mais en la fin la desconfiture sur les gens de la royne & du duc de Soubresset, lesquelz furent presque tous occis & prins. En ceste cruelle bataille furent tuez trente mil hommes & plus, & moult dautres gens furent prins qui depuis furent decollez.

La royne, le duc de Soubresset & aucuns autres se sauluerent au mieulx quilz peurent &

se tyrerent en Escosse par deuers la royne d'Escosse qui fille estoit du duc de Gueldres.

Au moys de May lan mil CCCCLi vindrent ambassadeurs par deuers le roy de France, le patriarche d'Autioche, vng cheualier ambassadeur de l'empereur de Trapefonde, vng autre cheualier ambassadeur du roy de Perse, deulx autres cheualiers ambassadeurs, lun du roy de Georgye & lautre du roy de Mesopotamye; deulx autres ambassadeurs, lun du petit Turc & lautre du roy d'Armenie, & y estoit vng autre ambassadeur de prestre Iehan, qui estoit le plus grant clerck de tous, & fut celuy qui fist la proposition deuant le roy. Et auoient mis le temps de dixsept mois a venir de leurs parties par deuers le roy de France. Finablement, leur charge estoit de prier au roy quil se voulust mettre en armes pour leur aider a combattre contre le grant Turc, & ne vouloient point d'argent, mais seulement vng capitaine de France avec quelque peu de gens darmes francois, disans que lenseigne de France venue par dela espouuenteroit plus le Turc & toute son armee que ne feroient autres cent mil personnes. La responce fut que le Roy disposerait de ceste affaire, & dedans brief temps leur enuoieroit de ses gens darmes pour seruir a ceste conqueste. Si furent ces ambassadeurs festoiez, puis sen retournerent en leurs pays.

### ¶ Du trespas du roy de France Charles septiesme de ce nom.

**L**AN dessusdit mil CCCCLxi, le xxii<sup>e</sup> iour de Iuillet qui estoit le iour de la Magdalaine, trespassa au chasteau de Meun sur Yeure en Berry le roy de France Charles septiesme de ce nom. Le matin du iour quil trespassa il demanda aux religieux qui autour de sa personne estoient quel iour il estoit; lun deulx luy dist: Sire, il est le iour de la glorieuse Magdaleine. Ha, dist le roy, ie loue mon dieu & le remercie de ce quil luy plaist que le plus grant pecheur du monde meurt le iour de la pecheresse. Le beau pere en le confortant lui dist que ne festimast pas si grant pecheur que la misericorde de Dieu ne

feust plus grande & que fichast son esperance fermement au faulnement de son ame, quelque pechez que iamais il ait commis, puis quil en est desplaisant, sen est confesse & quil en a requis pardon a Dieu. Et aussi quil en a fait satisfaction & restitution en ce que possible luy a este. Ha, dit le roy, reuerent, iay eu en ce mortel siecle tant grant charge & si ay eu soubz moy tant de peuple a gouuerner dont ie suis subgect a randre compte quil est impossible que infiniz maulx ne se soient ensuiviz par faulte de ce que ie ny ay pas pourueu si soigneusement comme ie le deuoye faire, que pleust a Dieu que en ce monde ie neusse iamais une autre charge que dune douzaine de aigneaulx, ie nauoye a present daultre chose a rendre conte. Les beaulx peres le confortoient en ce quilz pouoient, mais tousiours doubtoit son salut pour les grans affaires dont en ce monde il auoit eu la ministration. Il estoit fort ymaginatif, & a bien grande difficulte le pouoit on diuertir d'un propos quant il lauoit fiche en son entendement, & dit on que cela luy hasta sa mort, car il se doubta que on le vouloit empoisonner, cela le mist en telle refuerie quil ne vouloit menger. Il y auoit lors moult grande discorde entre iceluy roy Charles & monseigneur le dauphin son filz qui a celuy temps estoit a la court du duc de Bourgoigne & ne se fust ose trouuer en ce royaulme. A ceste cause les officiers diceluy roy Charles qui autour de sa personne estoient congnaissans sa fin approcher, le delaissoient & habandonnoient lun apres lautre pour la crainte de mondit seigneur le dauphin. Toutefois le grant escuier de France, nomme Tanguy du Chastel, qui Breton estoit, ne le voulut delaisser, mais fist & feist faire tous les preparatifz, fraiz & mises de ses obseques ou il fraya de ses deniers cinquante mille liures tournois & sans crainte ne treueur dudit monseigneur le dauphin acompaigna le corps de son maistre iusques a ce quil le veit mettre en sepulture dedans lesglise & abbaye de saint Denis en France ou il fut mis le vii<sup>e</sup> iour d'Aoust prochain ensuiuant, & eut iceluy Tanguy la charge de toutes ces obseques. Et pour ce que les religieulx de saint Denis voulurent auoir le poille de riche

## Le quatriesme

drap dor sur lequel la protecture & figure du corps mort auoit este apportee, ce que ledit grant escuier voulut empescher disant, que cestoit a luy quil appartenoit & non a autre, aussi la verite estoit telle; toutefois le grant escuier pour appoincter ce different donna & quicta en faveur de fondit feu maistre auxditz religieulx tout le droit que il pretendoit audit drap dor & en oultre donna a chascun autel des chappelles de ladicte esglise & abbaye du drap de veloux a croix de satin blanc pour la decoration desditz autelz hault & bas le tout a ses despens. Et quant les obseques furent parfaictes, iceluy Tanguy du Chastel se retyra en Bretagne par deuers le duc Francois lors regnant, qui bien cherement le recueillit & luy donna l'office de grant maistre de Bretagne, le feist cappitaine de Nantes & le mariaige de luy a la seconde fille de Malestroit, dont le seigneur de Rieux auoit espouse laisnee. Enuix pouoit le nouveau roy Lois veoir ceulx qui auoient seruy son feu pere & qui de bon cueur lauoiert ayme. Toutefois huit ou dix ans apres ledit roy Lois aduertiy des mises dessusditz que Tanguy du Chastel auoit employez en ces obseques len appoincta, & pour satisfaccion & payement luy vendit le roy pour ladicte somme de cinquante mille francs les chastel & chastellenie de Chastillon sur Aindre & les terres de Pacy, de Ayfi & de Nonnencourt en Normandie; ledit du Chastel & ses hoirs en ont ioy durant la vie dudit roy Lois. Apres sa mort on leur osta lesdictes terres & seigneuries pour ce quelles estoient du domaine de France, & furent recompensez par autre voye. Vers la fin dudit moys d'Aoult lan soixante & vng le roy Lois fut couronne à Rains.

**A**u moys doctobre ensuiuant le roy de France Lois fist venir deuers luy au pays de Touraine ou il estoit, monseigneur Charles de France son frere, & en la ville de Montrichart sur le Cher luy bailla les pays & duche de Berry pour partie de son apanaige, puis sen partit le roy du pays de Touraine & sen alla en voiage a saint Saulueur de Redon, ou le duc de Bretagne le receut grandement & luy

fist lhommaige & submission que tenu estoit pour raison de sa duche & de sa conte de Montfort de chascune seigneurie comme ses predecesseurs ducs ont acoustume faire aux roys de France.

**L**AN mil cccc lxii, le roy de France Loys enuoya en Angleterre pour le secour de la royne d'Angleterre fille d'Aniou qui sa cousine germaine estoit, deux mil combatans soubz la conduite du seigneur de la Varenne grant seneschal de Normandie, lequel auoit eu moult grant gouuernement au temps du feu roy Charles, & disoient aucuns que pour le mettre a ladventure le roy Loys le enuoya la voluntiers. Neantmoins il se y porta si bien quil y conquist plusieurs places, attendant le duc de Sombresset qui luy auoit promis mener vne grosse armee d'Ecosse, a quoy il ne fournist, & ce pendant il trouua moyen de faire la paix enuers le roy Edouart qui luy rendit ses places, terres & seigneuries. Et pourtant se trouuerent les Francois assiegez par le conte de Vuaruich es places quilz auoient conquises, tellement quilz furent contrains de tout rendre & de retourner en France, leurs vies faulues seulement.

**L**AN mil cccc lxiii la duchesse madame Marguerite de Bretagne femme du duc Francois acoucha a Nantes dung filz dont furent faictes festes sollennelles qui ne durerent gueres, car lenfant trespassa bien tost apres.

**C**Dune ambassade que le roy de France enuoya en Bretagne par deuers le duc qui fut cause de lentreprinse du bien publicque.

**L**AN mil cccc lxiiii le roy Loys, qui estoit a Nogent le Roy, despescha vne ambassade pour venir deuers le duc Francois qui lors estoit a Nantes, & estoit le chancelier de France chef de ceste ambassade; quant ces ambassadeurs furent deuers le duc & quilz luy eurent fait la reuerence, le chancelier de France proposa la

charge que le roy leur auoit baillee, contenant cinq pointz. Lun estoit que le duc ne mettroit plus en ses tiltres ces motz : par la grace de Dieu. Lautre, quil ne feroit plus forger de monnoye dor en sa duchie sans le congie du roy. Item que le roy auroit faculte de mettre les tailles en Bretagne & icelles faire leuer & recueillir a son profit. Quartement, que tous les prelatz de Bretagne tiendroient leur temporel nuement & sans moyen, du roy en declarant ledit chancelier que si le duc ne vouloit octroyer & consentir tous ces pointz, le roy luy feroit incontinant guerre & descendroit le plus fort en Bretagne.

Le duc fut de ces nouuelles moult esbahy & non sans cause. Apres la proposition faicte, le chancelier de Bretagne & autres conseillers du duc se retirerent par deuers luy pour scauoir la responce quil plairoit au duc leur faire : finalement le chancelier de Bretagne dist aux ambassadeurs de France que le duc auoit bien oy & entendu ce quilz luy auoient remonstre, & que sur ce il auroit conseil pour donner telle responce quilz auroient matiere den estre contans. Et a tant se departirent les ambassadeurs de deuant le duc & se retirerent en leurs logis.

Le duc de Bretagne fut grandement effraye de ces nouuelles, car il congnoissoit la fureur du roy Loys, qui ia auoit les gens darmes de ses ordonnances sur les frontieres de Bretagne, & si nauoit le duc aucunes gens prestz pour y resister. Si tira le duc a part son grant maistre de Bretagne Tanguy du Chastel, & moult tendrement luy demanda conseil en cest affaire, car il se veoit entre deux extremitez, ou de perdre les droiz souuerains de sa principaulte de Bretagne ou de soustenir le faiz de la guerre, a laquelle il nauoit puissance de resister. Tanguy du Chastel, grant maistre, qui prudent & faige estoit, & qui auoit este nourry des sa ieunesse en la court du roy de France depuis le trespas de son oncle messire Tanguy du Chastel, preuost de Paris, remonstra au duc : Monseigneur, ie vous aduertiz que si vous voulez mettre la main a loeuure & estre secret sans reueler le conseil que ie vous donneray, vous resisterez par le moyen de voz amys, a toutes

les entreprinse du roy, & vous trouuez dune aliance si grant nombre de princes ensemble deuant Paris, que si le roy sy treuve il ny fera pas le plus fort. Comment, ce dist le duc, grant maistre, se pourra il faire, ie nay pas vng homme de guerre prest, & le roy a toutes ses ordonnances sur les frontieres de mon pays. Ha, dist le grant maistre, monseigneur, ie vous aduertiz que ce roy icy a mal contente, & chascun iour mal contante tous les princes de France & tous les anciens officiers, car il ne les appelle point ne se conseille point a eulx en la conduite des affaires du royaume, mais se conseille & gouerne par gens de menue & basse condicion, lesquelz il veult exaulser par sur les grans princes, & ny a celuy qui ne se doute puis quil vous vient affaillir le premier que a chascun deulx lung apres lautre donnera la venue, & sil vous plaist me prester loreille, ie vous enseigneray le moyen par lequel vous, monseigneur, les ducs de Bourgongne, de Bourbon & autres princes de France, vous vnirez & ioindrez ensemble pour resister aux entreprinse du roy & faire tant que les grans affaires de la chose publique du royaume ne feront sans eulx deliberez ne conclutes, & que ces petis compaignons a qui le roy se conseille feront mis arriere. Mais tout premierement me semble que par vostre bouche vous deuez faire a ces ambassadeurs la responce telle. Cest assauoir que laffaire dont le roy vous poursuit & quil veult que luy octroyez, ne se peult bonnement par vous consentir sans appeller les prelatz, barons, nobles hommes & autres gens des estatz de vostre duchie, car si sans eulx vous le consentiez, cela ne vaudroit & seroit le roy abuse; a ceste cause direz aux ambassadeurs que vous suppliez au roy quil veille superfeder a oyr vostre responce iusques a troys moys dici, & que ce pendant ferez assembler les estatz de vostre pays, leur ferez proposer la charge que le roy a donnee ausditz ambassadeurs, laquelle ilz ont deuant vous proposee, & induirez en ce que pourrez les gens des estatz a contenter le roy. Et puis apres vous enuoierez par deuers luy vne ambassade pour aduertir de ce qui aura este conclu.

## Le quatriesme

**L**E duc Francoys trouua cest expediant tres bon, & des le lendemain assembla son conseil en son chasteau de Nantes, & fist la venir les ambassadeurs de France ausquelz le duc de sa propre bouche fist la response tout ainsi que son grant maistre Tanguy du Chastel luy auoit conseille; ces ambassadeurs (la response oye) prindrent congie du duc, lequel leur fist des presans de grant pris; mais ilz ne les oferent accepter, sen retournerent a toute ceste response trescontans du duc, & trouuerent le roy en Touraine qui retournoit de Picardie ou il auoit este visiter les villes que lannee precedente il auoit rachatees, & de la estoit rapasse par Ponthieu & Normandie & venu en Touraine menant tousiours avecques luy monseigneur de Berry son frere.

**D**ES ce que les ambassadeurs de France furent partiz de Nantes, le duc mist en voye gens en messaiges par diuers lieux, les vngs par mer en Flandres deuers le duc de Bourgongne, les autres par terre deuers les ducs de Bourbon & de Nemours, le conte d'Armignac & autres princes. Ces messaigiers icy estoient desguifez; lung estoit vestu dabit de cordelier, lautre de carme, lautre de iacopin ou augustin, & si nestoient clerics ne lettrez, parquoy plus secrettement portoient lettres contenant lentreprinse du bien publicque pour empescher que le roy nasolast les princes du royaume, & ia commençoit contre le duc de Bretagne, car si ces seigneurs icy dung commun assentement ne pourueoient aux entreprinse du roy, les affaires de la chose publicque se trouueroit mal, & les affoleroit le roy lung apres lautre; ces messaigiers icy acomplirent si bien leur charge que bien tost tous les princes de France eurent ensemble entendement de pourueoir a laffaire, a ceste fin enuoierent leurs scellez les vngs aux autres, & se rendit des premiers en Bretagne le conte de Dunoy, auquel le duc fist tresgracieux recueil.

**C** Comment le duc de Berry frere du roy Loys se retira en Bretagne.



**Q**UANT le duc de Bretagne fut en feurete de son affaire, il expedia par laduis du conte de Dunoy & de son grant maistre dostel vne ambassade pour aller deuers le Roy de France qui lors estoit a Poitiers, & auoit le Roy avecques luy monseigneur de Berry son frere; ceste ambassade nauoit charge sinon de trouuer moyen enuers le Roy quil voulsist superceder encore iusques a autres troys moys & quil se rendroit deuers luy en personne & luy diroit ce que par les Estatz de son pays auroit este delibere. Ces ambassadeurs furent assez tost expediez par le Roy; ce pendant quilz furent par deuers luy, ilz practiquerent par le moyen dung cheualier gascon, nomme messire Odet Daidye, seigneur de Lescun, lequel estoit bien familier seruiteur dudit monseigneur de Berry, la venue occulte & secrette diceluy seigneur en Bretagne, car sur luy vouloient & tendoient les princes de ce royaume fonder leur entreprinse ia par entreulx accordee & fermee par scellez comme dit est. Le iour que les ambassadeurs de Bretagne furent expediez, qui fut en carefme lan mil cccc lxxiiii, partit le Roy de Poitiers pour aller en voiage a Nostre Dame du Pont en Lymosin; pendant ce voyage celuy seigneur de Lescun, soubz vmbre de mener monseigneur de Berry aux champs voller & chasser, len emmena & fist tirer en Bretagne apres les ambassadeurs en telle diligence quilz estoient ia dedans le pais de Bretagne deuant que le roy en fust aduert. Et apres celuy seigneur tirerent celle part aucuns autres personnages de nom. Le roy fut bien desplaisant de ce cas ainsi adueni, se doubta que de ceste entreprinse le duc de Bourbon estoit lun en hayne de ce quil lauait desappoincte, & fut aduert que les ducs de Bourgongne, de Bourbon, de Nemours & autres princes du royaume, qui se estoient retirez chascun en son pays, faisoient mettre leurs subgetz en armes de toutes pars, & tachoient a attirer a leur bende tous les autres seigneurs, barons, cappitaines & gens de guerre de France. A ceste cause, le roy manda & escriuit par toutes les bonnes villes de son royaume que feissent bon guet,

Monseigneur de Berry se retire en Bretagne.

La response faicte aux ambassadeurs du roy.

Messaigiers enuoyez par terre pour forger le bien publicque.

Dunoy se rend en Bretagne.

en les aduertissant & priant de luy estre bons & loyaulx, & fist faistr tous les heritaiges du conte de Dunoys qui ia estoit en Bretagne. Puis sen retourna le roy a Angers pour essayer si par douceur il pourroit retirer monseigneur de Berry son frere qui en Bretagne estoit, mais il ne peut, & fut acertene que le duc de Bretagne faisoit mettre en armes toute la noblesse de sa duchie & autres qui armes pouoient porter. Et a celle cause laissa le roy au pays d'Aniou pour faire frontiere a Bretagne le roy Rene de Cecille duc d'Aniou, & le conte du Maine freres ses oncles, avecques grande compagnie de gens de guerre, puis tira en Berry, cuidant entrer dedans Bourges, mais il ne peut; si passa oultre & alla en Bourbonnoys pour ce quil auoit este aduertit que les ducs de Bourbon & de Nemours, & les contes d'Armignac & seigneurs d'Albret estoient ia en armes; & auoit le duc de Bourbon fait prendre les finances qui estoient au roy en ses pays, & auoit prins & tenoit en arrest le seigneur de Cursol, qui estoit fort familier du roy; le seigneur de Trainel, chancelier de France; maistre Pierre d'Oriolle, general des finances, & autres qui detenez estoient en la ville de Moulins. Le roy assiegea aucunes places en Bourbonnoys & Auvergne, comme Sainct Amand, Moulifson & Rion, les vnes print d'assault comme Sainct Amand, & par composition recouura Moulifson; mais on ne peut entrer dedans Rion.

**C** Comment le duc de Bretagne avecques son armee en la compagnie de monseigneur de Berry marcha en France.

**E** pendant que le roy estoit embe-soigne en Bourbonnoys, le duc de Bretagne qui ia auoit son armee preste marcha sur les frontieres d'Aniou en la compagnie de monseigneur de Berry, furent faictes les monstres des gens de guerre bretons pres de Chasteaubriand & fut trouue que le duc auoit en son armee avecques ses contes, barons & nobles hommes bretons, x mil vi cens hommes de guerre tant de

cheual que de pie, tous bien en point, & auoit en oultre vng bon nombre d'artillerie de camp, qui estoit conduite avecques l'armee. Et pour ce que lors arriua deuers le duc quelque ambassadeur quil auoit enuoye par mer deuers le duc de Bourgogne qui lui apporta nouvelles certaines que le conte de Charoloys filz du duc de Bourgogne auoit ses deulx armees prestes, lune des pays de Flandres, & lautre du pays de Bourgogne: & ia auoit marche en pays & estoient passez oultre Arras tirant a Sainct Quentin & a Paris ou il se deuoit trouuer en la premiere sepmaine de Iuillet. Monseigneur de Berry & le duc avecques leur armee se misdrent en voye & passerent la riuere de Loire a Bouche Maine au deffoubz d'Angers sans en estre aucunement empeschez par le roy de Cecille ne autres gens de guerre estans pour le roy a Angers dont depuis le roy eut mauuaise ymagination contre le deffusdit roy de Cecille; de la passa tousiours auant l'armee de Bretagne tenoit le chemin droit a Chasteaudun, tirant a Paris pour eulx ioindre a l'armee du conte de Charoloys qui ia estoit pres de Paris. Et par tout ou ilz passioient lon faisoit crier de par monseigneur de Berry le rabaiz des tailles & maletostes qui sur le peuple de France auoient este imposees par le roy.

**C** La cruelle rencontre a Montlhery.

**L**E roy de France qui lors estoit en Berry, retournant de Bourbonnoys, fut aduertit que ces deux grosses & puissantes armees de Bretagne & de Bourgogne estoient ia bien auant en son royaume & estoit le conte de Charoloys ia passe le pont sainct Cloud tirant a Montlhery, tendant a se ioindre a l'armee de Bretagne qui estoit ia a Chasteaudun. Le roy cuidant combattre l'armee de Bourgogne a part quil estimoit la moins puissante, fist tresgrande diligence de marcher avecques son armee qui estoit la plus belle & mieulx acoustree que lon veist pieca, & passa la Beausse iour & nuyt, tellement que le xvii<sup>e</sup> iour de Iuillet lan lxxv

L'armee de Bretagne marche & tire a Chasteaudun.

Charoloys est au pont Sainct Cloud & tire a Montlhery.

Le roy fait la guerre en Bourbonnois.

Le seigneur de Trainel & d'Oriolle prisonniers.

## Le quatriesme

le matin diceluy iour il arriua a Chastres soubz Montlhery. Et de la sans soy rafreschir ou bien peu se vint vaillamment & de couraige frapper dedans larmee du conte de Charoloys en tel hardement quil mist en fuite leur auant garde, & apres que lauand garde des Bourguignons eut este ainsi rompue, le roy se remist & entra dedans la bataille avecques sa garde & enuiron cccc lances de sa compaignie. Mais les Bourguignons festoient fort raliez, lesquelz auoient apreste leur artillerie & se trouuerent en tel nombre que le roy de France fut en tresgrant danger de sa personne par ce que il nauoit que peu de gens sans artillerie. Si furent ces deux armees de France & de Bourgongne tout le iour sans cesser de combatre. Le conte de Charoloys fut par deux foys prins & depuis rescous. Et le roy qui tousiours estoit des premiers cuyda plusieurs foiz estre tue, & fut bruit lors quil estoit occis. Quant vint a la vesprant les Escossoys de sa garde le tirerent hors de la presse & le menerent sans bruit dedans le chasteau de Montlhery, si treslas que il nen pouoit plus, car tout le iour nauoit cesse de combatre, sans auoir prins quelque soubzlegement de boire ne de menger, dont il estoit moult affoibly. En ceste bataille furent occis iii mil vi cens hommes, comme il fut le landemain trouue par les heraulx qui pour les compter furent commis : de celle bataille se partirent de vii a viii cens lances soubz la charge du conte du Maine, qui vint bien mal apoint pour le seruice du roy; celle mesme vespree le roy apres festre vng peu rafraichy dedans le chasteau de Montlhery, partit de la & toute nuyt tira a Corbeil, & le landemain se rendit par eue a Paris. Le conte de Charoloys & ses Bourguignons tirerent a Estampes & la se rendirent monseigneur de Berry, le duc de Bretagne & toute larmee des Bretons : & quant ilz eurent seiourne a Estampes quelque temps ilz sceurent que les ducs de Bourbon & de Nemours, le conte dArmignac & le seigneur dAlbret estoient passez la riuere de Loire avec toute leur armee pour venir vers eulx, si se assemblerent tous ensemble passerent la

riuere de Saine es endroiz de Moret & se parquerent a Conflanc qui est pres du pont de Charanton; ce pendant le roy estoit alle en Normandie assembler des gens, lequel aduerti que ceste assemblee estoit pres de Paris, se hasta de retourner pour rentrer dedans Paris. Et voiant quil perdoit temps de les cuider auoir par force, il se delibera dappaifer ces princes & seigneurs, & fist par diuers moyens parlementer a eulx en general & en particulier chascun des dictz seigneurs bailla sa demande, & a la plus grande partie d'icelles le roy fut conseille de obtemperer.

Le roy tire en Normandie.

### Le Laccord dentre le roy de France & son frere, & aussi des princes du bien publicque.



ENTRE autres traictez il bailla a monseigneur Charles son frere pour son pasnaige la duche de Normandie avecques tout le reuenu dicelle tant ordinaire que extraordinaire. Et reprint le roy a luy la duche de Berry & en oultre pour les fraiz & mises que le conte de Charroloiz auoit fraiez en ceste guerre le roy luy donna a perpetuite pour son butin les villes de Montdidier, Peronne, Roye & les contes de Guines & de Bouloigne sur la mer pour estre son heritaige & de ses hoirs masles ensemble les autres villes quil auoit nouvellement desgaigees du duc de Bourgoigne son pere, pour quatre cens vingt mil escuz. Pour le butin de monseigneur de Bourbon luy fut baillee & laiffee la pencion tel quil lauoit au temps du roy trespasse avecques les gens darmes quil auoit lors & fut assigne de la reste de son mariage. Au conte de Dunoys fut rendu tout ce quon luy auoit oste a cause de ce quil auoit este en Bretagne, & fut retenu a grande pencion. Au conte de sainct Pol qui auoit conduit lauand garde de Bourgoigne donna le roy loffice de conestable de France, & au regart des autres seigneurs chascun en emporta sa piece, sauf le duc de Bretagne qui ne tendoit si non que monseigneur Charles fust apasnaige honorablement & a son profit, & que le royaume fust en paix & tranquillite sans vouloir a la

Le traicte daccord dentre le roy & son frere.

Le roy se faulue dedans le chasteau de Montlhery.

Le conte du Maine sen fouyt a tout viii cens lances. Le roy va de nuyt a Corbeil.

personne du roy aucun mal ne inconuenient : mais bien desiroit que le roy se rangeast a traicter les princes & nobles seigneurs de son royaume en leurs auctoritez, & aussi le commun peuple en bonne paix & vnion; le roy toutefois 5  
 toufours demourant regnant & loyaument obey, & quil soit vray. Iai ouy dire a vng gentilhomme qui lors estoit seruiteur diceluy duc de Bretagne, que le matin du xvii<sup>e</sup> iour de Iuillet, qui fut le iour de la rencontre de 10  
 Montlhery, que lors estoient monseigneur & le duc de Bretagne a Chasteaudun ainsi que Beaudieu, le tailleur du duc, qui a luy grande familiarite auoit, luy effeoit quelque acoustrement il dit au duc : Monseigneur, il na tenu 15  
 que a vous que monseigneur nest auourdhy roy de France. Comment le scay tu, dist le duc. Monseigneur, il est tout certain que le roy va auourdhy combatre & affaillir larmee de 20  
 Bourgoigne, & si vous eussiez voulu y estre avec vostre armee le roy feroit deffaict a iamais & par ce moyen Monseigneur seroyt roy. Le duc moult desplaisant de ceste parole donna a sondit tailleur vng si tres grant soufflet a 25  
 trauers la ioe que le sang lui sortit du nes. Et fut depuis long temps sans le vouloir veoir.

**C** Comment apres ce traicte daccord le grant maistre du Chastel conseilla au duc son maistre de se retirer en Bretagne sans conduire Monseigneur en Normandie.

**A** PRES que ce traicte fut passe & accorde entre le roy & les princes 35  
 & seigneurs dessusdictz chacun en voulut auoir lettre & ne restoit plus si non que monseigneur Charles allast prendre possession de sa duche de Normandie & le roy festoit ia retire a Orleans. Le conte de Charoloys, le duc de Bourbon, le duc de Nemours, le seigneur dAlbret, le conte dArmignac, le conte du Maine & autres seigneurs dessus nommez sen retournoient chacun chez soy, mais le duc Francoys de Bretagne voulut 40  
 conduire monseigneur en sa duche de Normandie. Tanguy du Chastel, grant maistre de

Bretagne, qui en ce voyage auoit si bien conseille le duc son maistre & si bien auoit conduit les affaires que le duc estoit paruenue a la fin quil lui auoit promise, comme cy deuant auez peu veoir, dist au duc en ceste maniere : Monseigneur, vous scauez les paroles que ie vous porte en vostre chasteau de Nantes alors que les ambassadeurs du roy vindrent par deuers vous pour laffaire dont tant vous fustes trouble; vous auez a layde de Dieu si bien besongne en lentreprinse de ce voyage que iusques a icy vous y auez tout honneur. Le voy en vostre maison plusieurs gens qui pressent monseigneur de luy donner les offices de sa duche de Normandie & ay sceu que a vostre requeste il a donne loffic de cappitaine de Rouen au seigneur de Lescun & a autres de voz gens a donne les offices de Normandie. Je congnois bien la nature des Normans : ce sont gens si incompatibles que pour mourir ne souffriront que autres que eulx aient les offices du pays & sy monseigneur fait autrement veritablement il ne fera gueres leur duc car ce que ientens le roy comme contrainct luy a faict le partaige qui est moult grant; lon 25  
 tient notoirement que les deniers qui sortent de Normandie au profit du roy se montrent la tierce partie de tout le reuenu de son royaume. Si le roy y a regret il ne sen fault pas esmerueiller, ie suis daduis, monseigneur, que vous 30  
 deuez faire comme les autres princes de la compaignie; chacun sen va en ses terres & laissent monseigneur entre les mains de ses subiectz qui bien loyaument luy obeiront & seruiront pourueu quil ne se veille seruir dautres gens que deulx & pour ce ie suis daduis que vous prenez conge de monseigneur & vous en retournez en vostre duche; si vous le faictes ainsi il vous en prandra tres bien, autrement si vous lacompaignez en sa duche vous & voz gens pourrez estre en grant danger comme il est bien vroysemblable.

Le duc, qui auoit declare a monseigneur quil lacompagneroit, ne print pas en gre la remonstrance que son grant maistre luy fist & sen courrouca. Aussi auoit ia este le duc pratique par aucuns de ses mignons de sa maison, qui grandement estoient enuieux de la grande &

## Le quatriefme

secrete familiarite que il auoit audit grant maistre, car en tout le voyaige le duc festoit porte tout ainsi que le grant maistre du Chastel luy auoit conseille. Ledit du Chastel se retira a part & vit bien que le duc son maistre nauoit pas eu son conseil a cueur & que plus si familiarierement quil souloit ne se adressoit a luy & eust pacience iusques a cinq ou six iours de la. Puis apres le grant maistre dist a maistre Francoys de Rouuille, vichancelier de Bre-  
taigne, qui lun des mignons du duc estoit : Monseigneur le vichancelier, iay sceu des nou-  
uelles de Bretagne dont ie suis grandement trouble, car lon ma rescript que ma femme est  
tressfort malade. Le voy bien que nous ne  
sommes pas prestz a retourner en noz maisons, vous voyez dautre part que les plus grans af-  
faires du duc nostre maistre ont prins fin, par quoy na plus mestier que ie le suyue. Je vous  
prie que vous trouuez le moyen enuers luy  
quil luy plaise me donner conge, affin que ie  
retourne veoir lestat ou est ma femme, & sca-  
uoir comment mes affaires se portent, & vous  
me ferez vng tressingulier plaisir. Le vichance-  
lier de Bretagne luy promist quil en feroit son  
loyal deuoir, ce quil fist, car il fist au duc la  
requeste dessusdicte, de telle forte que le duc,  
vng soir en se couchant, donna conge a son  
grant maistre de sen retourner par deuers sa  
femme puisquil estoit aduertit que elle estoit  
mal disposee. Du retour dudit grant maistre,  
Lescun, le vichancelier & plusieurs autres mi-  
gnons du duc ne furent pas courroucez. Tout  
aussi tost que le grant maistre eust eu son  
conge, a deux heures de la il monta a cheual  
& nuyt & iour cheuaucha en telle diligence  
que en cinq iours il fut de Paris en Bretagne.  
Et quant il fut a Chasteaubriend, il rescriptit  
au duc que il luy conseilloit sen retourner en  
son pais, & que sil alloit a Rouen, sa personne  
seroit en danger, & tressmal en prandroit au  
nouveau duc de Normandie. Le duc ne voulut  
de ces lettres faire conte ne estime, & aucuns  
autres de ses mignons les interpreterent depuis  
en tresmauuais sens.

### Comment le duc de Bretagne partit

### du mont sainte Katherine de Rouen sans le duc de Normandie.

**T**ANTOST fut appreste le partement de monseigneur pour tirer a Rouen, lequel se mist en voye ayant le duc tousiours en sa compaignie. Et se logerent de plaine arriuee en labaye de sainte Katherine du Mont de Rouen ou ilz furent cinq ou six iours attendans les preparatifs des habitans de la ville pour lentre de leur duc. Ces Normans icy qui a toute heure venoient veoir leur duc en ceste abbaye, veoient quil estoit entierement gouerne par le duc de Bretagne, & ce quil ordonnoit estoit fait, dont ilz furent si tresmutinez quilz delibererent de luy iouer finesse sil entroit en leur ville auecques leur duc. Et fut le bruit que ceulx de Rouen auoient delibere denclorre secretement en leurs caues grant nombre de gens armez, & si le duc de Bretagne entroit dedans la ville auecques monseigneur, doccire & hacher en piece le duc & ses Bretons. Le duc de Bretagne entendit de ceste entreprinse quelque vent venter, dont il fut moult effroye, & ses mignons quil auoit auecques luy luy donnoient a entendre que Tanguy du Chastel, son grant maistre, sauoit bien ceste entreprinse comme lon pouoit bien coniecturer par les lettres que de Bretagne il luy auoit escriptes. A ceste cause, le duc print des lors ledit du Chastel tellement en sa malueillance que oncques puis ne le voulut veoir.

### De la Venue de Anthoinette de Maillezais dame de Cholet en Bretagne.

**N**OUS auons icy a noter que en ce voyage de France le duc de Bretagne qui moult beau prince & ieune estoit comme de leage de xxx ou xxxi an, se acoincta dune ieune damoiselle nommee Anthoinette qui lors estoit femme espouse du seigneur de Villequier, len enmena en Bretagne publicquement & iusques a la mort d'elle lentre tint en grant estat, neanmoinz quil eust espouse lors vne dame de si hault pris, fille du duc de Bretagne & dune fille du roy dEs-

Anthoinette de Maillezais dame de Cholet.

Tanguy du Chastel se retire en Bretagne.

coce. Et fut ceste acointence dentre le duc & la deffusdicte Anthoinette de moult dommageable consequence pour la posterite masculine de la ligne de Bretagne, comme plusieurs faiges hommes disoient lors, & aussi que lon a peu veoir depuis.

### ¶ Du mutinement de ceulx de Rouen.

**R**, pour retourner a nostre entree de Rouen, les Normans presserent tellement le duc monseigneur Charles dentrer en la ville, que ilz le y menerent sans le duc de Bretagne ne ses Bretons & aussi sans faire a leur duc entree solennelle quelconque. Et se hastèrent ainsi les Normans de recouurer la personne de leur duc, pour ce que quelque subtil esprit fist bruit que le duc de Bretagne & le conte Dampmartin auoient entrepris denleuer monseigneur & len enmener en Bretagne. Le duc de Bretagne partit du Mont saincte Katherine, & sans passer par Rouen tira a Caen avecques ses Bretons & delassa monseigneur entre les mains de ceulx de Rouen ou il ne fut gueres, car pour ce que lon supposoit que monseigneur & le duc de Bretagne auoient ensemble quelque secret entendement, les Normans se mutinerent tellement que monseigneur ny estoit pas en seurte.

### ¶ Comment monseigneur perdit sa duchie de Normandie & se retirèrent luy & le duc en Bretagne.

**L**E roy de France qui apres le traicte de Paris cestoit retire a Orleans ou il desappoincta les vngs & appointa les autres, & y fist dexecrables ordonnances, fut aduertit des mutinemens de Normandie. A ceste cause il fut conseille voire par luy mesme, car a aultre conseil que au sien en matieres ardues, guerres ne se arrestoit. Il departit dOrleans, & tira en Normandie sur les marches du pays, & la ne fut gueres quil nenstrast dedans Rouen, & fut contrainct monseigneur se retirer & ioindre comme deuant avecques le duc & aller avecques luy en Bre-

tagne. Bien tost apres le roy recouura tout le pays de Normandie & retira a luy le duc de Bourbon, luy bailla le gouvernement de Languedoc & en fut desapointe le conte du Maine. Et fist le bastard de Bourbon admiral de France, le seigneur de Loheac mareschal, & son frere le seigneur de Chastillon fist grant maistre des eaues & forestz de France qui pour lors estoit vng tresbel estat, & tantost apres le roy le fist gouverneur de Champagne; lesditz de Loheac & Chastillon estoient freres du conte de Laual qui auoit espouse lors dame Francoyse de Dinan dame de Chasteaubriend.

Monseigneur Charles pert Normandie.

### ¶ De la mort du duc Phelippe de Bourgoigne.

**A**U moys de feurier lan mil quatre cens LXvi, par laduis des gens de conseil de monseigneur & du duc, furent expediez en Bretagne certains ambassadeurs pour aller deuers le roy poursuir & pourchasser le partaige & apasnaige de monseigneur, car le roy quelque serment ne iurement quil eust fait, disoit que les droiz royaulx de sa couronne ne pouoient toller ne permettre que a monseigneur son frere la duchie de Normandie deust demourer pour son droit suceffif, & offroit tousiours le roy luy assigner son partaige ailleurs au royaulme la part ou il serait aduise selon que par raison seroit chose decente & conuenable. Ces ambassadeurs arriuerent par deuers le roy, lequel les ouyt & tresbien les fist festoier, & assez malcontans partirent de sa court. De la tirerent en Flandres par deuers le duc de Bourgoigne & le conte de Charolloys son filz pour pratiquer quelque nouuel brassaige contre le roy qui ne tendoit que a abuser son frere, puy s'en retournerent en Bretagne par mer. Et au moys de Iuing ensuiuant trespassa en la ville de Bruges le duc Phelippe de Bourgoigne, le corps duquel fut inhume aux Chartreux de Digeon, & fut son filz Charles duc de Bourgoigne, dont le roy de France ne fut gueres ioieulx.

### ¶ Comment en faueur du pape Poul se

Normans font mutinez.

roy consentit la rompture de la pragmaticque que le procureur general de France saint Rommain empescha.

**A**U mois de septembre lan mil quatre cens soixante sept, le roy, qui pour paruenir a ses fins tendoit a entretenir le pape Poul lors presidant a Romme, luy octroia la rupture de la pragmaticque. Et pour conclure ceste matiere, le pape enuoya son legat en France, auquel le roy estant a Tours octroya ses lectres en forme autentique tellement quil ne restoit plus si non a les enteriner par la court de parlement, & pour ce faire le roy enuoia a Paris auecques le dessusdict legat le reuerend maistre Iehan Balue euesque d'Eureux. Ces lectres furent leues & publiees au chastelet de Paris sans y faire aucun contredit, & le premier iour doctobre qui fut le lendemain ensuiuant que parlement vacquoit, le dessusdict euesque Balue se transporta au palais a Paris par deuers les presidans qui excercoient & administroient iustice pendant vacations comme il est de coustume, & leur presenta lesdictes lectres, lesquelz presidens luy responderent que les baillassent au gens du roy pour les veoir, car sans le ouyr ne les deuoit ne pouroit en bonnement enteriner. Ces lectres furent mises entre les mains des gens du roy, lesquelz apres les auoir veues, le procureur general de France qui pour lors estoit nomme maistre Iehan de saint Rommain, homme droit en iustice, les empescha & dist que formellement il se opposoit a lenterinement dicelles, & remonstra comment la pragmaticque auoit este ordonnee par grande & meure deliberation en ensuiuant les saints canons tant pour les dignitez & benefices electifs dont la disposition appartenoit aux eslisans gardans sainement & sainctement la forme ordonnee par ladicte pragmaticque en la matiere des elections & autres saints canons, & les benefices collatifs estoient en la disposition des ordinaires & patrons. Et ainsi lont tousiours confesse les saints peres de Romme, mesmement es concilles de Constance & de Basle, & la fut ladicte pragmaticque autorisee & approuee pour euitier & escheuer a

quatre execrables dommaiges qui par faulte de ce aduenoient au royaume de France. Premierement lon eschiuoit par ladicte pragmaticque la confusion de toute lordre ecclesiastique; secondement la depopulation des subgetz du royaume; tiercement leuacuation de la pecune de France, & quaterment la ruine & defolation de toutes les eglises du royaume.

**C** Les causes pour lesquelles la pragmaticque fut octroyee au roy de France par le concile.

**Q**UANT au premier point, si lon oste les elections & les collations aux ordinaires & que les reseruations & graces expectatiues aient lieu & les euocations en premiere instance en court de Romme, ne reste plus si non la confusion de toute leglise, car toute lordre ecclesiastique est confundue quant chascune iurisdiction est subuertie & que lon ny obeist comme aux chappitres le droit deslire, aux patrons de presenter & aux ordinaires de conferer, & des causes, si elles ne sont des plus grandes en premiere instance, congnoistre & decider. Pour soustenir le second point, qui est la depopulation des subgetz du royaume, il remonstra comment parauant lesdictz saincts decretz de Constance & de Basle a loccasion de ce que les reseruations & graces expectatiues auoient cours que les causes estoient traictees en court de Romme. Les subgetz du royaume en grant nombre delaissoient le pais de France, alloient en court de Romme, les vngs seruir cardinaulx, les autres officiers, & les aucuns sans y seruir y despendoient la substance de leurs parans tellement que tant par la fatigation & peril du chemin que par la peste qui souuent est Romme, la pluspart de ceux qui y alloient decedoient. Et par ce moyen estoient les citez & vniuersitez depopelees de gens, car tout alloit a Romme, pour obuier a laquelle depopulation furent faictes lesdictes constitutions & sans decretz.

Et pour le troiesme, qui conserne leuacuation dudit royaume de France, le dessusdict

procureur general de Sainct Rommain remonstra  
 le grant nombre des arceueschez, eueschez &  
 autres abbayes du royaulme & des paroyffes  
 que lon dit y auoir cent mil parroyffes, dont  
 chascune ville ou cite nest conte que pour vne. 5  
 Et linfini argent qui yroit a Romme tant pour  
 les vacans, taxes & imposez, graces expectatiues  
 & proces comme pour les voyages daller ou  
 enuoier y feiourner, & mesmement quil ny a  
 si petit benefice qui ne chee soubz grace, & 10  
 aussi sur vne petite collation, & voit on par ex-  
 perience x ou xii bulles expectatiues. Et ny  
 aura nul qui ait de quoy qui ne se mecte en  
 auant pour enuoier a Romme cuider auancer  
 son filz ou son parant, & souuent perdent leur 15  
 parant & leur argent. Et pour particulierement  
 donner entendre ladicte euacuation, proposa  
 que en trois ans que la pragmaticque fut inter-  
 rumpue au temps de pape Pie deuxiesme, qui  
 trespassa lan mil quatre cens lxiiii, vacquerent 20  
 au royaulme xxii arceueschez pour le vacquant,  
 & a loccasion desquelles fut porte en court de  
 Romme vixx mil escuz, vacquerent lxi ab-  
 bayes pour le vacquant desquelles & autressouiz  
 fut porte a Romme vixx mil escuz, vacquerent 25  
 semblablement deux gros priorez, doyennez, pro-  
 uoostez, commanderies & autres dignitez elec-  
 tiues sans crosse, dont fut porte a Romme pour  
 leur vacquant cent mil escuz, & chascun cure  
 de France a pour le moins eu vne grace expect- 30  
 atiuue, xxv escuz & autres graces & prerogatiues  
 que lon estime deux millions descuz. Et plu-  
 sieurs autres euacuations quil declaira par le  
 mynu qui se montoient pour lesdictz trois ans  
 deux millions huy cent mil escuz dor. Et di- 35  
 soit que le roy de France est principal fondeur,  
 protecteur, gardien & deffendeur des eglises de  
 son royaulme & est tenu de tout son pouoir  
 a la deffense, garde & entretenement des droiz,  
 libertes & auctoritez des eglises & a la protec- 40  
 tion & conseruation de ladicte pragmaticque  
 & desdictz saintz decrez par lesquelz est pour-  
 ueu aux quatre inconueniens dessusdictz. A  
 ceste cause, disoit ledict Sainct Rommain, pro-  
 cureur general de France, quil auoit cause & 45  
 matiere d'empescher lexecution & enterinement  
 desdictes lectres dont ledict Balue fut fort def-

plaissant, & pour ceste cause fist audict de Sainct  
 Rommain plusieurs menasses, en luy disant que  
 le roy nen seroit point contant & quil le desap-  
 poincteroit de son office. De quoy ledict de  
 Sainct Rommain ne tint pas grant conte, mais  
 luy dist que le roy, luy auoit donne & baille  
 loffice, laquelle il tiendroit & exerceroit iusques  
 au plaisir du roy & que quant son plaisir seroit  
 de la luy oster faire le pourroit, mais quil  
 estoit du tout delibere & resolu de tout perdre  
 auant que de faire chose qui fust contre son  
 ame ne au dommaige du royaulme de France  
 & la chose publique diceluy; & dist audit Balue  
 quil deuoit auoir grant honte de poursuivre la-  
 dicte expedition. Et apres le retour de luniuer-  
 site & les suppostz dicelle allerent par deuers  
 ledit legat qui de luy & de loctroy effect &  
 concession desdictes lettres appellerent au saint  
 conseil & partout ailleurs ou ilz verroient estre  
 affaire. Et autant en firent audit Chastellet, &  
 en cest estat sen retournerent le legat & Balue.

**C** Comment le duc de Bretagne  
 enuoya son armee en Normandie faire la  
 guerre tendant a ce que le roy assignast  
 a monseigneur son frere son partaige.



VOUS auez peu veoir cy deuant com-  
 ment monseigneur Charles & le  
 duc estant ensemble en Bretagne  
 enuoyerent deuers le roy vne am-  
 bassade pour le fait dudit monseigneur Charles :  
 laquelle ambassade se retira en Bourgoigne  
 par deuers le duc de Bourgoigne & a son  
 retour apporterent nouvelles dicelluy duc de  
 Bourgoigne & du conte de Charoloys son  
 filz que le roy a leur cuider nentendoit iamais  
 a apasnager son frere fil ny estoit contraint : &  
 que de leur part y seruiroient comme ilz  
 auoient promis. Or depuis monseigneur  
 Charles voulut employer ses amis a cest  
 affaire, & entre aultres le duc d'Alencon qui  
 promist donner passage aux Bretons pour en-  
 trer en Normandie & peu a peu le duc de  
 Bretagne reprint les armes & feist mettre ses  
 Bretons sur : dont il enuoya vne bien bonne  
 bende enuiron le commencement doctobre lan

## Le quatriefme

mil cccc lxxvii marcher en Normandie, tirerent iusques a Caen & Bayeux & entrerent dedans ces villes & celles prindrent & detindrent, semblablement leur furent par mon dit seigneur d'Alencon deliurez & ouuertes ses villes & chasteaux d'Alencon & du Perche, & pour la garde des ville & chastel d'Alencon icelluy duc d'Alencon laissa son filz le conte du Perche & quelque nombre de gens darmes bretons & se retira en Bretagne avec monseigneur & le duc & se tint avecques ceulx a Rennes.

**L**E xv<sup>e</sup> iour dudit moys doctobre fut le roy de France estans a Paris, oui nouvelles que les Bretons festoient mis esdictes villes de Caen, Bayeux & Alencon, & que le duc d'Alencon se estoit retire en Bretagne, dont le roy de France fut fort courrouce, & en diligence enuoya de Paris le mareschal de Loheac avec les cent lances dont il estoit capitaine esdictes villes pour icelles recouurer. Et le xx<sup>e</sup> iour diceluy moys le roy partit de Paris pour tirer es parties de Normandie, & deuant partir de Paris fist certaines ordonnances contenant que de la en apres son plaisir estoit que toutes offices royaulx fussent non impetrables & non vacantes si non par mort, forfaiture ou resignacion, & sil en donnoit nulles au contraire par importunite de requerans ou autrement vouloit quil ny fut aucunement obtempere. Et fist ceste ordonnance pour ce quil veoit bien que mal luy estoit prins, & preuoit de ce quil auoit reuoque plusieurs offices & destitue plusieurs offices sans cause. Et puis ce fait partit le roy, tira a Mante & a Vernon ou il resida quelque peu de temps, & de la sen alla a ses voyages de Chartres & de Clery, & faisoit descendre gens darmes & force dartillerie au pays d'Alencon. Quant le roy eut fait ses pelerinages, il tira au Mont Sainct Michel & avecques luy grant nombre de gens de guerre. Monseigneur Charles & le duc aduertis que le roy saprochoit si pres de eulx, firent fortir de Bretagne toute larmee que le duc auoit fait mettre sur, & s'espandirent ces Bretons par la Normandie tirans a Caen & Bayeux, & en passant prindrent Auranches & aultres places qui

facilement leur estoient deliurees; le roy se estoit lors retire des basses marches de Normandie, & estoit au Mans & enuiron celuy quartier furent assemblez tant de gens de cheual que de pied cent mil hommes & plus pour resister a larmee des Bretons. Et en ces entrefaites fut pourparle de treues qui tindrent le roy & son armee sans riens faire, & fut a ceste cause le pays denuiron menge & destruit par xx ou xxx lieues des pays d'Alencon & du Maine.

**Q**U pendant le nouveau duc de Bourgoigne qui venoit du Liege & auoit destruit les Liegeois, sen retourna deuers Sainct Quentin & fist crier par tous les pays que toutes gens de guerre desditz pays se tirassent deuers Sainct Quentin pour illec faire leurs monstres au xv<sup>e</sup> iour de decembre sur bien grosses paines, & tous nobles & aultres gens suyans les armes fussent prestz a Monfaugeon pour illec prendre & receuoir leurs soulde, & ce fait tirer deuers luy pour le acompaigner & ayder a secourir monseigneur Charles de France & le duc de Bretagne estans ensemble contre d'aucuns leurs malueillans, ce cry & ceste assemblee effroierent fort le roy & non sans cause.

**A**U mois de Ianuier ensuiuant monseigneur Charles de France, en la presence du duc de Bretagne, dist au duc d'Alencon, a Rennes ou lors ilz estoient, que il auoit este aduertie & la verite estoit telle, que son filz le conte du Perche en qui tant il se fioit auoit rendu & mis entre les mains de gens du roy les ville & chasteau d'Alencon, dont le duc d'Alencon fut moult esbahy veu les sermens que son filz luy auoit faitz & aux capitaines bretons, mais a la fin luy dist monseigneur, sil a fait le tour a ce la congnois ie bien quil est vray filz de son pere.

**C** Des estaz qui furent tenuz a Tours pour assigner a monseigneur son pasnage.



**L**E roy qui lors estoit au Mans enuoya le legat du pape dont deuant auons parle avecques le conte de Dampmartin & aultres par deuers mon-

seigneur Charles, & le duc estans a Rennes pour trouver quelque bonne ouverture de traicte de paix; finalement fut acorde que les estaz de France seroient assemblez a Tours au premier iour d'Auril ensuiuant qui estoit le temps de la passion pour par leur aduis pourueoir a laspanage de monseigneur. Le iour & le terme de tenir les estaz venu, fut a Tours l'assemblee faicte : a laquelle le roy de France present furent le roy Rene de Secille, le duc de Bourbon, le conte du Perche, le patriarche de Hierusalem & plusieurs autres princes, archeuesques, euesques, barons & aultres grans personages. Et par tous iceulx ainsi assemblez a grande & meure deliberation fut dit & conclut que au regart de la question dentre le roy & monseigneur son frere touchant son pasnage, il auroit & luy feroit fait assiete en terre qui seroit de tout ancien temps duche ou conte iusques a xii mil liures de rente, & auroit en oultre par chascun an LX mil liures tournoys. Et par tant demouroit au roy la duche de Normandie. Puis sen retournerent les seigneurs des estaz chascun en ses pays faire Pasques.

**Q**ES nouvelles & conclusions apportez en Bretagne a monseigneur & au duc, ilz nen furent gueres contans & firent exploicter quelques courses de guerre par leurs gens darmes estans en Normandie iusques au moys de septembre ensuiuant que monseigneur & le duc se delibererent de accepter la conclusion des estaz tenus a Tours comme de LX mil liures de pension par an iusque a ce que son apasnage eust este assigne a monseigneur selon ledit des princes que il esliroit pour ce faire, aux quelz il se vouloit rapporter; cest assauoir le duc de Calabre & le conestable de France. Et offroit le duc de Bretagne rendre les villes que luy & ses gens tenoient en Normandie en luy rendant aucunes places que les gens du roy tenoient en Bretagne sur la frontiere du pays, laquelle chose le roy accorda. Et puis le roy feist scauoir ces nouvelles au duc de Bourgoigne qui estoit a tout son ost pres de Peronne sur la riuere de Somme, desquelles

nouvelles il ne voulut riens croire iusques a ce quil en fust aultrement acertene par monseigneur & le duc de Bretagne. Tantost apres le duc de Bretagne luy enuoya Mallo son roy darmes par lequel il fut certifie plainement dudit traicte, mais pour tout cela ne voulut desparer son ost. Tantost apres furent entre le roy & luy treues prinsees, ce pendant que lon traictoit la paix dentre eulx.

**C** Du danger ou le cardinal Balue mist le roy de France & les princes de son royaume quil mena au Liege.

**A**U mois d'Avril lan mil CCCCLXIX, maistre Jehan Balue, cardinal euesque d'Angiers, en qui le roy se fioit autant ou plus que en homme qui feust lors viuant, mena sedicieusement le roy a Peronne par deuers le duc de Bourgoigne, tendant a le mettre entre ses mains. Le duc de Bourgoigne veoit que autour de Peronne y auoit si grant puissance des gens du roy quil neust pas fait de la personne du roy, ainsi que le dessusdit cardinal luy auoit conseille faire : a ceste cause fist au roy moult humble reuerence & firent entre eulx quelque traicte de paix fourre entre les mains du notable cardinal Balue, lequel feist passer le roy plus auant. Car il fist tant que le roy sen alla au Liege avec le duc de Bourgoigne & son armee contre les Liegeois, lesquelz contre le duc de Bourgoigne festoient rebellez, & furent le roy & ceulx qui avecques luy allerent en tresgrant danger de leurs personnes; de la sen retourna le roy a Paris & a Tours.

**C** Comment Tanguy du Chastel, grant maistre de Bretagne, se retira par deuers le roy Loys.

**Q**U'en ce temps Tanguy du Chastel, grant maistre de Bretagne, que le duc nauoit voulu veoir depuis le voyage de Montlhery, se tenoit a Malestroit avecques sa femme. Et si ne faisoit gueres de conte de se retirer a la court du duc,

## Le quatriesme

pour ce que le duc estoit si tresaffuble de ceste madamoyselle de Villequier que personne nauoit credit ne support en court, si non ceulx quelle auoit en grace. Et fut offert audit du Chastel par Pierre Landoys, lors tresorier general, & aultres de la court que fil vouloit souffrir & endurer de ladessusdicte damoyselle & icelle reuerer & honorer comme les aultres faisoient, elle feroit sa paix enuers le duc & le mettroit en grace plus que deuant. Aufquelz ledit du Chastel respondit que mieulx esliroit la mort que daccepter ce party, & grandement les blasma de ce que ilz ne trouuoient le moyen de len enuoyer & mettre hors : iacoit ce quelle fust douce & benigne, & voluntiers faisoit mettre en auant ceulx qui le valoient. Mais ce nonobstant leur remonstra les maledictions qui en Bretagne seroient a aduenir si le duc ne la delaissoit, & en tel estat sen retournerent par deuers ladessusdicte de Villequier, qui con-  
scent comme lon a voulu dire contre ledit Duchastel telle hayne quelle tendoit a le affoller, combien que a la verite elle induisoit souuent le duc en ce quelle pouoit dexfaulcer gens vertueux & a estre piteux & plain de grace, & si nestoit vindicatiue, mais benigne & prudente.

**L**E roy de France, qui scauoit toutes nouuelles de toutes pars & de toutes contrees, fut aduertuy du danger auquel le grant maistre du Chastel estoit de sa personne. Et desiroit sur toutes choses le recouurer pour le grant sens & les grandes vertus quil auoit ouy estre en luy & auoir este en ses predecesseurs, fist secretement scauoir audit du Chastel que fil se vouloit par deuers luy retirer, il le recueilliroit & lappointeroit de si bon estat quil auroit matiere den estre contant. Le grant maistre, congnoissant le danger auquel il estoit en Bretagne & aussi le recueil quon luy offroit en France, delibera de accepter loffre que le roy luy faisoit. Et pour plus secretement entreprendre son voyage, il faignit vouloir aller en la basse Bretagne veoir sa mere qui encores viuoit & y mener sa femme que sa mere nauoit iamais veue. Et sur les repas dentre Malestroit & la basse Bretagne, il enuoya des vins & aultres

viures pour en passant faire bonne chere, & enuoioit deuant de ses gens pour tout preparer & mettre apoint par lesditz logis ou il passeroit. Et vng iour a vng auesperant que le temps estoit assez sery & lors estoit la lune plaine qui toute nuyt luysoit, il partit de Malestroit avecques sa femme a peu de compagnie comme de treze a quatorze cheualx, & tourna bride, car en lieu daller en basse Bretagne, il tira toute nuyt le chemin dAniou, passa la riuere le lendemain au plus matin, au dessus dIngrande, & sen alla deuers le roy de France, qui bien chèrement le recueillit, & tantost apres lappointa tresbien; il le tenoit pres de luy comme lun des principaulx de son conseil & de plaine arriuee luy bailla le gouvernement de Rouffillon qui nouvellement estoit vacque, & le feist cheualier de son ordre.

### **C** Comment le roy de France assigna a monseigneur son frere la duchie de Guienne pour son apasnage & partaige.

**A**NUIRON celuy temps, apres que le roy fut retourne de son voiage du Liege, luy estant a Tours, il enuoya quelque ambassade par deuers monseigneur son frere & le duc de Bretagne les aduertir que, pour attirer a luy sondit frere & affin que bonne amour feust de la en apres entre eulx, il estoit contant de luy bailler pour son partaige & apasnage la duchie de Guienne avecques aultres seigneuries dont monseigneur fut trescontant. Et tantost apres alla monseigneur en celles parties esquelles le roy se tira avec monseigneur de Bourbon & aultres seigneurs, lesquelz furent a Nyort & la Rochelle, & la se rendit monseigneur, auquel le roy fist tresbon recueil & commist monseigneur de Bourbon & aultres pour luy bailler & deliurer pour son pasnage lesdictes seigneuries, le menerent de place en place & len misdrent en possession. Par ce moyen furent amys & dacord le roy, monseigneur de Guienne son frere, le duc de Bretagne & aultres princes, & en general tous ceulx du royaume en furent ioyeux, au moins ceulx qui aymoient paix, verite &

Le roy baille la Guienne a son frere pour son pasnage.

loyaulte. Et furent par les villes du royaume pour la ioye & l'yeffe de ceste paix faiz feuz & aux eglises cloches sonnees & chante *Te Deum laudamus* pour rendre gloire, louenge & merciz a Dieu, cuidans que ceste paix durast longuement entre le roy & monseigneur son frere. Puis sen retourna le roy a Amboise par deuers la royne qui moult auoit paine & trauaille pour ceste paix traicter & produire.

### **C** De la prinse & emprisonnement du cardinal Balue & de son proces.

**Q**u'ennemy denfer qui est pere & producteur de guerres, inimitiez & diuisions, & qui na en hayne chose quelconques tant que paix & repos en ce temps, suscita ses supostz & iceulx alla mettre en sa vigne comme le cardinal Balue, contre le vouloir & conseil duquel ceste paix fut traictee; pour sen venger & cuider affoller le roy & le royaume, ledit cardinal auertit en diligence le duc de Bourgoigne de ceste paix par quelques messagiers secretz qui de bouche dirent audit de Bourgoigne que de tout iceluy cardinal le certifieroit bien tost, & que sans nulle faulte ledit traicte luy estoit grandement preiudiciable. Tantost apres fut prins sur les marches de Flandres lun des familiers seruiteurs dudit Balue, portans lettres que son maistre escriuoit au duc de Bourgoigne, contenant que le traicte dentre le roy son frere & le duc de Bretagne estoit du tout fait a sa confusion & destruction, & auoit bien voulu le roy s'elargir iusques a la enuers sondit frere, & luy donner Guienne pour le apasnager & aussi le duc de Bretagne, affin deulx venir & assembler pour incontinent leur paix iuree courir sur au duc de Bourgoigne, icelluy & ses pays destruire, & luy faire la guerre plus que iamais, & que pour sen garder luy conseilloit Balue comme besoing lui estoit se mettre en armes, comme deuant auoit fait, & quil assemblast plus grande armee que oncques ne fist, sans plus auoir desperance au duc de Bretagne: car il festoit alie au roy contre luy. Ce messagier avecques les dessusdictes lettres &

instructions fut amene par deuers le roy. Et tout incontinent que le roy eust veu le contenu esdictes lettres & ouy parler le messager, fut le cardinal Balue prins & faisi au corps, & mene prisonnier a Montbafon, ou il fut laisse en la garde dudit seigneur de Torcy & aultres. Puis apres furent prins & faisis en la main du roy tous ses biens, & ses gens & seruiteurs detenuz. Ses biens furent incontinent mis par inuentoire. Et pour linterroguer sur les cas dont ses lettres faisoient mencion furent commis messire Tanguy du Chastel gouverneur de Roussillon, messire Guillaume Cousinot, le seigneur de Torcy, & maistre Pierre d'Oriolle general des finances, tous lesquelz procederent a lexaminer & interroguer sur lesditz cas & charges. En apres le roy donna & disposa des biens dudit cardinal a son plaisir. Cest assauoir sa vesselle d'argent fut vendue, & l'argent baille au tresorier des guerres pour employer es affaires du royaume. La tapisserie fut donnee au gouverneur de Roussillon, & sa librarie au general d'Oriolle.

### **C** Du trespas de la duchesse Marguerite de Bretagne, premiere femme du duc Francoys ii de ce nom.

**L**a bonne duchesse Marguerite, fille du duc Francoys premier de ce nom, & de la duchesse Ysabeau d'Escofe sa femme, fut en ce temps tellement detenue de maladie dedans le chasteau de Nantes, que le xxv<sup>e</sup> iour de septembre, a six heures apres midi, audit an mil cccclxix, elle rendit lesperit a Dieu; dont les douleurs, pleurs, cris & plaintes furent grans par toute Bretagne. Tantost apres le corps d'elle fut mis en sepulture dedans le cueur de leglise des Carmes de Nantes en tres grant solempnite, & y gist a present.

**C** Comment le duc de Guienne, apres quil eut prins possession de son pasnage, se retira deuers le roy son frere a Tours.

## Le quatriesme

**A**u mois de decembre lan dessusdit CCCCLXIX, le roy estant aux Montiz lez Tours, se rendit a luy monseigneur de Guienne son frere, acompaigne des nobles hommes de sa duche & de moult belle & noble compaignie; de sa venue fut le roy tres ioyeux, aussi furent la royne ma dame de Bourbon & aultres dames & damoyelles de leur compaignie, qui d'Amboyse ou elles estoient se rendirent audit lieu des Montiz. Et apres que monseigneur de Guienne eust este festoie & fait bonne chere pour quelque temps, il print conge du roy & des dames & sen alla a saint Iehan d'Angely, ou il fut festoie par vng maistre abbe du lieu quil retint de sa maison, dont tres mal en print depuis a lun & a lautre, comme vous orrez cy apres; de la tira monseigneur a la Rochelle & autres places & lieux de sa duchie pour disposer des offices & de lestat de la iustice, & y tint ses estatz pour par laduis des nobles & sages de sa duche pourueoir a la chose publique dice-luy.

**C** Comment le roy de France enuoya son ordre de saint Michel nouvellement cree & mise suz au duc Francoys de Bretagne, qui la refusa.

**L**E roy de France, tantost apres le parlement de monseigneur de Guienne, enuoya par deuers le duc de Bretagne certains ambassadeurs, par lesquelz il luy enuoya son ordre de saint Michel nouvellement cree, affin que icelle il portast & fist les sermens tout ainsi que auoient fait monseigneur de Guienne, monseigneur de Bourbon & plusieurs princes & seigneurs du royaume qui prinse lauoiement. Le duc, qui grandement se doubtoit du roy, lequel ne tendoit si non a soy venger de ceulx qui auoient suscite monseigneur son frere a luy donner la lourde venue quil eut a Montlhery, & congnoissoit le roy cault & subtil: aussi que les principaulx bastons pour la deffense du duc, si le roy lui couroit suz, estoient le duc de Bour-

goigne & le roy d'Angleterre, au moyen de laliance de luy & dudit duc de Bourgoigne, lesquelz seroient tres mal contans du duc sil acceptoit lordre, combien que sil eust este certain que le roy neust point fait de nouvelles entreprinsez contre le duc & ses aliez, & quil eust voulu viure en paix avecques les princes de son royaume, le duc y eust voluntiers fiche son esperance, car il aymoist parfaictement le royaume & les Francoys. A ceste cause le duc es plus gracieux termes qui luy fut possible de remonstrer refusa lordre du roy, & sen retournerent ces ambassadeurs par deuers le roy, auquel rendirent son ordre.

Le duc refuse lordre du roy de France.

Le roy de ce aduertit fut merueilleusement mutine, car aucuns aduenceurs dont la court du roy estoit suffisamment garnie luy rapporterent contre verite que le duc auoit prins & accepte du duc de Bourgoigne son ordre de la Toison dor, & quil auoit fait le serment a ce partinent, & que le duc de Bourgoigne auoit prins & accepte du roy d'Angleterre son ordre de la Jarretiere, & que par ce moyen estoient encloues leurs trois testes en vng chapperon. Le roy fut de ces rapportz tresmal content, & bien tost apres ordonna certain nombre de gens darmes & dartillerie pour tirer sur les marches de Bretagne. Et deuant que les faire marcher dedans le pays, il enuoya par deuers le duc ses ambassadeurs luy declarer que le duc se declairast formel aduersaire du roy Edouart, & estoit ce quil demandoit que le duc feist, lesquelz accorderent avecques le duc que dedans la fin du mois de Mars ensuiuant le duc enuoieroit par deuers le roy luy rendre la response de ce quil estoit delibere de faire; ce pendant le duc fist de sa part mettre ses Bretons en armes.

**C** Comment le duc de Clarence & le conte de Duarvich & leurs femmes furent dechassez d'Angleterre par le roy Edouart & descendirent en Normandie; de la natiuite du roy Charles viii, & de certain traicte d'accord qui fut conclud entre le roy de France & le duc de Bretagne.



Au moys de May lan mil cccc lxx, le  
 duc de Clarence, le conte de Vuar-  
 uich, leurs femmes & familles qui  
 dechassez auoient este du pays d'An-  
 gleterre par le roy Edouart a cause de certains  
 grans debatz & questions qui furent entreulx,  
 se misdrent sur mer iusques au nombre de  
 iiii vingtz nauires, & descenderent à Honfieu &  
 a Harfieu en Normandie. Et illecques trou-  
 uerent monseigneur ladmiral qui les recueillit  
 honorablement. Bien tost apres le duc de  
 Bourgoigne aduertit de ceste venue, escriuit  
 lettres missiues a la court de parlement, par  
 lesquelles il mandoit quil auoit sceu que le roy  
 auoit recueilly lesdictz Angloys, qui estoit aller  
 contre lapointement fait a Peronne entre le  
 roy & luy. Et prioit la court de remonstrer ces  
 choses au roy, affin quil ne fauorifast lesdictz  
 de Clarence & Vuaruich, quil disoit estre ses  
 ennemis cappitaulx & du royaume de France,  
 ou autrement il les yroit querir en France,  
 quelque part quil les peust trouuer.

Certain temps apres se retirerent ses An-  
 gloys & leur dames & meignee par deuers  
 le roy de France, & la se rendirent la royne  
 d'Angleterre & le prince de Galles son filz, &  
 illec tous arriuez fut parle par entreulx de la  
 maniere & pour quoy ilz auoient passe la mer  
 & estoient illec venuz. Et apres quilz eurent  
 este festoiez se retirerent ces princes anglois  
 avec leur train en Normandie, & le derrenier  
 iour de Iuing audit an lxx entre deux & trois  
 heures apres minuit la royne acouchea au chas-  
 teau d'Amboise dun filz qui fut nomme Charles  
 par larceuesque de Lyon, & par le prince de  
 Galles filz du roy Henry d'Angleterre, & par  
 madame de Bourbon, dont furent faictes plu-  
 sieurs ioyes & festes par le royaume.

Au moys de Iuillet ensuiuant, se retirerent  
 de par le roy de France deuers le roy de  
 Cecille, a Angers, monseigneur de Guienne, le  
 duc de Bourbon, le cardinal de Lyon, & le sei-  
 gneur de Beauieu, pour trouuer quelque moyen  
 enuers le duc de Bretagne quil prenrist lordre  
 du roy, & quil renonfast entierement a lialiance  
 du roy Edouart d'Angleterre. Le duc y enuoya

semblablement de sa part son chancelier Guil-  
 laume Chauuin, leuesque de sainct Mallo,  
 labbe de Begar, maistre Oliuier du Breil, se-  
 neschal de Rennes, maistre Nicolas de Ker-  
 meno, seneschal de Vennes, & autres gens de  
 son conseil; & furent ses ambassadeurs bretons  
 iusques a Saulmur, ou le roy estoit avecques  
 ledit monseigneur de Guienne & autres dessuf-  
 ditz qui d'Angiers estoient la retournez, fina-  
 blement fut conclud que le roy se contenteroit  
 de ce que le duc ne accepteroit point son  
 ordre, & au regard de se desemparer de la-  
 liance du roy Edouart, fut accorde que le duc  
 nauoit a luy entendement quelconque; mais  
 que si le roy Edouart vouloit entrer es terres  
 du roy & luy faire guerre, lors le duc se de-  
 clareroit formellement contre luy & feroit du  
 party du roy, pour luy secourir & ayder a la  
 garde de son royaume, ainsi que ses predeces-  
 seurs ducs de Bretagne auoient tousiours fait,  
 & sur plusieurs autres articles qui furent mis  
 en termes, fut fait entre eulx quelque appoin-  
 tement, au moyen de quoy le roy retira ses  
 gens darmes & toute son artillerie de dessus la  
 frontiere de Bretagne. Apres cest accord fait,  
 les ambassadeurs de Bretagne sen allerent en  
 Flandres par deuers le duc de Bourgoigne,  
 luy remonstrer ce qui auoit este conclud a  
 Saulmur. Et fut le duc de Bourgoigne bien  
 ioyeux de ce que le duc auoit refuse lordre,  
 pour ce quil croit fermement que le roy ne  
 luy faisoit presenter son ordre, si non pour luy  
 faire perdre toutes aliances d'Angleterre & ail-  
 leurs, affin que par ce moyen il luy peust  
 mettre la main au collet. Et auoit le duc de  
 Bourgoigne tellement aduertit le duc de sen  
 prendre garde, que oncques puis le duc ne  
 print fiance ne seurte en offre ne en parolle  
 que le roy luy ait sceu offrir, presenter ne re-  
 monstrer. Bien desiroit le duc sur toutes  
 choses lialiance de France, & sil eust este cer-  
 tain dy trouuer seur & loyal asses il eust bien  
 volontiers habandonne toutes autres aliances  
 pour accepter celle du roy; mais pour les  
 doubtes dessufdictes que le duc de Bourgoigne  
 auoit si auant imprimees en sa fantaisie, le duc  
 de Bretagne auoit deux cordes en son arc.

## Le quatriesme

Lune tendoit a lialiance & entretenement du roy de France, & de ce conseil estoient Guillaume Chauuin, chancelier de Bretagne; maistre Pierre du Bochet, vichancelier & euesque de Cornoualle; maistre Nicole de Kermeno, seneschal de Vennes, & aucuns autres gens de conseil du duc. Lautre corde tendoit a l'entretènement du roy Edouart d'Angleterre, & ny auoit homme du conseil du duc qui a ceste aliance d'Angleterre entendist riens fors luy & son tresorier general Pierre Landoy; ledit tresorier seul conduisoit & entretenoit ceste aliance, le tout par laduis & conseil du duc de Bourgoigne; toutefois pource que ledit de Bourgoigne fauoit bien que ces ambassadeurs icy de Bretagne qui par deuers luy estoient nauoient aucune congnoissance de l'entendement que le roy Edouart & le duc de Bretagne auoient ensemble, il ne leur en parla aucunement. Et par mer sen retournerent ces ambassadeurs en Bretagne par deuers le duc.

**C** De l'armee que le duc de Bourgoigne mist en mer pour cuider prandre les duc de Clarence & conte de Vuaruich qui estoient en Normandie.

**B** IEN tost apres que les ambassadeurs de Bretagne furent partiz de Flandres, le duc de Bourgoigne qui fut aduerti que ces seigneurs & dames d'Angleterre qui en Normendie estoient, vouloient eulx mettre en mer pour rapasser en Angleterre tendant a les cuider prandre, il mist sur mer vne bien puissante armee d'Angloys, Bourguignons, Flamans & Picars, equippez & aduitaillez pour longuement tenir la mer. Si tirerent ces nauires icy droit au chef de Caulx pource quilz fauoient bien que les nauires desditz de Clarence & Vuaruich estoient a Honfieu prestz a desloger, & furent sur ces marches les nauires de Bourgoigne a lancre par quelque temps. Le roy de France fut aduerti de ceste entreprinse, & pour y pourueoir partit d'Amboise, tira au mont saint Michel en voiage, sen retourna par Caen & Honfieu, & fist en diligence aduitailler, equipper & mettre

sur la grant nef de l'admiral de France la nef de Coulomb & plusieurs autres grans nauires qui la estoient en plus grant nombre que ne estoit l'armee d'Angleterre. Et dedans fist charger plusieurs seigneurs & dames d'Angleterre avecques tel nombre de gens de guerre que lesditz nauires pouoient porter, pour la seurte desditz seigneurs. Et dun bon vent de su qui lors siffoit, deslogerent de leurs haures, delibererent de passer a trauers l'armee des Bourguignons, lesquels voians la puissance de l'armee du roy, se desempererent & escarterent lung sa l'autre la a vau le vent pour donner lieu de passer a l'armee du roy sans la ofer faillir, & en cest estat sen retournerent en Flandres sans riens faire, tous affamez & despourueuz de vitailles, car tout auoit este consumme a la mer.

Coulomb & autres nauires de l'armee du roy.

**C** De la conqueste faicte par le conte de Vuaruich du royaume d'Angleterre pour le roy Henry.

**L** ES nefz francoyses tirerent iusques a la coste d'Angleterre saulvement aux haures de Ploemue & d'Artemue, ou ilz arriuerent vng peu deuant leur de minuyt. La descendirent a celle heure en diligence ces princes de Clarence & de Vuaruich & leurs gens darmes. Si enuoya a toute nuyt le conte de Vuaruich mil ou xii cens hommes bien armez prandre vng baron d'Angleterre qui pres dillec estoit, lequel ilz trouuerent encore couche en son lit, & ne se doubtoit de ceste descente; ilz amenerent ce baron par deuers ces seigneurs, & incontinant quil y fut le conte de Vuaruich, luy fist la teste tranchee; de la tirerent avec toute leur armee a Brisco, ou ilz furent bien chèrement recueilliz. Illec auoit le conte de Vuaruich laisse toute son artillerie & ses bagues quant il partit pour tirer en Normandie. Bien tost apres se rendirent a luy plus de lx mil hommes en armes pour le seruir & acompaigner. Et a toute ceste armee se mist aux champs tousiours cherchant le roy Edouart. Finablement, tous les princes, prelatz & autres gens destat du

Clarence & Vuaruich.

royaulme d'Angleterre se rendirent audit conte de Vuaruich. Et fut le roy Henry, qui prisonnier estoit en la grosse tour de Londres, mis a plaine deliurance, & luy baillerent la possession du royaulme, dont le gouvernement fut baille au conte de Vuaruich. Le roy Edouart, qui se veoit seul & habandonne, sen fouyt a reffuge au duc de Bourgoigne qui sa seur auoit espousee, & laissa en Angleterre sa femme & son mesnaige. Et rapasserent en Angleterre la royne, femme dudit roy Henry, le prince de Galles leur filz, & autres personnaiges qui a reffuge se estoient retirez en France.

**C** Comment le roy Edouart recouura son royaulme. Et comment le conte de Richemont vint en Bretaigne.

**A**U moys de May lan mil cccc lxxi, le roy Edouart partit de Flandres avecques grosse armee d'Austrelins, Flamans, Picars, Bourguignons, Henuyers, & autres nacions que le duc de Bourgoigne luy auoit mise fuz, passa la mer, descendit en Angleterre & fist cruelle & mortelle guerre au roy Henry; finalement par la bataille par entre eulx assignee, en laquelle y eut plusieurs murtreries, fut Edouart victorieux; le roy Henry comme deuant fut prins son filz le prince de Galles & le conte de Vuaruich qui tant auoit au roy de France couste a entretenir, furent occis en ceste bataille, & plusieurs autres princes, seigneurs & gens de renom. Et par ce moyen demoura Edouart roy paisible; plusieurs des seigneurs d'Angleterre qui tenoient le parti du roy Henry sen fuyrent par mer hors du royaulme, & entre autres le conte de Penbroch saulua vng ieune prince d'Angleterre qui lors estoit enfant, nomme Henry, conte de Richemond, lequel estoit des prochains parans du roy Henry, le plus habille a succeder au royaulme d'Angleterre; se mist avecques luy le conte de Penbroch en vne barque sur la mer, tirant a la coste de la basse Normandie de paour de trouuer les Flamans, & tendoit a se retirer en France; mais la fortune de la mer par force de vent & de

tempeste les getterent mal gre eulx a la coste de Bretaigne, & furent contrainctz de y descendre. Le duc en fut incontinant aduerti, & enuoya bonne & seure garde pour recueillir ce ieune prince, le fist amener a Vennes, & la avecques le conte de Penbroch son oncle a este longuement & seurement garde.

Le duc fut moult ioyeux de la venue de ce ieune conte de Richemond, car par ce quil le tenoit en ces mains, il auoit tousiours le roy Edouart a son commandement, lequel moult craignoit que le roy de France ne le recourast; si le roy leust eu, il eut facilement fait roy d'Angleterre: touttefois le duc cherist & traicta ce conte de Richemond moult honorablement, & en bonne seurete fut garde iusques a ce quil partist du pays pour recouurer le royaulme d'Angleterre comme vous oirez cy apres.

**C** Comment le duc de Bretaigne espousa mademoiselle Marguerite de Fois.

**L**E xxvii<sup>e</sup> iour de Iuing lan dessusdit lx et vnze, le duc de Bretaigne espousa en la chappelle de saint Anthoine a Clifson, damoiselle Marguerite seur du conte de Fois, belle dame, prudente & moult discrete. Et fut le seigneur de Lescun, qui lors gouernoit le duc, cause de ce mariage.

**C** Du mutinement qui fut entre le roy & monseigneur de Guienne son frere.

**L**E roy de France qui lors estoit a Han, & auoit avecques luy le duc de Guienne son frere, fut bien desplaisant de la malle fortune du roy Henry & singulierement de la mort du prince de Galles, & aussi de la mort du conte de Vuaruich, que tant il ayroit; de Han en Vermandoys partit tantost apres le roy avec monseigneur de Guienne, & se tirerent a Paris; de Paris sen retourna le duc de Guienne en sa duchie, tout mal contant du roy son frere, ce quil vouloit mal au conte d'Armignac en hayne

## Le quatriesme

de ce quil lauoit suyuy avecques les autres princes du royaume a l'assemblee du bien publicque.

L'an dessusdit cccc lxxi, vers le moys de Ianvier, le duc de Guienne qui retire festoit en sa duchie fut aduertit que le roy auoit fait saisir & mettre en sa main la conte d'Armignac & estoit le conte fuytif hors du royaume, dont le duc de Guienne fut tresmal content du roy. Et enuoya ledit monseigneur de Guienne querir le conte d'Armignac, lequel il fist venir par deuers luy, & luy rendit & mist a plaine deliurance la pluspart de ses heritaiges saizis contre le gre & vouloir du roy. Et puis apres ledit duc de Guienne & conte d'Armignac, le conte de Foix & autres misdrent leurs gens en arme, faignans fusciter quelque guerre. Le roy, qui en fut aduertit, enuoya sur les frontieres de Guienne v cens lances, grant nombre de francs archiers, & de l'artillerie, & par quelque temps les fist tenir sur ces marches.

### La mort du duc de Guienne & la piteuse fin de labbe de Saint Jehan d'Angely.

**A**u moys de may ensuiuant, qui fut lan cccc lxxii, le duc de Guienne trespassa de ce mortel ciecle en la ville de Bordeaux, & fut longuement malade; lon supposoit lors quil auoit este empoisonne ou enforcele par vng abbe de saint Jehan d'Angely, qui grand accez auoit autour de sa personne. Le seigneur de Lescun, qui estoit lun des plus prochains seruiteurs diceluy feu duc, print au corps cest abbe incontinant apres le trespas dessusdit, & le fist lier & garrotter estroitement, & le charger en vne nauire de Bretagne chargee de vins qui estoit deuant Bordeaux, & en diligence le amena a Nantes par deuers le duc, qui tresdesplaisant estoit du trespas dudit monseigneur de Guienne. Le duc fist bien estroitement garder cest abbe en la grosse tour du Bouffoy de Nantes, & commist aucunes gens deglise pour linterroguer & faire son proces. Il fut interrogué comme il appartenoit & confessa de merueilleuses choses. Le

Le duc de Guienne trespasse.

Labbe de saint Jehan d'Angely.

geolier du Bouffoy qui lors estoit, que lon nommoit Andre Perrault, dist & fist dire plusieurs fois au duc que lon se hastast de parfaire le proces dudit abbe & que toutes les nuytz depuis quil fut mis leans en prison, lon auoit ouy en ce Bouffoy le plus horrible bruit du monde; finalement vne nuyt, enuiron xi heures, la foudre par vng gros & espouuentable tonnoire tomba sur ceste grosse tour, ou il fist quelque dommage. Le matin Andre Perrault alla veoir comment ce portoit labbe, & le trouua mort estandu sur la place de la chambre ou il couchoit, & auoit la teste & le visaige enflez gros, aussi noirs que charbon, & auoit la langue tiree plus de demy pie de long hors de la bouche, & en telle maniere finist ses iours labbe de saint Jehan d'Angely.

### L'armee de la Guerche.



**A**PRES que le roy de France fut certain de la mort du duc de Guienne son frere, il sen partit des Montiz ou il estoit, se tira au pays de Guienne, comme a la Rochelle, saint Jehan d'Angely, Bordeaux & autres grosses places, & y mist officiers nouueaux de par luy, & de Guienne fist gouuerneur monseigneur de Beauieu, puis quant il eut mis en seurete le pays de Guienne, il proposa courir sus au duc de Bretagne, quelque traicte qui eust auparauant este accorde entre eulx. Et fist descendre sur les marches de Bretagne son armee quil auoit enuoiee es frontieres de Guienne des le viuant de son frere. Le duc se mist de sa part en armes & fist marcher son armee droit a la Guerche, ou le roy & son armee tiroient.

Le duc aduertist en diligence le duc de Bourgoigne de ce que le roy estoit delibere de luy courir sus. Le duc de Bourgoigne, pour empescher au roy quil nentraist en Bretagne, marcha en pays avec bien grande puissante compaignie de gens de guerre, droit a la ville de Neele, y mist le siege, & le xxii<sup>e</sup> iour de Iuing audit an lxxii, print ville & chasteau par force de baterie, ou il y eut de la bouche-rie & occision piteuse, car les cheualx par les

La Guerche.

rues estoient au sang, a demye paulme de hault, & fist pendre les cappitaines du roy; de la tyra le duc de Bourgoigne a Roye, quil recouura pareillement, & de Roye vinst mettre le siege deuant la ville de Beauuaiz, ou il fist donner de diuers assaulx, touteffois il ne print pas la ville, de la marcha en Normandie, fut deuant Rouen, & partout ou il alloit faisoit brusler places & maisons en grandes desolation. Le roy, qui estoit lors enuiron la Guerche & auoit en barbe larmee de Bretaigne, voiant comment dautre couste le duc de Bourgoigne luy degastoit ses pais, enuoya par deuers le duc de Bretaigne ses ambassadeurs. Finablement fut faicte & pourgectee quelques treues pour vng temps entre le roy, ses pays & subgectz & alliez, & le duc, & les siens, & fut Odet dAcadie seigneur de Lescun cause de faire ledit traicte, dont luy fist le roy de grans biens. Et pour ce que le duc declaira que le duc de Bourgoigne estoit son alie, force fut au roy pour demourer en paix poursuir enuers le duc de Bourgoigne pareil traicte de treues, a quoy le duc de Bourgoigne se condescendit facilement, puis que le roy tiroit son armee de dessus les marches de Bretaigne. Et par la treue le duc de Bourgoigne declaira ses aliez estre lempereur, les roys dAngleterre, dEspaigne, de Portougal, dEscosse, de Cecille & de Arragon, le duc de Bretaigne & plusieurs autres princes.

**C** Comment le cadet dAlbret ii filz dudit seigneur dAlbret furent decapitez & escartelez pour ce que par trahison ilz liuerent la personne de monseigneur de Beauieu entre les mains du conte dArmignac, a Lestore.

**A**U mois doctobre audit an LXXii aduind que monseigneur de Beauieu, qui par ordonnance du roy estoit alle au pays dArmignac comme gouverneur de Guienne, luy estant en la ville de Lestore fut par trahison prins & liure au conte dArmignac, lequel au moyen dicelle

prinse recouura la ville de Lestore. Puis apres que ledit seigneur de Beauieu fust deliure, fist le roy prandre aucunes personnes qui avecques luy auoient este a Lestore, & les fist mener a Loches. Entre autres y estoit vng nomme Iehan dYuer, qui pour ledit cas fut escartele en la ville de Tours, & a sa mort chargea de ladicte traifon le cadet dAlbret, seigneur de saincte Basille, deuxiesme filz du seigneur dAlbret, disant que ce auoit este luy qui en auoit este cause, & que sans luy on ny fust iamais paruenue pour laces & prochainete quil auoit audit seigneur a cause de ce quil auoit este nourry en la maison de Bourbon & en auoit eu moult de biens; a ceste cause se fyoit mondit seigneur de Beauieu en luy plus que en nul autre. Le roy, qui auoit aussi fait prandre ledit cadet dAlbret, fit faire son proces en la ville de Poictiers, & apres quil eust confesse auoir commis & perpetre contre son maistre ladicte trahifon, il fut condempne a estre decapite. Et le mercredi septiesme iour dApruil audit an LXXii, ledit cadet dAlbret seigneur de saincte Basille, ensuiuant ladicte condennacion, eut sur vng hault eschaffault, publicquement, en ladicte ville de Poictiers, le col coupe. Puis furent le corps & la teste mis en vng serqueil dun poille noir arroye de ses armes & porte par les quatre mendians en terre en quelque esglise de la ville.

Le cadet dAlbret decapite a Poictiers.

**C** Du mariage du duc de Bretaigne & de dame Marguerite de Foix.

**L**AN mil CCCCLXXiii, fut fait le mariage de monseigneur de Beauieu & de dame Anne de France, fille ainsee du roy Loys lors regnant. Et audit an, le xxx<sup>e</sup> iour de Mars, fut Iehan Hardy decapite & puis escartele en greue en la ville de Paris, pour ce quil fut attainct & conuaincu dauoir entrepris dempoisonner le roy. Et fut sa teste mise sur vne lance deuant lhostel de la ville, & les quatre membres portez es quatre des bonnes villes des extremitez du royaume, & soubz chascun membre y auoit vng escript qui contenoit la cause dessusdit.

## Le quatriesme

Phelippe des  
Essars, sei-  
gneur de  
Tyeux.

**L**AN mil quatre cens soixante & quatorze, bientoft apres pasques, le duc de Bretagne enuoya certains ambassadeurs deuers le roy de France, & en ceste ambassade estoit Phelippe des Essars, seigneur de Tyeulx, maistre dostel du duc, en qui moult le duc se fyoit, car lauoit recueilli & luy auoit fait plusieurs biens. Ces ambassadeurs yci trouuerent le roy a Senlis, & apres plusieurs communications qui furent entre les commis du roy & les ambassadeurs du duc, le roy fist pratiquer ledit Phelippe des Essars & luy donna de plaine arriuee dix mil escuz & loffice de grant maistre & general reformateur des eaulx & forestz de France que il osta au seigneur de Chastillon pour luy donner, & par ce moyen demoura en France ledit seigneur de Tyeulx.

Lors furent treues prinsees entre le roy & le duc de Bourgoigne pour durer iusques au premier iour d'April lan mil CCCCLXXV. Et fut lambassade de Bretagne cause de ladicte treue, & ladicte treue prinse, le roy se retira en Aniou, & vint en voyage a Nostre-Dame de Behuart, qui est en vne isle en la riuere de Loire, audeffoubz d'Angiers.

**C** Dung arrest donne contre le duc d'Alencon par lequel il fut condempne a estre decapite, & comment le roy de France mist en ses mains la duchesse d'Aniou & recouura la conte de Rossillon.

**G**NUIRON celuy temps fut en la court de parlement a Paris prononce par maistre Pierre d'Ariolle, chancelier de France, certain arrest contre le duc d'Alencon, qui prisonnier estoit detenu, par lequel arrest il fut condempne a auoir le col coupe & ses heritaiges confisquees comme crimineux de lese maieste pour quelque cas dont le roy Loys lauoit en hayne.

**A**PREs ledit arrest prononce, lequel ne fut execute, le roy de France descendit en Aniou & fist mettre en sa main la duchesse d'Aniou qui appartenoit au roy Rene de Cécille & au gouvernement dicelle duchesse com-

mist maistre Guillaume de Cerisay, prothontaire de la court de parlement.

**A**U moys de Januier lan dessusdit mil CCCCLXXiiii, la conte de Rossillon fut par traicte d'appointement mise entre les mains du roy.

**C** Du parlement que les roys de France & d'Angleterre firent ensemble a Picquiny sur Somme.

**L**EXXIX<sup>e</sup> iour d'Aoust lan mil CCCCLXXV, les roys de France & d'Angleterre parlerent ensemble sur vng pont de bois qui fait auoit este en la riuere de Somme, en l'endroit de Picquiny, soubz deulx appentiz de boys qui estoient faiz sur ledit pont. Et auoient ces deulx princes leurs armees des deulx costez de la riuere lune d'une part & lautre de lautre. Et en la presence des gens de leur conseil qui la estoient parlerent ensemble par le temps dun quart d'heure & plus. Puis apres firent retirer leurs gens, & seul parlerent ensemble par longue espace de temps. Et departirent amys. Et par ce moyen firent traicte de treues pour neuf ans, furent liurez au roy anglois LXXV mil escuz pour ses desfroiz, lesquels le roy auoit euz de la ville de Paris par emprunt, & fut dit qu'on paieroit cinq mil escuz par chascun an iusques a la parpaye de la somme qui entre eulx fut accordee, & puis se retira le roy de France a Senlis.

**C** De la mort de messire Loys de Luxembourg, conestable de France, qui fut decapite a Paris.

**A**U moy doctobre audit an LXXV, furent les ambassadeurs de Bourgoigne par deuers le roy de France qui firent quelques treues. Et en ce faisant promisdrent de par le duc de Bourgoigne leur maistre deliurer & mettre entre les mains du roy de France la personne du conte de saint Pol, conestable de France, pour ce quil auoit practique le roy d'Angleterre & ledit de Bour-

Le duc  
d'Alencon  
condempne a  
estre decapite.

goigne a faire contre le roy aucunes entre-  
 prinnes de grande consequence & y auoit voulu  
 gaigner le duc de Bourbon, & pour ceste af-  
 faire auoit pourchasse auoir son scelle; de toutes  
 ces praticques fut le roy de France aduertý, & 5  
 pour en auoir reparation, fist tant enuers le  
 duc de Bourgoigne quil luy deliura ledit con-  
 nestable & le liura a ladmiral de France & au  
 seigneur de saint Pierre qui le rendirent a la  
 Bastille. Tantost apres fut fait son proces par  
 la court de parlement, le chancelier dOriole  
 present; finalement fut condempne comme cri-  
 mineulx de lese mageste a auoir le col coupe,  
 & le xix<sup>e</sup> iour de decembre lan dessudit mil  
 CCCCLXXV, fut ledit connestable execute sur vng  
 eschaffault en la place de Greue deuant lostel  
 de la ville a Paris, & le corps porte par les  
 Cordeliers de Paris enterrer en leur couuent.

**C** De la prinse du duc de Nemours & 20  
 de la Venue du roy de Portougal en France.

**A**U moys de mars lan dessudit mil  
 CCCCLXXV, le roy de France, qui  
 auoit enuoye le seigneur de Beauieu, 25  
 messire Tanguy du Chastel & autres  
 avec grande quantite de gens darmes assieger  
 le duc de Nemours a Carlac en Auuergne, se  
 mist & rendit ledit duc de Nemours es mains  
 desdictz de Beauieu & du Chastel moiennant 30  
 quilz luy promisdrent de par le roy & comme  
 ses lieutenant auoir la vie sauue, ilz le mene-  
 rent deuers le roy en Dauphine & Lyonnoys,  
 ou il estoit, & de la fut mis prisonnier a Pierre-  
 Affise-lez-Lyon. 35

**E**NUIRON le commencement de Nouembre  
 lan mil CCCCLXXVI, le roy de Portougal, qui  
 pretendoit les royaumes de lune & de lautre  
 Castille a luy appartenir, ensemble toutes les 40  
 Espagnes, a cause de sa femme, se partit de  
 son royaume de Portougal & vint descendre  
 es marches de France & tyra a Tours deuers  
 le roy luy requerir ayde a recouurer feditz  
 royaumes. Le roy le receut moult honorable-  
 ment, le fist festoier par vng temps depuis sen  
 partit & tyra a Paris, ou il fist son entree &

y fut honorablement receu le xxiii<sup>e</sup> iour dudit  
 Nouembre, & furent au deuant de luy tous les  
 estatz de Paris iusques au moulin a uent hors  
 la porte saint Jacques a tel honneur que ilz  
 ont acoustume daller au deuant du roy quant  
 il fait son entree.

**C** Comment le duc de Millan fut occis,  
 & de la mort & destruction du duc Charles  
 de Bourgoigne. 10

**L**AN mil CCCCLXXVI, le xxvii<sup>e</sup> iour de  
 decembre, iour & feste de saint  
 Iehan leuangeliste feriers de Nouel,  
 le duc de Millan fut tue par vng  
 gentilhomme du pays, faignant parler a luy  
 dedans leglise de Millan, ou il se pourmenoit  
 avec vne ambassade qui par deuers luy estoit  
 venue. Ce gentilhomme vint secretement luy  
 bouter vng poignart par la fente de sa robe  
 dedans le petit ventre, & sans dire mot cheut  
 soudainement mort a terre. Et fut pource que  
 le gentilhomme & ses parans auoient mis &  
 employe tout leur vaillant pour paier la vacante  
 dune abbaye pour lun de ses parans, auquel  
 le duc de Millan lauoit ostee pour la bailler a  
 vng autre, & combien que plusieurs fois le  
 gentilhomme luy auoit requis iustice & fait  
 plusieurs requestes de len laisser & souffrir ioyr  
 comme la raison estoit, le duc de Millan ne  
 luy voulut accorder; a ceste cause, le gen-  
 tilhomme se accointa dun notable homme & de  
 ladicte ville qui mortellement hayoit le duc de  
 Millan, tellement quil auoit delibere de le tuer  
 pour ce quil luy auoit rauy & detenoit sa  
 femme. Eulx deulx assemblement dun accord  
 se trouuerent en ladicte esglise de saint Es-  
 tienne de Millan, deliberez de meurtrir le duc  
 de Millan, & ledit gentilhomme luy bailla le  
 coup dont sur le champ & sans mot dire il  
 tumba mort en ladicte esglise, en laquelle in-  
 continent le gentilhomme fut occis & son com-  
 paignon semblablement.

Par la sentence des iuges & nobles de la ville  
 fut delibere que tous les hommes & femmes &  
 aussi les enfans qui parans estoient iusques a  
 la iii<sup>e</sup> ligne dudit gentilhomme & de son

Le duc de  
 Millan occis  
 en leglise.

Merueilleuse  
 vindication.

Le conte de  
 saint Pol,  
 connestable,  
 decapite.

Le roy de  
 Portougal vint  
 a Tours  
 deuers le roy  
 de France.

## Le quatriesme

compaignon feroient occis & mis a mort, leurs maisons & bastimens desmoliz, & rues par terre, les arbres portans fruitz defracinez & les autres coupez a moictie, ce que fut fait.

### La iournee de Nancy.

**E**NUIRON celuy temps le duc de Bourgoigne, qui auoit mis le siege deuant Nancy en Lorraine, mist les gens qui dedans estoient pour le duc de Lorraine en telle necessite de fain que ilz fesoient par grant famine mis en traicte de composition de eulx rendre es mains du duc de Bourgoigne. Le dimenche vigille des Roys, v<sup>e</sup> iour de Ianvier audit an LXXvi, arriua le duc de Lorraine acompaigne de x a xii mil Suyffes & autres gens de guerre, pour leuer ce siege, dont aduind la fortune qui ensuit, & fault entendre que iiii iours deuant la iournee le conte de Campast, le sire Auge & le seigneur de Montfort abandonnerent le duc de Bourgoigne, & le mercredy deuant la bataille, iceluy conte de Campastz emmena auecques luy ix xx hommes darmes. Et le samedy deuant les deulx autres capitaines dessus nommez, en enmenerent vi xx hommes darmes, qui tous vouloient estre Francoys. Et le samedy iiii<sup>e</sup> iour dudit Ianvier, arriua a saint Nicolas de Varengeuille le duc de Lorraine, acompaigne de dix mille cinq cens Suyffes, & grant nombre dautres Allemans.

**L**E dimanche v au matin diceluy iour, se desemparerent le duc de Lorraine & ses Suyffes vindrent a Neufuille pres dun estang & la firent leurs ordonnances. Et en effect les dictes Suyffes se misdrent en deulx bendes & enuiron midy marcherent tous a vne foiz, vne bende vers la riuere, & lautre vers le grant chemin de Neufuille a Nancy.

Le duc de Bourgoigne fesoit ia mis hors de son parc en bataille, & au deuant & deuers luy y auoit vng ruisseau qui est entre deulx hayes tres fortez entre luy & lesditz Suyffes. Et sur le grant chemin par ou marchoit lune des bendes desditz Suyffes, auoit le duc de Bourgoigne fait asseoir le plus fort de son artillerie,

& ainsi que les deulx bendes marcherent, & quelles furent a vng gyt darc des Bourgoignons, deschargea lartillerie sur les Suyffes, & y fist quelque dommaige. Et celle bende de Suyffes laissa le chemin & tyra au dessus, vers le bois, & fist tant que elle fut au coste du duc de Bourgoigne au plus hault lieu.

Le duc de Bourgoigne fist tourner ses archiers, qui tous estoient a pie, deuers les Suyffes, & ordonna deulx aelles de ses hommes darmes pour combatre, dont lune conduisoit Jacques Galliot italian, & l'autre messire Iosse de Lalai. Si tost que ses Suyffes se tournerent au dessus & au coste du duc de Bourgoigne, tout a vng coup se tournerent le visage vers luy & son armee, & sans arrester marcherent impetueusement & plus fierement que iamais firent gens & a laprocher pour ioindre, deschargerent leur couleurines a main, pourquoy tous les gens de pie du duc de Bourgoigne se misdrent en fuite.

La bende de Suyffes qui estoit deuers la riuere marcha quant & quant celle de Galiot, & frapperent les Suyffes dedans eulx tellement quilz furent incontinant deffaiz. Lautre aelle desditz Bourgoignons tourna pareillement sur lautre bende de Suyffes, mais bien furent recueilliz, & des ce que les gens de cheual bourgoignons auiferent leur gens de pie qui se misdrent en fuyte, tous les gens de cheual de larmee de Bourgoigne picquerent apres & tyrent pour passer au pont de Bridores, a demye lieue de Nancy, qui estoit le chemin a tyrer vers Thyonuille & Luxembourg. Or estoit ce pont empesche de chariotz, que lon auoit fait mettre a travers, & ainsi qua foudre les Bourgoignons y arriuoient, lesquels ne pouuoient passer, le duc de Lorraine & ses gens les suyuoient au dos, parquoy furent Bourgoignons contrains de eulx gecter aux guetz de la riuere. Et la fut la grande desconfiture, & plus la moitie que au champ. Aucuns, quand ilz sceurent lempeschement dudit pont se tyrerent vers les bois, & on les suyuoit tuant tellement que a quatre lieulx enuiron lon ne trouuoit que gens mors par les champs, & dura la chasse contre les Bourgoignons iusques a deulx heures

de nuyt, que le duc de Lorraine senquist de touz costez que estoit deuenue le duc de Bourgoigne, sil sen estoit fouy ou prins, mais a leure nen peust scauoir nouuelle.

**E**T le lendemain, qui fut le lundi iour des Roys, ledit conte de Campast monstra vng paige qui prins auoit este, lequel estoit avec ledit duc de Bourgoigne. Et apres quil eust este interroge fut iceluy paige mene a grande compaignie de gens de guerre au lieu ou ledit de Bourgoigne gisoit mort, & estoit ia tout nud & enuiron luy quatorze hommes mors, tous nudz, & auoit le duc de Bourgoigne vng coup de halbarde a vng coste du milieu de la teste, par dessus loreille iusques aux dens, vng coup de picque a trauers les hanches, & vng autre coup de picque par le fondement.

Fut congnu clerement que cestoit le duc de Bourgoigne a six choses, lune au dens de dessus quil auoit autrefois perdues par vne cheute. La seconde dune cicatrice quil auoit a la gorge, a cause dune playe quil eut a la rencontre de Montlhery. La tierce a ses grans ongles, car iamais ne les faisoit roigner. La iiiie, dune autre cicatrice quil auoit en vne espaulle, a cause dune escarbouche que autrefois auoit eue. La cinquiesme fut a cause dune fistulle quil auoit au bas du ventre. La sixiesme fut dun ongle dun orteil quil auoit retrait. Son medecin, ses varletz de chambre, le grand bastard messire Oliuier de la Marche, son chappelain & plusieurs autres, qui bien le congnoissoient, tesmoignerent que cestoit le duc de Bourgoigne.

Apres quil eust este congnu on le porta a Nancy & illec fut laue & nettoye, & mis en vne chambre obscure tendue de veloux noir. Et sur vne table fut le corps estandu habille dun vestement de toille depuis le col iucques au piez, & dessous sa teste fut mis vng orillier de veloux noir, & dessus le corps vng poille de veloux noir a vne grande croix blanche, & aux quatre cornieres y auoit iiii cierges, leaue beniste au piez, & en tel estat le venoit veoir qui vouloit. Tantost apres le fist le duc de Lorraine enterrer honorablement, & luy fist faire beau seruice.

**C** La natiuite de ma dame Anne fille du duc de Bretagne, laquelle fut depuis royne de France.

**L**E XXV<sup>e</sup> iour de Ianuier, qui est le iour de la conuersion saint Paol, lan dessusdit soixante & seize, la duchesse de Bretagne dame Marguerite de Foix acoucha au chasteau de Nantes dune fille qui fut nommee Anne, laquelle fut royne de France, & est celle dont iay fait mention au premier prologue de ceste presente cronicque.

**C** Des places de Picardie qui se rendirent au roy sauf la Ville d'Arras.

**A**PRES que le roy de France eust este deurement acertene de la mort & deffaicte du duc Charles de Bourgoigne, il en fut moult ioyeux, car par ceste deffaicte il pensoit estre certain que le duc de Bretagne nauoit plus damys qui ayder luy peussent contre le roy; touteffois deuant que le roy de France se declairast vouloir courir sus au duc de Bretagne dont il auoit voulente, il se retyra sur les marches de Picardie a Compiagne & a Noyon; ce pendant quil y estoit ce reduisirent a luy les places d'Abbeuille, Peronne, Mondidier, Montereul & autres denuiron Arras; mais ceulx d'Arras se fortifierent contre luy de gens de guerre, viures & artillerie. Et le roy de sa part fist grans amas de gens de guerre, pionniers, artillerie, pouldrez & autres preparatifz plus que iamais nauoit fait, & fut pour assaillir & prandre par force la ville d'Arras.

**C** Comment le roy de France descouurit & declaira au chancelier de Bretagne les secretz entendemens dentre le roy d'Angleterre & le duc de Bretagne.

**V**OUS auez cy deuant peu veoir en l'article faissant mention de lordre du roy de France quil enuoya au duc de Bretagne comment le duc cuidoit

Le duc de Bourgoigne Charles fut trouue mort en vng fosse.

## Le quatriesme

entretenir lalliance du roy Edouart fans ce que le roy Loys en sceust riens, car veritablement le duc estoit tout aduertý que incontinant apres que le roy auroit recouert Arraz il luy courroit fuz en Bretagne. Or nauoit le duc plus despe-  
5 rance en Bourgoigne, parquoy force luy estoit entretenir ce roy d'Angleterre, mais il tendoit a ce faire fans ce que roy Loys en sceust riens, & comme il est dit deuant le tresorier Pierre Landoys & soubz luy maistre Guillaume Gue-  
10 guen, qui depuis fut euesque de Nantes, luy seul auoit la charge de conduire cest entrete- nement, & pour messaiger le tresorier Landois auoit vng ieune Breton nomme Maurice Bromel, qui portoit par mer en Angleterre par de-  
15 uers le roy Edouart les lettres du duc, & d'Angleterre apportoit au duc les lettres dudit roy Edouart, & fist ce Maurice cy plusieurs voyages par le temps de deux ou troys ans en Angleterre fans que le chancelier Chauuin, le  
20 vichancelier ne autres du conseil du duc en sceussent quelque chose, fors Landois & Gueguen. Or, est il que le duc cuidant rompre lentreprinse que le roy de France vouloit contre luy & ses pays faire, enuoya son chancelier  
25 Guillaume Chauuin, maistre Nicolle de Kermeno, seneschal de Vennes, & cinq ou six autres grans personaiges de sa court, par deuers le roy Loys, qui lors estoit en Artoys ou il faisoit ses preparatifs pour assaillir & prendre  
30 Arras. Incontinent que ces ambassadeurs bretons furent arriuez a la court du roy de France, le roy les fist tous arrester & mettre a part lun de lautre en diuerses gardes. En cest estat furent detenez par douze iours fans pou-  
35 uoir scauoir la cause de leur detention, puis apres le roy manda & fist venir par deuers luy le chancelier de Bretagne quil estimoit homme loyal & droict. Si luy dit le roy : Monseigneur le chancelier, ie vous prie, dictes  
40 moy pourquoy cest ie vous ay ainsi traicte & detenu, vous & voz compaignons. A quoy le chancelier respondit : Sire, ie ne puis pincer la cause qui vous a meu a ce faire, si non que vous aiez quelque suspicion ymaginatiue contre  
45 le duc ou contre nous comme vous auez eu tousiours, sil y a quelque autre chose, sire,

vous plaise me le declairer, & ie vous y re- pondray a la verite. Voire, ce dit le roy, si vous asaez & ne vous ventez plus large. Ne ma- uez vous pas dit & assure parcy deuant au  
5 deulx derniers voyages que feustes par deuers moy, que beau nepueu de Bretagne vostre maistre nauoit contre moy aucun entende- ment aux Anglois. Sire, dit le chancelier, ie le vous assure sur ma vie, car ie scay bien  
10 tant de luy que pour mourir il ne voudroit auoir aucun entendement en Angleterre contre vous ne vostre royaume. Ha, dist le roy, & si ie vous monstre le contraire le croies vous. Sur quoy luy dist le chancelier quil feroit comme  
15 saint Thomas fist de la resurrection nostre Seigneur. Alors tyra le roy a part le chancelier Guillaume Chauuin, & luy mist deuant luy vingt deulx paires de lettres, dont les douze estoient escriptes de la main de maistre Guil-  
20 laume Gueguen & signees de la main du duc, & les x estoient signees de la main du roy Edouart d'Angleterre. Le chancelier par ordonnance du roy ouurit toutes ses lettres qui contenoient  
25 plusieurs subtiles & secrettes entreprinse de la descence du roy Edouart a Calaiz & marcher en France au cas que le roy fist semblant de vouloir marcher en Bretagne.

**Q**UANT le chancelier de Bretagne eust veu & leu tout ce que les lettres contenoient, il  
30 supplia treshumblement au roy que sil scauait homme en toute lembassade feust luy ou autre qui fust consentant de ceste entreprinse, quil en fist faire aigre & publicque iustice. A quoy le  
35 roy respondit : Monseigneur le chancelier, ie scay bien que vous ne voz compaignons nen scauez riens, & que pour chose quelconque ne voudriez estre dun tel conseil, beau nepueu na eu garde de vous y appeller, il na que son  
40 tresorier & son petit secretaire Gueguen qui conduisoit ceste marchandie, & pour ce vous voiez clerement que ie ne vous ay pas fait arrester a faulses enseignez ne par ymaginatiue  
45 suspicion, retournez vous en vous & vos compaignons par deuers beau nepueu de Bretagne, portez luy ses lectres & luy dictes que ie ne veulx plus quil enuoye par deuers moy pour

me cuider estimer son amy fil ne se deffaiçt de tout point de ce roy d'Angleterre. A toute ceste responce print le chancelier de Bretagne congie du roy, furent tous ses ambassadeurs mis a plaine deliurance, & sen retournerent en Bretagne sans auoir declaire ne propose deuant le roy leur charge.

**Q**UANT ces ambassadeurs furent arriuez a Nantes, le chancelier de Bretagne se tira par deuers le duc qui estoit en son chasteau & luy declaira & remonstra comment le roy de France les auoit traicte & que on ne les auoit voulu oyr, mais les auoit renuoiez tous telz que par deuers luy estoient allez, dont le duc fut moult esmerueille, disant quil estoit impossible de meçtre hors de lentendement du roy vne fantasie quand elle y estoit imprimee, & puis quil ne se fyoit en personne, cestoit signe que lon ne se deuoit pas en luy fier.

Le chancelier de Bretagne dist au duc que fil luy plaisoit se retirer a part, il laduertiroit daucunnes secraittes matieres que luy auoit reuelles; le duc se retyra en sa garde robe ou chambre de retraicçt, le chancelier Chauuin avecques luy.

Après que eulx deulx furent enfermez en ceste chambraille, le chancelier recita au duc les termes que le roy lui auoit tenez, & finalement luy monstra les vingt deulx paires de lettres que le roy luy auoit baillees, dont le duc fut moult esbahy. Si fist le duc entrer en ceste chambraille son tresorier Pierre Landoys, & luy dist : Pierre, voyci des lettres que le roy ma enuoiees par mon chancelier, aduisez qui a ce fait, car il fault que ce ait este vous ou moy.

**L**E tresorier Pierre Landoys fut merueilleusement effroye quant il eut veu ces lettres. Se mist humblement a genoulx deuant le duc, & luy dist : Monseigneur, si vous auez sur moy quelque suspicion en ceste matiere, vous plaise me commander que ie me meçte en lune des prisons de vostre pais, ou il vous plaira, & sur ma vie ie my rendray pour ester a droicçt en tel proces quil vous plaira ordonner. Monsei-

gneur, scauez assez que ie neusse pas voz lettres en Angleterre, il estoit requis que iy enuoyasse quelque lyger personnaige dont on ne se feust iamais doubtte, iauoie vng secretaire nomme Maurice Bromel qui nest pas homme dapparence, & lay tousiours trouue secret & loyal seruiteur. A ceste cause a iceluy ay baille la charge de passer la mer & pourter voz lettres au roy d'Angleterre, & iamais ny enuoie homme que luy pour cest affaire, il est habille & subtil compaignon, & croy que fil est possible de le recouurer, vous saurez par luy la verite de ceste besongne.

Or, dist le duc, faictes diligence de le recouurer, quoy quil couste, que ie faiche par qui cest embusche est descouuerte. Nauoit pas six iours que ledit Maurice estoit expedie du tresorier avec semblables lettres pour retourner en Angleterre, & estoit ia au Porc Blanc prest a charger a quelque balemer que passer vouloit en Angleterre; les messagiers du tresorier firent telle diligence que ilz trouuerent Maurice ainsi quil vouloit entrer au nauire. Si le prindrent & lamenerent a Nantes; la fut examine & son proces fait par lequel il confessa quil y auoit quelque personnaige a Cherbourg en Normandie a qui il auoit entendement pour aduertir le roy Loys de la charge quil portoit, & estoit ledit Maurice si tres subtil, quil sauoit contrefaire lescripture de maistre Guillaume Gueguen & le feing manuel du duc de Bretagne. Aussi sauoit contrefaire lescripture du secretaire d'Angleterre & le feing manuel du roy Edouart, & ces lettres ainsi contrefaictes, bailloit dune part & dautre, & garδοit les originalles & quelquefoiz lan y trouuoit en passant le moyen de descendre a Cherbourg, & bailloit les originalles pour porter au roy Loys, & de chascunne lettre missiue, fust dung party ou dautre, il donnoit a Maurice cent escuz dor. Apres que le proces de Maurice eust este fait secretement, on lenuoya au chasteau d'Aulray ou il fut detenu quelque peu de temps, & puis fut noye au pie du chasteau de nuyt, & le plus secretement que lon peut, affin que le roy Loys nen eust congnoissance. Mais en fut il depuis aduerty.

Maurice Bromel est prins.

Maurice Bromel est noye a Aulray.

La remon-  
trance &  
excuse du  
tresorier  
Landoys.

## Le quatriesme

**L**E dimanche iiii<sup>e</sup> iour de May lan mil CCCC LXXvii, furent par le roy ceulx d'Arras receu a composition apres que leur ville eust este abbatue en plusieurs lieulx par artillerie.

**C** Comment messire Tanguy du Chastel, estant avec le roy deuant Boucham, fut frappe dun coup de couleurine dont il mourut.

**A**PRES que le roy Loys eust mis en son obeissance la ville d'Arras, il tira avec son armee au pays de Henault, assiegea Conde & le Quesnoy, quil print, puis tira a Boucham, qui pareillement fut rendu, mais deuant furent aucuns Francoys tuez, & entre autres messire Tanguy du Chastel, cheualier de lordre, y fut frappe dun coup de couleurine, luy estant pres du roy deuant la place, & de ce coup alla tantost de vie a trespas, dont le roy fut moult dolant pour lamour quil auoit a luy comme bien il monstra, car il le fist porter enterrer dedans le cueur de Clery, pres du lieu ou le roy auoit esleu sa sepulture.

**C** Comment le duc de Nemours fut execute a Paris.

**L**E lundi quatriesme iour d'Aoust lan dessusdit septante sept, messire Jacques d'Armignac duc de Nemours, qui auoit este mis prisonier en la Bastille, a tel & semblable quatriesme iour d'Aoust lannee precedente, lequel par arrest daucuns conseillers de parlement avec le chancelier de France maistre Pierre d'Oriolle, monseigneur de Beauieu, monseigneur de Montagu, messire Bouffille de Iuge & autre, deputez de par le roy pour assister a son proces, tous assemblez pour cest affaire en la ville de Noyon, auoit este pour aucuns cas de crime que on luy mettoit suz, condempne par arrest crimineulx de crime de lese maieste, & comme tel condempne a estre decapite, eust au halles de Paris sur ung eschaffault, enuiron trois heures apres midy diceluy iour, le col tranche & la

teste du corps separee. Puis furent le corps & la teste deliurez aux cordeliers de Paris qui lemportèrent en leur couuent, et leans fut inhumé.

**C** Le traicte d'accord du different qui estoit entre le duc de Bretagne & leuesque de Nantes touchant son serment de fidelite.

**E**N celuy temps messire Pierre du Chaffault, docteur es droitz, fut euesque de Nantes apres la mort de messire Amaurri d'Actigne, precedant euesque. Ledit d'Actigne & son predecesseur Guillaume de Malestroit auoient este tellement en lindignacion des ducs de Bretagne quilz furent residens hors de Bretagne par long temps pour raison du different de leur hommaige. A quoy iamais ne peurent estre d'accord; toutesfoiz au moys de Nouembre le duc fist assembler a Nantes plusieurs gens clerks & gens de conseil a la requeste dudit du Chaffault, lequel nouvellement auoit este esleu euesque contre son vouloir, & iamais ne se y feust condescendu si le duc & ceulx de lesglise de Nantes ne luy eussent promis accorder leur different, & iura que iamais ne porteroit crosse, mitre, iusques a ce que ce discord eust este paciffie. Finablement, moyennant la grace du saint Esprit qui a ceste fin fut deuotement imploree par processions & prieres singulieres par chascun iour que lon estoit pour cest affaire en conseil, lon faisoit a Nantes, le duc, leuesque & son esglise furent d'accord. Cest assauoir leuesque de Nantes, par laduis & conseil des doyen & chappitre de son esglise, aduoua le duc son souuerain seigneur, fondateur, protecteur & garde de son esglise de Nantes par sur tous autres princes & seigneurs temporelz, & iura estre a luy & a ses heritiers ducs de Bretagne toute sa vie bon & loyal subgect, son ressort souuerainete de luy & ses grans iours obseruer & obeir au reliefuement de son parlement soubz le dernier ressort du saint siege apostolicque, & non dailleurs. Nentendant leuesque en ce faisant aucun preiudice faire aux libertez & priuileges de son

esglise, & dudit accord furent passees lettres du xxviii<sup>e</sup> iour de decembre lan dessusdit mil CCCCLXXvii, soubz les seaulx dudit euesque & de plusieurs autres. Et de ce fait fut leuesque consacre. Il fut homme de saincte vie, & dit on que apres sa mort il resplandit par miracles en lesglise de Nantes ou certain temps depuis il fut enterre.

**C Du duc de Clerence frere du roy d'Angleterre qui par sentence fut noye en vne pippe plaine de Maluesie.**

**L**AN mil quatre cens septante & huyt, au moys de feburier, le duc de Clerence, frere du roy Edouart d'Angleterre, fut accuse dauoir entrepris de passer la mer & descendre en Flandres par deuers la duchesse Marguerite qui veufue estoit du duc de Bourgoigne, & luy donner secour & luy ayder en ses guerres contre le roy son frere. Son proces fut fait & parfait, & tellement que par sentence ledit duc fut declere criminel du crime de lese mageste & condempne a estre traîne depuis la grosse tour de Londres iusques au gibet de la ville, & illec auoir le ventre fendu & ouuert, ses entrailles arrachees & gettees dedans vng grant feu, & puis luy couper le col & luy mettre le corps en quatre quartiers. Mais depuis, a la grande priere & requeste de la mere desditz Edouart & de Clerence, fut la maniere de mort changee, car apres quil eust este confesse, il fut par le borreau gecte dedans vng queue plaine de Maluesie, la teste au fons. Et y demoura iusques a ce quil eut rendu lesprit. Puis fut tyre hors de ce tonneau et luy fut le col coupe, & apres fut ensepueley & porte en terre aux Carmes pres de sa feue femme, qui fut fille du conte de Vuaruich.

**C Du mariage de larcheduc d'Austriche & de la contesse de Flandres fille du feu duc de Bourgoigne.**

**G**NUIRON celuy temps, les Flamans, voyans que point nauoient de chef pour la conduicte de leur guerre, traicterent le mariaige de leur con-

tesse fille du feu duc Charles de Bourgoigne & de Maximien duc d'Austriche filz de Frederich empereur d'Alemaigne. Et furent lors ses guerres en Bourgoigne, Flandres & Henault moult apres par les gens du roy de France. Dolle fut prins d'assault, pillee & bruslee. Le chasteau de Boucham, que les Francoys tenoient, fut repris, & ceulx de la place furent tuez.

Lan mil quatre cens LXXIX, les habitans de la ville de Cambray, qui par certaine composition faicte entre les gens du roy & eulx lannee precedente deuoient estre neutrez, se mirent eulx mesmes en lobeissance du duc d'Austriche & chasserent dehors les gens du roy de France qui dedans le chastel estoient.

**E**N celuy temps, le roy de France se retira a Tours en voyage a monseigneur saint Martin & ordonna que le treilliz de fer qui estoit autour de la chaffe ou est le corps saint fust oste & y en donna vne dargent toute de pareille facon que la precedente qui estoit de fer, & poise le treilliz v mil vii cens LXXvi marcs deulx onces vng gros dargent au pris de xi liures tournois pour marc argent & facon.

Le treilliz dargent de saint Martin de Tours.

**C La rencontre de Guinegate.**

**A**U moys d'Aoust lan dessusdit LXXIX, le duc d'Austriche & le conte de Romont, acompaignez de LX mil combatans, se mirent aux champs pour assaillir la ville de Therouenne & se vindrent parquer en vng villaige appelle Guinegate, entre Therouenne & Aire, a demye lieue dudit Therouenne ou estoient les gens du roy. Et la firent plusieurs courses & assaulx, ausquelz resisterent les gens darmes de la compaignie du duc de Bourbon & autres qui en ladicte ville estoient. Les cappitaines & cheffz de guerre qui estoient a Arras, Bethune & autres villes de Picardie, de ce que dessus aduertiz se assemblerent vng iour a Therouenne, faillirent aux champs pour combatre les dessusditz Flamans, & donnerent si roidement sur eulx quilz mirent en defarroy lauant garde dudit duc d'Austriche, au moyen de quoy

Guinegate.

## Le quatriesme

luy & tous ceulx de son armee se misdrent en fuite & se retirerent dedans la ville de Aire, fuiuiz & chacez furent par les gens darmes francois iusques dedans les fossez & portes de la ville. Toutefois, pour ce que les gens du roy de France, mesmement les francz archiers fuyuans la chance, se misdrent au pillage & a despouiller ceulx qui occis auoient este a la fuite, ledit conte de Romont, qui sen apperceut, rallia vng grant nombre de pietons & picquiers iusques a xiiii ou xv mil combatans & retourna tout court sur lesditz francs archiers, & tous furent occis. En celle rencontre, tant a la fuite que au retour dudit de Romont furent occis, tant de Flamans que de Francois, xviii ou xx mil personnes, dont y auoit trois cens hommes darmes des ordonnances du roy, & de xi a xii mil Flamans, le fourplus des mors estoient les francs archiers de France; la furent sur le champ occis Vuaste de Montespodon, bailly de Rouen; Jehan le Beauuoisien, cappitaine, & autres chefz de guerre francois. Et furent prins & mis a rancon de neuf cens a mil Flamans, dont le filz du roy de Poulaine fut lun.

**T**ANTOST apres la rencontre de Guinegate, le duc d'Autriche rassembla des gens & alla mettre le siege deuant la place de Mal-Aulnay, dont le cadet Raymonnet auoit la garde pour le roy de France. La place fut batue & prinse, & furent le cadet & autres Francois qui dedans estoient penduz les vngz & les autres autrement occis. Le cadet fut pendu, dont le roy de France fut si mal content que en hayne de ce, il fist pendre l des meilleurs prisonniers qui prins auoient este a Guinegate. Cest assauoir: x des plus espiciaulx au propre lieu ou le cadet auoit este pendu; x autres deuant Douay; x deuant saint Omer; x deuant Arras, & x deuant Lisle. Et estoit executeur desdictes commissions le preuost des marechaulx, acompaigne de viii cens lances & vi mil francs archiers. Tous lesquels sen allerent courir la conte de Flandres & autres pays diceluy duc d'Autriche, en costoyant la conte de Guines, auquel voyage ilz prindrent xvii places & mai-

sons fortes, tuerent & bruslerent en pillant & faisant tous gatz & dommaiges acoustumez en fait de guerre.

### La diuision dentre Guillaume Chauuin chancelier & le tresorier Landoys.

**E**N ce temps, le duc de Bretagne se tenoit en son pays coy & paisible; car il veoit que le roy de France estoit autant ou plus occupe lors quil nauoit este du viuant du duc de Bourgogne, & par ce moyen ne luy tenoit de faire la guerre en Bretagne; mais en la court du duc y eut en ce temps vne merueilleuse picque entre Guillaume Chauuin, chancelier, & Pierre Landoys, tresorier; car Pierre Landoys auoit en mains le duc, par ce que en toutes ses voluntez telles quelles il le fauorisoit & y obeissoit tresbien. Et le chancelier estoit renommé estre homme droit & iuste a qui plusieurs defaulx quil veoit en court desplaisoient grandement, & pour mourir ne se feust voulu humilier enuers le tresorier; a ceste cause & par vindication mist le tresorier Landoys le chancelier en lindignacion du duc, disant que le chancelier auoit vng secret entendement au roy de France, & pour fulsir son dire, remonstra comment le seigneur de la Muce, filz ainsé du chancelier, sestoit retire en France: ceste picque dura entre ces deux personaiges tant & tellement que chascun fut cause de la mort scandaleuse lun de lautre, comme vous orrez cy apres.

### Comment le cardinal Balue fut deliure & mis hors des prisons du roy de France a la requeste du cardinal Petri Aduincula, legat.

**L**AN mil iiii cens iiii vingtz, au moys d'Aoust, fut accordee une treuë entre le roy de France & le duc d'Autriche, pour le temps de sept moys. Et le lundi iiii<sup>e</sup> de septembre, le cardinal Petri Aduincula entra a Paris comme legat en France, & le roy, a la requeste du legat, fist

deliurer hors de prison le cardinal Ballue, dont cy deuant auons parle. Tantoist apres le roy fist abatre & casser tous les francs archiers de son royaulme pour les pilleries & enormes griefz quilz faisoient au peuple de France, & en leurs lieux delibera se seruir de Suyffes & estrangers. Et auoit le roy le pays de Bretaigne en si grande hayne quil deffendit a tous ceulx du pays d'Aniou & Poitou de porter ne vendre vin aux Bretons, sur paine de la hart. Toutefois aucuns Engeuins faisoient charrier leurs vins en caues & celiers sur les marches de Bretaigne, de nuyt ou de iour les Bretons par force les enleuoient; mais ilz payoient secretement les pures gens a qui le vin appartenoit, & par ce moyen encores beuoient Bretons vin d'Aniou, quelque mal gre que le roy en eust.

**E**N celle annee cccc iiii vingtz, liuer comença a tart: cest assaouir le iour saint Estienne, lendemain de Nouel, & dura vi semaines, comme iusques au viii<sup>e</sup> iour de feurier, durant lequel temps furent de toutes pars les riuieres si trefgellees, que cheualx, charrettes & chariotz chargez passoient par dessus.

**L**AN mil cccc iiii vingtz & vng, au royaulme d'Espaigne fut descouuerte & manifestee leresie abhominable daucuns iuifz d'Espaigne, lesquelz se faisoient baptiser publicquement, faignans estre crestiens. Et y en auoit qui fut esleu euesque, lequel avec le principal de lordre des freres mineurs & plusieurs chanoines & autres gens furent brullez en Espaigne.

**C** Comment messire Jacques d'Espinau, euesque de Rennes, fut depossede de son euesche par le moyen du tresorier Landoy.

**A**NUIRON celuy temps, le tresorier Landoy, qui tous les affaires de Bretaigne tendoient a gouverner, voulut faire ung sien nepueu, nomme Michel Guibe, euesque de Rennes, & pour y paruenir donna entendre au duc que messire Jacques d'Espinau, qui estoit lors euesque de Rennes, &

estoit homme droit, de bonne & grande prudence, estoit hereticque. A ceste cause obtint de Romme ledit Landoy quelque brief pour faire son proces; finalement ledit d'Espinau euesque fut prins au corps, ces biens, meubles, qui a grande somme se montoient, furent saiziz & mis de par le duc entre les mains de ceulx que ledit Landoy, tresorier, y voulut commettre, & pour coadiuteur fut audit d'Espinau baille ledit Michel Guibe, lequel estoit lors euesque de Dol. Bien tost apres ledit messire Jacques d'Espinau ainsi empesche & detenu trespasa, & par son trespas, au moyen de certaines telles quelles promissions apostolicques, fust ledit Michel Guibe translate de Dol a Rennes, & Tomas Iames, qui lors estoit courtisen a Romme, fut euesque de Dol. Ledit d'Espinau fut moult plainct, car il estoit de grant sang & lignaige, & si auoit quatre ou cinq de ses nepueuz grandement auctorisez en France, dont lun estoit archeuesque de Lyon & de Bourdeaux & cardinal en leglise de Romme; autre estoit euesque de Valence; autre fut euesque de Mirepoys; autre euesque de Nantes; autre doyen de Clery, & autre fut seigneur de Segre, tous estoient gens de grande noblesse & bonne reputation, lesquelz ne purent subuenir a leur oncle pour lauctorite que ledit Landoy auoit lors.

**E**N celle annee les Turcs assiegerent Rhodes, & tellement batirent les murs de la ville a force de grosse artillerie quilz en abbatirent grande partie, & puis y firent de merueilleux assaultz. Et plus par miracle & diuine operation que par force humaine, attendu lexcessiue puissance quilz auoient, leur fut par les cheualiers crestiens resiste. De la se tirerent ces maudiz Turcs a Otrante; la assiegerent & par force la prindrent d'assault, & la mirent a mort cruelle les crestiens; & larceuesque du lieu seyerent dune seye de fer atrauers le corps, lequel arceuesque mieulx ayma souffrir celle mort que renoncer a la foy de Iesus Crist.

**E**N celle annee, a cause des excessiues gellees qui liuer precedant furent, ne creut gueres

## Le quatriesme

de vins, & ce quil en eut furent si tresuers que merueilles. Et si y eut tresgrande cherte de blez par tout le royaume de France, & mesmement es pais de Lymosin, Auuergne, Bourbonnoys, Normandie, le Maine, Aniou, & aussi en la France & Brie & Champagne, & es dessusditz pais de Auuergne, Bourbonnoys & Lymosin, moururent de faim plusieurs personnes que lon trouuoit mors par les champs & sur les chemins piteusement.

**T**OUTESFOIZ, Dieu preserua le pays de Bretagne de celle hostilite, car il y auoit lors en Bretagne force fromens, segles, auoines & autres blez, plus quil nen falloit pour le peuple du pays, tellement que aux marchez dAntrain, Combour & autres extremitez de Bretagne sur les frontieres, les habitans de Normandie, Aniou & le Maine, venoient a grant foule & multitude de cheualx acheter & enleuer les blez que lon exposoit en vente aux iours de marchie; a ceste cause fut le ble moult cher. Mais par laduis des gens du conseil du duc & soubz son auctorite furent faictes deffenses de non souffrir estranger enleuer ble quelconque hors du pays de Bretagne.

### De la prinse & emprisonnement de Guillaume Chauuin, chancelier de Bretagne.

**Q**UOR comme deuant iay recite, Pierre Landoys, tresorier de Bretagne, qui du duc faisoit tout ainsi quil vouloit, mist en son indignation tellement le chancelier Guillaume Chauuin, supposant quil auoit entendement au roy de France au preiudice du duc & de son pays, en maniere que le duc commanda au seigneur de la Clartiere le prendre au corps & constituer prisonnier, en vertu duquel commandement ledit seigneur de la Clartiere le print le v<sup>e</sup> iour doctobre lan mil cccc iiii vingtz & vng, & puis fut mis en prison a Nantes. Tantost apres que il eust par quelque temps este detenu, furent mandez gens de iustice, telz que le tresorier Landoys voulut eslire pour faire son proces, & y fut besoigne a

Nantes par aucun temps. Et fut institue chancelier par le moyen dudit tresorier vng nomme maistre Francois Cristien, qui lors estoit procureur dAulroy, homme simple & paisible. Et le cas a Chauuin bien examine, lon ne trouua pas en luy ce que on luy mettoit suz. A ceste cause fut le proces laisse la sans estre absoulz ne condamne, & fut mene a Aulroy, ou il fut detenu vne espace de temps, & dAulroy fut amene de nuyt le plus secretement que lon peut dedans le chasteau de lErmine a Venues, & pour le garder furent commis des gens dudit tresorier Landoys, lun nomme Iehan de Fontenailles & lautre Iehan de Vitre, lesquels faignoient garder quelque autre prisonnier. Et non contant le tresorier Landoys dauoir fait prendre & detenir ce chancelier Chauuin, il fist saisir & mettre en la main du duc tous ses biens, meubles & heritaiges, & mist par ce moyen la chanceliere sa femme & ses enfans en telle necessite quilz furent contrains de mandier & demander leur vie, & en cest estat tantost apres trespassa la bonne dame femme dudit Chauuin, car il ny auoit celuy, feust son parant ou autre, qui ayder leur eust ose pour la crainte dudit tresorier.

### De la mort du grant Turc & de la Venue de son filz en France.

**A**UDIT an iiii vingtz & vng, le iii<sup>e</sup> iour de May, Mahuit grant turc des Sarrazins qui par lespace de xxx ans auoit si cruellement persecute les crestiens, & lannee precedente acompaigne de deux cens mille combatans assiegea Rhodes, mourut miserablement tout ainsi que par sa miserable vie il auoit merite. Apres sa mort le peuple de Constantinoble fut diuise, les barons & nobles seigneurs dune part, & le populaire de lautre. Le peuple voulut auoir pour empeureur le filz ainsne du duc appelle Baiffet, lequel estoit lors absent de la cite. Les seigneurs & barons appetoient & desiroient le filz puisne nomme Zaliab; mais le populaire commun le porta, & fut Baiffet cree grant turc, & en attendant son retour ilz constituerent son filz

en son lieu iusques au xxv<sup>e</sup> iour de Iuing que Baiffet retourna & fist son entree a Constanti- noble. Ce pendant lautre filz Zaliab sefforsant destre grant turc & tenir lheritaige paternel, fist beaucoup de tours & alla en plusieurs lieux, print Prufce & autres pais d Asie, quil conuertit a sa cordelle. Finablement quant il vit & congneut quil ne profitoit en riens, mais perdoit son temps, il se vint rendre aux cheualiers de Rhodes, desquelz il fut chèrement receut soubz esperance quil se-debuoit conuertir a la foy. Et de la fut amene en France pour estre en plus grande seurete.

**C** Comment le duc de Bretagne, par sa liberalite, commanda la traicte des blez hors de son pays, contre l'opinion de son conseil.

**V**OUS auez veu cy deuant comment par le conseil du duc fut deffendu sur paine de la hart de non tirer hors de Bretagne blez quelzconques; toutesfoiz aucuns nobles hommes dentour la personne du duc impetroient aucunes foys de luy congie de traicte pour quelque nombre de sommes a cheual, mais le conseil scelloit enuis ces congiez de traicte, car lon veoit les pays denuiron affamez & auoit on paour que lon en tiraft hors de Bretagne telle quantite que les habitans du pays, par faulte de blez, tumbassent en la necessite & hostilite ou ilz veoient estre leurs voisins, & souuent en faisoient au duc la remonstrance; mais tousiours leur disoit le duc que plus il nen bailleroit. Ce nonobstant quelque mignon de la chambre du duc, qui bien estoit de ses familiers & estoit du pays dAniou, luy supplia quil luy pleust luy ottroyer pour son quartier dAniou la traicte de ble pour cent charges de cheual, ce que le duc octroya facilement, & en commanda les lettres, lesquelles portees au seau furent refusees. Et se retirerent ceulx du conseil par deuers le duc, & luy remonstrerent comment il auoit este delibere & conclud que plus lon ne scelleroit de telz congiez de traicte, & que plus le duc nen octroyeroit. Et quant ilz eurent au duc remonstre ce

que bon leur sembla, il se courrouca amere- ment a eulx, & leur dist : Dea, messeigneurs, alors que le roy deffendit sur paine de la hart a ceulx dAniou que ne laissassent descendre en ma duchie aucuns vins, les pources gens trouuoient bien moyen dy en faire venir, & auoient compassion & pitie de nostre soiff. Je vous commande que vous mandez de par moy en tous les lieux de ma duchie ou les marchez tiennent sur les frontieres, que lon en deliure aux pources estrangiers, ce mauuais temps ne leur durera pas tousiours, aussi bien que ilz nont pas attendu que nous ayons soif; ie ne veulx pas quilz meurent de fain. Et pour ce faictes leur en deliurer en chascun marche, iusques a la moitie du ble qui y fera; se tant en veulent auoir, le parfuz sera pour ceulx de ma duche, & pour ce ne men parlez plus, car ie veulx que ainsi soit.

**C** Des harnois que le duc enuoia acheter a Milan qui furent arrestez & prins en passant par Auvergne.

**E**N ladicte annee le duc de Bretagne enuoia acheter a Millan certain quantite de harnois, comme cuirasses, salades, & autres armeures qui furent enfardelez en fardeaulx de draps & autres marchandies fort enuelopez de coton, tellement que au remuer ces armures ne faisoient point de noise, lesquelz fardeaulx que lon portoit sur muletz, arriuerent aux montaignes trauerfans parmy le pays dAuvergne; ces fardeaulx icy furent descouuers par quelque mauuais garnement, en maniere que les commis de Doyat gouuerneur dAuvergne les prendrent & arresterent, les visiterent & en aduertirent le roy de France qui les donna a Doyat & a ses gens.

**C** La mort de la contesse de Flandres.

**L**AN mil cccc iiiixx & ii trespassa dame Marguerite de Bourgongne, contesse de Flandres, femme du duc dAustrie, fille du duc Charles de Bour-

## Le quatriesme

gongne, laquelle laissa deux enfans : Phelippe & Marguerite, lesquelz demourerent en la garde des Flamans.

### **C** Des fieures furieuses.

**F**icelle mesme annee courut en France vne autre piteuse pestilence, dont nostre Bretagne, graces a Dieu, ne fut point touchee. C'est que partout le royaume de France courut lors vne maladie de fieure enragee & furieuse, dont ceulx qui en estoient malades crioient & vroient, se precipitoient en puis & riuieres, & du hault des maisons en bas se iettoient & laissoient cheoir, & autant en estoit il des grans personaiges comme des petitz. De ceste piteuse maladie moururent en France pour gens de nom : les archeuesques de Narbonne & de Bourges, leuesque de Lisieux, messire Jehan Boulenger, premier president de Paris; messire Charles de Gaucourt gouverneur de Paris, maistre Nicolle Bataille, maistre Martin Magistri, docteur en theologie, & plusieurs autres nobles hommes, marchans & gens de tous estatz.

### **C** Le mariage de monseigneur le daulphin & de dame Marguerite de Flandres.

**A**u moys de Iuillet audit an mil cccc iiiix & deux, apres que les gens du roy eurent prins sur les Flamans la ville de Aire, lesditz Flamans prierent au roy quil voulsist avec eulx faire traicte de paix. Le roy y entendit volontiers, & furent en la ville d'Arras enuoiez de chascune part de notables personaiges, & finalement peruindrent a apointement enuiron deuers le moys de Nouuembre, par lequel entre autres choses fut traicte le mariage de monseigneur le daulphin & de madame Marguerite, fille du duc d'Autriche, & de sa feu femme, en faueur duquel mariage fut baille & accorde pour le partaige de ladicte damoiselle Marguerite les contes d'Artois & de Bourgongne, les terres & seigneuries de Masconnois, Aulferrois,

Salins, Bar sur Saine, & Noiers, pour en iouyr par elle & ses hoirs descendans delle perpetuellement; plusieurs autres articles y furent accordez, qui sont declairez es lettres du traicte, lequel fut par serment conferme par le roy, par les princes, euesques, vniuersitez, communitiez des citez & bonnes villes du royaume de France.

### **C** La mort du roy Edouart d'Angleterre.

**A**u moys d'Auril auant Pasques lan dessusdit iiiix & deux, le roy d'Angleterre fut frappe d'une appoplexie dont il mourut sans parler soudainement; aucuns disoient quil fut empoisonne.

### **C** Comment Madame Marguerite vint en France, & de la mort du roy de France Loys xi de ce nom.

**L**e samedi xix<sup>e</sup> iour d'Auril lan mil cccc iiiix & iii apres Pasques, monseigneur & madame de Beauieu, le seigneur d'Albret, le seigneur de saint Valier, madame l'Admiralle & plusieurs autres princes, seigneurs & dames passerent par Paris tirant a Hedin querir madame Marguerite de Flandres, que lon auoit accordee pour estre femme de monseigneur le daulphin par traicte de paix dentre le roy & les Flamans. Le second iour de Iung ensuiuant, ladicte dame Marguerite fist a Paris son entree; de la fut menee a Amboise, & au moys de Iuillet furent la faictes les solennelles festes & triumphes des nopces de monseigneur le daulphin & delle. Bien tost apres le roy Loys fut si tresmalade & si au bas, que lon esperoit en luy la mort de heure en heure. Le xxv<sup>e</sup> iour d'Aouust ensuiuant, il perdit la parolle par quelque temps & cuidoit on quil fust oultre, & en fut grant bruyt en plusieurs lieux; toutesfoiz la parolle luy reuint, beut & mengea tresbien, & vesquit iusques au samedi au soir xxx & penultime iour d'Aouust, quil rendit lame entre six & sept heures du soir. Incontinent fut son corps habandonne de

Le roy Loys est mort.

ceulx qui lauoient serui en sa vie. Puis apres fut porte enterrer en leglise de Clery, ou il auoit esleu sa sepulture, & la fut mis en telle sollennite quil appartient a roy. Il ordonna a sa fin le gouvernement de son filz pendant son ieune eage a madame de Beauieu, sa fille en son viuant luy regnant; il fist de son royaume a son plaisir comme possible luy fut, ainsi que chascun roy fait durant son regne, les vngs bien les autres mal, selon leurs particulieres fantasies & affections.

**L**E roy Loys laissa son filz moult ieune daage & des qualitez requises pour porter & soustenir le feix dun affaire comme du royaume de France. Par quoy estoit bien mestier auoir dautres directeurs pour son auctorite royalle guider & conduire la chose publique de France. Monseigneur le duc dOrleans, qui le plus prochain a succeder a la couronne estoit, si le nouveau roy trespassoit, estoit boute par le conte de Dunoys, homme de grande entreprinse, daspirer a ceste regence; monseigneur de Bourbon, qui estoit prince de grant aage, prudent & vertueux, y eust volentiers tendu, mais chascun celoit ce quil desiroit & pensoit en attendant le couronnement du ieune roy, pour auquel paruenir se disposerent ces seigneurs tout le temps de liuer & du carefme.

### **C** Comment le chancelier de Bretagne Guillaume Chauuin trespassa prisonnier au chasteau de Vennes.

**O**R auons icy a noter que au carefme dudit an xxxxiij, apres la mort du roy Loys qui trespassa le penultime iour du mois dAoust precedant, le parlement de Bretagne tenoit a Vennes, & ce pendant Iehan de Fontenailles & Iehan de Vitre qui le chancelier Guillaume Chauuin auoient en garde au chasteau de lErmine, furent contrains declairer & manifester quilz auoient la garde dudit chancelier, lequel ilz traicterent si tres inhumainement, tant par le laisser perir de fain que autrement, quil veioient sa mort approcher de heure en heure, & pour

leur descharge se retirerent par deuers la court, qui comme dit est lors feoit a Vennes, supplierent quil pleust a la court commettre aucuns des presidens ou conseillers dicelle pour eulx transporter au chasteau de lErmine veoir lestat ou estoit ledit chancelier. La court, apres deliberacion prinse sur leur requeste, leur respondit : Nichil ad curiam, car il ne leur apparoissoit quil fust prisonnier par auctorite de iustice, parquoy laffaire ne leur touchoit en riens. Et le lendemain, qui fut le v<sup>e</sup> iour dAuril auant Pasques, audit an iiiixx & iii, ledit chancelier trespassa en vne miserable pourete. Apres sa mort le corps de luy fut monstre a qui veoir le vouloit, & plusieurs qui lauoient veu en prosperite le descongnoissoient a sa mort, car il estoit tant descharne & mesgre que les os luy auoient perce la pel en plusieurs endroiz, par la fain & autres tirannies que endurer luy firent; sur le vespere diceluy iour il fut par quatre poures hommes porte en terre aux cordeliers de Vennes, & la gist : il estoit lors le lundi apres le premier dimanche de la passion.

### **C** Comment les barons de Bretagne entrerent par force au chasteau de Nantes au logis du duc pour cuider prandre le tresorier Landois, & enuoierent a la Pabotiere pour le cuider prandre.

**L**A piteuse mort de ce chancelier fut incontinant sceue par toute Bretagne. Et deplaisoit grandement a tous les nobles seigneurs du pays de ce que leur duc estoit ainsi boute de ce Pierre Landois son tresorier; car il auoit mis tel ordre autour de la personne du duc que prince, baron, homme de conseil ne autre, de quelque estat quil fust, ne parloit au duc sinon par le moien dudit tresorier. Le prince dOrange & le mareschal de Rieux estoient a Nantes lors que les nouvelles y vindrent de la mort du chancelier, & soudainement delibererent ensemble de prandre au corps le tresorier quelque part que il fust, & par iustice luy faire son proces, quelque gre que le duc en eust; au parauant ilz auoient bien eu ceste volante,

## Le quatriesme

mais ilz noferent entreprendre lexecution dun tel affaire iusques a ce quilz oyrent le grant murmure entre le peuple de la mort de ce chancelier que par hayne & vindication le tresorier Landoys auoit ainsi fait menger aux poux et mourir de fain en prison. Or aduint que le mercredy ensuiuant, qui fut le vii<sup>e</sup> iour d'Auril auant Pasques iiiixx & iii, fut entre ces barons icy conclud que le tresorier Landois seroit prins, & fust il entre les bras du duc, & que finablement on le luy osteroit; celuy iour apres disner, le tresorier Landoys, qui de ceste entreprinse ne fauoit riens, festoit retire avecques maistre Guillaume Gueguen lors arche-diacre de Nantes, qui estoit secretaire du duc & lun des plus familiers dudit tresorier, en la maison dudit Landoys appelee la Pabotiere, qui est hors a vne lieue pres de Nantes, contremont la riuiere, deliberez de y soupper & coucher, & faire grant chere. Le prince d'Orange & le mareschal de Rieux cuidoyent que le tresorier Landoys fust dedans le chasteau de Nantes avecques le duc, touteffoiz ilz nen estoient pas certains. A ceste cause firent deux entreprinse : lune dentrer dedans la chambre du duc a main armee, & lautre denuoyer partie de leurs gens a la Pabotiere, cuidans que par ce moien il ne fauldroient a le prandre & recouurer. Ces barons icy pour leurs entreprinse executer entrerent tresbien acompaignez dedans le chasteau de Nantes, & de plaine arriuee offerent les clefz aux portiers, fermerent les portes du chasteau, entrerent en la chambre du duc par force & violence, & en sa presence chercherent en la chambre en la garde robe & autres lieux, pour sauoir si le tresorier Landoys y estoit, mais ilz ne ly trouuerent pas. Le duc fut de ceste violente entreprinse si tresesmeu que merueilles, car ceulx qui dedans sa chambre cerchoient son tresorier parloient a luy autrement que nauoyent acoustume & que on ne deuoit parler a son prince & seigneur naturel. Quelque vng de la place faillit sur les murs du chastel deuers la ville, fescria a haulte voix : A la force, disant que les barons vouloyent outrager & prandre le duc; ceulx de la ville, officiers du duc, archiers de sa garde, & les

habitans de Nantes qui riens ne fauoient de ceste entreprinse se assemblerent enuiron le chasteau en tresgrant effroy, crians alerme. A la fosse de Nantes y auoit quelque nombre de baleniers & nauires du port du Croisic & autres parties de Bretagne, dont les equipages se tirerent en la ville, & de toutes pars fut ce chasteau assailly, tant par dehors que par dedans la ville, & furent plusieurs serpentines & autres grosses pieces dartillerie affustees deuant ce chasteau pour abatre portes, murs & tours; ceux qui dedans le chasteau estoient murèrent en diligence de grosses pierres qui estoient audit chasteau les portes & poternes diceluy, en maniere que on ny eust sceu entrer; ce bruit se efforçoit de heure en heure, tellement que ceulx qui le fait auoyent entrepris se trouuerent en necessite de leur corps dedans le chasteau, car personne de la place ne mettoit la teste aux creneaulx qui ne fust en danger de traict & destre affolle.

Le murmure du peuple.

**Q**UANT le prince d'Orange, le mareschal de Rieux & autres de leur bende qui dedans estoient enfermez virent ce bruit, pour plus feuement parlerent avec ceulx de la ville ilz menerent le duc sur les murs, le monstrerent au peuple & derriere luy se targeoyent de paour tout traict; finablement fut aduise que quelques gens entreroient dedans ce chasteau pour conclure lexpedient en cest affaire, & y entrerent Phelippe de Montauban & deux autres, lesquelz remonstrerent au prince d'Orange & ses aliez que force leur seroit de vider le pays, car le peuple estoit si tresesmeu, & de toutes contrees de Bretagne venoyent gens a Nantes en telle habondance que si tumboient entre les mains du peuple, ilz seroyent hachez en pieces & personne ne les fauroit garder. Et pour expediant affin de faire cesser la clameur de ces Bretons qui estoient defriglez comme sangliers chaffez & eschauffez, fut appointe que ceulx qui ainsi auoyent inuade & assailly le duc, & qui en telle austerite auoyent attente a sa personne & a son logis auroyent grace & remission, & par la riuiere tireroient contremont Loire a Ancenix & de la hors de Bretagne. Si furent expediees

Les barons entrent par force en la chambre du duc.

Les barons  
vuident le  
chasteau & ont  
grace du duc.

lettres en forme dabolicion que ces seigneurs emporterent, & du chasteau sortirent le lendemain, qui fut le ieu di deuant pasques fleuries, viii d'Auril iiiixx & trois.

Or ces seigneurs icy, comme iay dit deuant, auoient a toutes aduentures enuoie, alors quilz entrerent au chasteau de Nantes, partie de leurs gens en armes a la Pabotiere, ou le tresorier Landois estoit. Pour ce que la porte du logis estoit fermee, au moyen de quoy ces compaignons ne peurent entrer sans heurter, quelqun de la maison vint aduertir le tresorier qui a table estoit & souppoit, que a la porte de son logis y auoit xviii ou xx hommes armez a cheual qui vouloient entrer. Le tresorier eut paour, se leua de table, & par les iardins se sauua tellement que les dessusditz ne le peurent trouuer, & toute nuyt a beau pie seul ne cessa le tresorier de fuyr & de cheminer, iusques a ce quil eust trouue quelque paisant qui le matin le rendit au chasteau de Pouence en Aniou, appartenant au duc d'Alencon, & en ce chasteau refida le tresorier par quelque peu de temps. Tantost apres il aduertit le duc comme il festoit sain & saulue rendu a Pouence; tout incontinent le duc lenuoia querir venir par deuers luy a Nantes, ou il fut par le duc recueilly & en sa grace plus que deuant.

**C Du Voyage que les ducs d'Orleans & d'Alencon firent lors de Blois a Nantes par deuers le duc.**



TOUT aussitost que le tresorier Landois fut a Pouence, il enuoia en toute diligence aduertir le duc d'Orleans, qui cousin germain du duc de Bretagne estoit, de ceste fortune a luy aduenue. Le conte de Dunois qui homme de moult grande entreprinse estoit, & desloing preueoit aux affaires de consequence, incita le duc d'Orleans de tirer en diligence par deuers le duc de Bretagne, pour luy donner tout confort en ceste necessite ou ses barons lauoient mis. Et tendoit ledit de Dunois a paruenir au mariage diceluy duc d'Orleans & de madame Anne, ainsnee fille du duc, & par ce moyen estre duc de Bretagne. Et

tellement fut ceste entreprinse mise en auant, que le iour de Pasques lan mil cccc iiiixx & iiiii le duc d'Orleans & le duc d'Alencon partirent de Bloys a petite compaignie, tirerent a Nantes en diligence, et la trouuerent le duc qui moult bien les festoia, & leur remonstra loutrage que le prince d'Orange son nepueu, le mareschal de Rieux & autres leurs complices luy auoient fait, lesquelz estoient fuitifz au pays d'Aniou, & les pria le duc que par bon & vroy effect ilz donnoient a congnoistre que ce fait leur desplaisoit. Et pour quelque feblesse que le duc auoit eu, il nauoit plus lors lentendement si constant ne si discret que il auoit eu. Ces seigneurs d'Orleans & d'Alencon noserent pas de prime face entreprendre den venger le duc pour les mutations ou les affaires du royaume estoient au moyen du trespas du roy Loys iusques a ce que lon eust ordonne du couronnement du ieune roy & de ceulx a qui par les estatz de France la regence du royaume pendant la ieune aage du roy seroit depute, mais par apres ilz promirent ayder au duc en ce que possible leur seroit. Ce pendant que ces seigneurs estoient a Nantes, furent faiz les preparatifz pour aller couronner le nouveau roy a Rains. A ceste cause les ducz d'Orleans & d'Alencon partirent incontinent de Nantes & tirerent a Tours, de la a Amboise & a Bloys pour eulx disposer destre a ce couronnement. Et pour cause de quelque differend qui fut en danger de s'esmouoir entre les ducz d'Orleans & de Bourbon sur le gouuernement du roy iusques a ce quil fust en aage, fut le voyage de son couronnement quelque peu retarde, mais cela ne dura gueres; & bien tost apres partirent pour aller a Rains couronner le roy. Durant ce temps se tenoient au pays d'Aniou le prince d'Orange, la dame de Lual, le seigneur de Rieux & autres leurs complices, qui fugitifz estoient du pays de Bretagne pour les cas dessus recitez. Messire Poncet de Riuiere & le seigneur d'Urfe, qui en Bretagne festoient retirez a refuge par deuers le duc, pour la crainte du roy Loys, se rendirent pour ce couronnement a Rains, furent recueilliz grandement, & fut fait le seigneur d'Urfe grant escuier de France, &

Orleans &  
Alencon tirent  
a Nantes.

Poncet de  
Riuiere & le  
seigneur  
d'Urfe.

## Le quatriesme

messire Poncet maire de Bourdeaux. Et la furent faiz amys les ducs d'Orleans & de Bourbon.

### ¶ L'entree du roy Charles viii a Paris & comment les estatz furent tenus a Tours.

**T**ANTOST apres que le roy de France Charles viii<sup>e</sup> de nom fut couronne, il se retira a Paris, ou il fist son entree en grande triumphe, a laquelle furent les ducs d'Orleans, d'Alencon & de Bourbon, Monseigneur de Beauieu & madame sa femme, seur du roy, & plusieurs autres princes & seigneurs du royaume. Et pour discuter du differend dentre ces princes touchant le gouvernement du royaume pendant la ieune aage du roy, furent les estatz assignez tenir a Tours.

**L**E duc de Bourbon, qui moult ayroit le duc de Bretagne, desiroit grandement quil fust a ces estatz; toutefois le tresorier Landoy, qui lors estoit retourne par deuers le duc en credit et auctorite mieulx que deuant, empescha que le duc son maistre ny allast, dont le duc d'Orleans & le duc de Bourbon, qui ia estoient reconciliez ensemble, furent desplaisans, car ilz tenoient vne bende a part pour auoir ceste regence. Et monseigneur de Beauieu & madame sa femme tendoient au contraire; toutefois le tresorier Landoy, qui congnoissoit comment le duc son maistre estoit ia feble de sa personne, & encores plus de son entendement, tellement quil ny auoit propos quelzconques en son parler, a ceste cause ne voulut conseiller quil allast aux estatz, & le faisoit tenir en chambre sans ce que personne parlast a luy, fors ceulx qui seruoient autour de sa personne. Et Landoy dispoit des affaires de Bretagne au nom du duc a son plaisir.

**O**R furent a Tours tenus les estatz lan desusdit mil cccc iiiixx & iiii, esquelz comparurent gens de toutes les parties du royaume. La furent brigues merueilleuses touchant ceste regence, & en conclusion fut ordonne quil ny auroit point de regent en France, mais pour ce

que le roy estoit lors moult ieune, comme de laage de xii a xiii ans, fut aduise en ensuyuant l'ordonnance du feu roy son pere, que madame de Beauieu auroit le gouvernement de la personne du ieune roy son frere, & telle fut la conclusion des estatz. Le duc de Bourbon y fut fait conestable, & plusieurs autres profitables ordonnances y furent deliberez pour le fait des finances, & aussi du demaine & autres affaires du royaume.

**L**E duc d'Orleans fut tresmalcontent, aussi plusieurs autres princes & seigneurs, de ce que la personne du ieune roy auoit este par les estatz ordonnee a Madame de Beauieu. Et se delibera le duc d'Orleans, comme estant lors la seconde personne du royaume, dentendre & auoir loeil tout ce neantmoins aux vrgens affaires du royaume, & pour ce faire residoit a Paris, assistoit au conseil de la court de parlement & de lostel de la ville ordinairement comme celuy qui vouloit congnoistre & entendre tout ce que lon y faisoit, & en ceste maniere se gouerna par quelque temps, dont madame de Beauieu nestoit gueres contante.

**O**R pour retourner a noz barons de Bretagne qui sont fuitifz hors du pays, la verite est telle que apres quilz eurent congnoissance que madame de Beauieu auoit la personne du roy en garde, & que a celle cause tous autres personnaiges destat & de renom luy clineroient le genoil, ilz se tirerent par deuers elle, & luy offrirent tout seruice, en quoy elle trouua grant goust, & leur promist leur estre en ayde & y employer le roy sans toutefois en faire quelconque expresse declaration fors en termes generalx. Et de ce quilz sestoient adressez a elle, fut le duc d'Orleans tresmal content deulx.

### ¶ Comment les maisons & bois de ceulx qui ont suyui les barons furent abatus.

**L**E duc de Bretagne par linduction de son tresorier Landoy assemblea des gens de conseil de toutes pars, & entre autres fist venir des Ytalles vng